

# बाइदिमैयानि आसाम



गेजेरारि सोल्लोथाइ बिफान, आसाम सरकार

# बाइदिमैयानि आसाम

( गोख्रै फरा बिजाब : गु आरो जि थाखोनि थाखाय )



थियारि खालामग्रा : आसाम गेजेरारि सोल्लोथाइ गुथुम  
फोसावग्रा : आसाम हादरसायारि फरायबिजाब दिहुनग्रा आरो फोसावग्रा निगम लिमिटेड  
गेजेरारि सोल्लोथाइ बिफान, आसाम सरकार

# बाइदिमैयानि आसाम

( गोख्रै फरायबिजाब : गु आरो जि थाखोनि थाखाय )

राव सोलायगिरि : बालिराम बसुमतारी  
मधुम'हन लाहारी

थियारि खालामग्रा : आसाम गेजेरारि सोल्लोथाइ गुथुम

फोसावग्रा : आसाम हादरसायारि फरायबिजाब दिहुनग्रा आरो फोसावग्रा निगम  
लिमिटेड, गुवाहाटी

**Baidimwiyani Asam:** A textbook in Bodo Rapid Reader for Classes- IX & X prepared and approved by the Board of Secondary Education, Assam and published by the Assam State Textbook Production and Publication Corporation Limited, on behalf of Govt. of Assam.

## **FREE TEXT BOOK**

---

**All rights reserved :** No reproduction in any form of this book, in whole or in part (except for brief quotation in critical articles or reviews), may be made without written authorization from the publisher.

© : The Assam State Textbook Production and  
Publication Corporation Limited, Guwahati

गिबि फोसावनाय : 2018  
नैथि फोसावनाय : 2019  
शामथि फोसावनाय : 2020

: 70 GSM खाखोराव सेबखांजानाय फरायबिजाब ।

आसाम सरकारजों बेसेन लायालासे राननानै होनो  
थाखाय दिहुननाय फरायबिजाब ।

फोसावग्रा : आसाम हादरसायारि फरायबिजाब दिहुनग्रा  
आरो फोसावग्रा निगम लिमिटेड, गुवाहाटी

साफायग्रा : रियेल फिना  
वेलतला, गुवाहाटी- 28

## गुदि बाथा

असमीया समाज आरो हारिमुवा गुबुन गुबुन सुबुंफोलेरनि गोरोबलायनायनि गेजेरजों जाखांदों। आसाम आरो सा-सानजा भारताव थानाय सुबुंफोलेरफोरा गुबुन गुबुन समाव गुबुन गुबुन लामाजों बे ओन्सोलाव हाबफैदोंमोन। फाथाल फाथाल फैनाय बे सुबुंफोरनि गेजेराव राव, हारिमु, गाननाय-जोमनाय, जानाय-लौनाय आरिनि खायसे फारागथि दंब्लाबो गुबैयै बेनो उन समाव गेदेर असमीया माहारिखौ दादों। असमीया माहारि दानायनि जारिमिना बेनिखायनो गाबगोनां आरो गोजाम। बेनि अनगायैबो आसामाव मुगानि उनाव मुगा हमनानै थाबोनाय मोनफ्रोमबो सुबुंफोलेरनि माखासे गेदेमा सुबुंफोरनि बे गेदेर असमीया माहारि दानायव बिहोमा दं। आसामनि बे गोजाम सुबुं फोलेरनि आरो बै सुबुं फोलेरनि गेदेमा सुबुंफोरजों फरायसाफोरखौ सिनायथि खालामना होनाया बे गोख्रै फरा बिजाबनि गाहाइ थांखि। सुबुं फोलेरफोरनि मोसानाय, दामनाय-देनायखौ बिजिनो थाडालासिनो सुबुं फोलेरफोलेरनि हारिमुवारि, समाजारि थासारि सायाव सावरायनो नाजानाय जादों। गोजौ फरायसालिनि थाखो गु आरो जि थाखोनि सोलोंसाफोरनि थाखाय सुबुंफोलेरनि सिनायथि आरो बिहोमानि सोमोन्दै मिथिनो हानाय बादियै थियारि खालामनाय बे फराय बिजाबाव फरायसाफोरनि गोसोआरि आजावनो हानाय गोहोखौ नोजोर लाखिनानै सुबुं फोलेरफोरनि गेदेर बाखिनिफ्राय खायसे सुबुंफोलेरनि सोमोन्दैल' सुंदयै सरजाबना होनाय जादों। बेनि अनगायैबो असमीया हारिमायारि खौसेथि आरो गोरोबलायनायखौ फीथांनो लाखिनायनि बेलायाव जर'खायै तिहोमा होनाय लक्ष्मीनाथ बेजबरूवा, ज्यतिप्रसाद आगरवाला, पार्वती प्रसाद बरूवा, डं भुपेन हाजरिकामोनखौ लाफानानै माखासे गेदेमा सुबुंफोरनि जिउखौरांखौ बे गोरब्रै फराय बिजाबाव सरजाबूनाय जायाखै।

मिजिं थिदों 'बाइदिमैयानि आसाम' मुडै गिबि खेबनि थाखाय सुजुनानै दिहुननाय बे गोख्रै फराय बिजाबखौ मडेल महैरै लानानै मिथिनो लुबैनाय फरायसाफोरा इयुनाव सुबुं फोलेरनि आरिमु-हारिमुनि दिन्थि, गोसो बोनो हाथाव सुजुथाइ आरि फरायनायनि लामाखौ मोनगोन। बे बिजाबनि गुबुन गुबुन लिरगिरिफोरनि लिरसुंथायाव गासैबो खारिया जानो हागौ सरजाबजायाखै थेवबो फरायसाफोरा सुबुं फोलेरफोरनि सोमोन्दै सुंद' गियान आरजिना लानो हानाय बादियै लिरबिदांफोरखौ सुजुनाय जादों।

सेथि फोसाबनाय सेबखानायाव मिथिस्लाबाजासे थालानाय गोरोन्थिफोरखौ फरायसा, फोरोंगिरि समाजा आसि दिन्थिनानै होयोब्ला इयुनाव फराय बिजाबखौ आरोबाव समायनासिन महराव फोसावनो हागोन। जोबनायाव आसाम माध्यमिक शिक्षा परिषदनि मानगोनां आफादगिरि आर. चि. जैन सारनि मावथांखि आरो सामलायनायाव थियारि खालामनाय बे फरायबिजाबखौ थियारि खालामनायजों लोबबा थानाय लिरबिदां, रायथाइ लिरगिरिफोर गुबुन गुबुन थुनलाइ आफादनि फुंखा सुबुंफोर आरो लोबबा थानाय सोलोंथाइयारि मावख 'गोराफोरनिसिम गोसो गोरबोनो साबायखर बाउनाय जाबाय।

बामुणीमैदाम, गुवाहाटी

नरनारायण नाथ, ए.सि.एस.

नेहाथारि,

आसाम गेजेरारि सोलोंथाइ गुथुम, गुवाहाटी-21





## बेखेवथि

सा-सानजा हालामा हरियारि, सुबुं-हान्जायारि फरायसंनायनि थाखाय दोहोननि बाख्रि । सुबुं-सान्थौ आरो समाज बिगियाननि बादियैब्ला जनजातिनि ओंथिया गुवार । नाथाय राजखान्थियारि नोजोरबिथिंजों 'जनजाति' सोदोबनि ओंथिया गुसेब । थार ओंथियाव, जनजाति आरो हरिनि गुदि फारागथिफोरा गोबां बिथिडाव गोब्राब । बेनि थाखायनो सा-सानजा हालामाव जोबनोगोयै हारि माहारिनि फरायसंनाय दसिमबो जायाखै । हारि माहारियारि फरायसंनायनि लामा दिन्थिगिरि महरै इराजफोरखौ मुंख 'जायो । इराजफोरा सा-सानजा हालामनि माहारिफोरनि बागै लिरनानै गालानाय बिजाबफोरा उननि समाव जायगानि संजिरगिरिफोरनि फुंखा जाना फैदोंमोन ।

आसामनि गुबुन गुबुन जायगायाव रायजो जाना थानाय, कार्बि, मिसिं, गार', सावथाल, नागा, टाइ रोदानि गुबुन गुबुन जनजातिफोरजों लोगोसे गरिया-मरिया देशी मुसलमानफोर आरो बायदि बायदि हारि-माहारि जनजातिनि थुबिल बादि । नाथाय मिरु सोरखार आरो रायजो सोरखारनि बायदिसिना मावफारिनि गेजेरजों हारि माहारिनि सायाव फरायसंनाय, बिजिरसंनायनि खाबु खालामना होदोंब्लाबो, फरायसंनायनि गेजेरजों गोरोबलायनाय आरो गावजों गाव बुजिलायनाय मोजां फिथाइ मोनदों होनना जों बुंनो हाया ।

जोंनि हादरा उदांसि मोननाया स्नि जिथाय बारलांबाय । बे बिथिडाव जोंनि नसुंसेयारि एबा मोदोमनि सायखंबादि थानाय जनजातिफोरखौ, गोथौवै बुजिनाय एबा बिसोरनि सायाव थोजासे फरायसंनाय, बिजिरसंनाय जादों होनना बुंनो हाया । बेनि अनगायैबो सिगांनि थाखानाय अनलायनाय-गोरोबलायनाय बोन्दोंआ गोबां बिबांयै गुरुंसो जाबाय । दिनै आसामनि गोबां बिबांनि माहारिफोरा राजखान्थियारि, रांखान्थियारि-समाजारि जाहोनाव, उदां जाबाय एबा जानो नागिरदों । नाथाय बेनि उनावबो, हारि-माहारिफोरनि जौगानाय, दावगानायनि सावगारिखौ जों नुनो मोनाखै । हरियारि दाडाबाजि, रावआरि दाडाबाजि आरो थामोनथा लाखिलायनायनि दावहा, असमीया समाज जिउनि गेदेर गावसुफुंथिया जाबादि खहा खालामदों बै बादि हारि-माहारिफोरनि समाजाबो गोबां उनफिनना दड । असमीया रावखौ नाजावनाय एबा नाजावैखौ लानानैबो हारि-माहारिफोरनि गोसो सिडाव हेंथा-हेंथि फैदों ।

इयाण्डाबु गोरोबथानि उनाव, इराजफोरा आसामनि हारि-माहारिखौ खौसे खालामना खुंनाय राहानि थाखायनो जा एबा गुमुर संनो लुबैनायनि थाखायनो जा फरायसंनो जागायजेनदोंमोन । नर्थ इष्ट फ्रन्टियारि एजेन्सिनि (NEFA) गेजेरनि, दानि सा-सानजा हालामा बिसोरनि संजिरनायनि आयदा जानानै फैदोंमोन । गोदान आदबजों जिउ खानायनि इसेबो सोरां मोनै बे मिथिंगानि फिसाफोरनि जिउनि फारसे गोसो बोगथाबजानानै जायफोर बिजाब एबा सुजुथाइ बिसोर फोसावदोंमोन, उननि समाव बेफोरनो जनजातिफोरखौ फरायसंनायनि गुदि फुंखा जाना फैदोंमोन । पि. टि. गर्डन, ए. सि. हाडसन, सिडनी एण्डेल, हेइमेनडर्फ, डब्लिउ रबिनसन, जे.भि. निउभिल, इ.टि. डेलटन, एडवार्ड गेइट मोनबादि संजिरगिरिफोरनि बिहोमाया हारि-माहारिफोरनि जिउ खानाय, सुबुं फोथायथि, नेमखान्थि समाजारि जिउखौ सुबुंनि नोजोराव बेखेवना होनो हाबाय । जों बे लिरथाइयाव सानैसो संजिरगिरिफोरनि मुंखौल' बुंथिदों । बे बिथिडाव भारत अनसुला माहारियारि

संजिरगिरि भेरियार एलउइन, जारिमिनगिरि गेइट आरो दासान्दि आसामनि असे फिसाबादि जानाय प्छिफेन मुरे मोननि बिहोमाया बे बेलायाव अराय गोसोखांथाव । अष्ट्रेलियानि नोगोरारि प्छिफेन मुरेनि नैजि-नैजिसे जौथाइनि फरायसनायनि गोसोखौ दाबो भारतारी रोदानि संजिरगिरिया फेजेननो हायाखै । डेसमण्ड मरिछ, पितार माछ बादि जायगा लाना जायगा फरायसनायनि संजिरगिरिफोराबो बे बिथिडाव मुंख 'जाथाव । तिब्बत आरो ब्रह्मदेशनि सिमा थि खालामनानै सा-सानजानि गुबुन गुबुन जायगायाव रायजो जाना थानाय हारि-माहारियारि जिउखौ लाना मुंख 'जाथाव फरायसनायाव बाहागो लानाय पीटार भेन हाम, आग्लाजा प्छिननि बिहोमायाबो मुंख 'जाथाव ।

रिजायनानै नायोब्ला, गोदोनि बैसोर संजिरगिरिफोरनिखुइ जौनि हादरारि हारि माहारिनि फरायसनाया जरखायै दावगादों होनना जों बुंनो हाया । नाथाय गनायाब्लानो थानो हाया, मोनफ्रोम हारि माहारिनि सोमोन्दै बिजाबनि अन्जिमाया बांदों । गोदान मुलुगजों सोमोन्दो लाखिनाय आरो सोल्लोंथाय गोसारनाया, मोनफ्रोम हारिनि गेजेरनिफ्राय फसंथानारि सोल्लोंथाइजों गोरों गोरानि अन्जिमाया फारियै बांबोनायाव मदद जादों । गाव माहारिनि बागै बैसोर गोरोंगोरा सुबुंआ बिजाब फोसावनानै जरखा बिहोमा होदों । जानो हागौ असमीया थुनलाइनि ज 'नाकी मुगायाव, रत्नेश्वर महन्तआनो गिबियै आसामनि हारि माहारिनि सायाव फरायसनायनि लामाखौ एवम्रांजेनो । 'गार' बृत्तान्त ' मुनि सोल्लोंथाइजों लोब्बा थानाय लिस्थाइनि जोहै, रत्नेश्वर महन्त बिथाडा जनजातियारि जिउनि गामियारि खान्थिनि ओंथि गोनां, नोजोरबिथिंखौ सरजाबदोंमोन । हेरम्बकान्त बरपुजारी, एस. एन. बरकाकती, सत्येन्द्र नारायण ग 'स्वामी, ड° उपेन राभा हाकासाम, शरत कुमार फुकन, ड° भुवन म 'हन दास आरि गोबां जारिमिनगिरि, संजिरगिरिया माहारियारि आयदानि बिजाबजों मुंख 'जाथाव बिहोमा होदों । ड° नगेन शइकीया बिथाडा 'असमीया मानुहर इतिहास' नि जोहै बे बिथिडाव गियाननि अस्थायखौ बांहोदों । नाथाय जोंहा सानखानाय फैयो, जेब्लासिम सोल्लोंसालि थाखोयाव, फरायसाफोरा आसामनि हारि-माहारिनि बागै थि गियान मोना, असमीया समाज जिउआव हारि-माहारिनि गेदेर बिहोमानि बागै मिथिया, अब्लासिम जौनि जानोहाथाव मानहोलायनाय, हेंथा गैयाजासे मदद होलायनाय गोसो सानस्त्रिया रोदोमफैनाय नडा । हारि माहारिजों लाखिनो गोनां गावजोंगाव बुजिलायनायनि खाम्फा गायसनायनि सोल्लोंथाइया फरायसालिनिफ्रायनो जुरिजेननाया गोनांथार । बे बाथ्राखौ सानदंनानै आसाम गेजेरारि सोल्लोंथाइ गुथुमा गुबुन गुबुन हारि माहारिनि थारसावरायनाय आरो हारि-माहारिनि दागिरि सुबुंफोरनि जिउखौरांफोरखौ दाजाबदेरनानै गोख्रैफरा बिजाब साफायना दिहुननो थिरांथा लायो । बे नाजानायखौ समजों गोरोबनाय साबद्राय बिथांखि होनना साननाय जादों । फरायसालिजों लोब्बा गोनां महरै, हारि माहारिफोरजों सिनायज्जलायनायनि ओंथियानो जाबाय, मोनसे गोरबोनां दौलेंनि जुरिजेननाय ।

बे बिजाबाव थारैनो आरो गोबां मुंदांखा सुबुंफोरनि जिउखौरां सरजाबनो हानाय जायाखिसै । उनाव बेफोरखौ एफा-एनै सोलायनायनि खाबु दं । गिबि नाजानायजों जागायजेननाय बे गोख्रै फरा बिजाबखौ गु आरो जि थाखोनि फरायसाफोरा, गोदान थाखोनि फरायसाफोरा, गोदानथिनि गुमुर मोनगोन होनना जों फोथायो । गुवार असमीया हारिखौ बुजिनोब्ला, बेफोर बादि बिजाबानो गिबियाव गोनांथार जाना फैयो । बे गोख्रै फरा बिजाबनि थाखाय आसाम गेजेरारि सोल्लोंथाइ गुथुमनि आफादगिरि रमेश जैन बिथांनि नाजानाया बाखनायथाव । हादरनि भुमखौरां आरो जारिमिननि नेरसोनथिफोरा गोरलै बैसोआव गोथौ रेगा खोख्लैयो । बे बिथिडाव बे गोख्रै फराबिजाबा मोनसे गोनांथार बिफाव लागोन ।



अनुराधा शर्मा पुजारी

## नायखां बिलाइ

गु थाखोनि थाखाय		
आयदा	बुथुमगिरि	बिलाइ
गुदिलाइ फरा	नब कुमार डेकाबरुवा	1
आह 'मफोर	टाइ पूर्वाचल साहित्य सभा	8
काछारनि सुबुं हान्जाफोर	ड° अमलेन्दु भट्टाचार्य	22
कारबिफोर	कारबि साहित्य सभा	27
क 'च राजबंशीफोर	क 'च राजबंशी साहित्य सभा	31
गरिया-मरिया आरो मुसलमानफोर (देशी)	सदौ असम-गरिया मरिया देशी जातीय परिषद	38
गार 'फोर	गार ' साहित्य सभा	43
सावथालफोर	साउताली राव आरो थुनलाइ बिजिरसं मिरु	49
साहा बागानीया सुबुं हान्जा	सुशील कुर्मी, असम साहित्य सभा	55
चुतीयाफोर	ड° माणिक शङ्कीया	59
ठेंगाल कछारीफोर	सदौ असम ठेंगाल कछारी संगठन	64
डिमासाफोर	नव कुमार डेका बरुवा	72
कलिताफोर	कलिता जनग 'ष्ठी सन्मिलन	74
जि थाखोनि थाखाय		
तिवाफोर	तिवा साहित्य सभा	80
देउरीफोर	देउरी साहित्य सभा	86
नेपाली रावारि ग 'खाफोर	असम नेपाली साहित्य सभा	93
बर 'फोर	बर ' थुनलाइ आफाद	99
मटकफोर	सदौ असम मटक सन्मिलन	107
मरणफोर	मरण साहित्य सभा	113
मिचिंफोर	मिचिं साहित्य सभा	122
मणिपुरीफोर	असम मणिपुरी साहित्य परिषद	132
राभाफोर	निखिल राभा साहित्य सभा	140
स 'न 'वाल कछारीफोर	स 'न 'वाल कछारी साहित्य सभा	147
हाजंफोर	हाजं साहित्य सभा	157
नाथ य 'गीफोर	नाथय 'गी सन्मिलनी, असम	162
आदिबासीफोर	आदिबासी साहित्य सभा	165



## बाइदिमैयानि आसाम गुदिलाइ फरा

बुरलुंबुथुर आरो बराकनि फैलाव फारनैथिंबो बायदि भुमखौराडारि ओन्सोलफोराव थानाय हाजो-हायेन, दंग जाम्फै, दैसा, हाग्रा-बंग्राजों बुंफबनाय आसामा गंसे बायदिमैयानि हादरसा। बे बायदिमैया भुमखौराडारि थाथायाव गुबुन गुबुन रावारि, बायदि हारिमुनि, गुबुन गुबुन हारि जनजातिनि थाखुलि। बे सुबुं माहारिफोरा गुबुन गुबुन राव आरो गुबुन गुबुन सिनायथिजों गोरोबलायिनि गेजेशवबो असमीया महरै खौसे सोमजिहोनानै बेसेबांबा सिगांनिफ्रायनो थाबोदों आरो गोदानै हाबफैखननायफोरखौबो बरायना लादों। बेफोरबादि असमीयानि माखासे सुबुं माहारिनि सुंद' सिनायथिखौ फरायसाफोरखौ मिथिहोनो थाखाय गाहायाव होनाय जाबाय।

**कैबर्त्त** : कैबर्त्तफोरा जोबोर अनसुला आरो आलासि सिबिग्रा हारि। हायेन आसामनि कैबर्त्तफोरा गावसोरखौनो नमसुद्र होननानै सिनायथि होनाय नुनो मोनो। कैबर्त्तफोरखौ जालिया शालै होननानैबो मिथिनो मोनो।

**बणिया** : बणिया हारिया भारतनि गासै राज्योआवनो गोसारना दं। बे बणियाफोरनि मोनसे फिसा बाहागोआ जारिमिननि बबेबा मोनसे समाव आसामाव फैदोंमोन आरो थै-मोदोमै असमीया जायो। बणिया हारिया बुंनो थांब्ला बैष्यफोरनिनो मोनसे बाहागो, स'णारि बैष्यनि बाहागो बादि आरो गोबाडानो बणिक्य, दास आरि बिमुं लिरनाय नुनो मोनो।

**हीरा** : हीराफोरा हानि दो, आलारि साथि, धुना होग्रा आइजें बानायग्रा हारि। हीराफोरा आसामनि असमीया राव बुंग्रा फारियाव थिसनजायि हारि। हीराफोरा हानि आइजें बानायनायनि थाखाय कुमार चाक एबा सोरखिनि मदद लायो। खर'सा आसामनि हीरा हारिनि माखासे मानसिफोरा स'ना दानाय खामानि मावो।

**सुत**: सुंबुंनि खुगा खुगा सोलिबोनाय बादिब्ला सुतफोरा क्षत्रिय हौवा आरो ब्राह्मन हिन्जावसाखौ हाबा खालामनायनि जाउनाव सोमजिनाय हारि। गिबियाव मनु स्वयम्भनि देरसिन फिसाज्ला प्रियब्रतआ सास्त्रबादियै गिबिसिन क्षत्रिय। बिथांनि फोलेरनि उनमोनगिरि फिसाज्लाया शुक्राचार्यनि ब्राह्मन फिसाज्ला

देवजानीखौ हाबा खालामदोंमोन। बै समनि समाजारि नेम खान्थि बादियै बे गुबुन बोरोननि हाबा लानाय बादियै जोनोम जानाय जजाति आरो देवजानीनि फिसाफोरा सुत हारिनि होनना मिथि जादोंमोन। सुतफोरनि बाहागोसेनि आखा-फाखा बीर जोहोलावनि रथ सामलायग्रा महरै गोजाम मुगायावनो आसामाव हाबफैदोंमोन आरो असमीयानि गाहाइ आखुजों गोरोंबफानानै गुबै असमीया जानायसै।

**हालै :** आसाम सरकारनि गुबुन गुबुन उन गोग्लैसोनाय थाखोनि सुबुंहान्जानि खारियाव हालै मुंनि मोनसे सुबुंहारि दं। हालैफोरा केउटफोरनिनो बाहागोसे आरो हालै, मालि आरो जालै मुंनि मोनथाम सिनायथिजों मिथिजायो। हालै सोदोबा हालुवा एबा आबादारिखौ बुजायो। हालैफोरा फुजा, सारादु आरिखौ बैष्णब खान्थिजों खुडो। थैनाय मानसिखौ चितायाव अर होनानै सावनाय जायो। हालैफोरा असमीया रावारिनि गुबै असमीया। मालि हालैफोरा गुबैयै बिबार एबा बागाननि आबादारि।

**बकलियाल :** कछारी सिनायथिनि मोनसे जोबोद फिसासिन जनजातिया जादों बकलियालफोर। बकलियालफोर गोबाडानो गावसोरखौ स'न'वालनि मोनसे बाहागो महरै सिनायथि होयोब्लाबो बकलियालफोर आथिखालाव मोनसे आलादा सिनायथिगोनां जनजाति। बकलियालफोर स'न'वाफोर बादि सम्रा-समब्रि जनजाति। बकलियाल जनजातिफोरा जोबोर फिसा आरो नै रोजा बाजौसो नखरनि मोनसे असमीया राव बुंग्रा जनजाति।

**मेच कछारी :** मेच कछारी जनजातिया आसामनि गेदेर कछारीफोरनि मोनसे फिसा बाहागो। आथिखालनि नागालेण्ड राज्योनि डिमापुर आरो साखाथि फाखाथि ओन्सोलफोरा मेच कछारीफोरनि थानाय जायगामोन। आथिखालाव मेचफोरा असमीयाफोरजों गोरोंबलांनाय मोनसे जनजाति।

**शरणीया कछारी :** शरणीया कछारीफोरा आसामनि मोनसे मुंख'जाथाव थागिबि माहारि आरो गुबैयै अदालगुरि, बाक्सा, कामरूप आरि जिलानि थागिबि। 'शण्या कछारी'खौ असमीया सल'रावै शरणीया कछारी होनना बुंनाय जायो आरो बे मुडैनो शरणीया कछारीफोरा सिनायजानाय, शंकरदेब आरो माधबदेबनि गेजेरजों फोसावजानाय नबबैष्णबबाद आरो सोमावसारनायनि जाउनाव माखासे अनजिमानि शरणीया कछारी सुबुडा दोहोरोंम बारस्लायनानै बैष्णब दोहोरोंम आरो सनातन दोहोरोंम लादोंमोनब्लाबो बिसोर गावनि हारिमुजों आथिखालाव मोनसे आलादा सुबुं माहारि।

**मदाहीफोर :** खुगा खुगा सोलिबोनाय बादियैब्ला नेपालनि मदाइ दैमानि सेरफाडाव थानाय गुबै किराट कछारी फोलेरनि मोनसे सुबुंहारिया जादों मदाहीफोर। मदाहीफोरखौ मदाही, रय, डेका, बायदि बायदि बिमुं लिस्नाय नुनो मोनो आरो गावसोरखौनो मदाही कछारी महरै सिनायथि होयो। सिगांनि खारि बादियै मदाहीफोरनि सुबुं अनजिमाया बा लाखफ्राम आरो बि.टि.ए.डि. हालामनि नैथि गेदेर जनजाति।

**रियां :** आसामनि जारखुंथाइ कार्बिआंलं, बराक सेरफां आरो डिमा हासाव जिलायाव थानाय रियांफोरा डिमासाफोरनिनो मोनसे फोलेर।

**रेंमा :** कार्बिआंलं जारखुंथाइ जिलानि हाजोआरि फारियाव थिसनजायि जनजातिफोरनि गेजेराव रेंमाफोराबो मख'नो गोनां। रेंमाफोरा गेदेर नागा टियेनियेमा फोलेरनि आंगामि, चाकाचां, जेलियारं, माव, टिउमाइ आरि जनजातियारि सुबुंहारिनि बिफं जनजाति। सोलिबाय थानाय नागा सोदोबा बबेबा मोनसे जुनिया सुबुंमाहारिखौ फोरमाया। थामहिनबा नागा मुंनि रावबो सुबुंमाहारि गैया। नाथाय नागा सोदोबा चेमा, लुठा, आव, जेमि, रेंमा बायदि बायदि मोन 16 गुबुन गुबुन राव बुंग्रा सुबुं माहारिखौ दैदेनो।

**जेमि नागा :** नागा राणी गाइडालुआ हाजोआरि जनजाति जेमि फोलेरनि सासे गोहो गोरा आइजो। जेमि सोदोबा जेमि, लियांमाइ आरो रंमाइ मुंनि मोनथाम गुबुन गुबुन बिदा-फंबाय सोमोन्दोआरि सुबुं माहारिखौ फोरमायो। आथिखालनि डिमा हासाव जिलानि जोबोर थिया हाजो बराइलनि थागिबिफोरानो जादों जेमि नागा।

**रंमाइ :** सिगांनि बोखावजायि काछर जिला आरो आथिखालनि डिमा हासाव जिलानि थागिबि नागा सिनायथिनि मोनसे जनजातिया जादों रंमाइफोर। रंमाइफोरा आबाद मावना जाग्रा हारि आरो साफा सानैया सरकारि मासियाव थिसनजाना दंब्लाबो काछर, हाइलाकान्दि, करिमगन्ज आरो डिमा हासाव जिलानि रंमाइफोरखौ बुंनो थाडोब्ला साफाइ खामानि मावग्रा महरै मिथिजायो।

**मिजु एबा ल'चाइ :** मिज'राम राज्यो दाखानायनि उनाव आसामाव मोजोमसे मानसिखौ जार खुंथाइ कार्बिआंलं आरो सा-काछर हाजोआरि जिलायाव नुनो मोनो।

**प'य :** प'यफोरा बुंनो थाब्ला आथिखाल मिज'रामनि मोनसे दुइसिन जनजाति सुबुंमाहारि आरो बिसोरनि रावा प'य। मिज'राम सरकारआ प'यफोरनि रांखान्थि-समाजारि जौगानायनि थाखाय प'य जारखुंथाइ गुथुम दानानै होदों।

**लाखेर :** लाखेरफोरा गुबैयै मिज'रामनि बांला हादर सिमानि चिम पुइ टुइ मुंनि बिलो सेराव थानाय मोनसे फिसा जनजाति। बिसोर गावसोरखौनो मिजु होननानै सिनायथि होयो नाथाय बिसोरनि बिमा रावा मिजु एबा लुचाइ नडा, लाखेरसो। मिज'राम सरकारआ लाखेरफोरनि रांखान्थि-समाजारि जौगानायनि थाखाय लाखेर जारखुंथाइ गुथुम दानानै होदों।

**जयन्तीया आरो खाचिया :** गोदोनि गेदेर आसामनिफ्राय खाचिया, जयन्तीया आरो गार'हाजो जिलाखौ आलादा खालामनानै मेघालय राज्यो सोमजिनायनि उनावबो बराइल हाजोनि गुबुन गुबुन बाहागोआव थानाय आथिखालनि कार्बिआंलं, डिमा हासाव, काछर, हाइलाकान्दि आरो करिमगन्ज जिलायाव बाडाइ अनजिमानि खाचिया, जयन्तीया गामिया आसाम सिमानि सिडावनो थालांबाय।

जयन्तीया आरो खाचियाफोरा गावसोरखौनो मोननै जुदा जुदा हारि महरै सिनायथि होयोब्लाबो मोननैबो जनजातिनि राव आरो हारिमुजों गोरोबलायनाय दं।

**खामति, फाकियाल एबा टाइ फाकियाल, मान ( टाइ राव बुंग्रा ), तुरुं आरो द'वनीयाफोर** : खामति जनजातिया आसामनि जारखुंथाइ कार्बिआंलं आरो सा-काछार हाजोआरि जिलानि अनगायैबो गुबुन जिलाफोराव फारिलाइयाव थिसनजानाय जनजाति (SC)। मान (टाइ राव बुंग्रा) फोरा आसामनि जारखुंथाइ कार्बिआंलं आरो सा-काछार हाजोआरि जिलानि फारियाव थिसनजायि हारि।

खामति, फाकियाल मान (टाइ राव बुंग्रा) फोरा ब्रह्म हादरारि गुदिनिफ्राय फैनाय। मान आरो आसामनि जारखुंथाइ जिला कार्बि आंलं डिमा हासावखौ गारनानै गुबुन ओन्सोलाव थानाय खामतिफोरा गुबैयै टाइ राव बुंग्रा। मान एबा खामति टाइराव बुंग्रा मानसिफोरखौ गुबैयै आइतनीय खामिया एबा नरा राजनि फोलेरारि आरो श्याम एबा बाइलुं महरै सिनाय जायो।

तुरुं आरो द'वनीया मुंनि बिसोरनि मोननै माहारि दं। तुरुं आरो द'वनीयाफोरा चिंफौराव बुडो आरो आइतनीया, खामिया आरो श्याम एबा बाइलुंफोरा टाइ राव बुडो। मान एबा खामतिफोरनि समब्रा-समब्रि माहारि मोनसेया जादों फाकियालफोर। खामति, फाकियाल, मानफोरा हीनजान बौद्ध दोहोरोमारि।

**चिंफौ** : चिंफौफोरा ब्रह्म हादरारि गुबैनि मोनसे फिसा सुबुंफोलेर। चिंफौफोरनि रावा चिंफौ। चिंफौफोरा हीनजान बौद्ध दोहोरोमारि।

**कुकी** : कुकी मुंनि मोनबो रोखोमनि सुबुंहारिनि सुबुं माहारि गैया। खोनानो मोनो उदांसिनि सिंगा इंराजफोरनि आमोलाव आथिखाल बांला हादरनि चितागं हाजोआरि ओन्सोलनि चाकमाफोरनि खुन आबाद मावनाय ओन्सोलाव थाद', मार, बेइते, रांखल, पाइते, गांटे, खेलमा, भाइफुइ बायदि बायदि बायदि सुबुं माहारियारि मानसिफोरा बिसोरनि मैहरथिलिखौ खुन आबाद मावनाय हाग्रा-बंग्रा सिफायनानै फोजोबस्रादों होननानै सम सम लुट खामनानै लांदोंमोन। बिसोरखौनो बै समनि इंराजफोरा कुकि होनना गावज्जि दोंमोन।

**चाकमाफोर** : चाकमाफोरा आसामनि जारखुंथाइ जिला कार्बिआंलं आरो डिमा हासावनि हाजोआरि जिलानि फारियाव थिसनजायि जनजाति। चाकमाफोरा हीनजान बौद्ध दोहोरोमखौ फुजिग्रा। चाकमाफोरा आथिखालनि बांला हादरारि गुबैनि जनजाति। आथिखाल बांला हादरनि चितागं ओन्सोलाव चाकमाफोरनि राज्यो दंमोन आरो इंराजफोरा चाकमाफोरखौ होखारनानौ जोबोर जौगा थाखोनि खुन दिहुनदोंमोन।

**केअट** : केअटफोरा बुंनो थांब्ला हिन्दु दोहोरोमनि सास्त्र (मोनथोर) बादियै नाव सालायग्रा आरो ना हमना थानानै थाग्रा मानसि। रामायणआव केअटआ श्रीरामचन्द्रखौ दैमा बारहोनाय सल



फोरमायनाय दं आरो बै समनिफ्रायनो शुद्र महरै सिनायजानाय केअटफोरखौ शुद्रफोरनि गेजेराव मान होनाय जायो।

**बैश्य :** भारतारि हिन्दु दोरोडारि बादियै हिन्दु समाजा मोनब्रै बोरोन ब्राह्मण, क्षत्रिय, शुद्र आरो बैश्य महरै रानजानाय। बैष्यफोरा बुंनो थांब्ला दोरोडारि आबादारि हारिब्लाबो असमीया बैष्यफोरा गुबुन गुबुन फालांगिजों लोब्बा गोनां। असमीया बैष्यफोरा साउद बैष्य, स'नारि बैष्य आरो आर्य बैष्य महरै मोनथाम बाहागोआव रानजानाय होनना मिथिनो मोनो। खुगा खुगा सोलिबोनाय बादिब्ला साउद बैष्यफोरा चान्द सदागर फोलेरनि, स'नारि बैष्यफोरा स'नारि, बणिया एबा फालांगियारि आरो आर्य बैष्यफोरा आर्य फोलेरनि।

**असमीया शिख :** 1820 मायथाइयाव मानफोरनि थामथि गाग्लोबनाय समाव स्वर्गदेउ चन्द्रकान्त सिंहनि खावलायनायाव पान्जाब केशरी रन्जित सिडा 500 सा मान शिख सान्थि आसामसिम दैथायहरदोंमोन। बे सान्थिफोरनि बांसिनानो आथिखालनि ग'वालपारा जिलानि हादिशचकी मुनि जायगायाव बीर जोहोलाव बादि दावहा नांनानै थैयो आरो आद्रा थालांनाय बांसिनानो जखम जानानै बेंगुरा जाना थायो। दावहायाव सान्थि गाहाइ चैतन्य सिडाबो थैयो।

बे बेंगुरा सान्थिफोरा सान्थि गाहाइ चैतन्य सिंनि हिन्जावखौ लाफानानै चुबेदार राम सिंनि दैदेननायाव आह'म राजानि बिथोन मोननानै गेदेर दैमाजों दावखोलांनानै कपिली जाना भेटाइमरा बोरियाव थानो लायो आरो आसामनि नैथि गुरुद्वार गायसननानै बे बेंगुरा सान्थिफोरा जायगानि हिन्जावफोरजों हाबा जानानै थाजौरै थानो हमो।

**नापित :** भारतनि गासै राज्योआवनो खानाइ सिन'नाय आरो मोदोम नाग्रा (मालिस) हारिनि मानसि नुनो मोनो। हिन्दु दोरों बादिब्ला नापित हारिखौ गोबाडानो शुद्र हारिनिखुइ गोजौ थाखोनि होनना गनायो। खर'सा आसामाव नापितआ खानाइ सिननाय राहाया गोदान-सिगाडाव सासेया गुबुन सासेनि खानाइखौ सिननाय एबा हास'नाय दोरोडारि नेम दंमोन। आफां आसामाव असमीया राव बुंग्रा नापित हारि महरै सिनायजानाय शील बायदि बायदि बिमुं लानाय मोनसे फिसा सुबुंहारि दं।

**असमीया कुमार :** बिबार दोनग्रा, हानि दो, मला, हानि आलारि साथि बायदि बायदि हानि आइजें बानायग्रा हारिया जादों कुमारफोर। खुगा खुगा सोलिबोनाय बादिब्ला उरिष्यानि मोनसे ब्राह्मण नखरा कामाख्या थानसालि नायनो आसामाव फैदोंमोन। नखराव बामोनजों लोगोसे बिनि बिसि आरो सानै गथ' दंफायोमोन। सिनायमोनि बेरामाव गोग्लैनानै बामोना हरखाब थैनायाव रान्दि बिसिया दैमा जिंनि आमथा आमथा हाजों अराव सावनाय आइजें-आइला बानायनानै फानना नखरखौ फोथांना लाखिनायसै। समनि बाबेननायाव बे बामोन नखरनि गथ-गथाइफोरा कुमार हारि महरै सिनायजानायसै। कुमारफोरा हानि आइजेंखौ आखाइजें बानायो।

**ड'ली :** भारतनि गुबुन गुबुन राज्योआव, गुबैयै सोनाब बंग आरो आथिखालनि बांला हादरजों लोगोसे आसामावबो दोरोडारि बादियै राजा-महाराजा एबा हाबा आरि समाजारि आफादफोराव दोरोडारियै ड'ला जानग्रा महरै जिउ खांनाय मोनसे हारि दं। बिसोरखौ ड'ली हारि होनना मिथिनो मोनो।

**दुली :** भारतनि गुबुन गुबुन राज्योआव, गुबैयै सोनाब बंग आरो आथिखालनि बांला हादरजों लोगोसे आसामावबो दोरोडारि नेम बादियै ढाक एबा ढल दामनानै जिउ खांनाय मोनसे हारि दं। बिसोरखौ दुली एबा दल दामग्रा हारि होनना मिथिनो मोनो।

**त्रिपुरा :** त्रिपुरा होनना सिनायथि होनाय जनजातिफोरा डिमाचा गुदिनि।

**बरिया :** आसाम सरकारनि गुबुन उन गोग्लैसोनाय हारिनि फारिलाइयाव बरिया मुंनि मोनसे हारिखौ नुनो मोनो।

**शालाम :** आसाम मेघालय सिमा ओन्सोलाव शालाम मुंनि मोनसे जनजातिखौ नुनो मोनो। बिसोर कुकीफोरनिनो बाहागोसे।

**बानाइ :** बानाइफोरखौ क'छफोरनि बाहागोसे होनना मिथिनो मोनो।

**बांला रावारि हिन्दुफोर :** इंराज खुंथाइ समाव रेल कम्पानी, साहा बागान आरिनि केरानि, महरि, बाबु, पियन, सुखिदार बायदि साखि मावनानै बांला रावारि हिन्दुफोरा आसामाव हाबफैदोंमोन। उनाव बे बांला रावारि हिन्दुफोरा फिसा फिसा फालांगि खालामनो जागायजेनो। समनि फारियाव हादर गावसानायनि समाव गुबुन राजखान्थियारि, समाजारि आरो दोहोरोमारि जाहोनाव गोबां अनजिमानि बांला रावारि हिन्दुफोरा आसामाव हाबफैयो। मख'नो गोनांदि 1971 मायथाइनि बांला हादरनि दावहानि समाव बयनिखुइ बांसिन अनजिमानि बांला रावारि हिन्दुफोरा गोदान रानसारनाय राहानि गुबुन गुबुन जिउखुं राहाजों लोगोसे आबाद मावनाय आरि खामानियाव थिसनजायो।

**भारतनि गुबुन गुबुन राज्योनि फोलेरारि असमीयाफोर :** भारतनि गुबुन गुबुन राज्योनि फोलेरारिनि बाथा-खोथा बुडोब्ला गिबियावनो फैनांगोन आसामाव थानाय बिष्णुप्रिया आरो मेइताइ मणिपुरी लोगोसे मणिपुरी मुछलमानफोर। आसाम सरकारआ आसामाव थानाय मणिपुरीफोरखौ गुबुन गुबुन गोग्लैसोनाय हारिनि फारिलाइयाव थिसनथाइ होनानै बायदि खाबु होबोदों। बेनि उनावनो मुं लानांगोन बिहार आरो उत्तरप्रदेशनि गुबुन गुबुन ओन्सोलनिफ्राय फैनानै आसामाव फालांगि खालामनाय जोंनि बयनिबो देच'वाली गलादार दखानि आरो आबादारि महरै सिनायजानाय देच'वाली दखानि आरो आबादारिफोर, मुं लानांगोनदि असमीया सुबुंमाहारियाव मार'वार गुदिनि बयजोंबो मिथिजानाय आरो आंगो जानाय मारवाड़ी एबा केजा दखानिफोरनि मुंखौ।

भारतनि गुबुन राज्योनि फोलेरारि आरो मेगनाव गोग्लैनाय गुबुन मोनसे समाजा जादों पान्जाबी शिखफोर। रेल लामा, थाव सोदांसालि, गेदेर गेदेर अफिस-काछारि, डाक-बांला आरि लुनायनि थाखाय गिबियावनो पान्जाबीफोरा हाबफैजेनदोंमोन। बबेखानि उनसमाव बे पान्जाबीफोरा दर्जिनि दखान, गारि

गेरेज, जुथानि दखान, सिनि दखान (गला) आरो बायदि बायदि फालांगिजों नांथाबो। बे सुबुंहारिनि हाबफैनाया आसामनि गासै जायगायावनो रोखा बेरखानायजों लोगोसे गुबुन गुबुन फालांगियाव गोबां अनजिमानि हिन्दी राव बुंग्रा मुछलमान, गाइखेर फानग्रा ग'वाला आरो गासै रोखोमनि फालांगियारि बिथिडाव भारतनि गासैबो राज्यो फोलेरारिनि नुजासारनायखौ बाडाइ-एसे बिबांनि नुनो मोनो आरो बे सुबुंफोराबो गावसोरनि गावारि हादरसानि सिनायथि, राव, हारिमुखौ फोथांना लाखिबोदों आरो माखासेया असमीया हारिमुजों गावखौनो हगारसारदों। मानिनांगोनदि साखि मावनायनि गेजेरजोंबो आसामाव भारतनि गुबुन गुबुन राज्योनिफ्राय बायदि मानसिया हाबफैदों आरो गोबाडानो आसामाव थाजौरै थानो लायो आरो असमीया जानांदों। बिसोरबो बिसोरनि सिगांनि सिनायथि, राव, हारिमुखौ हमथानानै लाखिबोदों। बेनि अनगायैबो आसामा-अरुणाचल सिमाजिं ओन्सोलफोराव माखासे अनजिमानि गोजाम नखर, तांचा नखर, चेमा नागा बायदि बायदि नखराबो गावसोरनि आंगो राव-हारिमुजों असमीया जानानै असमीया हारिमुआव बिहोमा होबोदों।

**बांला राव बुंग्रा मुछलमान :** काछारनि राजा आरो त्रिपुरानि राजानि सिडाव आबाद मावनाय आरो राजानि सिडाव साखि मावग्रा लस्कर, बरभूजाखौ हमफानानै गुबुन गुबुन बांला राव बुंग्रा इछलाम दोहोरोमारि आबादारिफोरा आसामनि बांला राव बुंग्रा मुछलमानफोर। इंराजनि खुंथाइ समावबो गोबां अनजिमानि बांला राव बुंग्रा मुछलमानफोरा बांला हादरनिफ्राय आसामाव हाबफैदोंमोन। आथिखालनि करिमगन्ज जिला, आथिखाल बांला हादरनि, सिगांनि चिलेट जिलानि बाहागोसेमोन आरो सिगांनि करिमगन्ज महकुमाया थोजासे अनजिमानि बांला राव बुंग्रा मुछलमानफोर थानाय जायगामोन बेनिखायनो करिमगन्ज महकुमाया आसामजों सरजाबजानायनि जाउनाव बै बांला राव बुंग्रा मुछलमानफोराबो आसामनि सिमायाव हाबनानै असामनि थागिबि जालांनायसै।

उदांमिनि उनाव गुबुन गुबुन रांखान्थियारि-समाजारि आरो राजखान्थियारि जाहोनाव आथिखालनि बांला हादर आरो सिगांनि सानजा बंगनिफ्राय हान्जा हान्जा बांला राव बुंग्रा मुछलमानफोरा आथिखाल बांला हादरनि ढाका, मइमनसिं, चिलेट, पाबनाया, बगरीया, रंपुर आरो गुबुन गुबुन जिलानिफ्राय गोख्रै हाबसनफैयो आरो बुरलुंबुथुर गेजेरनि हासार गोनां आरो थाजोर नडि बालानि सेर सेर थानो लायो। दैमा सेराव थानायानो बिसोरनि सिनायथि, बिसोरनि सिगांनि नखर जिला ढाकानिफ्राय फैनायफोरखौ ढाकायारि, चिलेटनिफ्राय फैनायफोरखौ चिलेटारि, पाबनाया जिलानिफ्राय फैनायफोरखौ पाबनारि, मइमनसिंनिफ्राय फैनायफोरखौ मइमनसिडारि, रंपुर एबा खर'सा ओन्सोलनि मानसिफोरखौ भाटीया बायदि बायदि आरो साधारण असमीया समाजाव पमुवा मुछलमान महरै सिनायो।

बेनो जादों बाइदि मैयानि आसाम। जों साफ्रोमबो असमीया महरै दुगायो। बाइदि मैयानि आसामा गोरोबलायिनि गेजेरावबो खौसेथिनि थावनि।

नब कुमार डेकाबरुवा



## आह'मफोर

आह'मफोरा गुबैयै टाइ हारिनि मानसि। आसामाव फैनायनि उननिफ्रायसो बिसोर आह'म मुडै सिनायजायो। बिसोरनि गोजाम थानाय जायगाया चीन हादरनि खोला-सोनाब ओन्सोल, आथिखालनि इउनान हादरसानि मुंमाव राज्योआव। बिथांमोनखौ टाइफोरनि गेजेराव गेदेर हान्जानि होन्नानै मिथिनो मोनो। बिसोरनि आजै-आजौफोरा जिथाम जौथाइयावनो चुकाफा राजानि दैदेननायाव पातकाइ हाजो बारनानै सानजा आसाम एबा बै समनि सौमारआव राज्यो गायसनो। उनाव लासै लासै सोनाबहा मानाहसिम राज्यो फेहेरना 600 बोसोरनि बांसिन सम राज्यो खुडो। स्वर्गदेउ चाउलुं चुकाफाया आसामनि आहम साम्राज्योनि गायसतगिरि आरो गेदेर आसामनि बिथा गायसनगिरि। आथिखालनि चीन हादरनि मुंमावलुडव ११९२ मायथाइयाव चुकाफानि जोनोम जादोंमोन। बिथाड ७७ बोसोर बैसोआव १२६८ मायथाइयाव बै समनि राजथावनि चराईवाव रूसारि जायो। बिथानि गोथार गोसोखांथियाव आसामाव बोसोरफ्रोमबो २ डिसेम्बर सानखौ 'चुकाफा सान' एबा 'आसाम सान' (असम दिवस) महरै फालिनाय जायो।

बिसोरनि रावा टाइ एबा श्यानमोन नाथाय समनि फाखनाव बाइदि जाहोननि थाखाय जुनियायै राज्यो फेहेरनाय लोगो लोगो हादरनि सुबुं अनजिमायाबो बांबोनायाव फोरजाफोरनि खाबुखौ नोजोर होन्नानै गावसोरनि रावनि सोलायै असमिया रावखौ बजबना लायो। नाथाय गोजाम फुजा-सिबिनाय, आसार-खान्थिनि सोमोन्दै गासै खामानिखौ बिसोरनि पण्डित पुर'हितफोरा टाइ रावखौनो बाहायो आरो दिनैसिमबो बाहायबोगासिनो दं। बेबादिनो, राज्योआरि हाबा-हुखाफोराबो जिदाइन जौथाइसिम आह'म रावखौनो बाहायदोंमोन। आथिखालाव टाइ राव बुंग्रा मानसिया सा-सानजा भारतनि आसामनिफ्राय जागायनानै म्यानमार, खोला चीन, थाइलेण्ड, लावच, कम्ब'दिया, भियेटनामसिम गोसारदों। आह'मनि अनगायैबो आसामाव खामति, फाके, खामयां, आइतन आरो तुरूड् मुंजों आरो मोनबा टाइ सुबुंफोलेरारि मानसि दं।



**सुबुंअन्जिमा :**

टाइ आह'म जौगाखां परिषदा 2012-14 मायथाइयाव सानना मोननाय बादिब्ला आह'मफोरनि आथिखालनि सुबुंअनजिमाया 25 लाखसो जागोन।

**थानाय जायगा :** बिथांमोननि थानाय गाहाइ ओन्सोला जादों आथिखालनि चराइदेउ, शिवसागर, डिब्रुगड़, ज'रहाट, ग'लाघाट, लक्षिमपुर, धेमाजि आरो तिनचुकीया जिला। बेनि अनगायैबो गुवाहाटी नोगोरमाखौ लाफानानै गुबुन नोगोरफोरावबो गोबां आह'म मानसिफोर जायगा लानानै दं।

**जिउखां राहा :**

थानाय जौथाइनि जोबनायसिम मायसालि माइनि आबादानो बिसोरनि गाहाइ थांना थानायनि राहामोन। बेजों स्रें-स्रें, मोसौ-मैसो, अमा-बोरमा, दाउ-हांसो फिसियोमोन। आथिखालाव गोबाडानो जुनार फिसिनो गारबाय। जिरायनाय समाव हौवा मानसिफोरा बिफांनि मुगा एम्फौ फिसियोमोन। हिन्जावफोरा इन्दि एम्फौ, पात एम्फौ फिसियोमोन। बे एम्फौनिफ्राय खुन्दुं थुननानै हिसान दाना ननि थाखाय नांगौ जानाय सि-जोम बानायना लायोमोन। मैगं-थाइगंनि बारि गंसे, गइ-खान्थालनि बारि गंसे, दंफांनि बारि गंसे आह'मफोरनि थानाय जायगायाव बे नुथाया सरासनमामोन। हा गोनांफोरा न'आवनो स'म बिफांनि बागान बानायना लायोमोन। आथिखालाव बेफोरखौ सिफायनानै साहा आबाद खालामनो लादोंसै।

**न'-बां :**

न'बांनि बिथिडाव बुंनो थांब्ला सिगां बिसोरो बैसां न'आव थायोमोनब्लाबो उनाव हानि बिथा दैखांना उखुम फारनै गोनां न' लुना लादोंमोन। बुंनो थाडोब्ला न'नि खुन्थियाफोरा दंफांनि, इन्जुरफोरा औवानि आरो उखुमखौ थुरि होना (थुरिजों सालिना) लायोमोन। आथिखालाव बयहाबो पाक्का न' जाबाय। न'आ मोननै रोखोमनि- न'मा न' आरो सौरा न'। न'मा न'नि मुदा फारसेथिं ओंखाम संग्रा थायो। उननि खथाखौ सरासनम्रा फिसाजोफोर उन्दुग्रा खथा हिसाबै बाहायो। सौरा न'खौ आलासि जिरायग्रा खथा आरो सेंग्राफोर उन्दुग्रा खथा हिसाबै बाहागो।

गुबुन न'नि सिडाव बयनिबो न'आव गंफा एबा गंसेनि बारा बाख्रि न', गंसे मोसौ गलि, गंसे दाउ-हांसोनि गन्द्रा, बोरमा दोनग्रा गन्द्रा आरो गंसे अमा गन्द्रा थायो।

**जानाय-लौनाय :**

ओंखामा बिसोरनि गाहाइ खाजा। ओंखामजों लोगोसे जानाय गोथाव-गोथाव ओंख्रि संना जानाया

बिसोरनि मोनसे हारिमु। सरासनस्रायै मोनसे गोखै मैगनि ओंखि, मोनसे सबाइ नडाब्ला खारै ओंखि, बाइदि मैगनि ओंखि, ना एबा बेदर आरि एवनाय नडाबा सावना जानो मोजां मोनो।

### लाव-लाव लोंग्रा :

आह'मफोरा सानफ्रोमबोनि जिउवाव बाहायनाय रोखोमसे लाव-लाव मुवाया जादों जौ। सरासनस्रायै मायसालि आरो माइब्रा माइरनि ओंखामाव एमाव फुनना जौ संनाय जायो। साहाया बिसोरनि जोबोरै अनसायजानाय रोखोमसे दैलाव लाव लोंग्रा मुवा।

### दोहोरोम फोथायनाय :

आह'मफोरा आजै-आजौनि जिउमा थानायखौ फोथायो आरो बिसोरनि मुडव फुजा होनायानो बिथांमोननि गाहाइ दोहोरोममोन। थैलांनाय आजै आजौनिफ्राय लानानै बिमा-बिफाखौ लाफानानै जिब्रै फिरिसिम 'डाम' हिसाबै थाखो थाखो नेमबादि फुजा होयो। जिब्रै फिरिनि गोजौनि एबा साथारनि फिरिखौ 'फी' मोदाइ महरै 'मे-डाम मे-फी', 'उमफा', 'चाइफा' आरि महरै फुजा होबोदों। बेनि अनगायैबो रिक्खन, जासिंफा, प-फी-चु बायदि फुजाबो खुंबोदों। बे गासैबो फुजायाव जिब-जिबि बाउनाय जायो आरो टाइ रावावनो आरज गाबनाय एबा मोन्थोर रायसंनाय जायो। बबेखानि, बैष्णब दोहोरोम आजावनायनि उननिफ्राय बिथांमोननि साथाम पण्डितनि हान्जा महन-देउधाइ-बाइलुंफोरनि अनगायै गुबुनफोरा बे फुजाखौ खुंनो गारबाय।

### हाबा :

आह'मफोरनि हाबाया जाबाय बंस रैखा खालामनायनि थाखाय खुंनाय मोनसे जोबोर गोनांथार खुंनाय फोरबो। बिथांमोना 'चकलं' आरो 'देवबान' बे मोननै आदबजों हाबाखौ खुडो।

### थुनलाइ :

बिथांमोननि सोदोब बिहुं, जारिमिन, खौगान्थाइ, नेमखान्थि सास्त्र ; ज्य'तिष सास्त्र, फुजा होनाय नेम आरिया आह'म रावाव लिरनाय गोबां सासिपातनि बिजाब दं।

### हारिमु :

जारिमिन ससा खालामनाया आह'मफोरनि मोनसे हारिमु। बेनि अनगायैबो आबाद, लंथाइखुलि, शिल्प आरिमु, खुन्दुं थुननानै सि दानाय, गाननाय-जोमनाय, गहेना, जाग्रा खाजा बानायनाय, फोथायनाय-फोथायै आरिखौ असमीया हारिमुनि गासैयावबो आह'मफोरनि हारिमुवारि गोहोम गोग्लैनाय नुनो मोनो।

बिदिन्थि बादियै माइसालि माइनि आबाद मावनाय, खोथिया फुनानै माइ गायनाय, मैसोजों हाल एवनाय, दखर दखर आलि खोनानै फोथाराव दैनि राहा खालामनाय, खोथिया जावैनाय बाइदि बाइदि। दानख'थाइ आरिमुनि बुल्लियाव मुदा होनाय आरो बिबार एरनाय न', बैसां होनाय बाख्रि, गरखाय जावनाय आरो बेरा होनाय बारि बाइदि बाइदिया आह'मफोरनि हारिमु। मुगा आरो पात एम्फौ फिसिनानै बेनिफ्राय खुन्दुं दिहुनना सि दानानै लायो, गुबुन गुबुन मैगं-थाइगं आरो ना-बेदरनि बानजायथाव खाजा (जामु) बानायनाय आरिखौ हामफानानै गोबां बिथिडाव बिसोरनि हारिमुवारि गोहोमखौ असमीया हारिमुवाव मोननो थाडो।

आसामखौ रं-रुफाजों गंसे गोहोगोरा रज्यो महरै दानाय आरो बेयाव थानाय गासै मानसिखौ मोनसे खुंथाइनि सिडाव लाबोना मोनसे असमीया माहारि महरै गायसंनायजों लोगोसे आसामाव थानाय गुबुन गुबुन हारि आरो सुबुंहान्जानि गेजेराव सरजाबनाय राव महरै असमीया रावनि बिथा दानायाव आह'मफोरनि बिहोमाया बांसिन। आह'मफोरनि सानैसो मख'जाथाव सुबुंफोरनि सोमोन्दै गाहायाव सुंदयै सावरायनाय जाबाय।

### लाचित बरफुकन :

आसामनि जारिमिनाव हादर अनफावरि बीर होननानै बुडोब्ला गुबैयै लाचित बरफुकननि मुंखौ लानांगौ जायो। जारिमिनारि आह'म-म'गलनि शराइघाट दावहानि गाहाइ बिबानखौ लाचित बरफुकनआ लानो गोनां जादोंमोन। म'ग'लफोरनि बेरेखायै लाचित बरफुकननि दावहा सामलायनाय सल'आव जाय हारिमायारि बिबान, आब्रुथि आरो खौसेथिजों खामानि मावनाय बिदिन्थि मोननाय जायो। आसामनि जारिमिनाव, बे बादि गुबुन बिदिन्थि गोरलैयैनो मोननो थाडा। बिथां लाचित बरफुकनआ 1622 ख्रिष्टाब्दआव जोनोम जादोंमोन। जोनोमनि बाराइ-खालार आरो जायगानि सोमोन्दै रोखा मिथियाब्लाबो गडगावनि खाथि-खालानिमोन होनना हमना लानाय जादों। बिथांनि बिफानि मुडा म'माइ तामुली बरबरुवा। उन्दै फिसाज्ला लाचितआ साथाम बिदा दंमोन। बिथांमोना जादों- लालुकस'ला, मरंगी आरो भारधरा। उन्दै समनिफ्रायनो लाचितआ जोबोर गोहो गोरामोन। सैथो आरो रोखाथिया बिथांनि गुबुन मोनसे आखु। बिफा ममाइ तामुलीया गावनि फिसाखौ मोजां सोलोंथाइ होना लेखा गोरों खालामनो जेब्लाबो नाजादोंमोन। उन्दैनिफ्रायनो बिफानि खामानि-दामानि मावनायखौ लाचितआ मेगन होनो खाबु मोनदोंमोन। बरबरुवा महरै स्वर्गदेउनि बरच'रा, बिजिरसालि आरियाव बिफानि खामानि-दामानि, गुबुन गुबुन गेदेर गेदेर बिबानगिरि आरो मावख'गोराफोरजों सावरायनायफोरखौबो लाचितआ नुदोंमोन। गुबैयै बुंनो थांब्ला बिफानि रज्यो सालायनायखौ नोजोर होनानै गोबां बाथ्रा सोलोंनो खाबु मोनदोंमोन।

जोबोर थाबैनो गावनि हारोंथिनि बोलोजों राजानि नखराव लाचितआ साख्रि मोनदोंमोन। गिबि

समाव राज्योनि मन्थ्रि गेदेमाया 'गय-फाथै बोनथुमग्रा तामुली' महरै लाचितखौ थिस'नो। बेनि उनाव साननैसोनि थाखाय 'घं'रा बरुवा' मासिखौ मोननो हायो। बे मासियाव थानाय समाव राजानि गराइसालिनि गराइफोरखौ नोजोर लाखिनायजों लोगोसे बेफोरखौ फोरोंथाइ होदोंमोन। बेनि उनावसो 'द'लीया बरुवा' आरो 'शिमलुगुरीया फुकन'नि मासिखौ मोनदोंमोन। बै समावनो मिरजुमलाया आसामखौ गाग्लोबनायाव लाचितआ दिखौमुखआव सुथुरफोरजों दावहा नंदोंमोन आरो गावनि आखा-फाखाथिखौ दिन्थिनो हादोंमोन। लाचितनि आखा-फाखाथि आरो गाग्लोबनायनि हेंथायै जुजिनायखौ मिथिनानै बै समनि आह'म राजा चक्रध्वज सिंहआ लाचितखौ सान्थ्रि गाहाइ खालामनायसै आरो बरफुकन मासियाव थिसननायसै।

बेनि साननैसो उनाव 1667 मायथायनि 20 आगष्टआव आह'म-म'गलनि गेजेराव दावहा जागायजेनो। असमीया सान्थ्रिया मोननै बाहागोआव गावसानानै बुरलुंबुथुर दैमाजों दावगाबोनो लायो। म'गलजों गिबि दावहाया बुरलुंबुथुरनि साहा थानाय बाहबारियाव जागायो। बेयाव जायगा लानानै थानाय म'गलखौ गाग्लोबना आह'म सान्थ्रिया दावहाखौ जुरिजेनो। बेनि उनाव खोला रुगुनि काजलीयाव थानाय म'गलनि खरंखौ आह'मफोरा गावनि सिडाव लाबोयो। इटाखुलियाव बादा लुनानै म'गलफोरा गावनि गोहोखौ बांहोनो नाजादोंमोनब्लाबो बेखौबो आह'म सान्थ्रिया थेर-बेथेर खालामो आरो म'गलफोरखौ मानाह दैमा बारहोना होखारहरनायसै। म'गलजों जानाय बे दावहायाव देरहानाया असमीया सान्थ्रिनि गेजेराव गावफोथायथि लाबोदोंमोन, सानथ्रि गाहाइ महरै लाचित बरफुकनआ बाख्नायजादोंमोन।

असमीया सान्थ्रिनि आखाइयाव म'गलफोरनि जेननांनाय खौराडा म'गल सम्राट औरंजेबनि खोमायाव हाबहैनायसै। खौरंखौ मोननाय लोगो लोगो बिथाडा लाजिनाय आरो मान गोमाजानाय मोननानै बेनि खिथेर लानो थि खालामनायसै। औरंजेबनि बिथोन बादियै राम सिंहनि दैदेननायाव मोनसे गेदेर सान्थ्रि हान्जाया फिन आसामखौ गाग्लोबनो फैनायसै। लाचित बरफुकनआ मोजाडै सानना मोनदांदोंमोनदि सुथुरा जेसेबांनो गोहोगोरा जायार्थों मानो, साफ्रोम असमीया सान्थ्रि आरो सान्थ्रि गाहाइया गावनि बिबानखौ मोजाडै फालियोब्ला बिथांमोना म'गलखौ फेजेननो हाथारगोन। बिथाडा बेयावबो एरैबादिबो फोसावना होनायसैदि, सोरबाफोर गावनि बिबानखौ थियै मावफुडाब्ला एबा गावनि मावनांगौ हाबायाव गोहैलो खालामोब्ला बे बाथ्राखौ मिथिनाय लोगो लोगोनो बै मानसिनि खर'खौ दानस'नाय जागोन।

लाचितआ सान्थ्रिफोरखौ सोर बबेयाव थागोन, बेनि जायगाखौबो सायखना होदोंमोन। दावहानि समा खाथि मोनफैनाय लोगो लोगो लाचितआ गले गले सान्थ्रिफोरजों सावरायदोंमोन, जाहाथे दावहानि आदब-खायदा आरो गुबुन गुबुन राहाफोरा गावनि आखायाव थायो आरो लोगोसे बै सान्थ्रिफोरखौ गोख्रों खालामना लाखिनो हायो। आमिनगावनि खाथियाव गड़ (बान्दो) मोनसे खोनायनि गाहाइ बिबाना लाचितनि सासे बिमाइनि आखाइयाव गोग्लैदोंमोन। बिमाइया बिबान मानिना सोलियैनि थाखाय गड़

(बान्दो) खोनाय खामानिया जोबोर उन जाना थानायाव लाचिता रागा जोंखानायसै आरो थुंग्रि दैखाना बिमाइखौ दानगासेयावनो सनै खालामना बुंनयसै- 'हादरनिखुइ बिमाइया देरसिन नडा'। लाचितनि बेबादि थिउरिया रागा जोंनायखौ नुनानै गड़ (बान्दो)नि खामानि मावग्रा मानसिफोरा जोबोर गिखानायसै आरो जिरोन गैयि खामानि मावनानै हरसेनि गेजेरावनो गड़नि खामानिखौ मावफुंनयसै। बे गड़आ दा 'बिमाइ दानस'नाय गड़' (ममाइ कता गड़) मुडै मिथिजायो। बेनि अनगायैबो 'हादरनिखुइ बिमाइया देरसिन नडा' होननाय बाश्राखौ दिनैसिमबो साबसिम-हामसिन हादर अनफावरि बाश्रा होनना गनायना लानाय जायो।

आह'म आरो म'गलनि जोबथा दावहायानो जादों शराइघाटनि दावहा। 1671 मायथाइनि मार्च दाननि गेजेर खोन्दोआव बे दावहाया जादोंमोन। बै समाव लाचितआ गोब्राब जब्रायाव गोग्लैना दंमोन। फारसेथिं म'गलनि गाग्लोबनाय बाश्राखौ खोनानानै लाचित बरफुकना थाथिरनो हायै जाबाय। फारसेथिं रामसिंहआ दै लामाजों आन्धारुवालिनि गड़सिम थानानै बै गड़खौ गावनि खालामना लानानै गुवाहाटीयाव हाबनो थांखि लायो। बिथांखि बादियै म'गलनि नावनिफ्राय सान्थ्रिफोरा बोर्ला-थिराव बारुद लगायना असमीयाफोरनि नावआव थादवाजासे गावहरनायसै। बेबादि गाग्लोबनायाव थावरिनो हायिनि असमीया सान्थ्रिनि नावफोरा गिदिंलांफिननायसै। असमीया सान्थ्रि गाहाइनि दैदेननायाव गंनैसो असमीया नावआ म'गलनि नावखौ होसोबोनानै अस्वक्लान्त मोनफैनायसै। बेनि उनाव म'गलफोरा फेरफाथिनायसै आरो म'गलनि गोबां दावहा नांग्रा नावफोरा सिगांबोनायसै। आह'म सान्थ्रि गाहाइ लाचितनि मोदोमा जोबोर गाज्जि होनना मिथिनानै असमीया सान्थ्रिफोरनि गोहो-बोलोआ एसे लोरबां जादोंमोन। म'गलफोरा गोखों देरहासारनायजों गाग्लोबना सिगांबोनायखौ नुनानै असमीयाफोरा दावहायाव देरहानायनि मिजिंखौनो नागारनायसै। असमीया सान्थ्रिफोरा दावहा नागारनानै उनफिनलानो नागिरनायसै। बरफुकनआ नोरजिया देहाखौ लानानै दावहानि हालसालखौ नायबाय थादोंमोन। बिथाडा म'गलनि नावखौ सा रुगुनि जुरियानिफ्राय फैनानै अशक्लान्त मोनफैथारनायखौ नुना बरफुकनआ थाथिरनो हायाखैसै। फारसेथि थोरथोर लोमजानाय। गावनो गाव गसंन थानो हायाखैमोन। बे बादियैनो लाचितआ नोजोर होना नुबायदि म'गलनि नावनि अनजिमाया बांबोगासिनो दं आरो बे नावफोरा सिगांबोगासिनो दं। लोगोसे असमीया सान्थ्रिफोरनि नावफोरा उनजों फावसायबोगासिनो दं। लाचिता अब्ला दान्दिसेबो गोबाव खालामनो हानाय नंलिया सानना सिगांलानायसै। नाव जावग्राफ्रा सानदोंमोनदि बरफुकनआबो थारैनो उनफिनलांसिगोन। बिसोर बेबादिनो नावखौ जावलांनयसै। लाचित बरफुकनआ हसिखावनायसै- "ओइ, नोंसोर मा खालामदों? स्वर्गदेवा आंखौ गुवाहाटीखौ रैखा खालामनानै सुथुरजों दावहा नांनो बिबान होना दोनदों। आं दा दावहा नागारनानै बिसि-फिसाफोरनि खाथियाव थांगोन नामा? आरो नोंसोर आंनाव सोडालासिनो नावखौ बैथिंजाय मानो लांदों।" रागाजों लाचित बरफुकनआ नोरजिया

देहाखौ लानानैनो गोहोगोरा जाखांनायसै। बिथाडा थुंग्रि बिखबजों बुनानै साब्रै नाव जावग्राखौ नावनिफ्राय दैयाव गारहरनायसै। बिसोर सानस्रिनानै गावसोरनि जिउखौ बासायनायसै। उनाव बबेखानि लोगोफोरा बिसोरखौ फिन दिखांफिननायसै। नडाब्ला सोर नावखौ जावनो? सासेया गुबुन सासेखौ ह'सिखाव ह'सिखाव बुंनयाव बाश्राया एरैबादि गोसारबाय दि, बरफुकनआ दावहा नागारनानै थांनो नागिरनायफोरखौ दानस'दों, हमै खायै दैमायाव गारहरदों होनना लोगो लोगो खायसेया गिनानै आरो खायसेया थुलुंगानाय मोननानै नावफोरखौ जावलांफिननो हमनायसै। म'गलनि नाव फारसे सिगांलांनाय बरफुकननि गं स्नि नावजों लोगो नांनो फारफ्रोमथिंनिफ्राय असमीया नावफोरा गोबारै सिगांबोनायसै। नावनिफ्रायबो असमीया सान्श्रिफोरा आखाइजों बानायनाय बारुदजों गाग्लोबो आरो रुगुंआव थानाय असमीया सान्श्रिफोराबो म'गलनि नावखौ नोजोर होनानै बारुद बेरफुहोनायसै। सिगांबोनाय म'गलनि नावफोरा सोमो नांबाय। थासारियादि बेबादि हरखाब सोलायलांनो हागौ एबा सासे बीर सान्श्रियादि बेबादि दावहानि गोख्रैथिखौ लाबोफिननो हायो, बेखौ म'गलफोरा सानफेरख्रैमोन।

गोमोथाव गोहो-बोलोजों असमीया नावफोरा फैनानै म'गलनि नावफोरनि गेजेराव हाबबाय आरो मोननैबो हान्जानि गेजेराव गोख्रों दावहा जानायसै। दावहाया गाहायै दाबथाम जायगायाव जादोंमोन-अस्वक्लान्त, इटाखुलि आरो कामाख्या हाजोनि गाहायाव। दावहानि खाबुनि थाखाय आह'मफोरा गंसेनि उनाव गंसे नावखौ फोनांजाबानै नावजोंनो गंसे दालां बानायगारनायसै। बेनि जाउनाव गेदेर खाबु जानायसै दि गोख्रै सान्श्रि आरो बारुद, अरखि ओंखारग्रा थिर आरि दावहा नांग्रा हाथियार रोगानो हानाय जाबाय। लाचितआ सान्श्रि आरो सान्श्रि गाहाइफोरनि गेजेराव एरैबादि मोनसे सानस्रि सोना होदोंमोन दि बे दावहायाव देरहानो हायोब्लासो असमीयाफोरनि हा, उदांस्रि आरो जिउवा बारगगोन। फारसेथिं गिबियाव लाचितआ जोबोर बेरामाव गोग्लैनाय, लाचितआ दावहा नांनो हानाय नडा-बेफोर बाश्रायानो म'गलफोरखौ मोदोम दुंखांहोदोंमोन आरो असमीयाफोरनि गोसोआव थुलुंगानाय आरो गावनि गोसो फोथायनायखौ खमायहोदोंमोन। नाथाय दावहायाव लाचितनि थोंजों बाहागो लानाय आरो गोख्रों दिस्थिफुंनयनि थाखाय साननायनि उल्था जाबाय। नुनो मोनबाय मोनथामबो जायगायावनो म'गल सान्श्रिया जेनबाय आरो म'गलनि नावफोरा फारियै उनफिनलांनायसै। असमीया सान्श्रिया म'गलफोरखौ पाण्डुसिम होखारहरनायसै आरो असमीया सान्श्रिफोरा दावहायाव देरहानायसै। बे दावहायानो शराइघाटनि दावहा होननानै मुंदांखा जायो।

1671 मायथाइनि 5 एप्रिलखालि रामसिंहआ गिदिंलांफिननो जागायनायसै। हाज'खौ नागारनायनि सिगां बिथाडा बैयाव थानाय हयग्रीब-माधब मन्दिराव फुजा होयो। बिदाय लानाय समाव बेनि बामोनफोरखौ बुंलांनायसै- “लाचितआ सरासनस्रा बीर नडा। आं मोनसेबो जायगायावनो थावरिनो हायाख्रैसै।”



शराइघाटनि दावहायाव असमीया सान्त्रिफोरा देरहानायनि मोनसे गेदेर जाहोना जादोंमोन साफा-साफा असमीया सान्त्रिया गुबुन गुबुन रोखोमनि खामानि मावनो हायोमोन। सासे असमीया सान्त्रिया गोनांथियाव नाव जावदोंमोन आरो बे सासे सान्त्रियानो अन्थाइनि गुलिबो गावहरदोंमोन; बोरलाबो गावहरदोंमोन आरो गड़बो खोदोंमोन। अब्ला सासेयानो सा जिनि खामानि मावदोंमोन। सुथुर हान्जानि जानानैबो रामसिंहआ असमीया सान्त्रिफोरनि बेफोरबादि मावथि, साहस आरो दावहानि सोलोखौ बाखनायना बुंदोंमोन- “साफ्रोमबो असमीया सान्त्रिया नाव जावनाय, बोरला गावनाय, हाखर जावनाय, आखाइजों बानायनाय बारुदनि कामान गावनाय गासै खामानियावनो आखा-फाखा बेबादि सान्त्रि आं भारतनि जेरावबो नुवाखै।” रामसिंहआ आरो बुंभावदों दि आसाम हादरखौ जै खालामनाया जायखिजाया राजानि थाखाय जाथावना बाथ्रा नडा। शराइघाटनि दावहानि साननैसोनि उनाव गुवाहाटीयावनो लाचित बरफुकना थैयो। जानो हागौ गोब्राब जब्राखौ नेवसिनानै दावहा नांनायनि थाखायनो बेबादि जादों। बिथानि थैनाया दावहा देरहानायनि रंजानायाव दुखु लाबोदोंमोन। बेबादि हादर अनफावरि बीरखौ रावजोंबो रुजुजाया। गावनि थाखाय सानफेरि हादर अनसायग्रा आरो गोख्रों दैदेनथिनि सोमोन्दै मिथिनो आह'म -म'गलनि दावहायाव सान्त्रि हानजा दैदेननाय लाचित बरफुकननि खोथाखौ गोसोआव खोख्लैथारनांगोन।

### सती जयमती :

सती जयमती राजखुंग्रिनि समाव आह'म राज्योनि राजखान्त्रियारि हालोदा जोबोर गोब्राबमोन। मन्त्रि लालुक स'लाया अब्ला आसामनि अनागारि राजामोन। गुबुन गुबुन बैसोगोरा राजखुंगुर थासेयावबो लालुक स'लाया जिब्रै बोसोर बैसोनि चामगुरीया हारिसानि उन्दै ग'हाइनि लाबोनानै 1679 मायथाइनि काति दानाव आसामनि राजा फाथियो। आह'मनि बादिब्ला छुलिकफा आरो हिन्दुनि बादिब्ला रत्नध्वज सिंह मुं दोननायसै। बैसोआव उन्दै नुनानै फोरजानि गेजेराव ल'रा राजा (उन्दै-राजा) मुडासो मुंदांखा जानायसै।

लालुक स'लाया छुलिकफाखौ राजा खालामनानै छुदैयफा स्वर्गदेवखौ बिस दौनानै बुथारनायसै। आतन बुढाग'हाइखौबो बंसयैनो 1679 मायथाइनि आघोन दानाव बुथारहोनायसै। आतन बुढाग'हाइनि जायगायाव दिलिहियालनि दीघला लाडिखौ बुढाग'हाइ खालामनायसै। जबंगखौ बोखारनानै मादुरीनि लाइ थेपेनाखौ बढगहाइ खालामनायसै।

लालुकआ गावनिल' साननायखौ जाफुंहोनो थाखाय ल'रा राजाखौ सोमोन्दोनि बान्दोजों बोननायसै। बिथाडा गावनि बा बोसोर बैसोनि फिसाजोखौ जिब्रै बोसोर बैसोनि ल'रा राजानो हाबा होनानै गाहाइ राणी खालामनायसै। बंगनि नबाबनि बाथ्रा मोननानै लालुकनि आह'म राज्योनि राजा जानायनि हाबिलाया बांबोनायसै।

राजफोलेरनि मोनब्रै हारिसानि राजा जानो हाथाव गोबां राजखुंगुर दंमोन। बे हालोदाव लालुक स'लानि

साननाया माबोरै जाफुंगोन, बिथाडा जरखायै बे राजखुंगुरफोरनि बाथ्राखौ साननानै गिखांनायसै । बिसोरनि मादाव सोर सासेया माब्ला बिग्राइखांनारजानि मासिखौ सेना लागोन बेनि जेबो थिग गैया ।

लालुकआ उन्दै राजाखौ बुंनायसै, राजा जानो हानाय गुन थानाय आरो बैसोगोरा गोबां थासेयावबो बिथांखौ राजा खालामनाय जाबाय । बे खोथाखौ राजखुंगुरफोरा सहायनो हायाखै । सोर सासे राजखुंगुरा माब्ला स्वर्गदेविनि जिउ लायो बेनि थिग गैया । बेनिखायनो सुथुर गैयि जानोब्ला राजखुंगुरफोरखौ जखम खालामनानै राजा जानो हायि खालामनांगोन आरो बेखौ खालामनोब्ला गिबियाव गिनो गोनां गेदेमा मावख 'गोराफोरखौ बोख्लायनांगोन । उन्दै राजानि मेलेमाव लालुकनि बाथ्राया गो हाबनायसै । लोगो लोगो लालुकआ ल'रा गाजानि इसारा मोननानै राजखुंगुरफोरनि देहायारि खहा खालामनाय राजखुंगुर बुथारनाय खामानिखौ मावजेननायसै ।

तुं-खुंगीया हारिसानि लांगि गदापाणिनि अनगायै गुबुन हारिनि राजखुंगुरफोरखौ लालुक बरफुकननि हानजाया हमनायसै आरो सोरखौबा अंग ख'हा खालामनायसै, सोरखौबा बुथारनायसै । ग'बर राजानि राजखुंगुर लाडि गदापाणिखौ लालुकनि हानजाया हमनो हायैयाव लालुक स'लाया जानो-लोनो खहाबा जाबाय । मन्थ्रि लाइ थेपेना बरग'हाइया गदापाणिनि बिहाव आरो हायेन आसामनि बंदर बरफुकना बिथानि बिगुमैमोन । फारसेथिं गदापाणिखौ हमनो हानायाथ गोजाननि खोथा बिथाडा बहा दं आरो बबेयाव थांखो बेनि जेबो खौरांखौनो लालुकनि हानजाया दिहुननो हायाखिसै । गदापाणिनि बिसिनि मुडा जयमती कुवरीमोन । गदापाणि आरो राजखुंग्रि जयमतीया लाइ-लेचाइ मुनि सानै फिसाज्लाजों तुंखुंआव राइजो जानानै दंमोन । लालुकआ छुलिकफानि राजखुंगुरफोरखौ हमना बुथारनाय रादाबखौ मोननानै सानै गथ'खौ नागा राज्योनि बबेबा मोनसे रैखाथि जायगायाव दोनखोमाहैदोंमोन । राजखुंगुर गदापाणिखौबो गथ' सानैजों लोगोसे थाखुमाहैनो थाखाय जयमतीया खुलुमथाबदोंमोन । नाथाय गदापाणिया बेफोरबादि गिख'ला जाना थानो राजि जायाखिसै । जयमती कुवरीया राजखुंगुरखौ गावनि राज्यो आरो फोरजानि दहाय होनानै बुजायबायदि बिथाडा थायाब्ला राज्योआबो थानाय नडा । बेबादिनो जयमतीनि खुथार खुथार आरज गाबनायखौ नुनानै जोबथारनायाव गदापाणिया खारखुमाना थाहैनो राजि जानायसै । गदापाणिया खारखुमाबाय । नागानि महर लानानै नागाहाजोनि गेजेराव हाबहैनायसै ।

राजआफादाव लाबोनानै स्वर्गदेविनि बिथोन खोनासंहोनानै लालुक स'लाया जयमती कुवरीनाव गदापाणिनि खौरां सोंनायसै, 'गदापाणिया बबेयाव दं?' राजखुंग्रिया जेबो फिननाय होआलासिनो सिरि थानायसै । लालुक स'लाया सावदांखौ बिथोन होबाय, जयमतीखौ जेरेडानि सेरफाडाव निजोम जायगायाव लानानै जायखिजाया राहायैब्लाबो जयमतीनि खुगानिफ्राय गदापाणिनि खौरां लाबोनानै गोख्रै होथारनांगोन । सावदाडा जयमतीखौ जेरेडा फोथारनि निजोम जायगायाव लानानै थानायसै ।

जयमतीखौ चावदाडा जोबोर बुजाय-आजाय, फुस्लायनानै, गाज्रि थुलुंगा होनानै, सिगि-सग'

खालामनानै बिथांनि खुगानिफ्राय गदापाणिनि खौरां दिहुननो हायियाव चावदाडा राजखुंग्रिखौ मोनफा मोननै साजा होनो हमनायसै। जयमतीया गासैबो साजाखौनो सहायसुलि बैसोमुथिबादि सिरियै सहायना थानायसै। बेबादि जिब्रै सान निजोम जेरेडा फोथाराव साजा मोननानै इराजी 1679 मायथाइनि असमीया सैत्र दाननि 13 खालार, बृहस्पतिबारखालि दशमीनि अखाफोर हाबसि समाव सती जयमतीया जिउ गारो। बिथाडा असमीया आइजोनि जोबनो गैयि गोहोबोलो, फिसाइ सिबिनायनि गेदेर आदर्शनि गोथार नेसोन अरायनि थाखाय दोनलांबाय। बहुमाव बेफोरबादि बिदिन्थिखौ मोननो थाडा।

सती जयमतीनि देरसिन फिसाज्ला स्वर्गदेउ रुद्रसिंहआ बिमानि गोसोखां नेरसोनखौ अराय जोरथाय महैरै लाखिनायनि थांखिजों जेरेडा फोथाराव 1697 मायथाइयाव लैथोबादि गेदेर फखि मोनसे जावहो नायसै आरो जयसागर फुखि मुं दोननायसै। बेनि बा बोसोरनि उनावसो रुद्रसिंह स्वर्गदेउआ बिमा जयमतीनि थैजों गोथार खालामना दोनलांनाय जेरेडा फोथाराव राजाथावनिखौ गरगावनिफ्राय दैखांनो लाबोनायसै आरो रंपुर मुं दोननायसै। बेनि अनगायैबो स्वर्गदेउआ गोजाम आलि आरो गेदेर आलिनि गेजेराव बिमानि मैदाम (गोथैसालि) लुनायसै। बे गोथार मैदामा दिनैसिमबो सती जयमतीनि गोसोखां नेरसोनखौ फोथांनो लाखिदों।

### आसामनि गिबिसिम सोदोबबिहुं लिरगिरि टेडाइ महन :

पण्डित टेडाइ महनआ इराजी 1715 मायथाइयाव चराइदेउआव महुं-माइचेउ नखरनि तकम्बरिनि नखराव जोनोम मोन्दोंमोन। टेडाइआ साथाम बिदा-फंबायनि मादाव दुइसिनमोन।

आह'म खुंथाइनि जोबनायथिं सांग्रां आरो मेलेमजिबि आह'मफोरा मोनसे जोबोर गेदेर खैफोदाव गोग्लैदोंमोन। जाहोना जादों-आह'मनि राज उलाफादाव (दरबाराव) गुबुन गुबुन जाहोनाव आह'म रावनि सोलायै असमीया रावा लासै लासै गोसारनो हमदोंमोन। गुबुनफारसे आह'म रावा लासै लासै नेवसिजानायजों लोगोसे सानफ्रोमबोनि जिउआव खोथा-बाथ्रा रायज्जायनायावबो बाहायजाया जाबोनायसै। बे बिथिडाव सांग्रां-मेलेमजिबि आह'मफोरा साननो गोनां जाना फैबाय दि मोनसे समाव आह'म रावा गोमालांथारोब्ला आसामनि मोनसे थांनानै थानाय सोदोमस्रिया आसामनि जारिमिननिफ्राय गोमालांगोन। मानोना आह'मफोरा आसामसिम फैनायावनो थुनलाइ, जारिमिन, दोहोरोम, नेमखान्थि गोनां ज्यतिष, सान्थौ आरि आयदानि गोबां बिजाब लोगोआव लाबोफादोंमोन। बेनि अनगायैबो उननि आह'म खुंथाइनि समावबो गुबुन गुबुन आयदानि गोबां बिजाब लिरदोंमोन। जायफोरखौ मोनसे समसिम आह'म रावावनो लिरनाय जादोंमोन। आह'म सोदोमस्रि हारिमुनि गासैबो बाथ्राखौ बे बिजाबफोराव लिरनाय जादोंमोन। इयुन जोलैया जाहाथे आह'म रावखौ सोलोंनो हायो बेनि थाखाय बिथाडा गांसे आह'मनि सोदोब बिहुं लिरनायनि खामानि आखाइयाव लायो। मानोना रावखौ फोथांनो लाखिनोब्ला गिबियाव रावनि सोदोबफोरखौ हमथाना लाखिनांगोन। गुबुन फारसेथिं राव-बोरोन सायख'वालासिनो

बयबो जाहाथे रावखौ सोलोंनो हायो बे थांखियैनो बिथाडा बे खामानिखौ आखाइयाव लायो। 1795 मायथाइयाव, गौरिनाथ सिंहनि खुंथाइनि जोबनायथिं बिथाडा 'बर काकत हु मुं पुथि' मुंनि गांसे सोदोब बिहुं बिजाब लिरो। साचि बिलाइयाव लिस्नाय बे बिजाबाव 42 बिलाइ दंमोन। बेनि जखाया (40x10) से.मि. मोन। मोनफ्रोमबो बिलाइयाव मोन 8-9 सिरि दं। बेयाव मोनफ्रोमबो आह'म सोदोबनि उल्थायै जाथावथाव असमीया ओंथि होनाय दं। मोनफ्रोमबो सोदोबनि उल्थायै 'चाम बा' सोदोबखौ होनाय जादों। बेनि ओंथिया जादों 'बुडो' बिदिन्थि बादियै 'का चाम बा काउरीक' (दाउखाखौ का बुडो), 'खा चाम बा खेरक' (थोरिखौ खा बुडो) बायदि बायदि। बेबादि सोदोबफोरखौ सरजाबदों। असमीया सोदोबफोरनि जोबनायाव 'क' आरो 'र' हांखो बाहायनाय नुनो मोनो। बेनि जाहोना जादों-'क' हांखो होनायफोरा मुंमा आरो 'र' हांखो होनायफोरा थाइजा।

1912 मायथाइयाव क'च बिहारनि कैलाश चन्द्र सेन मुंनि सुबुं सासेनिफ्राय हेमचन्द्र ग'स्वामीया टेडाइ महनआ लिस्नाय 'बर काकत हु-मुं' बिजाबखौ बुरखांना गोजाम मुवाखौ बुरखांना खनसायना लाखिनाय जारिमिन आरो जावखांथाइ बिफानाव जमा होयो। फोसावनायनि थांखियै 1932 मायथाइयाव नन्दनाथ फुकनआ बे बिजाबखौ सुजुनायनि खामानिखौ आखाइयाव लायो। टेडाइ महनआ लिस्ना गालानाय 'बर काकत हु-मुं' बिजाबनि सुजुनाय महरानो जादों आसामनि जारिमिन आरो जावखांथाइ बिफाननि जोहै 1964 मायथाइयाव सेबखांजानाय 'आह'म लेकचिकन'।

'बर काकत हु-मुं'नि अनगायैबो बिथाडा लिस्नानै दोनलांनय गां ब्रैजिनिखुइबो बांसिन बिजाब मोननाय जादों। टेडाइ महनआनो जादों आसामनि गिबिसिन सोदोब बिहुं लिस्गिरि। बिथांखौ आह'म रावनि बिजाब दानस्लायनायनि थाखाय इंराज साहेबा बिलातसिम लाना थादोंमोन होनना मिथिनो मोनो। बे गेदेमा सोदोब बिहुं लिस्गिरिया 1823 मायथाइयाव डिब्रुगड जिलानि खुवाडाव थैयो।

### पण्डित डम्बरुधर देवधाइ फुकन :

1912 मायथाइनि अक्ट'बर दाननि मोनसे मोजां समाव बै समनि चराइदेउ महकुमानि सिडाव थानाय खालैघ'गुरा मौजानि बेन्दोडाव थानाय आखैया देवधाइ गामिनि मोनसे गेजेर थाखोनि नखराव डम्बरुधर देवधाइ फुकना जोनोम मोनो। बिथांनि बिफानि मुडा गंगाराम फुकन आरो बिमानि मुडा चादै फुकन। बिफा गंगाराम फुकनआ सासे सोलोंथाइ मोजां मोनग्रा मानसिमोन। बिथाडा गिबियाव लाकुवा नाहर हाबि साहा बागाननि केरानी महरै साखि मावनानै जोबनायाव गामिनि गावबुद्धा जादोंमोन। डम्बरुधर फुकनआ एम. भि. फरायसालिनि उनाव गोबां सिगांलांनो हायाखैमोनब्लाबो टाइ राव-हारिमुखौनो हमथाबना गोसो होथाबनानै फरायसंनो लायो। बिथाडा बिदा सरुनाथ देवधाइ फुकन आरो नन्दनाथ देवधाइ फुकननिफ्राय नआवनो टाइ रावनि सोलोंथाइ लादोंमोन। इसे समनि गेजेरावनो टाइ रावाव फुकना सासे पण्डित महरै नआवनो थानानै आबाद मावनायजों लोगोसे टाइ राव चर्चा खालामबाय

थानाय समावनो आसामनि जारिमिन आरो जावखांथाइ बिफाननि गाहाइ ड° सूर्यकुमार भुयाया 1931 मायथाइयाव टाइ रावनि रेंगौसा महरै टाइ आह'म जारिमिनखौ रावसोलायनायनि थाखाय गुवाहाटीयाव लिंनानै लाडो। आसाम जारिमिन आरो जावखांथाइ बिफानाव ब्रै बोसोर खामानि मावनायनि उनाव 1935 मायथाइयाव गावनि गोसोबादियै साख्रि नागरानानै नआव थाडो। फुकननि दैदेननायाव 1936 मायथाइयाव पाटसाक'नि भेसेली बिलोनि रुगुडाव आसाम थाखोआव फुरालं सबाह खुंनाय जायो। 1963 मायथाइयाव थानुराम गगैनि दैदेननायाव 'बौद्ध हरिमुवाव फ्रालुं हरिमुनि मख'नो गोनां बिहोमा' आयदानि सायाव सावरायमेलनि थाखाय बौद्ध गयायाव मुलुग बौद्ध हरिमुनि सावरायमेलान बाहागो लायो। 1964 मायथाइयाव टाइ राव-हारिमु बुरखांनायनि थाखाय दंफां-औवाजों गंसे फरायसालि न' लुनानै होयो। बेनो जादों मिरु टाइ एकाडेमी, पाटसाक'। बिथाड 1975 मायथाइयाव सदै असम बौद्ध फ्रालुं संघ गायसनदोंमोन। 1981 मायथाइयाव दिल्लीयाव जथुमनाय 'गिबि हादरगेजेरारि टाइ सोल्लोथाइ' सन्मिलनाव बाहागो लानानै गं 19 हादरनि टाइ पण्डितफोरजों आह'म रावनि सोमोन्दै सावरायनायाव बाहागो लादोंमोन। बे जथुम्मानिफ्राय फैफिननानै धेमाजीनि प्रमद भवनआव 1981 मायथाइनि 8 एप्रिलाव सा-सान्जा (पुर्वांसल) टाइ साहित्य सभाखौ दायो आरो गायसनगिरि आफादगिरिनि बिबान आजावो। 1984 मायथाइयाव बेंककआव खुंनाय नैथि हादरगेजेरारि टाइ सोल्लोथाइ जथुम्मायाव हांखायहरजानानै दान मोनसे सम थाइलेण्डनि चियांमाइ नोगोरमायाव थानानै टाइ राव-हारिमुनि सोमोन्दै फरायसडो। बिथांनि सेराव फैनानै थाइलेण्ड, फ्रान्स, अष्ट्रेलिया, जार्मानी आरि गोबां हादरनि बिजिरसंग्राफोरा बिथांनि नआव आलासि महरै थानानै बिजिरसंनाय हाबाखौ मावदोंमोन। टाइ आह'म राव-हारिमु सोल्लोनाय बे बिजिरसंगिरि फोरा जादों-ड° बान्सप बन्दुमेधा, खुन काइ श्रीनिम्मान हेमिन्दा, ड° प्रमाहा मालिन्य, ड° बेन जन तारुवेल, ड° जांबार्लि, बिबुंगोरा राणु बिछाचिन, आचिफा पुन्य मेधा आरो गोबां मुं गोनां मुं गैयि सोल्लोसाफोर।

आसामनि बे खर'निफ्राय बै खर'सिम टाइ राव-हारिमु गोसारनायनि थाखाय गिदिंबायग्रा मलुं डम्बरु देवधाइ फुकनआ डिब्रुगड् जिलानि लेडेरीयाव खुंनाय पुर्वांसल टाइ साहित्य सभानि जिथि जथुम्मानि अखानायै 1993 मायथाइनि फेब्रुवारि दाननि 15 खालारखालि बेलासि समाव हरखाब बिखानि बेरामाव डिब्रुगड् देहा फाहामसालियाव जिउ गारो।

### कृष्णाकान्त सन्दिकै :

1898 मायथाइयाव कृष्ण कान्त सन्दिकैया ज'रहाटाव जोनोम मोनो। बिथाडा बिफा राधाकान्त सन्दिकै आरो बिमा नारायणी सन्दिकैनि सेथि फिसाज्जामोन। 1913 मायथाइयाव ज'रहाट सरकारी हाइस्कुलनिफ्राय सेथि थाखोआव एन्ट्रेन्स आन्जादखौ उथ्रिनानै कटन कलेजाव फरायो। बेनिफ्राय सेथि थाखोआव आइ. ए. आन्जादखौ उथ्रिनानै कलिकातासिम थाडो आरो बैयाव संस्कृत कलेजनिफ्राय

1917 मायथाइयाव बि. ए. डिग्रीखौ लायो। 1919 मायथाइयाव कलिकता मुलुग सोल्लोसालिनिफ्राय संस्कृतनि बेद गुपआव सेथि थाखोआव सेथि जायगा आवग्रिना एम. ए. खौ उथ्रियो। बेनि उनाव बिलातसिम थांनानै अक्सफ'र्ड मुलुग सोल्लोसालिनिफ्राय गोदान जारिमिन आयदायाव मेजर लानानै 1923 मायथाइयाव एम. ए. बिमुं मोनो। 1923-27 मायथाइयाव पेरिछ आरो बार्लिन मुलुग सोल्लोसालियाव ग्रीक, लेटिन, इटालियान आरि राव सोलोडो। 1930 मायथाइयाव ज'रहाट जे. बि. कलेज गायसननाय लोगो लोगो बेनि गिबि बेथन गैयि गोरायुं जायो। 1948 मायथाइयाव गुवाहाटी मुलुग सोल्लोसालि गायसननायाव बेनि गिबिसिन उपाचार्य थिसनथाइ मोनो आरो 1957 मायथाइसिम बे मासियाव थायो।

कृष्ण कान्त सन्दिक्कैया सासे पण्डितमोन। जुनियायै संस्कृतआव आखा-फाखा पण्डितमोन। बिथानि सेबखांजानाय इंग्रजी बिजाबा गांथाम- श्रीहर्षनि नैषध चरितनि इंग्रजीयाव राव सोलायनाय आरो टीकानि सोमोन्दै लिरनाय बिजाब 'निषध सरित' (1934), स'मदेविनि जशस्तिलकनि बिथायाव लिरनाय बिजाब 'जशस्तिलक एण्ड इन्डियान कालसार' (1949) आरो माराठी लिरगिरि प्रबर सेननि नंगुबै बिजाब सेतुबन्धननि राव 'सेतुबन्धन'। बेनि अनगायैबो गुबुन गुबुन बिजिरसंनाय लाइसिफोराव भारतनि सोमोन्दै मोननैसो लिरबिदां लिरदोंमोन। 1951 मायथाइयाव खुंनाय अखिल भारतीय प्राच्यबिद्या सन्मिलननि लक्ष्णौ जथुममानि आफादखौ दैदेनदोंमोन। 1953 मायथाइयाव वालटेयाराव खुंनाय गेजेरारि-मुलुग सोल्लोसालि आफादनि आफादगिरिमोन। असमीया थुनलाइयावबो गोसो गुदुंमोन। फरायसालियाव फरायफुनाय समावनो नकुलन चन्द्र भुया मोनजों लोगो नांनानै आखाइजों लिरनाय लाइसि दिहुनदोंमोन। सिफुं, मिलन, आबाहन, चेतना लाइसि आरि खौरां बिलाइफोराव लिरबिदां लिरदोंमोन। कृष्ण कान्त सन्दिक्कैनि लिरनाय बेफोर बिजाबफोरा दोनथुमजादों। सेंग्रा समाव मोननैसो मेथाइबो लिरदोंमोन। 1929 मायथाइयाव आसाम सात्र सिन्मलननि आफादखौ दैदेनदोंमोन। आसाम साहित्य सभानि गुवाहाटी जथुममानि आफादगिरि जादोंमोन (1937)। भारत सरकारआ बिथानो 1955 मायथाइयाव पद्मश्री आरो 1967 मायथाइयाव पद्मभुषण बिमुंजों मान होदोंमोन। गुवाहाटी आरो डिब्रुगड़ मुलुग सोल्लोसालिया बिथानो डि. लिट. बिमुं होदोंमोन।

बिथाडा जे. बि. कलेजनि बिगियान बिफाननो जिसे रोजा आरो चन्द्रकान्त अभिधाननि थाखाय बाजि रोजा रां दान होदोंमोन। थौनायनि सिगां सिगां गावनि बिजाबबाखिखौ गुवाहाटी मुलुग सोल्लोसालिनो दान होलाडो।

### पद्मनाथ ग'हाइ बरुवा :

आसामनि सासे बयजोंबो मानिजाग्रा आरो सिबिजाग्रा थुनलाइगिरि पद्मनाथ ग'हाइ बरुवानि जोनोमा जादोंमोन 1871 मायथाइनि 24 अक्ट'बरखालि सा लक्षिमपुरनि नकारि गामियाव। बिथानि बिफानि

मुडा घिनाराम आरो बिमानि मुडा लक्षी देबीमोन। बिथाडा सा-लक्षिमपुरनिफ्राय वृत्ति आन्जादाव उश्रिनानै शिवसागर हाइस्कुलाव मुं थिसनदोंमोनब्लाबो उनाव कहिमा हाइस्कुलनिफ्राय 1890 मायथाइयाव एन्ट्रेस आन्जादखौ उश्रियो। गोजौ सोलोंथाइनि थाखाय बिथाडा कलिकतासिम थाडो आरो एफ. ए. आरो आयेन फरायो। बिथाडा गिबियाव कहिमा गेजेर फरायसालियाव गाहाइ फोरोंगिरि महरै हाबो आरो उनाव ज'रहाटआव बोसोरनैसो फोरोंगिरि हाबा मावनानै 1893 मायथाइयाव तेजपुर नरमाल स्कुलाव फ़ैयो आरो बेयावनो थाजोरै थानो हमो।

पद्मनाथ ग'हाइ बरुवाहा खन्थाइ, नायजाब, सल'मा आरिया थुनलाइनि गासैबो बाहागोआव आखाइ दंमोन। बिथानि मुंदांखा खन्थाइ बिजाबफोरा जादों- 'जुरणि', 'लीला', 'फुलर चानेकी'। जारिमिनारि नायजाबफोरा जादों- 'जयमती', 'गदाधर', 'साधना', 'लाचित बरफुकन', 'बाणरजा'। मिनिथाव नायजाबफोरा जादों- 'गावबुद्धा', 'टेट'न तामुली', 'भुत ने भ्रम'। सल'माफोरा जादों- 'भानुमती', 'लाहरी'। जिउखौरां- 'म'र स'वरणी', 'साहित्य संग्रह', 'जीवनी संग्रह'। दोहोरोमारि बिजाब- 'श्रीकृष्ण', 'गीतासार' आरो गोबां। बिथाडा सुजुनाय लाइसिफोरा जादों- 'बिजुली', 'आसाम बन्ति' आरो 'उषा'। बिथाडा शिवसागराव खुंनाय साहित्य सभानि गिबि जथुम्मानि आफादगिरिमोन। बिथाडा तेजपुरनि बाण रंगमन्सजों गोथौयै लोब्बा दंमोन। गोबां बोसोर तेजपुर पौरसभानि आफादगिरिमोन। बिथाडा गुबुन गुबुन थुनलाइयारि आरो समाजारि आफादनि जथुम्मायाव आफादगिरि जाना दैदेनदोंमोन। बे थुनलाइगिरिया 1946 मायथाइनि 7 एप्रिलखालि सोरगोआरि जायो।

### सोंथि :

1. आह'मफोरा सिगाडाव मा हारिनि मानसिमोन?
2. आह'मफोरनि गोजाम थाग्रा जायगाया बबेयावमोन?
3. आह'मफोरा बेसेबां बोसोर आसामखौ खुंदोंमोन?
4. आह'मफोरनि गोजाम रावा मामोन?
5. आह'मफोरनि मोननैसो फोरबोनि मुं लिर।
6. लिरसुंथाइ लिर :
 

(क) लाचित बरफुकन	(ख) सती जयमती
(ग) टेडाइ म'हन	(घ) देवधाइ फुकन
(ङ) कृष्ण कान्त सन्दिकै	(च) पद्मनाथ ग'हाइ बरुवा





## काछारनि सुबुं हान्जाफोर

आसामनि खोलाहाथिं थानाय गंथाम जिलानि मुंफोरा जादों -काछार, हाइलाकान्दि आरो करिमगन्ज । बे जिला मोनथामनि गेजेरजों बोहैलानाय दैमानि मुडा बराक । बे दैमानि मुंजों लोब्बा लाखिनानै जिला गंथामखौ फंसेयैनो बराक सेरफां होननाय जायो ।

आथिखालाव बराक सेरफाडाव गुबुन गुबुन हारि आरो हारिसानि सुबुं हान्जानि मानसिफ्रा रायजो जागासिनो दड' । समाजारि (गायामारि) रांखान्थियारि, राजखान्थियारि बिथिडाव बायदि समाव जानाय जाथायारि दोहौनि जाउनाव भारत हादरनि गुबुन गुबुन हालामनि मानसिफोरा बराक सेरफांआव फैनानै रायजो जानो लादोंमोन । मोनफ्रोम सुबुं हान्जानि मानसिया गावनि राव-हारिमु सोरजिनायखौ थियै लाखिदों । गुबुन गुबुन राव आरो हारिमुनि मानसिफोरा जयै थालायनायनि थाखाय सुबुंबिगियानिफोरा बराक सेरफांखौ Anthropological Garden थामहिनबा सुबुंबिगियाननि बिबारबारि होनना मुं दोनदों ।

बराक सेरफांआव रायजो जानाय सुबुं हानजाफोरनि मुं, सुबुं हान्जाफोरनि गाहाइ रंजाथाइ फोरबोनि मुं आरो फोरबो खुंनाय समखौ सिडाव मुंख'नाय जाबाय ।

सुबुं हान्जानि मुं	गाहाइ फोरबोनि मुं	फोरबो खुंनायनि सम
बंगआरि समाज	{ मेसेडारि दुर्गा फुजा (हिन्दु) { ईद-उल-फितर मुछलमान	-- --
मणिपुरी	लाइ हराउबा	नबेम्बर
बिष्णुप्रिया (मणिपुरी)	रासजात्रा	नबेम्बर
भ'जपुरी	छट पुजा	नबेम्बर
असमीया	बिहु	एप्रिल
राजबंशी	बिहु	एप्रिल
राजस्थानी	महाबीर जयन्ती	मार्च
बर्मन (डिमासा)	बुसु	जानुवारी

रंमाइ नागा	गाण्ड नाई	नबेम्बर/डिसेम्बर
मार	चिकपुइ रुए	5 डिसेम्बर
कार्बि	रेस' निमच आरं गाजे	फेब्रुवारी
रियां	हजागिरि	नबेम्बर
खासिया	सेनखासि चैनग्रिते	फेब्रुवारी
भेइकेइ	चावयां कुट	अक्ट'बर
कुकि, पैते	मिमकुट	जानुवारी
मिज'	चापचार कुट	मार्च
सिमटे, गांते	कुट	नबेम्बर
चाकमा	बुद्धपुर्णिमा	एप्रिल
चिरु	चाकथारकम	अक्ट'बर
चरै, रांखल, शाकचेप	ख'दय	फेब्रुवारी
नेपालि	दशेइ तिहार	सेप्टेम्बर/अक्ट'बर

चान्द्रमाहनि बादियैसो इसलाम दोहोरोमनि बोसोरखौ साननाय जायो। बेनि थाखायनो ईद-उल-फितर फोरबोनि समा बोसोरफ्रोमबो सोलाय सोल' जायो। ख्रीष्टान दोहोरोमारिफोरनि गाहाइ फोरबो बरदिना 25 डिसेम्बर खालाराव खुंजायो।

बराक सेरफांनि मानसिफ्रा सरासनम्रायै मोनथाम रोखोमै जिउ खांनाय राहा दं-आबादारि, फालांगि आरो साखि। बराक सेरफांनि सानैसो मख'जाथाव सुबुंफोरनि सोमोन्दै गाहायाव सुंथाबै सावरायनाय जाबाय।

आसाम फुटबल एस'सियेसना 1946 मायथाइयाव गायसंजादोंमोन। बराक सेरफांनि बांला समाजनि **सुनील म'हना** बे एस'सियेसननि गायसंगिरि रां थुबिलगिरिमोन। बिथाडा आसाम हकी एस'सियेसननिबो आफादगिरि सायख'जादोंमोन। 1951 मायथाइयाव मुम्बाइयाव आरो 1957 मायथाइयाव हायदाराबादाव खुंजानाय सन्त'ष ट्रफि जोलुर बादायलायनायाव बिथाडा आसाम राज्योयारि जोलुर हान्जानि सामब्लायगिरिमोन।

आइजो समाजनि जौगानायनि थाखाय अराय जिउ सोर्जिलु खामानियाव मुखुब थायोमोन **मालती श्यामा**। बिथांनि दैदेननायाव 1938 मायथाइयाव 'नारी कल्याण समिति''आ गायसनजादोंमोन। आइजोफोरनि रोंग'थि जौगासारहोनायनि थांखियै बै आफादा बायदि मावबिथांखि नाजावदोंमोन। मालती श्यामनि गोसो मोदोमै नाजानायनि जाउनाव बराक सेरफांनि आइजो समाजा समाजारि होबथानायखौ नेवसिनानै 1935 मायथाइयाव गिबियै रंजासालि जौसाडाव गसंदोंमोन।

सा-हानजा भारतनि मोनफ्रोमबो सुबुं हान्जानि गावनि सुबुं मोसानायनि आखुथाइफोरा बिसोरनि आजौ-आजैनि जारिमिन। रंजाथाइ-फोरबो आरिनि जोबोर गोनांधार बाहागोयानो जाबाय मोसानाय रोजाबनाय। **मुकुन्द दास भट्टाचार्य**आ सुबुं मोसानायनि सरैखाथि, फोसावनाय आरो गोसारहोनायनि बिथिडाव मुख'जाथाव बिहोमा होलांदों। अराय जिउ सोर्जिनायनि गनायथि महरै बिथांनो 1997 मायथाइयाव 'बिष्णुराभा बान्था' होनाय जादोंमोन।

आसामनि जारिमिन आरो गोदोमिन संजिरनायनि बेलायाव **राजम'हन नाथनि** बिहोमाया इसेल' नडा। बिथाडा सासे इन्जिनियारमोन। नाथाय बिथांनि हास्थायनायनि थिलिया जारिमिन आरो संजिरनाय। बे बिथिडाव बिथांनि मुख'जाथाव बिजाबनि मुडा "The Background of Assamese Culture." बिजाबा गिबियावनो फोसावजादोंमोन 1948 मायथाइयाव। श्रीमन्त शंकरदेवनि थुनलाइ आरो सानथौनि बागैबो राजम'हन नाथआ नायबिजिरदोंमोन। तिनिचुकीया सोहोराव 1958 मायथाइयाव खुंजानाय 'असम साहित्य सभा'नि जिथामथि ज'थुम्मायाव बिथाडा जारिमिन दालाइनि आफादगिरिमोन।

जारिमिनगिरि **कामालुद्दीन आहमेद**आ करिमगन्ज जौमा फरायसालिनि जारिमिन आयदानि गाहाइ बिबुं गोरामोन। उननि समाव बिथाडा गोरायुं जादोंमोन। बिथांनि सुजुनाय थुनलाइ लाइसिनि मुडा 'दिग्वलय'। आसामनि आरिमु आरो लंथाइनि बागै लिरनाय बिथांनि बिजाबनि मुडा जाबाय "The Art and Architecture of Assam (1994)। जौसेनिबो बांसिन संजिरथाइयारि रायथाइजों लोगोसे बिथाडा सल'मा आरि सोर्जिलु थुनलाइबो रनसायलांदों।

बराक सेरफांनि बर्मण समाजनि माखासे मुख'जाथाव सुबुंफोर जैरै-नन्दन बर्मण, मणिचरण बर्मण, नलिनीन्द्र कुमार बर्मण आरो अनिल कुमार बर्मणमोननि मुखौबो रायखांजायो।

राजमन्थ्रि फोलेरनि **नन्दलाल बर्मणा** सासे समाज सिबियारिमोन। सासे गोहोगोरा फालांगिरि महरै बिथाडा समाजाव मान मोनोमोन। बर्मण समाजनि मानसिया बिथांखौ मान होनानै 'मिलाउ' आरो गुबुन समाजनि मानसिफ्रा "माहाजोन" होना गाबज्रियोमोन। सोलौंथाइगिरि नन्दलाल बर्मणा गामिनि गथ' गथाइनि सोलौंथाइनि थाखाय काछार जिलानि बरखलायाव 1901 मायथाइयाव गंसे फरायसालि गायसंदोंमोन। फरायसालिनि मुडा "राजा ग'बिन्द चन्द्र मेम'रियेल स्कुल"।

डिमासा रावबिगियाननि सायाव गिबि बिजाब रनसायदोंमोन **मणिचरण बर्मणा**। नैजि जौथाइनि गिबि बाहागोयाव फोसावजानाय बिथांनि बिजाबनि मुडा "हैडिम्ब भाषा प्रवेश"।

**नलिनीन्द्र कुमार बर्मणा** सासे फोरोंगिरिमोन। 1930 मायथाइनि जुन दानाव दानि डिमाहासाव जिलानि राजथावनि हाफ्लंनि मिसन फरायसालियाव बिथाडा फोरोंगिरि महरै गावखौ थिसनदोंमोन।

डिमासा हारिनि जारिमिन आरो दोरोंनि बागै बिथाडा गुवारै फरायसंदोंमोन। बेनि आयदानि बागै लिस्नाय बिथानि बिजाबनि मुडा "The Queen of Cachar or Herambo and the History of the Cacharis". डिमासा समाजाव शराधरनि गोनांथार बाहागोया जाबाय कीर्त्तन। नलिनीन्द्र कुमार बर्मणा शराधर कीर्त्तन खबामनि गांसे सुजुनाय बिजाब दिहुनो। बे बिजाबनि मुडा "हैडिम्बराज ग'बिन्दा चन्द्रकृत हिन्दु शास्त्रीय श्राद्धादिर कीर्त्तन गीतिका"।

फरायसा समनिफ्रायनो **अनिल कुमार बर्मणा** समाज सिबिनाय खामानियाव सिगांबोदोंमोन। 1942 मायथाइयाव बिथाडा "डिमासा छात्र समिति" मुनि मोनसे आफाद दादोंमोन। खामानि जिउआव आयेन फालांगियाव मुखुब थायोब्लाबो बिथाडा गुबुन गुबुन समाजारि हारिमुवारि आरो सोलोंथाइ फंसथानफोरजों लोब्बा दड'मोन। गोबां सानसिम बिथाडा "निखिल काछर हैडिम्ब बर्मण समिति"नि आफादगिरिमोन।

रडमाइ नागा सुबुं हान्जानि **गाइनगामलडः कामेइया** आसाम राज्योयारि जोलुर हान्जानि गेलेग्रामोन। गावनि समाजाव बिथाडा गेलेनाय हारिमुखौ गोसारहोदोंमोन। समाज सिबियारि रियाड लुयाड रिप'व रडमाइआ नागा समाजनि आरिमु-हारिमु गोसारनायनि थाखाय अरायजिउ खामानि मावदोंमोन।

इरुंभम चन्द्र सिंहआ मणिपुरी समाजनि गिबि रांखान्थि बिगियाननि अनार्स गोनां आरिमुजालिया मोन। गामिनि गथ'-गथाइनि सोलोंथाइनि थाखाय बिथाडा बायदि रोखोमनि मोजां खामानि मावनो नाजादोंमोन। गोरिब फरायसाफोरखौ हेफाजाब खालामनो थाखाय मोनसे रां थुबिल दानायजों लोगोसे बिथाडा गंसे फरायसालि गायसनदोंमोन फरायसालिनि मुडा दा 'खेलम हाइस्कुल'।

**सौगाइजमे बसन्त कुमार सिंह**आ सन्ट'ष ट्रफि जोलुर बादायलायनायाव आसाम राज्योआरि हान्जानि गेलेग्रामोन। उननि समाव बिथाडा राज्योयारि थाखोयाव रेफारिबो जादोंमोन।

मणिपुरी बिष्णुप्रिया समाजनि **राजकुमार जेनारिक सिंह** आरो **गुरु बिपिन सिंह**मोना मोसानाय आरिमुनि थिलियाव सानै गोसोखांजाथाव सुबुं। फरायसाफोरखौ मणिपुरी मोसानाय आरिमु फोरोंनायनि थाखाय राजकुमार चेनारिक सिंहखौ रबीन्द्र नाथ ठाकुरा शान्तिनिकेतनआव लेंनानै लांदोंमोन। मोसानाय आरिमु सोर्जिनाय थिलियाव बिहोमा होनायनि थाखाय गुरु बिपिन सिंहनो 1966 मायथाइयाव 'संगीत नाटक अकाडेमी बान्था' होनाय जादोंमोन। उननि समाव बिथाडा मध्यप्रदेश सरकारनिफ्राय 'कालिदास सन्मान' मोनदोंमोन। बिथाडा कलकातायाव 'मणिपुरी नर्तनालय' मुडै मोसानाय आरिमु सोलोंथाइनि मोनसे फसंथान गायसंलांदों।

**जगत म'हन सिंह**आ सासे फोरोंगिरि आरो मोजां थुनलाइगिरि। बिष्णुप्रिया रावाव बिथाडा

खन्थाइमा, नाटक (नायजाब) राइथाइ आरि लिरदोंमोन। बिथाडा निखिल बिष्णुप्रिया मणिपुरी साहित्य परिषदनि गायसनगिबि आफाद गिरिमोन।

### सोंथि :

1. सुबुं बिगियानगिरिफोरा बराक सेरफांखौ मा होनना बुंलांदों ?
2. बराक सेरफांआव रायजो जाना थानाय गुबुन गुबुन सुबुं हान्जाफोरा मा मा ?
3. बराक सेरफांनि मानसिफोरनि गाहाइ जिउखां राहाया मा ?
4. 'The Background of Assamese Culture' बिजाबखौ सोर लिरदोंमोन ?
5. हायदराबादाव खुंलांनाय सन्त 'ष टूफि जोलुर बादायलायनायाव आसामनि राज्योयारि जोलुर हान्जानि सामलायगिरिया सोरमोन ?
6. लिरसुंथाइ लिर :
 

(क) राजम'हन नाथ	(ख) कामालुद्दीन आहमेद
(ग) नन्दलाल बर्मण	(घ) नलिनीन्द्र कुमार बर्मण



## कारबिफोर

कारबिफोरा आसामनि गाहाइ जनजाति। रुंसारि मुंदांखा महरगिरि बिष्णु प्रसाद राभाया आमेरिकानि संदिहुनगिरि कलम्बाछजों रुजुना कारबिफोरखौ आसामनि कलम्बाछ होनना बुंदोंमोन। बे बुंथिखौ बानबुंथाइ होनानै मदद होदोंमोन कलिकतानि मुंदांखा जारिमिनगिरि सुनिती कुमार चट्ट'पाध्याय बिथाडा।

**थानाय जायगा :** आसामनि गेजेराव थानाय कारबि आंलं आरो सोनाब कारबिआंलंआनो जादों कारबिफोरनि गाहाइ थानाय जायगा। मोननैबो जायगाखौ लाफाना कारबिआंलं गावखुंथाइ परिषद दानाय जादों। बेयाव सा 26 बिसायख'जानाय सोद्रोमा आरो साब्रै सायख'जानाय सोद्रोमा दं। गासै मासिया मोन 30। बेनि हा कालिया 10,343 बर्ग किल'मिटर। कारबिफोरखौ शनितपुर, बिश्वनाथ, लक्षिमपुर, कामरुप, स'नापुर आरि जायगायावबो थानाय नुनो मोनो। बिसोर मणिपुर, नागालेण्ड, मेघालय, अरुणाचल आरि राज्योआवबो एफा-एनै गोसारनानै दं।

**गाननाय-जोमनाय :** कारबिफोरा गाननाय-जोमनायाव जोबोर दोहोनि। हौवा आरो हिन्जावफोरनि सि-जोमा गुबुन जनजातिफोरनिबादि गुबुन गुबुन। हौवा मानसिफोरनिया हान्थु बारनाय पे छेलें, चइ हंथर, चइ इक, चइ लक (कारबि जेकेट) पह' आरियानो गाहाइ। पह'आ (कारबि माफला) 4 निफ्राय 5 इन्सि गुवार आरो बानिफ्राय द'फुटसिम गोलाउ। बेनि फारनैबो खर'थिं बायदि गाबजों बिबार एरनाय जायो।

**चेपानबु :** बेयो 3 इन्सिफ्राम गुवार आरो गोलावै 6 फुट। फारनैथिंबो खर'थिं खाउरि लागायनाय जोंखोल गोसोम सि। बेखौ सेंग्राफोरखौ बाहायनाय नुनो मोनो।

**हिन्जावफोरनि गाननाय-जोमनाय :** पिनि, पेकक, वानकक पे छेलें, पे खनजारि, पे छारपि आरिया कारबि आइजोफोरनि गाहाइ खसाब।

**पिबा :** 1½ फुटनिफ्राय 2 फुट गुवार आरो 6 फुट गोलाउ फारनै खर'आव बायदि गाबनि बिबार एरनानै खाउरि लागायनाय गोसोम जोंखोल सि। बेखौ आइजोफोरा गावनि गथ'खौ बाना लानो बाहायो।

**स'ना-रुफा :** हेक हिकि, नथेंपी, न'लांपं, न'जांपं, न'जांछइ, लेक रुवे, लेक पांखारा, लां आव', रइ पांखारा, रइ पाहु आरियानो कारबि आइजोफोरनि गहेना।

**फोरबो-फालिथाइ :** पें हेमफु, रंकेर, चजुन आरियानो कारबिफोरनि गाहाइ फोरबो। पें हेमफुआ जादों न'खरारि फोरबो। बे फोरबोआव सरासनस्रा मोनथाम फुजा थायो। रित् आंलं, बुइचम आरो पें। बे मोनथाम फुजाखौ बोसोर जागायजेनखालि सानसे खुंनाय जायो। जाहाथे बोसोराव जेबो खैफोद-आफोद जाया बेनि थाखाय इसोरनि सेराव आर'ज गाबो। बेखौनो न'खरारि फोरबो (Household Festival) बुडो।

**चजुन फोरबो (Family Festival) :** बे फोरबोखौ बोसोरफ्रोमबो खुंनाय जाया। 4, 5 एबा 9 बोसोरनि उन उन खुंनाय जायो।

**रंकेर फोरबो (Community Festival) :** बेखौ गामिनि फोरबो बुंनाय जायो। बे फोरबोखौ बोसोर हाबजेननायावनो खुंनाय जायो। फुजानि गाहाइ बिथायाव दाउ, बोरमा, दाउदै आरि बाउनानै मोदाइखौ गोजोन बे फुजाखौ खुंनाय जायो।

**माहारि :** कारबिफोरनि गेजेराव मोनब्रै माहारि दं। बेफोर जाबाय- (1) टिमुं, (2) टेस्न, (3) टेरां, (4) इंहि आरो (5) इंति। बे मोनफ्रोमबो माहारियाव दालाइ माहारि थाबावो।

**कारबि लाइमोन फोरबोमा :** बोसोरफ्रोमबो 15-19 फेब्रुवारीसिम बे फोरबोमा तारालांछ'खौ डिफु सोहोराव खुंनाय जायो।

कारबिफोरनि गेजेराव असमीया माहारियारि जिवाव बिहोमा होना अरायनि गोसोखांथाव जाना थानाय गेदेमा सुबुंफोरनि सोमोन्दै गाहायाव सुंदयै सावरायनाय जाबाय।

### छेमछनछिं इंति :

बिथाडा जादों कारबिआंलंनि सिमां सुजुग्रा आरो महरगिरि। बिथाडा 1910 मायथाइनि 8 फेब्रुवारी खालारखालि सोनाब कारबिआंलंनि टिका हाजोआव जोनोम मोनो। बिफानि मुडा थेंकुरछिं इंति आरो बिमानि मुडा रुथ माधवी ( काजिर तिमुंपी)। 1916 मायथाइयाव ग'लाघाट मिछन स्कुलाव सोलोंथाइखौ जुरिजेनो आरो 1928 मायथाइयाव ग'लाघाट बेजबरुवा हाइस्कुलनिफ्राय सेथि थाखोआव मेट्रिक आनजादखौ उश्रियो। गोजौ सोलोंथाइनि थाखाय गुवाहाटी कटन कलेजाव फरायदोंमोनब्लाबो बै समाव उदांमि सोमावसारनायनि थाखाय फरायनाया आद्रा जायो। उनाव 1933 मायथाइयाव चिलेटनि मुरारी चान्द कलेजनिफ्राय जोबथा आनजादखौ मोजाडै मोजां उश्रिनानै कारबि हारिनि गिबिसिन बि.ए. डिग्री लानाय सुबुं महरै मिथिजायो। बिथाडा उनाव ग'लाघाट बेजबरुवा हाइस्कुलाव फोरोंगिरि हाबा मावदोंमोन। 1933 मायथाइयाव मिकिर हिलच ट्रेक दानायनि उनाव इंराज सरकारआ लिंनो लाबोनानै बिथांखौ 1934 मायथाइयाव नगाव जिलानि सोलोंथाइ बिफानाव लेडाइ नायदिंगिरि (SI) मासियाव थिसनो। बिथाडा गावनो बिजाब लिरनानै असमीया बिजोंनि फरायसालिफोराव उफ्रा बिजाब महरै फरायहोयो। बिथाडा लिरनाय बिजाबफोरा जादों-'बितुछ आकिताप', 'कालाखा आकिताप', 'तेमपुरु' आरो 'वपी'।



### छामछिं हान्से

छामछिं हान्सेया सासे लिरगिरि, खन्थाइगिरि, मेथाइ लिरगिरि, सल'मा लिरगिरि, सावथुननि दिथागिरि, राजखान्थिगिरि आरो थुनलाइ मोजां मोनग्रा मानसिमोन। बिथाडा नगाव जिलानि सरुबाट मौजानि सिडाव थानाय पण्डितघाट एबा आर्हिकेलक मुंनि गामियाव 1948 मायथाइनि एप्रिल दाननि 18 खालारखालि जोनोम मोनो। बिफानि मुडा जयसिं हान्से आरो बिमानि मुडा काएन टेरनपीमोन। उन्दै समाव नखरा गोजाम जायगाखौ नागारनानै हंक्राम मुंनि जायगायाव थाडो आरो बेयावनो थाजोरै थानो लायो। बिथाडा हंक्राम गुदि फरायसालियाव सोलोंथाइखौ जागायजेनो। उनाव टीका गेजेर फरायसालियाव आरो कामपुर गेजेर फरायसालियाव सोलोंथाइ लायो। डिफु सरकारी बालक बिद्यालयाव मुं थिसनदोंमोनब्लाबो मेट्रिक आन्जादखौ बारग'नो हायैयाव सान्थ्रि हान्जानि साख्रि मावो। थाम बोसोरनि उनाव साख्रि गारनानै 1967 मायथाइयाव बैठालांछ गोजौ फरायसालिनिफ्राय गोजौ फरायसालिनि जोबथा आन्जादखौ बारग'यो। 1973 मायथाइयाव बि.ए. डिग्री लायो।

राव-थुनलाइ गोसारनाय आरो जौगानायनि थाखाय बिथाडा माखासे बिजाब कार्बि आरो असमीया रावाव सेबखांना दिहुनदोंमोन। बेफोरनि मादाव 'ताइ हाईमु', 'कार्बि प्रणयी गीत', 'छाबिन आलुन' (कार्बि रामायण), 'कुमलीन', 'र'मीर एमुठि कार्बि कविता' (राव दानस्लायनाय) आरो 'छेर हनजें' मुंनि बिजाबफोरा मख'जाथाव। 1983-84 मायथाइयाव कार्बि लालमेत आमेइर (कार्बि साहित्य सभा) नि गाहाइ नेहाथारि आरो 1984-85 मायथाइयाव आफादगिरि जादोंमोन।

1985 मायथाइयाव बिधान सभानि साधारण बिसायख'थियाव डिफु समष्टिनिफ्राय बिसायख'जानानै आसाम मन्थ्रिआफादनि केबिनेट मन्थ्रि जानो हादोंमोन। 1998 मायथाइनि जानुवारी दाननि 13 खालारखालि बयखौबो नागारनानै अरायनि थाखाय रुंसारि जायो। कार्बि राव-थुनलाइ मोजां मोनग्रा आरो सासे लामा दिन्थिगिरि महरै बिथांनि मुडा जोंनि गेजेराव जेब्लाबो थांना थागोन।

### बंलं तेरां

कार्बि थुनलाइनि लामा दिन्थिगिरि बंलं तेरां बिथाडानो कार्बि थुनलाइनि लिरजेननाय महर होगिरि। 1909 मायथाइनि अक्ट'बर दाननि 10 खालारखालि डिलाइ दैमा जिंनि निहांलांछ मुंनि जायगायाव जोनोम मोनो। बिफानि मुडा छार तेरां आरो बिमानि मुडा कारें तिच्छपीमोन। बिथाडा 13 बोसोर बैसोनिफ्रायनो लिरनाय हाबाखौ जुरिजेनदोंमोन। बिथाडा Word Book, आदाम आछार (हाबा-नेम), रुकाछेन, हाईमु, छेर हंथम, कार्बि कपुछन, कार्बि चरंजे, आरण आतें, रंलिन, छार आलुन आरो छार लामछाम बिजाबफोरखौ लिरना दिहुनो। 1973 मायथाइयाव कार्बि साहित्य सभाया कार्बि थुनलाइयाव आखाइ होजेननाय सुबुं महरै बान्था होयो। आसाम सरकारनिफ्राय अनसुंथाइ मोननायजों लोगोसे थुनलायारि पेन्सनबो मोनो। बे गेदेमा सुबुडा बयखौबो नागारनानै 2001 मायथाइनि जुलाइ दाननि

17 खालारखालि रुंसारि जायो।

### लंकाम तेरण

मुंदांखा थुनलाइगिरि लंकाम तेरणनि जोनोमा 1932 मायथाइयाव जादोंमोन। बिथानि बिफानि मुडा डिप्लु तेरण आरो बिमानि मुडा काचाइ हान्सेपीमोन। 1957 मायथाइयाव काचे रंहांपीजों हाबा जायो। 1964 मायथाइयाव मिक्किर हाजो जिला परिषदनि Public Relation Officer मासियाव थिसनजायो। बिथाडा कार्बि आदरबारनि गाहाइ नेहाथारि आरो आफादगिरि मासिबो मोनदोंमोन। बिथाडा कार्बि साहित्य सभानि गायसनगिबि आफादगिरि आरो 1986 मायथाइनि कामपुरनि जथुम्मायाव आसाम साहित्य सभानि लेडाइ आफादगिरि मासियाव थानानै हाबा मावदोंमोन। बिथांजों लिरजानाय, सुजुजानाय आरो रावसोलायजानाय गां 41 बिजाबफोरनि मादाव मखजाथाव बिजाबफोरा जाबाय- रे केछें, टामाहिदि, किताप किमि, कार्बि लामकुरु, कार्बि जनग'ष्ठि, कार्बि लामकुरु-लामछें, कार्बि भाषा परिचय, कार्बि लामताछाम बायदि बायदि।

बेफोरबादि कार्बि थुनलायाव आखाइ होजेननाय सुबुंफोरनि गेजेराव मुं लानो हायो-पद्मश्री रंबं तेरां, फुकन चन्द्र फांच, केहाइ बे, लुन्से तिमुं, छिंक्र, खनछिं टकबि, बिदरछिं रंपि, मन्दलछिं बे, पारि रंपि, धनीराम रंपी, काबन नेली तिमुंपी, धनेश्वर इंति आरो गोबां।

### सोंथि

1. आसामनि कलम्बाच होनना सोरखौ बुंनाय जायो?
2. कार्बिफोरनि दोरोडारि गाननाय जोमनायनि सोमोन्दै लिर।
3. कार्बिफोरनि फोरबो-फालिथाइनि सोमोन्दै लिर।
4. कार्बिफोरनि गाहाइ माहारिया मा मा?
5. कार्बि समाजनि हिन्जावफोरा गाननाय मोननैसो रोखोमनि गाननाय-जोमनाय आरो गहेनाफोरनि मुं लिर।
6. लिरसुंथाइ लिर :
 

(क) छेमछनछिं इंति	(ख) छामछिं हान्से
(ग) बंलं तेरां	(घ) लंकाम तेरण



## क 'च राजवंशीफोर

जिगुजौ जौथाइनि गिबि जिथाइनिफ्राय नैजि जौथाइनि जोबनायथिडै जायफोर सुबुं बिगियानि संजिरगिरि, सरकारि सुबुं सानखोयाव खामानि मावग्रा कमिचनार, डाक्टर एबा देहा फाहामगिरि, समाज बिगियानि आरिया क 'च राजवंशीफोरनि बागै संजिरदोंमोन बिसोरनि बांसिनानो गनायोदि आसाम, उत्तर बंग, नेपाल, भुटान, बिहार, मेघालय आरो बांलादेशआव जायफोर राजवंशी सुबुंफोर दड बिसोरनि गुदियानो जाबाय क 'च। आसामाव बेनि थाखायनो बिसोरखौ बुंनाय जायो क 'च राजवंशी। बिसोरो हिन्दु दोहोरोमारि सुबुं। गोबाडनो क 'च आरो राजवंशीफोरखौ जुदा जुदा महरै फसंनो नागिरो। गोबां जायगायाव खालि क 'च आरो खालि राजवंशी होननानै लिरोब्लाबो राजवंशीनि गुदियानो दि क 'च, बेखौ गनायाब्लानो थानो हाया। मेघालय आरो मेघालयनि आसाम सिमना ओनसोलाव माखासे क 'च सुबुंफोरा गोजामथार क 'च राव आरो हारिमुखौ फालिबोगासिनो दड। बिसोरनि बोहैथिया जाबाय आर्यथि दाहार। गुबुन फारसेथिं सोनाब आसाम, उत्तरबंग, नेपाल, बिहार आरि हालामनि राजवंशी सुबुंफोरनि राव हारिमुवा जाबाय आर्य राव हारिमु जायफोरखौ खालि राजवंशी होननाय जायो। बिसोरो हिन्दु दोहोरोम नाजावनानै राजवंशी होनना सिनायथि होयो। गोबाडनो खालि क 'च महरै आर्य राव हारिमुखौ फालिबोदों। मोननै जुदा रोखोमनि राव हारिमु फालियोब्लाबो सुबुं बिगियान महरै गासै क 'च राजवंशी सुबुंनि गुदिया मोनसेयानो बेनो जाबाय क 'च। जायगा लायै जायगा बिसोरखौ क 'च, क 'च राजवंशी, क्षत्रिय राजवंशी एबा राजवंशी बबेयावबा खालि क्षत्रिय होननानैबो मिथिगौ। बिसोर क्षत्रिय होनना सिनायथि होयोब्लाबो आर्य क्षत्रिय नड। गासैनिबो हारिमुवाव जनजातिनि गोहोमा रोखा। सरकारि महरै बिसोरखौ जनजाति होनना सिनायथि होआब्लाबो बिसोरखौ क 'च राजवंशी जनजाति होनना बुंनाया बानगोनां। असम, बंग, बिहार, नेपाल आरो बांलादेश आरि जायगायाव बिसोर राजवंशी होनना सिनायथि होयो। उननि समाव मदाही, हाजं, जलधा, धिमाल, झल', माल', बरुवा मग आरि गोबां फिसा फिसा सुबुं हानजानि मानसिफोरा राजवंशी होनना सिनायथि होना गोजोननाय मोनोब्लाबो बिसोरनि बांसिननि गुदियानो जाबाय क 'च। बेनि बागै सानैसो पण्डितनि बुंथिखौ बेखेवनो हायो- बुकानन हेमिल्टना बुंदों-आंहा जेबो सानब्लिंनाय गैया दि, क 'च जनजातिनि गासैबो मानसिनि जोनोमा जादों मोनसे फुंखानिफ्राय आरो बांसिन राजवंशीयानो जाबाय क 'च (B.Hamilton:1809)।

1889 मायथाइनि आदम सुमारि फोरमायथियाव हान्टरआ बुंदों दि-खावसेयानो हिन्दु जनजाति महरै मिथिजानाय क 'च, पालिया आरो राजवंशी सुबुं हानजानि मानसिफोर जायफोरा क 'चबिहार राज्यो आरो

लोब्बागोनां जनजाति बिसोरो गाहाइयै मोनसे फोलेरावनो जोनोम मोननाय दालाइसा हारि (W.W. Hunter:1877)। ग्रियारचननि बादिब्ला जायफोर क'चफोरा दासिमबो हिन्दु दोहोरोमखौ सिबियो बिसोरो गाहाइयै राजबंशी महरै सिनायथि होयो । (Grierson:1903) बिजली आरो क'च, पालिया आरो राजबंशीफोरखौ सुबुंबिगियान महरै मोनसे जोलैनिफ्रायनो उजिनाय होनना बुडे (Risely:1981)। बेबादिनो जे.ए. भासनि खारिमिनाबो बेखौनो फोरमान होयो दि रंपुरनि (दासान्दि बांलादेश)राजबंशीफोरा क'च हारिनिफ्राय उजिनाय आरो मंगलीय सुबुं हान्जानि। बिसोरजों द्राबिड थैनि गलाय मोन्देर जादों होनना बिथाड सानो। नाथाय आर्यनि थैया बिसोरनि रोदायाव गैयाखौनो बुंजायो (J.A .Vass:1911)। गोजौआव मुंखनाय पण्डितफोरनि सुबुं बिगियानारि बानबुंथि बादिब्ला क'चनिफ्राय दि राजबंशीफोरनि जोनोम जादों बियाव जेबो गोनो गोथो गैया। गुबुन फारसेथिं बिसोरदि मंगलीय सुबुं हानजानि मानसि बे बाथ्राया बयजोंबो गनायजानाय।

राव बिगियाननि नागिरसंगिरि, हादोरारि आरो गुबुन हादोरारि गोजाम पण्डितफोरनि बिबुंथिनिफ्राय गोदान मुगानि पण्डितफोरा थिरांथा खालामदोंदि, क'चफोरा गुवार तिब्वतबर्मी राव फोलेरनि सुबुं। उनावहालागै बिसोरो गावनि गोजामथार राव हारिमुखौ गारनानै आर्य राव हारिमुखौ नाजावो। जारिमिनारि पण्डितफोरनि लिस्नाय जारिमिननिफ्रायबो मिथिनो मोननाय जायोदि, जिद जौथाइनि गेजेर बाहागोयाव क'च राजा बिश्वसिंहनि दैदेननायाव क'चफोरा बिसोरनि गोजाम राव आरो दोहोरोमखौ गारनानै हिन्दु दोहोरोम नाजावनानै राजबंशी जायो आरो आबुडै हिन्दु आसारजों गोरुबप्लेलाडे (A. Biswas:2005)।

बे जाथाइया जादोंमोन जरखायै सोनाब आसाम आरो साहा बंग हालामाव। बेनिखायनो दिनै दानि सोनाब आसाम थामहिनबा धुबुरी, बडाइगाव, गवालपारा, ककराझार, सिरां आरि जिलायाव साहा बंग, बिहारनि साहा ओनसोल, नेपालनि झापा, मोरं आरि जिलायाव आरो बांलादेशनि गोजाम रंपुर जिलायाव राजबंशी होननानै सिनायथि होनाय क'चफोरनि अन्जिमायानो बांसिन। बिसोरनि राव-हारिमु, हारियारि सिनायथि आरिया राजबंशी होनना मिथिजायो।

### राव आरो हारिमु

क'च राजबंशीफोरनि रावनि बागै हादरारि, गुबुन हादरारि गोबां पण्डितआ सावरायलायदों। बेनि मादाव मुंदांखाया जाबाय जर्ज एब्राहाम ग्रियारसन। बिथांखौ भारतारी रावफोरनि लामा दिन्थिगिरि होनना बुंनाय जायो। भारतनि राव संदानारि बिजाब (Linguistic Survey of India) आव बिथाडा राजबंशी रावनि बाथ्रा रायखांदों। क'च राजबंशीफोरनि बिमाराव राजबंशी रावनि गावारि सोदोब बाख्रि, मुंराइ(मुंस्लाइ), गावारि थाइजा (बिमाव) महर, सोदोब महर, खौथि आरो लिस्नाय थुनलाइ, रिसारथि, गावारि बाथ्रा दाथाइ खान्थि आरि दड। बेनिखायनो बे रावा गुबुन गुबुन गोदान भारतारि आर्य रावफोरनिफ्राय जुदा आरो गावनि आंगो आखुथाइ गोनां मोनसे राव।

क'च राजबंशीफोरनियाव गोजामथार मोनसे गुबुनथि आखुनि जोंखोल हारिमु मोनो। भारतबर्षनि आर्यफोरा सोमजिहोनाय हारि सायख्ल'नाय समाज राहानिफ्राय क'च राजबंशीफोरा अराय गोजानाव। समनि

दाहारजों बिसोरो बे राहानि आवथायाव फैदोंब्लाबो आर्य क्षत्रिय हिन्दुफोरनि हारिमुजों बिसोरहा जेबो लोब्बा गैया । हिन्दु हारिनि आसार खान्थि नाजावब्लाबो क'च राजबंशीफोरनि गावारि आसार खान्थि फोसाबथाइ, फुजा फोरबो, दोहोरोमारि फोथायनाय, जानाय-लौनाय, गाननाय-जोमनाय, गहेना फाथि, मेथाइ, दामनाय-देनाय दंखायो । बेफोर गासैबो गावारि समायनाथिजों आबुं ।

क'च राजबंशीफोरनि जोनोम थैनाय, हाबा हुखानि गावारि आसार खान्थि, थैनायनि उनाव जिउमानि थाथाइनि फोथायथि, गोथैसिनि सेराव सिबिनाय, बाइदि इन्द्रजालनि खामानि, तन्त्र मन्थ्रफोरनि फोथायनाय, मिथिंगानि सोरजिगिरिखौ बिमा महरै फुजिनाय, गिदिर फाखि, बट बिफांफोरखौ फुजिनाय, जिब-जिबिनि फुजा, मानसिनि लोमजानाय-साजानाय आरो गात्रि जाथाइफोरखौ मोदाय दावदाइ, बुहुद-फेथानिफ्रायनो सोमजियो होनना फोथायनाय, बाइदि रोखोमनि हेंथा-हेंथि एबा आबुथि एबा जानाय, बेषमा एबा बिषुबा, पुषुणा, काति गासा, हलि, चडक पुजा, गाजन, मनसा, बिषहरि, शीतला, मासान कालि आरि फुजाफोराव खावसे हिन्दु एबा जनजातिनि आखुथाइया बेरखाडे । रायजोनि खामानिफोराव माइरं, थाइलिर, थाइलिर बिफां, नालेंखर, गय फाथै, फिथा सौराइ आरिनि बाहायथिया नोजोर होथाव । दोहोरोम फालिनायनि बेलायाव हिन्दुफोरनि मोदाइ-दावदाइखौ फुजिनाय, बाउनाय थिनाय, खुलुमनाय सिबिनायजों लोगोसे गावसोरनि खान्थिजों बोराइ बुरि, तिस्ता बुरि, हुदुम पुजा, ग्राम पुजा, धामपुजा, माशान, यखा, सनाराय, काति, षाइटल, आमति, यात्रा फुजा, चडक पुजा, सत्यनारायण, त्रिनाथ आरि फुजा होयो ।

जानाय-लौनायनि गेजेराव-बिसोरो हांनाय, सिफ्लेनाय, सावनाय, हमनाय, छेका, पेल्का, भेल्ला, सिदल, सुटका, सिथुमनाय ओंखाम आरिया गावारि आखुथाइ गोनां । गाननाय-जोमनायनि गेजेराव आइजोफोरनि पाटानि, बुकुनि, फोथा; गहेना फाथिनि गेजेराव आखाइनि आसान मुथा, चुरिया, आसान, बाजु, गोदोनानि सुर्यहार, चन्द्रहार, सिक्काहार, खोमानि माकिरि, अन्ति; गन्थंआव नलक, नाखाफुल, आथिडव- तला खारु, फेलाखारु आरिया मुख'जाथाव ।

रोजाबनाय खननायफोरनि मादाव क'च राजबंशीफोरनि भावयाइया गान, बाइदि फुजानि गान, राबाण गान, कुशान गान, दतरा गान, बिषहरि फुजानि गान, मारै फुजानि गान, तुकखा गान, लाहांकारी गान, नटुवा, शाडी ढाकनि गान, डाकनाम, जाग गान आरिया गावारि आखुथाइ गोनां । बेफोरबादि जेथिंबो बिजिरनानै नायोब्ला नुनो मोनो बिसोरनि समाजारि आरो हारिमुवारि जिउनि बिथिडव गावारि हारिमुजों लोगोसे बौद्ध, शैव, शाक्त, गोहोमनि अनगाथैबो हिन्दु हारिनि सायाव गोसो होनायनि जाउनाव गोजामारि गोहोम, शंकरी बैष्णव आरो गौड़ीय गोहोमाबो गोग्लैदों । थेवबो बिसोरनि हारिमुआव गोजाम जनजातिनि आखुथाया जोंखोल-माखोलै थानायखौ नुनो मोनो ।

क'च राजबंशी हारिनि दावगानायनि बेलायाव मखजाथाव बिफाव होनाय सानैसो गेदेमा सुबुंफोरनि सोमोन्दै गाहायाव सावरायनाय जाबाय ।

**सुबुं दैदेनगिरि शरत चन्द्र सिंह - मोनसे आलादा गावारि आखुथाइगोनां**

शरत चन्द्र सिंहनि जोनोमा जादोंमोन 1914 मायथाइनि 1 जानुवारियाव । बिफानि मुड लालसिं सिंह आरो बिमानि मुड आयासिनि सिंह । शरत चन्द्र सिंहआ उदांमिनि उननि आसामनि राजखान्थिनि मुख'जाथाव सासे सुबुंमोन । बिथाड सुबुंनि थार दैदेनगिरिमोन । बेनिखायनो बिथांखौ सुबुं दैदेनगिरि होनना बिमुं होनाय जायो । बिथाड गोसो गोरबोजों गान्धीजिनि आदर्शजों सोलिनाय सुबुंमोन । बिथाड बांबा मोखाडारि रोंग'थिजों आबुं सासे सुबुंमोन । सासालग सुबुंखौ सिबिनायानो बिथांनि जिउनि थांखिमोन । गात्रि खान्थिनि उदां राज्यो महरै आसामखौ दानायनि जाय सिमां नुदोंमोन बेखौ मोगथां महर होनो जिउनि जोबथा समसिम बिथाड नाजादोंमोन । बिथाडा 1972 मायथाइनिफ्राय 1978 मायथाइसिम आसामनि गिबि मन्थ्रि महरै मावसम सामलायदोंमोन । बिथाडा 1946 मायथाइनिफ्राय 1952 मायथाइसिम, 1962 मायथाइनिफ्राय 1967 मायथाइसिम, 1972 मायथाइनिफ्राय 1978 मायथाइसिम आरो 1978 मायथाइनिफ्राय 1982 मायथाइसिम आसाम बिधान सभानि एम.एल.ए महरै बिसायख'जादोंमोन । बिथाड आसामनि गिबि मन्थ्रि जाना थानाय समाव गोबां दावगानाय खामानि मावदोंमोन । बिथाड आबादनि दिहुनथाइ बांहोनाय, आबादारि जौगाहोनाय, गोरिबथि आरो गात्रि खान्थि होखारनाय, गामियारि रंखांथि जौगाहोनाय आरो फेहेरनायनि आखुथाइखौ सिगाडव लानानै माखासे मुख'जाथाव मावफारि आखाइयाव लादोंमोन । बिथांनि मुंख'जाथाव माव बिथांखिफोरा जादोंमोन एरै-(1) जरुरी समनि रबि फसल मावफारि, (2)गामि पन्सायत समबाय समिति (3)आबाद निगम (4)आकलन पत्र मावफारि (5)बिबानगिरि थुबुर मावफारि (6)पन्सायत खुंथाइ (7)शिलंनिफ्राय दिशपुरसिम अरायथा नडि राजथावनि सोलायनाय । (8) जामुं फसल सरकारि फालांगि आरो (9) सोलोंथायारि फसंथाननि फोसाबनाय मावबिखान्थि ।

सुबुं दैदेनगिरि बिथाडा 2005 मायथाइनि 24 डिसेम्बरनि हर गेजेराव 93 बोसोर बैसोयाव सोरगोयारि जायो ।

### अम्बिकाचरण चौधुरी

1930 मायथाइनि 16 आगष्टखालि बडाइगाव जिलानि सिडव थानाय बरपारा मुंनि गामियाव अम्बिका चरण चौधुरीआ जोनोम मोनदोंमोन । बिथांनि बिफानि मुड नरेश्वर चौधुरी आरो बिमानि मुड काशीश्वरी चौधुरीमोन । मेलेम बहरा चौधुरीआ उन्दै समनिफ्रायनो राडारि आंखालनि गेजेरजों बडाइगावनिफ्राय गुदि आरो गोजौ फराइसालिनि सोलोंथाइ मोनना गुवाहाटीनि कटन कलेजनिफ्राय 1955 मायथाइयाव दर्शन बिफानाव अनार्स लाना आरिमु जालिया डिग्री लायो । बेनि उनाव शिलंआव साख्रि मावना थानाय समाव बि.टि. उथ्रियो । एम.ए. आरो बि. एल.(दासान्दि एल.एल.बि)फरायनायनि थाखाय गुवाहाटी मुलुग सोलोंसालियाव मुं थिसनदोंमोनब्लाबो राडारि आंखालनि थाखाय साख्रि मावनो गोनं जानायाव बै डिग्री फराफारिखौ फोजोबनो हायाखैसै ।

फरायसा समनिफ्रायनो अम्बिका चरण चौधुरीआ बायदिसिना समाजारि खामानिजों लोब्बा लाखियो । 1953-54 मायथाइयाव कटन कलेजनि समाज सिबिनाय बिफाननि मावफुं सोद्रोमा जाना थानाय समाव

पलाशबारी मिर्जा हालामनि दैबाना आरो हाब्रां खुरखानायाव खहा जाजानायफोरखौ हेफाजाब होनायनि थाखाय बै समनि भारतनि गाहाइ मन्थ्रि जवाहरलाल नेहरुनिफ्राय बाखनायलाइ मोनदोंमोन ।

अम्बिका चरण चौधुरीआ थैनायनि आगोलसिम फिसा गेदेर गां 32 जारिमिन, हारिमु, सावरायथाइ आरि मुंथिनि बिजाब लिरदोंमोन । इंराजी, असमीया आरो राजबंशी मोनथामबो रावावनो बिथांहा समान हारोंथाइ दडमोन । इंराजी आरो असमीया रावाव बाइदि मुंथिनि जौसेनि बारा रायथाइबो सुजुदोंमोन ।

1961 मायथाइयाव असम साहित्य सभानि गवालपारा जथुम्मायाव अम्बिका चरण चौधुरीआ 'रत्नपीठ रत्न' बिमुं मोनदोंमोन । 1992 मायथाइयाव उत्तर बंगनि हारिमु आफादनिफ्राय 'कामता रत्न' बिमुं मोनो । 1994 मायथाइयाव बिथाडा थुनलायारि पेन्सन मोनदोंमोन । 2003 मायथाइयाव बिथाडा गोदान दिल्लीनि प्रेण्डी संघनि फारसेनिफ्राय 'महेन्द्र नाथ बरा' बान्था मोनो । गुदि फोरोंगिरि आफादनिफ्राय बिथाडा 'शिक्षाबान्धब' बिमुंबो मोनदोंमोन । बेनि अनगायैबो बिथाडा बडइगाव जिला साहित्य सभा, बरपेटा साहित्य सभा, बाइदि दालाइ साहित्य सभा, आसाम प्रकाशन परिषद, भारत बिकाश परिषद, बडइगाव जिला प्रशासन, बडइगाव नर्माल स्कूल सामलायगिरि आरि फसंथाननिफ्राय जुनियायै हामब्लायारि मानबिलाइ मोननो हादोंमोन ।

### अरुण कुमार राय

अरुण कुमार रायनि जोनोमा 8 अक्ट'बरखालि 1925 मायथाइयाव जादोंमोन । बिथानि न'आ बडइगावनि छिपनछिला गामियाव । बिथानि बिफानि मुडा प्रकाश चन्द्र राय आरो बिमानि मुडा अभयेस्वरी राय । सिरां जिलानि बेंतल गुदि फरायसालियाव गुदि सोलोंथाइखौ लाखांनानै बहलपुर गोजौ फरायसालियाव मुं थिसनो । बेनिफ्राय फिन बडइगाव बीरझरा गोजौ फराइसालियाव एन्थ्रेन्ससिम फरायनानै बेनि उनाव आरिमु गुरु बिष्णु राभानि साखाथियाव फैनानै आर. सि. पि. आइ. आव बाहागो लायो । कमिउनिष्टनि आदर्शनि फोसावथाइनि थाखाय बियो जोबथेसालियाव थानांगौ जायो । 1964 मायथाइयाव बिथाडा आबादारि सोमावसारनायजों थोंजोडै नांफादेरो । नखर रैखाथि बिफानाव साननैसो खामानि मावनानै बिथाडा साननैसो बेंतल एम. भि. फरायसालियाव फोरोंगिरिनि खामानि मावदोंमोन । 1974-75 मायथाइयाव बिथाडा ककराझार महकुमा परिषदनि आफादगिरिनि बिबान लायो । 1983 मायथाइयाव बिथाडा उत्तर शालमारा महकुमा परिषदनि आफादगिरिबो जादोंमोन । साननैसो गाव रैखाथि आफादनि हायेनारि आसामनि लोब्बागिरिनि बिबान बानस'नानै 1993 मायथाइयाव क'च राजबंशी साहित्य सभा दानायाव आगदारि महरै बिफाव लायो । 1999 मायथाइनिफ्राय 2015 मायथाइसिम क'च राजबंशी जनजातिनि राव थुनलाइ हारिमुनि दाउगानायनि थाखाय नारा नाथा नाजादोंमोन । बिथाडा राजबंशी रावाव क'च राजबंशीफोरनि हारिमुजों लोब्बा गोनां माखासे बिजाब लिरनायनि अनगायैबो नाइजाब, खन्थाइ आरो सोदोब बिहुं सुजुना दिहुनो । बिथाडा गासै गां 10 (जि) बिजाब रनसायदोंमोन । 2004 मायथायाव बिथाडा आसाम सरकारनिफ्राय खेबसेयारि थुनलायारि अनसुंथाइ मोनो । 2013 मायथाइयाव आसाम सरकारनि हारिमु बिफाननि Directorate of Cultural Affairs नि जोहै दैदेनजानाय गुरु शिष्य परम्परा माव बिथांखिनि सिडव 'सुबुं थुनलाइनि गुरु' (ल'क संस्कृतिरि गुरु) महरै गनायथि आरो मान मोनो ।



2013 मायथाइयाव बिथाडा बडइगाव जिला फरायसा आफादनि फारसेनिफ्राय 'कामता रत्न अम्बिका चरण चौधुरी गोसोखां बान्था' मोनो। क'च राजबंशी सुबुं हानजा आरो बिसोरनि राव थुनलाइनि थाखाय होनाय बिहोमथाइनि गनायथि महरै क'च राजबंशी साहित्य सभाया थैनायनि उनाव 2016 मायथाइयाव बिथांखौ 'साहित्य रत्न' बिमुंजों सन्मान होयो ।

### रुक्मिनी कान्त राय

क'च राजबंशी हारिनि सोनाब आसामनि सासे मुंदांखा मेलेमजिबि, सोलोंथाइगिरि, राजखान्थिगिरि, समाज सिबियारि आरो फेस्ला राजा महरै रुक्मिनी कान्त रायनि मुडा मुंदांखा। बिथाडा सासालग गोरिब नखराव जोनोम लानानै, मुलुग सोलोंसालिनि गोजौ सोलोंथाइ मोननानै जिउवाव जाफुंसार जानो हादोंमोन। बिथानि सोलोंथाइयारि, समाजारि, हारिमुवारि, राजखान्थियारि, दोहोरोम सिबियारि जिउनि बांसिन बाहागोआनो समाजनि थाखाय नेरसोन महरनि।

सरासनस्त्रा फरायसा बादि गामिनि गंसे फरायसालियाव जिउखौ जागायजेननानै गावनि मेलेमनि बोलोयाव बिथाडा गुवाहाटी मुलुग सोलोंसालिनिफ्राय आरिमु गोरा थाखोयाव रंखान्थि बिफानाव सेथि थाखोनि नैथि मासि मोननानै आसामनि सासे मेलेम गोनां सुबुं होनना बयनिबो मेगनाव गोग्लैदोंमोन। गावनि हारिनि आरो सोनाब आसामनि सासे मेलेम गोनां, सोलोगोरों सुबुं महरै रुक्मिनी कान्त रायआ मुंदांखा जानो हादोंमोन। समाज आरो हारिमु जिउवाव बिथाडा गावनि बिमाराव राजबंशी रावखौ बाहायनानै मोजां मोनोमोन। बिथाडा बांसिन बिबुंसारखौनो बिमा रावजों होनानै बयनिबो गोसोखौ जै खालामोमोन।

बिथाडा समाजनि दावगानायनि थाखाय सानथ्र'हायै फरायसालि, कलेज, मठ, मन्दिर आरि गायसंनाय बिथिडव आगु बिबान लादोंमोन। राजखान्थियारि जिउनि बिथिडव बिथाडा जिला थाखोनिफ्राय राज्यो थाखोसिम जौगानानै मिरु थाखोनि दैदेनगिरिनि नोजोर बोनो हादोंमोन। बिथाडा सरासनस्त्रा सासे केरानी साखिनिफ्राय कलेजनि बिबुंगिरि, गोरायुं आरो एम. एल. ए थाखोसिम जौगालांनो हादोंमोन। मोजां सासे जोलुर गेलेगिरि महरै बाखनायजानायनि अनगायैबो जिउनि जोबथा बैसोयाव सासे आखाफाखा दोहोरोमारि बिबुंगिरि महरै गावखौ गायसंनो हादोंमोन। कृष्णानन्द ब्रह्मचारीजों गोबां सान थानानै बिथाडा माखासे दोहोरोमारि आयदानि थाथौ गिलिर रायथाइ लिरदोंमोन।

### पानीराम दास

अरायजिउ गुफुर खहरनि धुति पान्जाबि गानग्रा, समनि बालाबारीयाव गोमालाडै आगानफोरनि बिगोमा, नागारसारनाय हादोर सिबिनायनि आदर्शजों रादाय गैयै, थादनाय गैयै जांख्रिथाइ दैदेनलांनाय, समाजनि मावथि, उदांस्त्रि दावहारु पानीराम दासनि जोनोमा 1919 मायथाइनि 7 एप्रिल खालाराव, मंगलदै सार्कलनि सिडव थानाय जलजलि गामिनि मोनसे आबादारि फोलेराव जादोंमोन। 1934 मायथाइयाव पाथरिघाट एम.इ फरायसालिनिफ्राय स्नि थाखोनि आनजादाव उथ्रिसारनानै मंगलदै हाइस्कुलाव मुं थिसनो। उनाव 1937

मायथाइयाव कलिकतानिफ्राय देरहासारै सेथि थाखोयाव मेट्रिक आनजादखौ उथ्रिसारनानै महात्मा गान्धीनि दैदेननायाव हादोर नाडै-नो सोलिनाय उदांस्रिनि दावहायाव मदद होयो । 1938 मायथाइयाव कंग्रेछआव हाबनानै 1941 मायथाइयाव महात्मा गान्धीनि सत्याग्रहआव मदद होनानै जोबथेसालियाव जोबनानै दोनजायो । बिथाडा गावनि हादरनि दाउगानायनि थाखाय नारा नाथा नाजादोमोन । 2005 मायथाइयाव भारतनि गेदेमा राष्ट्रपति ड<sup>०</sup> ए.पि.जे. आबुदुल कालामआ बिथांबादि उदांस्रि दावहारुखौ हादरारि सन्मानजो मान बाउदोमोन । बे मायथाइयावनो भारतारी सान्थ्रि हानजायाव जारिमिनारि पठरुघाटआव खुंनो लानाय 'आबादारि मुंख्लं सान' आव बिथांखौ खादि गानग्रा सान्थ्रि गाहाइ ( The General in Khadi )बिमुंजो मान होदोमोन ।

बिथाडा 2010 मायथाइनि 30 नबेम्बरखालि सोरगोआरि जायो । हादोरनि थाखाय होलांनाय बिहोमानि गनायथि महरै भारतारि सान्थ्रिनि 65 नं फिल्ड रेजिमेन्टआ आबुं सान्थ्रियारि सन्मानजो बिथांसिसिम जोबथि सन्मान जासिनायजो लोगोसे आसाम पुलिसाबो हादोरारि मर्यादाजो जोबथि सन्मान होदोमोन ।

### सोंथि

1. क 'च राजबंशीफोरा मा दोहोरोमारि सुबुं ?
2. क 'च राजबंशीफोरनि राव आरो हारिमुनि बागै लिर ।
3. क 'च राजबंशीफोरनि जानाय आरो गाननाय-जोमनायनि बागै लिर ।
4. क 'च राजबंशीफोरनि मेथाइफोरा मा मा ?
5. लिरसुंथाइ लिर :
  - क) सुबुं दैदेनगिरि शरत चन्द्र सिंह ।
  - ख) अम्बिका चरण चौधुरी ।
  - ग) अरुण कुमार रय ।
  - घ) रुक्मिणी कान्त रय ।
  - ड) पानीराम दास ।

## गरिया-मरिया आरो मुसलमानफोर ( देशी )

आसामआ गुबुन गुबुन हारि-माहारिजों बुंफबनाय। गुबुन गुबुन हारि-माहारिख्रौ लानानैनो गेदेमा असमीया हरिया दाजादों। गुबुन गुबुन थागिबि सुबुंफोलेर बादिनो असमीया हारि दानाय हाबायाव बाहागो लानाय गरिया-मरिया, देशी होनना जारिमिनाव मिथिजानाय इछलाम दोहोरोमारि थागिबिफोरा आसामनि गोजाम सुबुंफोलेरफोरनि बाहागोसे। 'आह'म, चुतीया, क'च, मरण-मटक आरो केअट-कलिताफोरबादि असमीया मुछलमानफोरा असमीया समाजनि मोनसे मख'नोगोनां आरो गोजाम बाहागो।' दैनिक असम, 12 फागुन (1926)। आसामाव बे सुबुंफोलेर सोमजिनाया मोनसे मख'नां जाथाइ। 1205-06 मायथाइयाव तिब्बत-चीन देरहानायनि मिजिं लानानै बंगनि तुर्की सान्थ्रिगाहाइ बखतियार खिलिजिनि दैदेननायाव कामरूपआव हाबफैनाय मुछलमान सान्थ्रिफोरा कामरूपनि राजा पृथुनि आखाइयाव गाज्रियै जेननांनानै बिसोरनिनो खायसे सान्थ्रिफोरा आसामाव थालांदोंमोन होनना बुंनाय जायो। मखनो गोनांदि बखतियार खिलिजिख्रौ लामा दिन्थिना लाबोदोंमोन "आलि मेच" मुनि सासे इछलाम दोहोरोमाव बारस्लायनाय जनजाति राजाया। जारिमिनाव बिथांख्रौनो गिबिसिन इछलाम दोहोरोमाव बारस्लायनाय जनजाति राजा होनना मिथिनो मोनो। बेखायनो राजाजों लोगोसे फोरजाफोरनि गोबाडानो इछलाम दोहोरोम आजावना लानाया गोरलै बाथा। नाथाय सोरबा सोरबा जारिमिनगिरिफोरनि बादिब्ला स्निथि जौथाइयावनो आसामाव इछलाम दोहोरोम जुरिनाया तुरस्कनि राजा सौष्टब हाछानआ चीनख्रौ जै खालामना गिदिंन फैनाय लामायाव थालांनय माखासे सान्थ्रिफोरनिफ्राय जानोबो हागौ ('इछलामारि जारिमिन आरो आसाम'-रफिउल हुछेइन बरुवा)। बेयो जायखियानो जाया मानो, स्निथि जौथाइयावनो एबा जिथामथि जौथायावनो जाथों गुबुन गुबुन समाव आसामाव फैनाय दोहोरोम फोसावगिरि पीर-साधकफोरनि ख्रौराडाव (बाणी) गोहोम गोग्लैनानै मिथिंगायारियै दोहोरोम लानाय आरो हिन्दु दोहोरोम लानाय मानसिफोरनि गोसोआव इछलाम दोहोरोनि गोहोमा गोथौयै रोदा सुनो हमो। क'च, कलिता, नाथ, आह'म आरिख्रौ हमफानानै थागिबि मानसिफोराबो इछलाम दोहोरोमनि फारसे नोजोर खोख्लैनो हमो। बेबादि थागिबि माखासे मानसिफोरा रैखाथि गैयि समाजनि गुबुन गुबुन गोब्राब खुंथाइ राहायाव सहायनो हायैनि इछलाम दोहोरोम लादोंमोन। बे मानसिफोरनि गेजेराव गरियानिफ्राय एबा गुदि समाजनिफ्राय एरख'जानाय मानसिफोरानो गुबैमोन। बेनिखायनो गोसो जानानैनो जाथों एबा जुनिया

थासारियाव गोग्लैनानैनो जाथों थागिबि मानसिफोरा इछलाम दोहोरोम लानो हमदोंमोन। नाथाय इछलाम दोहोरोम लादोंमोनब्लाबो बिसोर गावनि सुबुंहारिमुखौ नागाराखै। जाउनाव समनिफारियाव बे दोहोरोमाव बारस्लायनाय थागिबि मानसिफोरनि गेजेराव दावहाबन्दि होनना मिथिजानाय मोजोमसे मानसिफोरा गावनि आबुं सिनायथिखौ नागारनानै आसामनि थागिबिफोरनि राव, दोरों, हारिमुजों अरायनि थाखाय गोरोबना थानो गोनां जायो। दोहोरोम फोसावनायनि थाखाय फैनाय मुछलमान पीर-साधकफोराबो थागिबिफोरनि गोसो सानसिखौ बुजिनानै दोहोरोमनि खौरांफोरखौ थागिबि राव-हारिमु आरो हिन्दु दोहोरोमारि सोदोबजों सोमोन्दो लाखिना फोसावनो गोनां जादोंमोन। असमीया राव-थुनलाइनि बाखिखौ दोहोनि खालामनाय गेदेमा पीर हजरत आजान फकीरा लिरनाय जिक्किरफोरा बेनिनो फोरमान। मखनो गोनांदि बेफोरबादि दोहोरोम गुस्लायनाय थागिबि मानसिफोरा गिबियाव गुदि समाजनिफ्राय गारजानानै थाखानाय समाजजों थाफानानै इछलाम दोहोरोम आजवना लानायसै। बे मानसिफोरानो उनाव गरिया होनना सिनायथि मोननायसै। अदेबानि गरिया सोदोब सोमजिनायनि सोमोन्दै आरो मोननैसो बुंथि दंब्लाबो गरियाफोरनि देहायारि दाथाइ, सुबुं-हारिमु दोरों आरो सुबुंफोरनि थानाय आरि बिथिनिफ्राय गोजौआव मख'नाय बुंथिनायफोरानो गोरोबो होनना हमना लानाय जायो। गुबुन फारसेथिं आह'म राज्यो खुंनाय समाव काह-पिथलाइजों सोमोन्दो गोनां इछलाम दोहोरोम लानाय मानसिफोरखौ मरिया होनना मिथिनो मोनो। मरिया मानसिफोरनि थानाय जायगाया खर'सा आसामनि मोननैसो ओन्सोल नगाव जिला, गुवाहाटीनि उजान बाजार आरो हाज'आव दं। देशीफोरा गुबैयै बोखावजायि ग'वालपारा जिलानि थागिबि। बोखावजायि ग'वालपारानि क'च-राजवंशी राव-हारिमु गोनां इछलाम दोहोरोमनि थागिबि मानसिफोरखौ हादोरारि एबा हादोरनि मुछलमान होननानै मिथि मोनो। देशीफोरा गुबैयै क'च-राजवंशी, मेच-कछारी आरि थागिबि सुबुंफोलेरनिफ्राय गुस्लायनाय।

### आसाम हारिमायारि सार्थआव गरिया-मरिया, देशीनि बिहोमा :

आसामाव इछलाम दोहोरोमा 1206 ख्रिष्टाब्दआव फोसावजादोंमोन आरो आह'मनि राज्यो खुंनाय समा जादोंमोन 1228 ख्रिष्टाब्द। बे आह'म राज्यो खुंनाय समावनो म'माइ तामुली बरबरवाया क'च नखरनै ब्राह्मन नखरनै, कलिता नखरनै आरिजों लोगोसे नखरनै गरिया, नखरनै मरियाखौबो लाफाना गेदेर असमीया समाज दादोंमोन। (फोरमायथि : ड° सूर्यकुमार भुयानि गेजेरजों सुजुनाय 'देवधाइ असम बुरन्जी, बिलाइ-95)। बेनिखायनो बे बाथ्राखौ गोरलैयै हमनो हायो दि गोजाम दोहोरोम फारिलायि समाज-हारिमुजों आबुं असमीया हारि दानायजों लोगोसे गरिया-मरिया, हादोरारिफोरा गावनि हादरनि सार्थआव जिउ बाउनायनि अनगायैबो आसामनि शिल्प, आरिमु, थुनलाइ, हारिमु आरि गासै बिथिडावनो आह'म मुगानिफ्रायनो दिनैसिम जोबनोगैयि बिहोमा होबोदों। बिथांमोननि गेजेरनिफ्राय सानैसोनि सुंद

फोरमायथि गाहायाव होनो नाजानाय जादों।

### बाघ हाजरिका :

गुबै मुडा इछमाइल चिहिकी। मोसार्जों जुजिनानै फेजेननो हानाय गोहोनि थाखाय बाघ मुंखौ मोन्दोंमोन। गोख्रों गोहो आरो मावगोहोनि थाखाय आह'म राज्यो खुंनाय समाव हाजरिकाया मासि मोनदोंमोन। शराइघाटनि दावहायाव लाचित बरफुकननि लोगो सान्थ्रिगाहाइ महरै मगलनि बेरेखायै नारानाथा जुजिदोंमोन।

### आजान फकीर चाहाब :

जायफोर मुछलमान दोहोरोम गुरुवा गोथार इछलाम दोहोरोमनि खौरांफोरखौ गोरलै रावाव सुबुंनि गेजेराव फोसावदोंमोन, बिथांमोननि गेजेराव आजान फकीरआबो सासेमोन। आजान फकीरनि गुबुन मोनसे मुडा श्वाह मिलान। आजान फकीर चाहाबआ बागदादनिफ्राय इछलाम दोहोरोम फोसावनो आसामाव थाफैदोंमोन होनना बुंनाय जायो। नाथाय बिथांनिनो लिरनाय मोनफा मोननै जिकिराव थानाय 'बिबायारि आजानआ बुडो फै गुबुन हादराव, हायेननिफ्राय फैबाय चाहाब दारि गोमोन,' बे बाश्रायाव गुबुन हादर आरो हायेन सोदोबा बिथांखौ सोनाब आसामनि कामरूप, ग'वालपारा आरि जायगानिफ्राय फैनायबो बुंजायो। आजान पीर एबा श्वाह मिलननि मुडाव सोलिनाय दाइन कुरि (160) जिकिरआ असमीया रावनि बेसेन गोसा सम्पद। जिकिरफोरखौ लिरनाय समखौ सोरबा सोरबाया 1634 ख्रिष्टाब्द आरो सोरबा सोरबाया 1734 ख्रिष्टाब्द होनना बुंदों। राजा गदाधर सिंहनि दिनाव रुपाइ गरीया दा-धरा मुंनि सासे (इछलाम दोरोमनि) मावख'गोरानि खैसारियाव गोग्लैनानै राजाया गावनि मेगनजों नोजोर लाखिदोंमोनब्लाबो राजाया उनाव गावनि गोरेश्थिखौ हमदांनो हानानै बिथांखौ सरागुरि चापरियाव हा-हु होनानै थाजोरै थानो होयो। बेयावनो बिथाडा थैयो। बिथाडा सानफ्रोमबो फुं-बेलासियाव मछजिदाव आजान होनायनि थाखाय मानसिफोरा बिथांखौ आजान फकीर होनानै बुडोमोन।

### बाहादुर गावबुरा :

बाहादुर गावबुराखौ सासे उदांसि सोमावसारग्रा महरै मिथिनो मोनो। बिथाडा बकतानिफ्राय थानानै ज'रहाटआव थाहैदोंमोन। 1857 मायथाइयाव सिपाइ बिग्रायनायनि गेजेरजों जागायनाय भारतनि उदांसि सोमावनायाव मणिराम देवान, पियलि बरुवामोनजों लोगोसे बाहादुरनि बिफावा मख'जाथावमोन। इंराजनि बेरेखायै बिग्रायनायनि दायाव कमिछनार चि हलरइडनि बिसार बादियै बाहादुर गावबुराखौ कलीयापानीयाव दैथायहरना जिउजोबजासे गोलाउ सम साजा होदोंमोन।

### चैयद आब्दुल मालिक :

ग'लाघाट जिलानि नाहरनि गामियाव चैयद नखराव 1919 मायथाइनि 16 मे खालारखालि आबुल मालिकआ जोनोम जायो। बिफानि मुडा चैयद रहम्मत आली। बिथाडा सासे सिबिजाथाव थुनलाइगिरिमोन। 1935 मायथाइयाव 'बन्ध कथा' मुनि सल' गांसे गिबि दिहुनजेननायनिफ्रायनो बिथाडा थैनायनि सिगां समसिम लिरना दोनलांनाय सल', सल'मा, नायजाब, खन्थाइ बिजाबजों असमीया थुनलाइखौ दोहोनि खालामना गालांबाय। बिथाडा 1954 मायथाइनिफ्राय 1956 मायथाइसिम गुवाहाटी मुलुग सोलोंसालिनि सुबुं-हारिमु बिफानाव बिजिरसं बिथांखिनि सिडाव असमीया जिकिर आरो जारी आयदानि सायाव बिजिरसडो।

बिथाडा 1956-57 मायथाइयाव एछियान राइटार्स कनफारेन्सआव बिथाडा भारतनि थान्दै जानानै थांदोमोन। बिथाडा 1977 मायथाइयाव आसाम साहित्य सभानि अभयापुरीयाव खुंनाय जथुम्मायाव आफादगिरि मासि मोन्दोमोन। 1952-55 मायथाइयाव बिथाडा भारतारि गणनाट्य संघनि लेडाइ आफादगिरि मासियाव हाबा मावदोमोन। 'अघरी आत्मार काहिनी' मुनि सल'मानि थाखाय बिथाडा साहित्य अकाडेमी बान्था मोन्दोमोन। 1997 मायथाइयाव आसाम साहित्य सभाया बिथांनो साहित्याचार्य बिमुं होयो। 1992 मायथाइयाव आसाम उपत्यका बान्था, 1993 मायथाइयाव आजान फकीर बान्था, 1988 मायथाइयाव हार्मनी बान्था, 1995 मायथाइयाव महापुरुष शंकरदेबनि सायाव लिरनाय 'धन्य नर तनु भाल' मुनि सल'मानि थाखाय शंकरदेब बान्था मोनो। 1999 मायथाइयाव साहित्य अकाडेमीनि फेल'शिवप बान्था मोनो। भारत सरकारआ 1984 मायथाइयाव पद्मश्री आरो 1992 मायथाइयाव 'पद्मभूषण' बिमुं होयो। बिथाडा 2002 मायथाइनि 19 डिसेम्बरखालि रुंसारि जालाडो।

### नबाब छेहिदुर रहमान :

सुभाष चन्द्र बसुनि दैदेननायाव दाजानाय "आजाद हिन्द फौज"नि सासे मुंदांखा दैदेनगिरिमोन। बिथाडानो भारतनि उदांमि दावहानि "आजाद हिन्द फौज"निफ्राय जानाय गिबि असमीया मुंख्लं। बिथाडा नैथि मुलुग दावहानि लोगो हानजानि बमा खुबैनायाव 1945 मायथाइयाव 31 मार्चखालि रुंसारि जालाडो।

### फकरुद्दिन आलि आहमेद :

फकरुद्दिन आलि आहमेदा 1905 मायथाइनि मे दाननि 13 अक्ट'आव दिल्लीयाव जोनोम मोनो। बिथाडा 1927 मायथाइयाव केम्ब्रिज छेन्ट केथलिक कलेजनिफ्राय जारिमिननि आरिमु जालिया (बि.ए) आरो लण्डन इनार टेम्पलनिफ्राय बार-एट-लि बिमुं लानानै 1931 मायथाइयाव आसामाव फैनानै उकिलगिरि खालामनायजों लोगोसे राजखान्थियावबो बाहागो लायो। 1966 मायथाइयाव ल'कसभानि सोद्रोमा महरै बिसायख'हरजानानै मिरुवारि मन्थ्रिनि मासि मोनो। 1977 मायथाइनि 19 फेब्रुवारी

अक्ट'खालि बिखानि गोब्राब बेरामाव गोग्लैनानै बिथाडा रुंसारि जालाडो।

**सोंथि :**

1. असमीया हारि बुडोब्ला मा मिथियो? बर्नायना लिर।
2. बखतियार खिलिजिया माब्ला आसामाव हाबफैदोंमोन?
3. बखतियार खिलिजिया मानि थाखाय आसामाव हाबफैदोंमोन?
4. बखतियार खिलिजिया सोरनि आखाइयाव जेनदोंमोन?
5. इसलाम दोहोरोमआव बारस्तायहैनाय गिबि जनजाति राजानि मुडा मा?
6. आसामाव सोरख्रौ गरिया होनना बुंनाय जायो?
7. आह'मफोरा राज्यो खुंनाय समसिम आसामाव माखासे थागिबि मानसिफोरा इसलाम दोहोरोम नाजावनायनि मोननै जाहोन लिर।
8. लिरसुंथाइ लिर :  
बाघ हाजरिका, आजान फकीर साहाब, छैयद आब्दुल मालिक, नबाब छेहिदुर रहमान।





## गार'फोर

गार'फोरा गोजाम मुगानिफ्रायनो आसामाव थाबोनाय मोनसे फोलेर। बिसोरनि खायफाया गेदेर मंगलीय दालाइनि होनना बुंन लायोब्लाबो राव फारसेनिफ्राय इन्ड'चीननि तिब्बत बर्मी बड़' दालाइनिसो मानसि।

आथिखालाव बे फोलेरनि मानसिफोरा सोनाब बंगनिफ्राय फैनानै सा-सानजा ओन्सोलनि गंफ्रोमबो हादरसायावनो सेरखाय-बेरखाय जानानै दं। गुबुन फारसेथिं गार'फोर थानाय गाहाइ जायगा मेघालयनि गार'हाजोनि अनगाथैबो बांला हादरावबो गोबां जायगायाव बे सुबुंनि मानसिफोरा सेरखाय बेरखाय गोसारना दं। बिसोरनि थानाय जायगा बादियै आरो रावनि फारसे नायनो थाडोब्ला आमबें, मातछि, माताबें, गारागानचि, दुवाल, रुगा आरो मेगाम दालाइ सुबुंफोराव बोखावनाय जायो।

गोदोनि जारिमिनखौ नायोब्ला गार'फोरनि आजै-आजौवा तिब्बतनि थरुवा मुंनि दाबसे जायगायाव दंमोन। मोनसे समाव आंखाल (दुर्भिक्ष) जानायाव जापफा, जालिमफा, चुकफा, बंगिफा आरो बिन्जिफा बिथांमोननि दैदेननायाव बे दाबसे जायगाखौ नागारनानै हिमालय हाजोमा बारनानै थोंजों क'चबिहार मोनफैयो आरो बेयावनो गोबां बोसोर थायो। नाथाय बेनिफ्राय आसामसिम फैनायाव फिसा फिसा राज्योनि राजाफोर जैरै धुबुरी आरो बिजनीनि राजाजों दावहा नानानै जोबथारनायाव राजा आब्राचेनआ हाब्राघाटआव गावनि थानाय जायगाखौ थि खालामना लार्दोमोन आरो नसुंसेनि जायगाफोरखौ गावनि मुडाव थिसनदोमोन। माखासेफोरा गावसोरनि गेजेराव गोसो गोरोबनाय मोनैनि गुबुन फासेथिं गावसाना गार'हाजो आरो गुबुन मोनसे हान्जाया बांला हादराव थानो लायो।

दोहोरोमारि बिथिंनिफ्राय गार'फोरनि आजै-आजौफोरा फुजा होयोमोन। बेबादिनो फुजा होग्रा मानसिफोरखौ गार'फोरा संसारेक होनना बुडो। बिथांमोननि मोदाइ-मोदाइजोआ जाबाय-चालजं, गबेरा, खालखामे, आसिमा, डिंसिमा, सुसिमे आरि। मोदाइ-मोदाइजोफोरखौ फुजा होनायाव नखरनि जिब-जिरादखौ बोलि होयोमोन। नाथाय जिगु जौथाइनि जागायजेननायनिफ्राय गार'फोरा ख्रिष्टान दोहोरोमाव बारस्लायनो हमो आरो फुजा होनाय नेमा जोबलानो हमो। समनिफारियाव गार'फोरनि हारिमायारि फोरबो अवानगालायाबो जोबो।

गार'फोरा बाहायनाय दामजुंफोरा जादों-ढामा ख्राम (ढल), गगना, मैसोनि गंजों बानायनाय औवानि

फेम्फा लागायनाय बांसी-सिफुं बायदि बायदि। बिसोर बायदि गाबनि सि-जोम बाहायोमोन। हान्थु नुजालायनाय सि गानोमोन। आथिखालाव गार' आइजोफोरनि बाहायनाय सि-जोमा दागाबान्दा, दागशारी, चुनि बायदि बायदि।

समाजारि बिथिंनिफ्राय गार'फोरनि नखरनि दाथाइया बिमानिफ्राय जागायजेननाय। गोबां नखर एबा सुबुंनि गेजेराव लोगो नांनानै मोनसे माहारि दानाय जायो। दोरोडारि बादियै गार'फोरनि जोनोमारि माहारि थामहिनबा बिमुं थानायनि अनगायैबो उफ्रा बिमुं थायो। बिदिन्थि बादियै आगितक माहारिनि सासे सुबुडा लोगोसे सांमा लिरफायो। गार' समाजाव माहारिखौ ओरैबादि गोनां होनना साननाय जायो दि गुबुन गुबुन दाबनै जायगा एबा गनै हादरनिब्लाबो मोनसे माहारि एबा बिमुंनि गेजेराव हाबायारि सोमोन्दो खानो मोना, मानोना मोनसे गत्रनि होनना हमना लानाय जायो।

सिगांनि दिनाव हाजोआरि गार'फोरनि सेंग्राफोरनि सोल्लोथाइ मिरुवा नकपान्थे एबा डेकाचांमोन। बेयावनो गामिनि गासै सेंग्राफोरा ज' जानानै औवा, राइदों आरि गुबुन गुबुन आखाइनि हाबा मावनाय, दामजुं दामनाय, गेलेनाय बेफोरखौ बैसो गोरा सुबुडा दैदेनोमोन।

सरसनस्रायै गार'फोरा रगा गोसा आरो थिउरियामोन। जायनि जाउनाव नसुंनि राजाया सामलायनो हायाखैमोन। बेबादिनो राहा गोथे जानानै बृटिछफोरबो दबथायनाय खान्थिनि सोलायै मिछनारीफोरनि हेफाजाबाव दोहोरोम फोसावनो हमनायसै। सिबिसालि, फरायसालि आरि गायसंनानै जायगा जायगा मिछनारीफोरनि हेफाजाबाव मिछन सामलायनो होनाय जायो। बेबादिनो जिगु जौथाइ जागायजेननायनिफ्रायनो गार'फोरनि गेजेराव समाजारि सोलायनाय फैदों होनना बुंनो हायो।

जानाय-लॉनायाव बेदर जाग्राफोरा दाउ, अमा आरो मोसौ जायो। गार'फोरनि बयनिखुइ मोजां मोनजानाय जामुडा जाबाय ना गोरान आरो खारदै। गुबुन गुबुन रोखोमनि थावनाय ओंख्रि थासेयावबो गार'फोरनि जानाय-लॉनायाव ना गोरान आरो खारदै ओंख्रिया गोनांथार।

गार'फोरनि गेजेराव असमीया माहारियारि जिवाव बिहोमा होना अरायनि गोसोखांथाव जाना थानाय गेदेमा सुबुंफोरनि सोमोन्दै गाहायाव सुंदयै सावरायनाय जाबाय।

### रामथे अवाथ्रे म'मिन :

मेघालयनि आथिखाल सा-गार' हाजोआव थानाय माटछक ग्रे मुंनि दरसे फिसा हाजोआरि गामियाव 1834 मायथाइयाव रामथे अवाथ्रे म'मिनआ जोनोम मोनदोंमोन। 1863 मायथाइनि 8 फेब्रुवारीयाव रामथेआ रेभारेन्ट ड<sup>०</sup> माइलच ब्रनचननि हेफाजाबाव गुवाहाटीनि शुक्लेश्वर घाटआव ख्रिष्टान दोहोरोमआव बेप्तिष्ट लादोंमोन। साननैसोनि उनाव दामरासिम फैनानै रामथेआ गंसे फरायसालि गायसनदोंमोन आरो गाहाइ फोरोंगिरि महरै खामानि मावदोंमोन। रामथे अवाथ्रे म'मिनआ ख्रिष्टान मिचनफोरनि बिबान

मोनथ'नाय मिचनारी महरैबो खामानि मावदोंमोन। मिचनफोरनि मादाव आथिखालनि सा-गार' हाजोआव थानाय राजा शिमला गार'फोर थानाय गामियाव सा 40 सोद्रोमाजों गिबिसिनै मोनसे ख्रिष्टान मिचन महरै गंसे गिर्जा न' लुदोंमोन। बेनि उनाव दामरायाव मिचन लुनानै लादोंमोन आरो गंसे फरायसालि लुदोंमोन। उनाव दामरानि फरायसालिखौ फोरोंगिरि फोरोंथाइ मिरुसिम जौखोहोनाय जायो। नाथाय दुखुनांथाव बाश्रादि फारफ्रोमथिंनिक्राय खाबु गोनां नडिनि थाखाय ग'वालपारासिम दिखांना लाडो। रामथे अवाश्रे म'मिनआ मिचन आरो फरायसालि गायसंनायल' नडा, बिथाडा ग'वालपारा आरो तुरा नर्माल स्कुलनि गाहाइ फोरोंगिरि महरैबो खामानि मावदोंमोन। रामथेया सासे सोल्लोंथाइ रोंगौसा, थुनलाइ लिरगिरि, मेथाइ लिरगिरि महरै गार' समाजनि गिबि सुबुंमोन। बेनिखायनो बिथाडा गार'समाजनि लामा दिन्थिग्रा होनना मिथिजादोंमोन। बिथानि आखाइजों लिरनाय कला आरो संस्कृति (आरिमु आरो हारिमु) आयदानि बिजाबखौ मेघालय सरकारआ 1990 मायथाइयाव दिहुनदोंमोन। बिथानि लिरनाय 45000 सोदोबनि बांला आरो गार' सोदोब बिहुडा अरायबो गोसोखां महरै थागोन। रामथे अवाश्रे म'मिना लिरनाय खन्थाइ बिजाबफोरा जादों-(1) बिचिक ख्रिता (1881), (2) चिमान' आटछियानि (1882), (3) रिपेंतांख' निकग्रिकानि (1883), (4) 'आ. आक' दाकानि' (1884) आरो (5) ड' अरां।

ग'वालपारा जिलानि दुधनैन खोला बाहागोआव थानाय निचानग्राम गामिया गार'फोर थानाय गामिमोन आरो रामथे म'मिनआ बे गामिखौ आदर्श गामि एबा मडार्ण भिलेज होननानै सिनायथि होदोंमोन। रामथेया सासे गोरों फोरोंगिरि, दोहोरोम फोसावग्रा, लिरगिरि आरो मेथाइ लिरगिरिमोन।

भारतनि सा-सानजा ओन्सोलनि जनजाति लिरगिरिफोरनि मादाव रामथेयाबो सासे। बेनि अनगायैबो रामथेया सासे समाज मावथि आरो रांखान्थियारि फोसाबग्रामोन। बेनिखायनो खायफा मिछनारीया बिथांखौ "Father of Modern Garo Community" होनना बुंदोंमोन।

### रेभा. गिलबार्थ के माराक :

1925 मायथाइयाव गिलबार्थ के. माराकआ सोनाब खाचिया हाजो आरो खोला कामरुप जिलानि सिमायाव थानाय रांसापारा गामियाव जोनोम मोनदोंमोन। बिथाडा रेभा. रामथे आरो सांमानि नायल'जाल' सासेल' फिसाज्जामोन। बिथाडा 1933 मायथाइयाव गुदि फरायसालिनि फरायनायखौ फोजोबो। 1941 मायथाइयाव गोजौ फरायसालिनि जोबथा आन्जादखौ उथ्रिखांनानै ड° डिक्टर डिउग'स्कर्डनि हेफाजाबाव चेरपुन्जि थिअ'लजिकेल कलेजाव फरायनो खाबु मोनदोंमोन आरो 1949 मायथाइयाव एल.टि एइच आन्जादाव बारग'नो हादोंमोन। गिलबार्थ के माराकआ 1960 मायथाइयाव लिनार्ड थिअ'लजिकेल कलेजनिफ्राय डिग्री अव बेचालर अब रेलिजियाच इडुकेशन मोनदोंमोन।

गिलबार्थ के माराकआ कामरुप जिलानि ग'हालक'ना गोजौ फरायसालियाव फोरोंगिरि हाबा

मावदोंमोन। बिथाडा फोरोंगिरि मावबाय थानाय समाव ज'रहाट चेमिनारीनि गोरायुं ड° डुफिचाया बिथांखौ रेजिष्ट्रार मासियाव थिसनदोंमोन। गिलबार्थ के माराक आरो ड° डुफिचआ सानैबो लोगोसेयै 'लिउ अब दा चेमिनारि स्कुल' मुंखौ सोलायनानै 'इष्टार्ण थिअलजिकेल कलेज' मुडै गोदान मुं होदोंमोन।

खाफाल गोनां गिलबार्थ के माराकआ चुइजारलेण्डनि जेनेभासिम थांनो खाबु मोनदोंमोन। बेनिनो वर्ल्ड काउन्सिल अब ख्रिष्टियान इडुकेशननि गाहाइ मावख'आव भारतनि सासे बोसोनगिरि मासियाव थिसनजादोंमोन। बेबादिनो साननैसोनि उनाव वर्ल्ड काउन्सिल अब चार्जनि सासे सोद्रोमा महरैबो बिथांखौ थिसनदोंमोन। बेनिनो सासे सोद्रोमा महरै बिथाडा बुहुमनि गोबां हादर गिदिंदोंमोन। बेनिखायनो बिथाडा थाइलेण्डनि गिर्जाफोरखौ, आथिखालनि म्यानमार, हंकं, जापान, पाकिस्तान, इजिप्त, लेबानन, एडेन, थिअ'पिया, केनिया, तान्जानिया, कंग, इतालि, चुइजारलेण्ड, फ्रान्स आरो जार्मानी आरि जायगाबो नायदोंमोन।

गिलबार्थ के माराकनि खामानि मावनायनि रोंगौथिनि थाखाय ख्रिष्टियान आफादा बिथांनो मानबावनानै 'रेभारेण्ड' बिमुं होयो आरो बै समनिफ्रायनो बिथाडा रेभा. गिलबार्थ के माराक होननानै सिनायजादों। 1972 मायथाइयाव ख्रिष्टियान लिटारेचार स'साइटि अब इण्डियानि खावलायनाय बादियै इराजी रावनि गोथार बाइबेलखौ फिन गार' रावआव सोलायदोंमोन।

रेभा. गिलबार्थ के माराकआ इसोर सिबिग्राल' नडा बिथाडा सोलोंथाइनि फारसेबो जोबोद गोसो गुदुंमोन, थुनलाइ, रायथाइ आरि सोरजिनाय बिथिडाव बिहोमा होदोंमोन। बिथाडा लिरनाय बिजाबफोरखौ ओरैबादि मुं दोनदोंमोन-आं गिसिक खु आंनि बिदल-1, बिदल-2 आरो बिथांनि लिरनाय लिरबिदांफोरनि मादाव 'गार'हिल' दा आदार डेजर्ट' गांसे मुंख'जाथाव बिजाब।

2007 मायथाइयाव मेघालयाव मेघालयनि सोनाब गार'हाजो जिलानि गाहाइ नोगोर तुरायाव रेभा. गिलबार्थ के माराकआ जिउ नागारो। बिथाडा सासे मुंदांखा दोहोरोम सिबिसुला सुबुंमोन, थुनलाइगिरि आरो सानथौगिरिमोन।

### स'नाराम रंरकग्रे सांमा :

स'नाराम रंरकग्रे सांमाया सा-सानजा गार' हाजो आरो ग'वालपारा जिलानि सिमायाव थानाय नाछिरंदिक मुंनि गामियाव 1867 मायथाइयाव जोनोम मोनदोंमोन। बिथांनि बिफानि मुडा ख्लां गाबिल म'मिन आरो बिमानि मुडा छामरे रंरकग्रे सांमामोन। निशानग्रामाव गुदि सोलोंथाइखौ फोजोबनानै बिथाडा तुरा मिचन स्कुलाव थाखो द'सिम फरायदोंमोन। स'नारामआ सासे गोहो गोर, गाव फोथाइथि, गुनखौ सिबिनो मोजां मोनग्रा आरो अनसुला गोसोनिमोन। बेनि अनगायैबो निन्दा होनाय बाथ्राफोरखौ खोमा होयि, बायदि रोखोमनि अगेन-अनागारफोरखौ सहायनो हानाय गुनफोरा स'नारामनियाव दंमोन।

स'नारामआ जेब्लाबो अनागार खालामनाय हाबाफोराव हेंथा होबोदोंमोन आरो बेफोरखौ फोजोबस्रानो जिउयै-माहामै नाजादोंमोन।

बृटिछ सरकारा सरकारी बिफानाव थानाय मानसिफोरखौ गामिसिम लाबोनानै सुबुंफोरखौ रां होआलाबानो खामानि मावहोदोंमोन। बेनि अनगायैबो हाजोनि बिफां-लाइफां बेंखनना लाखिनाय थांखियै गार' हाजोआव थानाय गार'फोरा जुम आबाद मावनायखौ बन्द खालामदोंमोन। बृटिछ सरकारनि बे गोब्राब खान्थिफोरखौ बिथाडा मानिना लानो हायाख्रैमोन आरो सरकारनि हेंथायै जुजिदोंमोन। बिथाडा 1916 मायथाइनि 27 आगष्टआव जिउ गारो।

### हारवार्ड डेनिचन म'मिन :

हारवार्ड डेनिचन म'मिनखौ गोदान गार' थुनलाइनि बिफा होनानाै बुंनाय जादोंमोन। बिथाडानो गिबियै "Achik Ku-rang" (आछिक खुरां) थामहिनबा "गार' मानसिनि गारां (खौरां)" मुंनि गार' रावनि गांसे लाइसि दिहुनदोंमोन।

1913 मायथाइनि 20 फेब्रुवारीयाव मेघालयनि फिसा सोहोर तुरायाव हारवार्ड डेनिचनआ जोनोम मोनदोंमोन। बिथांनि बिफा जबां डि माराकआ आमेरिकायाव फरायनो थांनाय गार' माहारिनि गेजेराव गिबिसिन सुबुंमोन। जबां डि माराकआ 1905 मायथाइनिफ्राय 1911 मायथाइसिम आमेरिकानि हारवार्ड मुलुग सोल्लोंसालिनि "डेनिचन स्कुल" आव सोल्लोंथाइ लादोंमोन। बेनिनो नेर्सोन महरै गावनि देरसिन फिसाज्जलानि मुंखौ "हारवार्ड' डेनिचन डब्लिउ म'मिन" होनना लाखिदोंमोन। बेनि ओंथिया सोल्लोंथाइ आरो दोहोरोमनि सिरि मोनखांनाय। हारवार्ड डेनिचन डब्लिउ म'मिनआ कलिकतायाव फरायनाय समाव बिथांनि मुंखौ 'हारवार्ड डेनिचन डब्लिउ म'मिन' मुडै सोलायदोंमोन।

हारवार्ड डेनिचन म'मिनआ तुरा ओन्सोलाव गोदानै गायसनजानाय ख्रिष्टान मिचनारी स्कुलाव सोल्लोंथाइ लानो जुरिजेननायाव फरायनायनि गोसो होनो गारनानै सावगारि आखिनोसो मोजां मोनोमोन। बिथांखौ गु बोसोर बैसोआव कलिकतानि सेन्ट जेमच इंलिस स्कुलाव लांनाय जादोंमोन आरो बेयावनो 1922 मायथाइनिफ्राय 1930 मायथाइसिम सोल्लोंथाइ लादोंमोन। बे फरायसालियाव फरायबाय थानाय समाव हारवार्ड डेनिचननि आखाइजों बोनाय सावगारिखौ लण्डनाव जानाय खुंगा जिसेथि कमनवेलथ एकजिभिचनसिम दैथायहरनाय जादोंमोन आरो हारवार्ड डेनिचनआ माननि बान्था मोननो हादोंमोन। गोजौ फरायसालिनि जोबथा आन्जादखौ उश्रिखांनानै बिथाडा कलकातानि प्रेसिडेन्सि कलेजनिफ्राय 1934 मायथाइयाव डिग्री लादोंमोन, 1936 मायथाइयाव इंराजी थुनलाइ आयदायाव डिग्री लादोंमोन। इंराजीयाव एम.ए. डिग्री लानाय गार'माहारिनि गेजेराव गिबिसिन सुबुडानो जाबाय हारवार्ड डेनिचन म'मिन।

हारवार्ड डेनिचन म'मिनखौ तुरानि खुंथाइयारि बिफानाव बिसारगिरि महरै थिसनदोंमोन नाथाय बे

मासियाव बिथाडा गोसो गोजोननाय मोनाखैमोन। बै समाव आजिरा मोननाय “गगन बरुवा”नि जायगायाव फरायसालि नायदिंग्रा मासियाव थिनजादोंमोन। 1940 मायथाइयाव गुवाहाटी कटन कलेजाव इंराजी आयदानि प्रफेसार मासियाव साखि मोनदोंमोन। कटन कलेजाव हाबा मावबाय थानाय समाव माखासे गार’ फरायसाफोरनि हेफाजाबाव बिथाडा “आछिक खुंरा” मुनि लाइसिखौ दिहुनदोंमोन।

बिथाडा लिरनाय खन्थाइ बिजाबफोरनि मादाव मखजाथावफोर जादों- गार’ मात-ब’ल (1941), NANGKO GISIK RAGEN (नोंखौ गोसोखांगोन), DO.MA SKINI GIT (चातकी दाउनि मेथाइ), SENGWAT (सांग्रेमा), ME. CHIK AROTA-MAKU (हिन्जाव आरो थांखु) आरो 1942 मायथाइयाव दिहुननाय BILSI GITAL (गोदान बोसोर)।

नैथि मुलुग दावहा सोलिबाय थानाय समाव रैखाथि गैजायि आरो न’ गोमाजानाय शरणार्थीफोरखौ सिबिनो बिथाडा मणिपुरसिम थांदोंमोन। बिथाडा 1944 मायथाइनि 7 आगष्टखालि सोरगोआरि जायो।

बेनिखायनो 1990 मायथाइनि 22 फेब्रुवारीयाव तुरा सोहोराव 77 थि थैनाय सानखालि हारवार्ड डेनिचन म’मिननो "KA CHALANG" (खा छलां) मान बाउनाय जायो।

## सोंथि

1. गार’फोरनि दालाइ सुबुंफोलेरफोर मा मा ?
2. गार’फोर थानाय गाहाइ ओन्सोलफोर मा मा ?
3. गार’फोरनि फुजा होग्रा मानसिखौ मा होनना बुंनाय जायो ?
4. गार’फोर गिबियाव मा दोहोरोमनिमोन आरो उनाव मा दोहोरोम लादोंमोन ?
5. गार’फोरनि गाहाइ दामग्रा-देग्राया मा मा ?
6. लिरसुंथाइ लिर :
 

(क) रामथे अवाथ्रे म’मिन	(ख) रेभा. गिलाबार्थ के माराक
(ग) स’नाराम रंरकग्रे सांमा	(घ) हारवार्ड डेनिचन म’मिन।



## सावथालफोर

सावथाल(चावताल)फोरखौ गावनि बिमा रावाव “ह’ड हपन” होनना बुंनाय जायो। सुनीति कुमार चट्ट’पाध्यायनि बादिब्ला ‘चावताल’ सोदोबा संस्कृत ‘सामन्तराल’ सोदोबनिफ्राय सोमजिदों।

आसामाव साहा शिल्प जागायनायनि बेसेबा सिगांनिफ्रायनो आथिखाल आसामाव थानाय सावथालफोरा कामरूपआव दंमोन होनना ड<sup>०</sup> बाणीकान्त काकतिनि "The Mother Goddess Kamakhya" आरो प्रताप चन्द्र चौधुरीया सुजुनाय "The History of Civilisation of the People of Assam" मुंनि बिजाबाव मोननो थाडो।

### समाजारि जिउ :

सावथालफोरनि समाजारि जिउ दाथाया जोबोरै जुनियाथार। बिसोर गामि फसंनानै थायो। गामिनि मानसिफोरखौ खान्थि बादियै खुंनो गामिनि राइजोनिफ्राय साबा मानसि सायख’नानै खुंनायनि बिबान होनाय जायो। बे साबाखौ ‘म’डे ह’ड’ बुंनाय जायो। मडे ह’ड’नि गाहाइखौ गावबुढा एबा ‘माझहि’ होनना बुंनाय जायो। गामियाव माबाफोर नांलाय-खमलाय एबा गालाय-गुजाय जायोब्ला ‘माझहि’नि सेराव अजद होनाय जायो। बै अजदनि सायाव बिथा खालामना माहारिया साबानि मादाव सासे ‘गेडेत’खौ गामिनि मानसि (राइजो) फोरखौ लिंथुमनो बिबान होयो। बेबादि खान्थिजों समाजनि जायखिजाया जेंनाखौ सुम्रांनाय जायो।

सावथालफोरनि समाजा बिफा गाहाइ। बिसोरनि गाहाइ थांना थानाय राहाया जादों आबाद। हासार गोनां हा नागिरनानै बिसोरखौ जायगा सोलायनाय नुनो मोनो। सावथालफोरनियाव मोन जिने माहारि (गत्र) दं जेरै- मुर्मु, हेम्ब्रम, किस्कु, बेछरा, टुडु, चरेन, बास्के, हासदा, मारिड, च’डे, पाउरीया आरो बेदेया। नाथाय मोनफ्रोमबो माहारिया दालाइ माहारि दं जेरै- मुर्मुनि दालाइ माहारिया ठाकुर, किस्कुनि दालाइ माहारिया रपाज आरि।

सावथाल हिन्जावफोरनि गाहाइ गाननाय जोमनाया जादों लुंगी पान्सि (पान्सि-पाइहाड)। चावथाली रावाव गाननाय-जोमनायखौ ‘ह’र:बान्दे’ बुडो। हिन्जावफोरा मोदोमनि सा बाहागोआव गाननाय सिखौ

पान्सि आरो गाहायाव गाननाय सिखौ पाङ्हाण्ड (लुंगी) बुडो। हौवाफोरा गाननाय गाहाइ सिया जादों पान्सि।

हाबा फोरबोफोराव सावथाल हौवाफोरा धुति गानो आरो हिन्जाव गोदाना गाननाय हालदै फोननाय सि-जोमखौ सिन्दुर खाण्डि बुंनाय जायो। हाबायाव हौवा गोदाना हालदै फोननाय साद्रि आरो गुफुर सिनि टटङ्बा: (थफि) गानो।

बिसोरनि हारिमुनि गाहाइ फोरबोया जादों बाहा आरो चहराइ। बिसोरनियाव गोबां मेथाइ रोजाबनाय आरो मोसानाय दं, बेनि मादाव दं-मोसानाय, दं-मेथाइ, लांगडे मोसानाय, लांगडे मेथाइ, चहराइ, बाहा मेथाइ आरि।

मेथाइ आरो मोसानायाव बाहायनाय दामग्रा-देग्राफोरा जादों टामाक, तुमदा:, करताल (खाबां), ढल आरि। हाबा-खेराइ फोरबोआव काहानि आइजे-थोरसि, खुरै, लथा बाहायो। हिन्जावफोरा रुपानि गहेना गानो। आथिखालाव सावथालफोरा सोल्लोथाइयाव गुबुननि रुजुनायाव उन गोग्लैसोनायब्लाबो सिगानि खोमसि फोथायनाया जोबबोनो हमदोंसै। समनि बाबेननायाव सुबुं फोलेरा थारैनो दावगानायनि थिखिनियाव मोनफैनो हागोन।

सावथालफोरनि सानैसो गेदेमा सुबुंनि सुंद जिउखौरां गाहायाव होनाय जाबाय-

### बेनेडिक्ट हेम्ब्रम :

समनि फाखनाव बेनेडिक्ट हेम्ब्रमा थैदोंमोनब्लाबो सावथालफोरनि थुनलाइ फोथाराव बिथाडा गोबां बिहोमा होनानै थैनानैबो थैयिबादि जानानै दं। बिथांनि बिफानि मुडा रुंसारि डाटु लक्षण हेम्ब्रम (आजिरा मोननाय फोरोंगिरि) आरो बिमानि मुडा राणी चरेन। बेनेडिक्ट हेम्ब्रमनि जोनोमा जादोंमोन 1967 मायथाइनि 18 अक्ट'बरआव क'कराझार जिलानि ग'साइगाव महकुमानि सिडाव थानाय पलाशगुरि (जियाडांगा) मुंनि गंसे फिसा गामियाव।

बिथाडा गुदि सोल्लोथाइखौ गामिनि गुदि फरायसालियाव जागायजेननानै 1993 मायथाइयाव कटन कलेजनिफ्राय लाइफाडारि सोल्लोथाइ (Botany) याव एम. एस. सि. डिग्री लायो। हायेन आसामाव सावथाल सुबुं माहारिनि मादाव एम. एस. सि आन्जाद उथ्रिनाय गिबि सुबुडानो जादों बेनेडिक्ट हेम्ब्रम।

बिथाडा ग'साइगाव बि. एड. डिग्री लाखांनानै ग्राहामपुर जौसिन फरायसालियाव बि. एस.सि. फोरोंगिरि महरै हाबो आरो उनाव लाइफाडारि आयदानि फोरोंगिरि महरै गोजौथाखोआव बारखोयो। बिथांनो साख्रि मावनाय समावनो सावथालफोरनि राव आरो थुनलाइ बिजिरसं मिरुनि आफादगिरि बिबानखौ होनाय जायो। बिथांनि दैदेननायाव रुंसारि लुबीन्द्रनाथ चरेन आरो मुस्रि सुब'ध बास्केनि



गोख्रों नाजानायाव सावथालफोरनि बिजाबखौ आसाम सरकारा रं होनाडाजासे जगान होनायखौ जागायजेनो। बेनेडिक्ट हेम्ब्रमनि समाजारि खामानि मावनायनि बे मोनसे जर'खा बिहोमा। सावथालनि थुनलाइयाव मोननैसो खन्थाइ, लिरबिदां बिजाब आरि लिरनायनि अनगायैबो आसामाव बिथाडानो गिबिसिन सावथाल रावनि रावखान्थि दिहुननानै सावथाल थुनलाइखौ राफोद खालामो।

थुनलाइयाव बिहोमा थानायनि अनगायैबो बिथाडा सासे मोजां बिबुंगोरा आरो आखा-फाखा गेलेग्रामोन। सोल्लोथाइ बिथिडाव गावसोरनि सावथाल सुबुं फोलेरखौ सांग्रां खालामनो थाखाय बोसोराव जायगा जायगा सांग्रांथि मेल-मिटिं खुंदोंमोन।

सावथाल राव ससा खालामनाय बिथिडाव बेनेडिक्ट हेम्ब्रमनि मुंखौ लाथारनांगोन। आदिबासि समाजनि खोमसि फोथायनायखौ होखारनो थाखाय जायगा जायगा सांग्रांथि मेल खुंनानै सुबुंखौ सांग्रा खालामदोंमोन। खेबसे क'कराझार जिलानि जिला खुंगिरिनि हेफाजाबाव रं होनाडि मेगन नायजानाय केम्पबो खालामदोंमोन।

बेनेडिक्ट हेम्ब्रमआ सासे गोरलै गुरै मिथिंगाखौ मोजां मोनग्रा आरो फोथायग्रा मानसिमोन। बिथाडा गावनि साखियाव माब्लाबाबो गोहैलो खालामाखैमोन। जायखिजाया खामानियावनो समनि सिगां मावथिलियाव नुजानाया बिथानि गेदेर गुनमोन। बिथाडा थैनायनि सिगां सानखालिबो गावनि खामानियाव नुजाथिदोंमोन।

गोबां बोसोर बेरामाव गोग्लैनानै बिथाडा थानाय 05-10-2013 खालारखालि सोरगोआरि जायो।

### बदन हासदा :

हायेन आसामनि सोनाब सिमायाव थानाय क'कराझार जिलानि खापरगाव मुंनि फिसा गामियाव 1957 मायथाइयाव बदन हासदाया जोनोम मोन्दोंमोन। बिथानि बिफानि मुडा माझि हासदा आरो बिमानि मुडा चलमा बेसरामोन। बदन हासदाया क'कराझार कलेजाव आइ. ए. सिम फरायनानै गावनि गोग्लैसोनाय सुबुं माहारिखौ सोल्लोथाइ, समाजारि, रांखान्थियारि बिथिडाव गसंथानो हानाय खालामनो थाखाय नारा नाथा नाजायो आरो बिथानि दैदेननायाव 1980 मायथाइयाव दुलाराय आसाम सावथाल फरायसा आफादा दाजायो। बे मोनसे थांखिखौ लानानैनो बिथानि दैदेननायाव 1986 मायथाइयाव आदिबासि सेवा समिति दानाय जायो। जिबा बोसोर गोलाउ सम आदिबासि सेवा समितिनि मिरु आफादनि आफादगिरि मासियाव जिरायो। बिथाडा आसाम सावथाल साहित्य सभानिबो बोसोनगिरिमोन।

1996 मायथाइयाव जानाय हरियारि दाडाबाजिनि समाव गोजोन लाबोफिननो बिथाडा गाहाइ बिफाव लादोंमोन। बे खामानिनि थाखाय क'कराझार जिला बैंगिरिया बिथांखौ 'गोजोन आरो खौसेथि' लाबोग्रा एबा लामा दिन्थिगिरि बि. टि. चि. गोरोबथाया मुंसाइ जानायनि उनाव क'कराझार जिला सावथाल सुबुं फोलेरनिफ्राय बिथाडानो गिबि परिषदाव मावफुं सोद्रोमा मासि मोनदोंमोन। बि. टि. चिनि मावफुं

सोद्रोमा महरै बिथानि मावसमाव गोबां सावथाल सुबुं फोलेरनि साखि गैजायि सेंग्रा-सिख्लाफोरा साखि मोननो हायो।

बिथाडा सैथो आरो गोहो गोर, गोख्रों दैदेनगिरि, उन साननो गोरों, गुन गोनां सुबुंमोन। गावनि बिफाननि जौगाथाइयारि खामानिफोरखौ गोख्रै मावोमोन। बिथाडा आदिबासि समितिनि मिरु नेहाथारि रुंसारि सतेन्द्र चरेनखौ लोगोआव लाफानानै हायेन आसामनि गामि गामि थानानै मेल खुंनानै सरासनस्रा निखावरि आदिबासि मानसिफोरखौ सांग्रां खालामो। आदिबासि रइजोनि जानानै उदाडै सुबुं खुंथाइयारि खान्थिजों रज्यो आरो मिरु सरकारनि नोजोराव गोग्लैनाय आसामनि सावथाल सुबुं फोलेरनि गिबि सुबुडानो जादों बदन हासदा।

बिथाडा 01-02-2017 थिउरिया हान्जानि आखाइयाव जिउ खोमानो गोनां जायो। बिथानि बिहोमाया बि. टि. सि. नि जारिमिनाव स'नानि हांखोजों लिरजाना थसिगोन।

### मिथियाछ टुडु :

आसामाव सावथाल सुबुं फोलेरनिफ्राय नुजाफैनाय अलंबार हाथरखिया जादों मिथियाछ टुडु। बिथानि जोनोमा 15-01-1930 मायथाइखालि आथिखाल बि. टि. ए. डि. नि क'कराझार जिलानि ग'साइगाव महकुमा सावथाल कलनीनि मोनसे फिसा गामि माटियाजुरीयाव जादोंमोन। बिथानि बिफानि मुडा रुंसारि मारथा मुर्मुमोन। बिथाडा गुदि सोलोंथाइखौ माटियाजुरी गुदि फरायसालियाव जागायजेननानै गुवाहाटी कटन कलेजनिफ्राय बि. ए. डिग्रीखौ लादोंमोन।

सोलोंथाइ लाखानानै 1954 मायथाइयाव ग्राहामपुर गोजौ फरायसालिनि गाहाइ फोरोंगिरि महरै साखि मावजेनो। बेनि उनाव रुंसारि राहेल चरेनजों हाबा जायो। रुंसारि मिथियाछ टुडुआ 1957 मायथाइयाव गिबि खेबनि थाखाय ग'साइगाव बिधान सभा समष्टिनिफ्राय आसाम बिधान सभायाव एम. एल. ए. महरै बिसायख'जायो। बिथाडा 1957 मायथाइनिफ्राय 1991 मायथाइसिम लेनथ्रियै स्नि खेब एम. एल. ए. जादोंमोन। बिथाडा 1972-78 मायथाइयाव आसाम सरकारनि लेबार एण्ड ससियेल वेलफेयार बिफाननि मन्थ्रिमोन। बिथाडा दाइनथि खेबाव 2001-2005 मायथाइसिम एम. एल. ए. जानानै आसाम सरकारनि खाजोना (राजह) मन्थ्रिमोन। बेनि उनाव बिथाडा 2005 मायथाइनिफ्राय 2010 मायथाइसिम सरकारनि नैजि (20) दफायारि मावबिथांखिनि लेडाइ आफादगिरिमोन।

आसामाव सावथाल सुबुंफोलेरनिफ्राय ब्रैजि बोसोर आसाम बिधान सभायाव थान्दै महरै दैदेननाय बिथाडानो सासेल' सुबुंमोन। आसाम सावथाल साहित्य सभानि आफादगिरि, सावथाल राव आरो थुनलाइ बिजिरसं मिरुनि गायसनगिबि आफादगिरि, सावथाल कल'नी पारगाना बाइछिनि आफादगिरि ग्राहामपुर समबाय समितिनि गायसनगिरि, मरनाइ साहा बागान मेनेजमेन्ट कमितिनि आफादगिरि, सेवापुर मिछन हस्पिटालनि चुपारिन्टेडेण्ड आरि मासियाव दंमोन।

बिथाडा गावबो सासे फुटबल गेलेनो गोरेंमोन। बिथाडा भलिबल, बेडमिन्टन, केराम आरि गेलेनो मोजां मोनोमोन। बिजाब फरायनाय, साहा बागानाव खामानि मावनाय, आबादनि खामानि-दामानियाव नोजोर होनाय आरो मैहुर खालामनाया बिथानि सर'मोन।

बिथाडा सासे दोहोरोम मानिसुला मानसिमोन। बिथाडा माब्लाबाबो जंखायनाय बाभ्रा बुडामोन। रबिबारखालि गीर्जायाव नुजाहैयोमोन। बिथानि सहायनाय गुनफोरा बाखनायथाव।

बेफोरबादि सासे गोसो गोथार आखुनि बिगुमा गेदेमा सुबुडा थानाय 10/07/2017 मायथाइयाव बेरामाव गोगलैनानै बे संसारखौ नागारना थाडो।

### राहेल किस्कु :

राहेल किस्कुनि जोनोमा क'कराझार जिलानि ग'साइगाव थानानि बरचनपुर गामियाव 1925 मायथाइयाव जादोंमोन। बिथानि बिफानि मुडा जहन किस्कु आरो बिमानि मुडा लुक्षी मुर्मूमोन।

राहेल किस्कुआ उन्दै समनिफ्रायनो फरायनायाव जोबोर गोसो गुदुंमोन। गुदि सोलोंथाइखौ हाराफुटा मिसन स्कुलाव जागायजेनदोंमोन आरो लक्ष्णौनि गंसे कलेजनिफ्राय 1951 मायथाइयाव बि. ए. डिग्री लायो। बै समाव राहेल किस्कुआनो गिबि सावथाल आइजो बि. ए. उश्रिनाय।

राहेल किस्कुआ साखि मावनाय समाव गैजारोडे थाखोनि आइजोफोरनि रांखान्थियारि जौगानायनि थाखाय गावनि दोहोन बाहायनानै सि सुथाबग्रा फोरेंथाइ मिरु खुलिनानै आइजोफोरखौ रां होनाडाजासे फोरेंथाइ होदोंमोन।

बिथाडा समाजनि गाज्रि आखु बाद्राय जौ लॉनायखौ बन्द खालामदोंमोन। दाइना बुथारनाय हाबाखौ हैंथा होदोंमोन। आइजो सोलोंथाइखौ गोसारहोदोंमोन आरो जाउनाव आइजोफोरनि सोलोंथाइया बांनो हमो।

आखान्थि फोरेंगिरि महरै 1952 मायथाइयाव ग्राहामपुर गोजौ फरायसालियाव बिथाडा साखि मावजेननानै 1980 माइथाइयाव गाहाइ फोरेंगिरि महरै आजिरा लायो।

आजिरा लाखांनायनि उनावनो बिथाडा समाजारि, दोहोरोमारि आरो सोलोंथाइ जौगानायनि थाखाय खामानि मावलांदोंमोन। बिथाडा गावनो सान्थालि रावनि खन्थाइगिरि आरो आखा-फाखा लिरगिरिमोन। बिथानि लिरनायनिफ्राय रोखा जानो हायोदि बिथाडा जिरायनाय गैयाजासे आइजो आरो गथ'फोरनि मोजानि थाखाय खामानि मावलांदोंमोन। गोरलै, गुरै आरो गियानजों बुंफबनाय आरो बोसोनारि लिरनायफोरा साफ्रोमखौबो सानगोमाहोयो। राहेल किस्कुआ सान्थालि साहित्य मुलुगाव जाबादि बिहोमा होलांबाय बेफोर बेसेन गोसा सम्पदबादि। बिथाडा 2001 मायथाइलि 6 एप्रिल खालाराव रुंसारि जायो।

**सोंथि :**

1. सुनील कुमार चट्ट'पाध्यायनि बादिब्ला 'चावताल' सोदोबा बबेनिफ्राय सोमजिदों ?
2. सावथालफोरनि गाहाइ थांना थानायनि राहाया मा ?
3. 'म'डे ह'डर' (साबानि) गाहाइखौ मा होनना बुडो ?
4. सावथालफोरनि माहारिया मोनबेसे आरो मा मा ?
5. सावथालफोरनि आरिमु-हारिमुनि सोमोन्दै लिर।
6. सावथालफोरनि समाजारि जिउखौ बरनाय ?
7. लिरसुंथाइ लिर :
  - (क) बेनेडिक्ट हेम्ब्रम (ख) बदन हासदा
  - (ग) मिथियाछ टुडु (घ) राहेल किस्कु



## साहा बागानीया सुबुं हान्जा

आसामाव गुबुन गुबुन समाव गुबुन गुबुन जायगानिफ्राय गोबां सुबुंहान्जा हाबफैदोंमोन। भारत हादोरनि गुबुन गुबुन राज्योनिफ्राय साहा बागानाव खामानि मावग्रा सुबुंफोरा आसामाव फैदोंमोन। नाथाय बे सुबुं हान्जानि हाबफैनाया मिथिंगायारि नडामोन। इष्ट इण्डिया क'म्पानीया साहा बागानाव खामानि मावग्रानि गोनांथि जानायलाय भारत हादोरनि गुबुन गुबुन हालामनिफ्राय बुथुमनानै लाना फैदोंमोन। कम्पानीया 1835 मायथाइनिफ्राय खर'सा आसामनि चाबुवायाव गिबियै साहा आबादनि खान्थियारि फुलि गायनाय खामानिखौ जागायजेनो। बेनि बोसोरब्रै उनाव आसाम साहा क'म्पानी (The Assam Tea Company) दानाय जायो। आसाम साहा कम्पानीनि सिङाव साहा आबादा लासै लासै गोसारलाडो नाथाय गोनांथि बायदियै जायगानि मावदांसानि आंखाल जादोंमोन। बेनिखायनो चीन आरो भारत हादोरनि गुबुन गुबुन जायगानिफ्राय मावदांसा बुथुमनायनि बाश्रा साननांगौ जायो। बेनि थाखायनो कम्पानीया माखासे गेजेर थाखोनि दालाल थिसनदोंमोन। बै दालालफोरा सोनाब बंग, बिहार, झारखण्ड, छत्तिशगड, मध्य प्रदेश, उत्तर प्रदेश, अन्ध्र प्रदेश, माद्राज आरि राज्योनिफ्राय मावदांसा बुथुमना लाबोदोंमोन। बेबादिनो आसामाव मावदांसा बुथुमनानै लाबोनाय खामानिखौ मजदुर चालान होनना बुडो मोन। मजदुर चालाना मोननै रोखोमनि दंमोन गिरमिटिया चालान आरो आङ्काठिया चालान। लिरनाय गोरोबथा (Agreement) बादियै थिखानाय समनि थाखाय मावदांसा लाबोनायखौ गिरमिटिया चालान आरो जेबो रदाय खायाब्लानो सोलो-बोलोजों बुथुमनानै लाबोनायखौ आङ्काठिया चालान होनना बुंनाय जायोमोन।

आसाम साहा क'म्पानीया जिगुजौ जौथाइनि गेजेर बाहागोयाव हाजारिबाग जिलानिफ्राय गिबि गिबियै 652 सा मावदांसा बुथुमनानै लाबोदोंमोन अदेबानि बै मावदांसाफोरा आसामसिम मोनफैयाखिसै। बेराम आजार जानानै खावसे मावदांसाफोरा लामा दथायावनो थैदोंमोन आरो आद्रा थानायफोरा गिदिंफिनलांदोंमोन। बेनि उनाव छ'टनागपुर हालामनिफ्राय क'म्पानीया दालालनि जोहै मावदांसा बुथुमो। बै मावदांसाफोराबो माखासे बाहागोयाल' आसामनि हायाव गाफैनो हायो। गुबुन माखासेया लामायावनो

थैलांजोबो। नाथाय लासै लासै मावदांसानि अनजिमाया बांलाडो। 1877 मायथाइयाव गोरोबथा खानाय मावदांसानि अनजिमाया जाहैयो सा 46,765। भारत हादोरनि गुबुन गुबुन जायगानिफ्राय मावदांसाफोरा फैदोंमोनखायनो बिसोरनि हारि, गाव दोहोरोम, राव कृष्टि हारिमुवा गुबुन गुबुनमोन। नाथाय आसामाव फैनानै चाहा बागाननि मोनसेल' थासारियाव थानानै खामानि मावनोगोनां जायो। गिबि समाव माखासे आख 'फाख' जादोंमोनब्लाबो सम बाबेननाय लोगो लोगो गावजों गाव लोब्बा लाखिनाय आरो बुजिलायनाय सानस्रिया बांलाडो। गोरोबथा खाजानाय आथालसे मावदांसाया गावसोरनि जायगासिम गिदिंफिनलांबायब्लाबो आद्रा थानायफोरा आसामखौनो गावनि हादाब होनना साननानै थालानायसै। आसामावनो दिदोमै थालानाय मावदांसाफोरनि गेजेराव जुथाइयै मोनसे फोनांजाब राव जोनोम मोनो जायखौ बागानीया राव होनना बुंनाय जायो। बागानीया रावा मोनसे दवानसो। बेयो दाबो रावनि थाखोयाव दावगानो हायाखै।

साहा बागानीया सुबुंहान्जाया दा आसामनि समाज जिउनि मोनसे रायखांजाथाव गेदेर बाहागो। साहा मावदांसा आरो बारग' साहा मावदांसाफोरखौनो लाफाना साहा बागानीया सुबुं हान्जानि अन्जिमाया द'जि लाखफ्राम। बिसोरनि मादाव हिन्दु आरो खृष्टान दोहोरोम लानाय सुबुंफोरनि अन्जिमाया बांसिन। हिन्दुफोरनि बांसिनानो शाक्त धोरोमारि आरो जिउ गैयै (मुसुखा) खौ फुजिग्रा। दुर्गा, कालि, मनसा आरि गोबां मोदाय-मोदायजोखौ फुजा खालामो। अनुकुल ठाकुरनि सिबियारिनि अन्जिमायाबो इसेबां खम नंदाया। साहा बागानीया सुबुं हान्जानि समाजनि गेजेराव गोबां हारि, हारिसा आरो माहारि दड'। आथिखालाव साहा बागानीया सुबुंहान्जानि समाजनि गेजेराव आसामनि अनगायैबो गुबुन गुबुन रान्ज्योनि आदिबासी, जाति, जनजाति, लेडाइ हारि-हारिसा आरो गुबुन गुबुन सुबुंमाहारिनि मानसि दं।

आसामनि बुरलुंबुथुर आरो बराक सेरफांनि साहा बागान गोलाउ सम रायजो जानानै फैनाय साहा बागानीया सुबुंफोरा असमीया समाजनि एंगारहायै बाहागो जाना फैबाय। असमीया राव-हारिमुखौ गोबानानै लादोंब्लाबो साहा बागानीया सुबुंफोरहा गावनि सिनायथि दड'। बिसोरनि आंगो कृष्टि-हारिमु आसार आखुवा जोबस्रांलाडाखै। करम, टुसु आरो सहँराइया साहा बागानीया सुबुंफोरनि जोबोर आंगो रंजाथाइ फोरबो। करम फोरबोनि झुमुर मोसानाय-रोजाबनाया साहा बागानीया सुबुंहान्जाया गावनि सिनायथिखौ होयो। साहा बागानीया सुबुंहान्जानि गोबां मुख'जाथाव सुबुंनि गेजेराव सानैसो रायखांजाथाव सुबुंनि सुंद' सिनायथि सिडाव दैखांनानै होनाय जाबाय-

### मेघराज कर्मकार :

खायसे बागानीया सुबुडा असमीया रावजों थुनलाइ सोरजिनानै मुंदांखा जादों। जेरै खर'सा आसामनि

जामिता साहा बागाननि मेघराज कर्मकार बिथाडा साहा बागानीया सुबुंहान्जानि मादाव गिबि थुनलाइयारि पेन्सन मोननाय गिबि थुनलाइगिरि। बिथाडा “चालुक बचन”नि अनगायैबो माखासे बिजाब फोसावलांदों। असम प्रकाशन परिषदआ “मेघराज कर्मकार रचनावली” मुनि बिजाब फोसावदों। बिथाडा बरबरुवा गोजौ फरायसालियाव फोरोंगिरि मावोमोन।

### सन्त 'ष कुमार तपन :

मराणनि सन्त 'ष कुमार तपनआ लिरनाय “मुण्डा जातिर चमू परिचय” (मुण्डा हारिनि सुंद' सिनायथि) बिजाबानो साहा बागानीया सुबुं हान्जानि गिबि फोसावजानाय बिजाब। आसाम साहा जनजाति फरायसा आफादनि बिथाडा गायसंगिरि गाहाइ नेहाथारिमोन। 1924 मायथाइयाव जोनोम मोननाय तपनि बिफानि मुण्डा दयाल तपन आरो बिमानि मुडा मारठा तपनमोन। ज'रहाट जे. बि. कलेजनिफ्राय आरिमु जालिया डिग्री मोननाय तपनआ समाज सिबिनायनि समानैनो थुनलाइबो सोरजिदोंमोन। आसामनि गुबुन गुबुन खौरांबिलाइ-सानमालाइसियाव बिथानि फारि गोथौ लिरथाइ सुजुथाइ फोसावजादों। सादा-सिदा जिउखुंथाइजों सोलिग्रा बिथां गेदेमा सुबुडा 1994 मायथाइनि 21 नबेम्बरआव रुंसारि जालाडो।

### साइमन सिं ह'र :

टियकनि साइमन सिं ह'रआ 1929 मायथाइयाव जोनोम जादोंमोन। बिथानि बिफानि मुडा माछिराम ह'र आरो बिमानि मुडा छरा ह'र। शिबसागरनि मिछन फरायसालियाव फरायसा जिउखौ जुरिजेननाय ह'रआ ज'रहाट जे. बि. कलेजनिफ्राय आरिमु जालिया डिग्री मोनो। सरकारनि साखिखौ नेवसिगारना नै समाजनि खामानियाव मुखुब थानाय ह'र बिथाडा खृष्टान दोहोरमारि जानानैबो हिन्दु दोहोरमनि नामघर फज'नो गावनि हाखौ दान होनानै आगदारि बादि खामानि मावो। सोल्लोंथाइनि बाथ्राखौ साननानै उन गोगलैसोनाय गोथौ हालामाव फरायसालि गायसंनानै सोल्लोंथाइनि सोरां बिलाइदोंमोन। बिथां गेदेमाया 1979 मायथाइनि 26 जुनआव सोरगोआरि जायो। कलेजनि सोल्लोंथाइ मोननाय बे गेदेमा सुबुडा साहा बागानीया सुबुंहान्जानि समाजखौ खौसे खालामनायाव आगदारि बिबान लादोंमोन। बेनिखायनो बिथांखौ साहा बागानीया सुबुं हान्जानि समाजनि दागिरि होनना बुंनाय जायो।

मखनो गोनांदि हादरनि उदांसि दावहायाव आसामनि साहा बागानीया सुबुंहान्जा समाजनि बिहोमाया थोजासे दड'। सोमावसारनायनि गुबुन गुबुन हाबाफारियाव बाहागो लानानै गोबां सुबुडा सरकारी नासयजानायनि बोलि जानो गोनां जादोंमोन आरो गोबाडानो थैनायखौ गोबानानै लानांदोंमोन। 1921 मायथाइनि हेफाजाब होयै सोमावसारनायाव बाहागो लानानै आथिखालनि शणितपुर जिलानि तेजपुर एण्ड घगरा टि इष्टेटनि मांरि उरावआ जिउ बाउलादों। बिथाडा जाबाय उदांसि दावहायाव जिउ बाउजेनग्रा

आसामनि गिबि आइजो मुंख्लं। आसामनि गुबुन हादरारि होखारहरनाय सोमावसारनायावबो साहा बागानीया सुबुंफोरा गोसो मोदोम जिउ होनानै बाहागो लादोमोन। सरकारी गादबनाय, नासयनायनि बोलि जाना माखासे सुबुडा जिउ गारनांदोमोन। 1980 मायथाइयाव थैनाय दरं जिलानि कौपाति साहा बागिसानि बाधना उरावँआ आसाम सोमावसारनायाव थैनाय साहाबागानीया सुबुं हानजानि गिबि मुंख्लं।

### सोंथि :

1. आसामनि गिबि साहा बागाना मा आरो माब्ला गायसनजादोमोन?
2. आसामनि साहा कम्पानीनि मुडा मा आरो माब्ला गायसनजादोमोन?
3. भारतनि बबे बबे राज्योनिफ्राय मावदांसा बुथुमदोमोन आरो बेखौ मा होनना बुंदोमोन?
4. गिरमिटिया आरो आइकाठिया सालाननि बागै मा मिथिगौ लिर।
5. साहाबागानीया सुबुंहान्जा समाजनि मोनजि हारि-हारिसानि मुं लिर।
6. आसामाव साहा बागानीया सुबुं हानजानि सुबुं अनजिमाया बेसेबां?
7. साहा बागानीया सुबुं हान्जानि गेजेराव मा मा दोहोरोमारि सुबुं दडो?
8. उदांसि सोमावसारनायनि गिबि आइजो मुंख्लंआ सोर?
9. आसाम सोमावसारनायनि साहा बागिसानि गिबि मुंख्लंआ सोर?
10. जायखिजाया सासेनि बागै सुंदयै लिर:
  - क) मेघराज कर्मकार,
  - ख) सन्त'ष कुमार तप्प
  - ग) साइमन सिं ह'रनि





## चुतीयाफोर

चुतीयाफोरा आसामनि गोजाम थागिरिफोरनि गेजेराव मुंख'जाथाव सुबुंहान्जा। द'थि जौथाइसोनिफ्राय गोजाम चुतीया रायजोनि जारिमिनारि फोरमानफोर मोननाय जायो। अब्लानिफ्राय आह'म सर्गदेउ चुहुंमुं दिहिडीया राजानि राज्यो खुंनाय समाव (1523 ख्री: आव) आह'म रायजोनि सिडाव फैनायनि सिगांनो गोलाउ समहालागै बिथांमोना गाहाइयै बुरलुंबुथुरनि साहा फारसे रायजो खुंदोंमोन। मुंख'जाथावदि, आहमजों लोगोसे जानाय दावहायाव चुतीयाफोरनि रानी बीरजो सती साधनीया हानायसिम दावहा नांदोंमोन आरो आह'मनि गेजेन जानायनिखुइ थैनायानो साबसिन साननानै कुबेरा होनाय दोहोन दौलदखौ बिखायाव गोबानानै चन्दनगिरि हाजोनिफ्राय सिंनि हाफावसिम बारजुमनानै जिउ गारदोंमोन।

हिमालयनि साहानि मानस सर'बरनि सानजाहा थानाय स्वात सर'बरनि खाथि खाला थानाय ओनसोलफोरा चुतीयाफोरनि गाहाइ थानाय जायगामोन। बेनिफ्राय बिसोर स'वनशिरि दैमानि सेर सेर सोनाबथिं दावबायलांनानै दानि लक्षिमपुर हालाम मोनफैयो। स्वात सर'बरनि खाथि खाला ओनसोलनिफ्राय फैनायनि थाखाय बिसोरखौ स्वातीया बुंनाय जायोमोन। समफारियै बे स्वातीयानिफ्रायनो चुतीया सोदोबा जोनोम जादों।

गुबुन फारसेथिं बे बुंफोरथिखौ मोननाय जायोदि, जि एबा डि एबा टि माने दै एबा दैमा-छु नि ओंथिया जादों दैसा, छु-टि नि ओंथिया जादों गोथार दैमा; बै दैमानि सेरफांआव थानाय मानसिफोरानो चुतीया। (बिष्णुप्रसाद राभा रचनावली, सेथि बिसान, 1982 बिलाइ 336, 337)।

चुतीयाफोरा रायजो खुंनाय शदिया राज्योनि गोजाम मुडा बिदर्भमोन आरो राजथावनिया कुण्डिल नोगोरमोन। चुतीयाफोरा गावखौनो बिदर्भ राज्योनि राजा भीष्मकनि फोलेर होनना सिनायथि होयो। बिसोर मोदाइजो सिबियारि आरो शदियानि केचाइखाति (गोथांजाग्रा) एबा ताम्रेस्वरी मोदाइजोनो मानसि दानथारनानै फुजा होयोमोन। चुतीया राज्योया आहम राज्योनि सिंआव फैनायनि उनाव आह'मफोराबो केचाइखाती मोदाइजोनो फुजा-बावथाइ होयोमोन। सर्गदेउ गौरिनाथ सिंहनि साननिफ्रायसो मानसि बोलि होनाय खान्थिखौ बोखारना होनाय जायो।

चुतीयाफोरा गावनि गेरेमसा हारिमु दड'मोन। बिसोर मंग'लीय सुबुंहान्जानि गेदेमा बड़' सुबुं

हान्जानि। बिसोर नोगोर गायसननानै रायजो जादोंमोन होनना हमना लानो हायो। कुण्डिल नोगोर, लखिमी नोगोर, रत्नपुर एबा रतनपुर आरि मुं आरो बेनिनो गंनैसो नोगोरनि बायखोन्दा नेरसोना बै सुबुंफोरनि जौगा सोदोमस्रि हारिमुनि सिनायथि होयो। “सातसरी आसाम बुरन्जी” आव आहम राजाया चुतीया राज्योखौ जै खालामना मोननाय बायदि मुवा बेसाद आरो गोनां गेदेर सुबुंनि बाश्रा मुंख'नाय दड'। बेनि मादाव मैदेर 30, गराइ 60, सिलाइ 79, बमा बारुद, दण्डछत्र, केक'राद'ला, थुंग्रि, पिकदान, मोसौ मैसो गोबां मोनदों। गणक ब्राह्मण जि दाग्रा, स'नारी, कमार, तेली, माली, ध'बा, चमार गोबां गुबुन गुबुन बिरतियाल, गोबां गाजानि मुकुट, राजा जिरायग्रा उलाफाद, थुंग्रि, पिकदान आरि आरो जि दाग्रा, स'नारी, खामार, फालांगियारि थाखोया चुतीया राज्योनि जौगा सोदोमस्रि आरो मावमिननि जुनिया बिफाव थानाय मोनसे समाजनि फोरमान दिन्थियो।

बिसोरो लंथाइ आरिमु बिथिडावबो दोहोनिमोन। दावराइ दाउजों लोगोसे बिष्णुमुर्ति, शिव पार्वतीनि मुसुखा, सूर्य मुर्ति, ताम्रेस्वरी मन्दिर, केचाइखाइती थान, मालिनी थान गायसननाय आरिया बिथांमोननि लंथाइखुलिनि सिनायथि दिन्थियो। बेफोरनि अनगायैबो स'नाजों दानाय डुगडुगि, स'नाथि गाबनि गलपाता, सनानि खेरु, स'नानि आरो रुफानि गामखारु, ज'नबिरि, स'नानि मावजि, थाम थाखोयारि राजउलाफाद, दबा, कालि, चौरा नाव आरि बाहायनायनि फोरमान मोनो, बेफोरनो बिथांमोननि जौगा हारिमु सांग्रांथिनि सिनायथि।

जारिमिनगिरि बेनुधर शर्माया फोरमायलांदों- चुतीयानिफ्राय जाय हाजार हाजार सिलाइ बारुद लाबोदोंमोन। बेनि मादाव मिठाह'लं मुंनि बरट'पआनो साबसिनमोन। बे बरटपनि सा बाहागोया फिसलाइनि दै बोहैहोग्रा, बियावनो मिना स'नानि बाखोर साजायना दोननाय दड'। ....सासे चुतीया मानसिया औवानि खाथिजों समायनायै साजायनाय दुटुपीया मोनसेयाव सोयै सोयै लाडोमोन। बै समसिम लुइतनि खोला फारसे रावहाबो खोलोबनै (दुटुपीया) न' गैयामोन। सर्गदेउआ बेखौ साबना हामना नुनानै जोबोर गोजोनदोंमोन आरो बै नेरसोनजोंनो राजानि न'खौ खोलोबनै लुनो बिथोन होदोंमोन।

फिन बिग्रायखांनायखौ गिनानै आहम राजाया फिसा फिसा हान्जायाव बोखावनानै आसामनि गुबुन गुबुन जायगायाव राइजो जाहैनायाव चुतीयाफोरा गोदोनि कृष्टि हारिमु, सोदोमस्रिखौ थि महराव सरैखाथि लाखिनो हायाखिसै।

चुतीया सुबुं हान्जानि गोबां सुबुडानो असमीया हारिनि जिउ खांनायाव बायदि बिथिडाव बिहोमा होनानै अरायबो गोसोखांजादों। सिडाव बेनिनो सानैसोनि बागै सुंद'थै फोरमायनाय जाबाय।

### बैष्णव पण्डित स'नाराम चुतीया :

दासान्दि जरहाट जिलानि काकजान ओनसोलनि बाम कुकुपराच'वा गामियाव 1915 ख्री: आव जोनोम लानाय स'नाराम चुतीया बिथाडा गाहाइयै आसामनि दोहोरोमारि बिथिडाव गोनांथार बिहोमा होलांदों। बिथाडा 1935 ख्री: आव मोनबा आयदायाव लेटार नाम्बार लानानै मेट्रिक आनजादाव उश्रिसारानानै कटन कलेजनिफ्राय बिगियान थाखोयाव बि. एस. सि. डिग्री मोननानै ब्ल'क डेभेलापमेण्ट अफिसार महरै खामानि मावदोंमोन। भारतनि उदांसि सोमावसारनायाव बाहागो लानानै बिथांआ नै बोसोरफ्राम जोबसालियाव थानांदोंमोन। उननि समाव बिथाडा फोसाबलु गोसोजों श्रीमन्त शंकरदेव संघआव बाहागो लायो आरो गु बोसोर सम बिबानगिरि महरै खामानि मावो। बिथांनि मुंख'जाथाव बिजाबफोरा जाबाय-असमर बैष्णव दर्शनर रुपरेखा, नामधर्म प्रकाश, महापुरुष श्रीश्रीहरिदेव चरित, भागवत माहात्मा, महापुरुषीया धर्म जिज्ञासा, बेद आरो महापुरुषीया धर्म' बायदि बायदि। भारत हादोरनि मिरु सरकारा बिथांबादि दोहोरोमसुला सुबुंखौ उदांसि दावहारु महरै गनायथि होदोंमोन। आसाम सरकारा बिथांखौ श्रीमन्त शंकरदेव बान्था आरो केबिनेट बिबानगिरि महरै मान बाउदोंमोन। गुबुन फारसेथिं श्रीमन्त शंकरदेव संघआ 'श्रीमन्त शंकरदेव-माधवदेव बान्था' आरो 'बैष्णव पण्डित' बिमुं होनानै बिथांनि थानानै थाजासिम बिहोमथाइनि सायाव गोनांथार गनायथि होलांदोंमोन।

### जारिमिनगिरि ड° स्वर्णलता बरुवा :

डिब्रुगड़ मुलुग सोल्लोंसालिनि जारिमिन आयदानि गाहाइ आरो श्रीश्रीअनिरुद्धदेव मासिनि बिबुंगोराजो महरै खामानि मावनानै आजिरा मोननाय ड° स्वर्णलता बरुवाया साहा सानजा हालामनि सासेल' आइजो जारिमिनगिरि महरै गनायथि मोनदोंमोन। चुतीया माहारिनि जारिमिननि गाहाइ सुजुगिरि बिथां आइजोया A Comprehensive History of Assam, Last Day of Ahom Monarchy : A History of Assam from 1769-1826 आरि जोबोर गोनांथार जारिमिनारि खारिआबुं बिजाबनि अनगायैबो गोबां बिबांनि जारिमिनारि रायथाइजों आसामनि जारिमिन सोर्जिनायनि बिथिंखौ गुफुंसार खालामलांदों। मुंख'नो गोनांदि, बिथां जारिमिनगिरिनि Status of Women in Non-Tribal Societies of Assam मुंनि संजिरलाया गुवारै अनसायनाय मोननो हादोंमोन।

### मावथि हरिप्रसाद नेउग :

जरहाट नोगोरनिफ्राय बा कि. मि. सो सानजानि केन्दुगुरिनि 2 नं बामुण गामियाव जोनोम मोननाय हरिप्रसाद नेउगा (1929-1973) मरियनि जौमा फरायसालिनि गोरायुं महरै खामानि मावनायनि अनगायैबो डिब्रुगड़ मुलुग सोल्लोंसालिनि फराबिजाब दिहुनग्रा समितिनि गिबिसिन नेहाथारि महरै आखा फाखायै

खामानि मावदोंमोन। खामानि मावथिनि थाखायनो बिथाडा असम साहित्य सभानि 6 बोसोर लोगो नेहाथारि आरो बोसोरब्रै गाहाइ नेहाथारि महरै खामानि मावदोंमोन। मुंख 'जाथावदि ब्रै बोसोराव बिथांखौ नेम खान्थिनि सोलायसोल' खालामनानैब्लाबो नेहाथारिनि बिबान बानस 'होदोंमोन। बेनो बिथांनि गौथुमारि रोंग 'थि आरो गोसो गोथौ मावथिनि फोरमान दिन्थिनानै होयो। थुनलाइ आफादनि गाहाइ नेहाथारि महरै गाजा गोमजायै साहित्यरथी लक्ष्मीनाथ बेजबरुवानि जोनोम जौथाय बोसोर खुंथायखौ बिथांनि गौथुमारि रोंगौथिनि साबसिन बिदिन्थि होनना बुंनो हागौ। बिथाडा राधाकान्त सन्दिक्कै, बिश्वनाथ राजबंशी, चन्द्र कुमार आगरखाला आरि बिजाब सुजुनायनि अनगायैबो असमीया संस्कृति (लीला गगैजों जुथाइयै) डिम्बेश्वर नेउग, रघुनाथ चौधारी, अम्बिकागिरि राय चौधुरी, नकुल चन्द्र भुजा आरि बिजाब आरो ज'वार, साहित्य दुत, गतिपथ आरि सानमालाइसि सुजुनानै असमीया हारिमायारि जिउआव गोनांथार बिहोमथाइ गालांदों।

### सुबुंअनसुला चिदानन्द शइकीया :

दासान्दि गलाघाट जिलानि बकाखाट द गामियाव 1924 ख्री: आव जोनोम लानाय अरायजिउ सोलोंथाइ हान्थियारि उदांसि दावहारु चिदानन्द शइकीयाया गाहाइयै साम्यवादी दर्शननि गनायगिरि। बिथाडा 27 गां बिजाब सुजुनानै असमीया थुनलाइनि बाख्रिखौ दोहोनि खालामलांदों। बेनिनो मुंख 'जाथावफोरा जाबाय-छ'भियेट नारी, सीमान्त गान्धी, महर्षि कार्ल मार्क्स, जुये प'रा स'न, रडचुवा पृथिवीर सेउजीया ब'ल, जीया ढल बागरि जाय, प्रबीन श्रमिक नेता चानु खेरीया, राछियान साहित्यर आभास, स्वाधीनता संग्रामत गलाघाटर अवदान, शंकर बरुवा : कर्म आरु जीवन, धीरेन दत्तर कविता, आधुनिक रचना शिक्षा (1थि नैथि आरो 3थि खोन्दो) नतुन आदिपाठ सत्याग्रही आरि। बेनि अनगायैबो बिथाडा गोबां बिजाब सुजुदोंमोन आरो खौरां बिलाइ, लाइसि आरियाव गोबां रायथाइ लिरदोंमोन। थुनलाइ सोर्जिनायनि थाखायनो मस्क', टाचखण्ड, रिगा आरि दावबायनो खाबु मोननाय बिथां गेदेमाया छ'भियेट देश नेहरु बान्था, थुनलाइयारि पेन्सन आरो फोरोंगिरि बान्था मोननो हादोंमोन। आसामनि खौरां बुथुमगिरि जानानैबो संगालि मुलुगावबो बिथाडा गोनांथार बिहोमा होलांदों। ब'काखाट सोहोरनि खाथि काजिरडा मौजानि क'लाख'वा गामिनि हा गैजायै सुबुंफोरनि थाखाय जि बिघा हा (दाग नम्बर 112 पट्टा नम्बर 39) दान होनो हानाया गोरिब-निखावरिफोरनि सायाव सहायफानाय लोगोसे बिथांनि सिबिसुला सुबुंथिनि मुंख 'जाथाव नेरसोन।

### दुब्रि हाग्रानि खन्थाइगिरि क'पेश्वर बरुवा :

छयदुवार जौमा फरायसालिनि गायसंगिबि गोरायुं जारिमिनगिरि क'पेश्वर बरुवा बिथांआ 1936 ख्रीष्टआव बै समनि लक्षिमपुर जिलानि ढलपुर मौजानि बरथेकेराबारी गामियाव जोनोम मोनो। आसाम

सरकारनि थुनलाइयारि पेन्सन मोनगिरि बिथाडा गुबुन गुबुन आयदानि माखासे बिजाब सुजुनानै असमीया थुनलाइनि मुलुगखौ दोहोनि खालामलांदों। बैफोरनि मादाव मुंख 'जाथाव गांनैसो बिजाबा जाबाय-कलेजर दुबरि बन, अनुभव, प्रजन्मर उमानत, लगन, आगन्तुक आरि खन्थाइ बिहुं ; धन्य जन्म भारत बरिये, जननेता भीमबर देउरी, लुइतर बुरन्जी, ऐतिहासिक बिबर्तनत असमर चुतीया जनग'ष्ठी, चुतीया राजा रत्नध्वज पाल, Sati Sadhini, Deuri Chutia Language आरो An Outline Grammar of the Deuri Chutia Language Spoken in Upper Assam by W.B Brown आरियानो गाहाइ। बैफोरनि अनगायैबो गांनै मेथाइनि बिजाब आरो गुबुन गुबुन खौरांबिलाइ सानमालाइसि आरियाव 500 निबो बांसिन रायथाइ लिरदोंमोन। मुंख 'नो गोनान्दि, 1992 ख्री: आव गहपुर बिधान सभा समष्टिनिफ्राय असम बिधान सभासिम बिसायख 'हरजानाय थान्दै बरुवा बिथाडा ड<sup>०</sup> आम्बेदकार फेल 'श्विप आरो आसाम सरकारनि चुतीया जाति उन्नयन परिषदा होनाय सती साधनी बान्थाखौबो मोननो हादोंमोन।

हेफाजाब लानाय बिजाब :

1. Nath, Rajmohan, "The Background of Assamese Culture.
2. Devi, Lakshi, "Ahom Tribal Relation, 1968.

**सोंथि :**

1. चुतीयाफोरनि गाहाइ थाग्रा जायगाया बबेयावमोन?
2. चुतीया सोदोबनि जोनोमा मा सोदोबनिफ्राय फैदोंमोन?
3. चुतीयाफोरनि सासे बीर आइजोनि मुं लिर।
4. गाहायाव होनाय जायखिजाया सासेनि सोमोन्दै गुसुडै लिर।
 

(क) स'णाराम चुतीया	(ख) ड <sup>०</sup> स्वर्णलता बरुवा
(ग) चिदानन्द शइकीया	(घ) हरिप्रसाद नेउग
(ङ) क'षेश्वर बरुवा	
5. चुतीयाफोरनि सोमोन्दै गुसुडै लिर।



## ठेंगाल कछरीफोर

आसामाव गोदोनिफ्रायनो थाबोनाय गोजामथार हारिया जादों कछरी हारि। गोजाम मुगायाव कछरीफोरखौ किरात होननानै बुंदोंमोन। दैदेनगिरिफोरा बे किरातफोरखौ मंग'लीय एबा मंग'लयडबो बुंदोंमोन। मोनसे समाव गासै सा-भारतआ किरातफोरनि खुंथायाव दंमोन।

मंग'लीय (किरात) फोलेरनि आखुथाइफोरा जाबाय-“मोदोमनि गाबा गोमो एबा गोमोजिद, खानाइया गोसोम, मिहि नडा आरो गयरि-गयरा, ग'फनि दारिया गेसैं, मोदोमनि खोमोना खम, मोखां गुवार आरो गन्थं दाब्ले। खाफाल एबा मोखाडा रोखा जौखोनाय, मेगना फिसा, मेगन अलमायनाय मंग'लीयफोरनि मोनसे जुनिया लैखोन।” बे किरातफोरखौ सरासनस्रा गेदेर दैमा एबा हाजो सेरनि खाथि खाला जायगायाव थायोखायनो संस्कृत रावआव बिसोरखौ कक्षबाट होनना बुंदों। कक्षबाटनिफ्राय कक्षत > कच्छर जों लोगोसे अरि दाजाबदेरनानै कच्छ + अरि- कछरी मुं सोमजिदों। आसामनि बुरलुंबुथुर सेरफाडाव थानाय मंग'लीय फोलेरनि बे किरात एबा कछरीफोरा गावसोरखौनो बर' एबा बर'फिसा होनना बुंनो नागिरो। मंग'लीय फोलेरनि बे बर'फोरखौ भारतारी गुबुन गुबुन हिन्दुफोरा गुबुन गुबुन समाव किरात, म्लेच्छ, कछरी मुडै गाबजिबोदोंब्लाबो कछरीयासो बिसोरनि सोलिबोनाय मुं।

ड° भुवन म'हन दासआ सा-सानजा भारतनि मंग'लीयफोरखौ एरै बोखावदों-(1) खाछी (2) बड़' (3) लुचाइ कुकी (4) नागा (5) अरुणाचलनि थागिबि हारि (6) गुबुन गुबुन। गुबुन गुबुन हारिसाफोरनि गेजेराव दं मिछिं, देउरी, हाजं। बड़' रावफोलेरनि गेजेराव गार', राभा, मेच, तिया-डिमाछा, ठेंगाल, स'न'वाल, झारुवाफोरखौ सरजाबफानाय जादों।

बेनिखायनो ठेंगाल कछरीफोरखौ मंग'लीय हारिनि बड़' राव फोलेरनि सानजाफारसे थानाय होनना रोखायै हमनो हायो।

ठेंगालफोरा, जुनियायै पाण्डबनि बीर भीमनि फिसाज्ला घट'त्कचनि फोलेरनि होननानै सिनायथि दं। हिडिम्बा राक्षसी मुनि सासे फिसाजोजों भीमआ हाबानि सोमोन्दो खालामनायनि थाखाय घट'त्कचनि जोनोम जायो। हिरिम्बानि मुंखौ लानानैनो कछरीफोरनि राज्योखौ “हिडिम्बा” राज्यो एबा “हेडेम्बा” राज्यो आरो राजथावनिखौ ‘हिडिम्बापुर’ बुडोमोन आरो राजाफोराबो गावसोरखौनो हिडिम्बानि फिसा

होनना सिनायथि होदोंमोन।

**टेंगाल कछरी जोनोम :** दावहा, नांज्लाय-खमज्ज्लाय आरो देरहानाय-जेननायनि गेजेरजों हेडेम्बियाल कछरी फोलेरनि आखा-फाखा बोर्ला बिद्यायाव रोंखा-राखा, जड बाहादुर आरो चत्रुध्वज मुंनि सानै सेंग्रा जोहोलावा माखासे कछरी नखरनि मानसिफोरखौ लोगोआव लानानै दैयां सेरफांनि काछमारि फोथाराव गंसे राज्यो गायसननानै जड बाहादुरा बेनि राजा जायो। बिथानि सान्त्रिफोरखौ टेंडा (Pantloos) गानहोनानै दावहा नांनो होदोंमोन। दावहायाव गाननाय टेंगाखौ गोजोन थासारियावबो गानना गिदिंथिनायखाय गुबुनफोरा बिथानि फोरजा आरो जड बाहादुरखौ टेंगाल कछरी होननानै बुंदोंमोन।

**टेंगाल कछरीफोरनि थाथाय :** जारिमिनारि फोरमायनाय बादियै हमदानो हायोदि जौगा ओन्सोलनि शदियानिफ्राय दैयां, धनसिरि सेरफां आरो नगावसिम टेंगाल कछरी फोलेरनि थाग्रा जायगा दंमोन। समफारियाव जारिमिनारि खैसारियाव आरो रांखास्थियारि जाहोनाव बिथामोना आसामनि दाब दाब जायगायाव बुरलुंबुथुरनि सा आरो खोला बोखावजायो। खोला फारसेयाव आथिखालनि ज'रहाट जिलानि 37 नं राजा लामानिफ्राय नागा हाजोसिम तिताबरखौ मिरु खालामनानै गुवार ओनसोला टेंगाल कछरी सुबुंफोरजों बुंफबनाय। ग'लाघाट जिलानि धनसिरि सेरफां टेंगाल गामि पंका, मरडि, बुढाग'हाइ खाट, सरुपथार, बरपथार, चाउदां पथार, गमारि, चिचुपानी, मेरापानी, काछमारी, दैयां, कार्बि आंलं जिलानि सिंनि कालियनी, शिवसागर जिलानि स'नारि ओनसोल, नाजिरा, डिब्रुगड जिलानि नाहरणी टेंगाल गामि, चाचनी, साहानि लक्षिमपुर जिलानि बिहपुरीया, कावैमारी बागिसा, बडालमरा, नाहरणी, पकादौल, ख'लागुरि, बहाइखना, नावबैसानि स'नापुर, ल'कामपुर, टेकीयाजुलि, दलपा पथार, बालिगाव, दक्षिण लालुक, हारमती, बान्दरदेवा, उत्तर लालुक, फुलबारी, कदम, धेमाजि, ग'गामुख, कृष्णपुर, गढपारा, नाहरबारी, पानीगाव, दंगीबिल, जकाइपेल'वा, ज'नाइ आरि जायगायाव रोजा थाथायनि गोनां टेंगाल कछरीफोरनि गामि दं।

टेंगाल कचारीफोरा टेंगाल मुडै मिथिजानाय समनिफ्रायनो 'टेंगाल' बिमुं लिरबोदोंब्लाबो बिसोरनि सोरबा-सोरबाया 'कछरी' उपाधिखौ (बिमुं) बो समानै बाहायबोदों। टेंगाल कछरी मानसिफोरा राजानि मावख'गोरा बिबान मोनदोंमोन, बेनि फोरमानखौ बिसोरनि लिरनाय बिमुंफोरनिफ्रायनो मिथिनो हायो। बे बिमुं (उपाधि) फोरा शइकीया, हाजरिका, बरा, नेउग, बरुवा, राजख'वा, दास, बर शइकीया, बरबरुवा, हातीबरुवा, घ'राबरुवा, भराली, चांमाइ बाइदि बाइदि।

**टेंगाल कछरीफोरनि समाज-हारिमुनि सुंद' सिनायथि :** टेंगाल कछरीफोरा गोदो-गोदायनिफ्रायनो समाज दानानै थाबोदों आरो आथिखालनि असमीया समाजारि जिउजों लोगोसे सरजाबजाफानानै दं। टेंगाल कछरी समाजा हौवा गाहाइ महरै जथाइ नखरारि। बिफायानो नखरनि गाहाइ मानसि।

**समाजनि दाथाय :** गोजाम मुगायाव टेंगालफोरनि समाजा "कैरातज" दोहोरोमारि दाथाइजों

दैदेनजानायमोन। नाथाय बाजि जौथाइयाव महापुरुष शंकरदेवआ नब-बैष्णव एकशरण नाम धर्म फोसावनानै आसामनि खना-खनला जाय समाजारि आदर्श (नेर्सेन) दिन्थिदोंमोन बै आदर्शआव टेंगाल कछरीफोरबो गोसो दुंखांदोंमोन। बेनि फिथाइ बादियै समाजाव मोनफा गामियाव समाज दानायनि दिन्थि महरै नामघर गायसननाय जायो। दोहोरोमारि हारिमु आरो समाजारि बिथिडाव नाम न'आनो बिसोरनि समाजावबो मोनसे सोमोनांथाव बिफाव लानायसै। सत्रनि खान्थिबादियै टेंगाल कछरीफोरनि गेजेराव मोनफा गेदेर हालामनि गेजेराव बरमेधि, करिया मेधि, चुक मेधि, बर टेकेला, टेकेला आरि मावख'गोरा आरो मोनफा गामियाव एबा मोनफा खेलाव नाम न' थानायजों लोगोसे नाम हमग्रा, भड़ाली, पाठक, दामग्रा-देग्रा, देउरी, ढुलीया-अजा आरि बिबान लानाय मानसि थायो आरो सत्रनि सत्राधिकारआ राजमेधि, पाचनि आरो बरमेधिनि गेजेरजों टेंगाल कछरी समाजजों सोमोन्दो लाखिना समाजनि दोहोरोमनि नेम-खान्थिखौ सामलायनाय नुनो मोनो। गुबुन फारसेथिं टेंगाल कछरीफोरनि समाजनि हाबा हुखा एबा समाजारि जिउआव आइजोनि जायगायाबो हौवाफोरजों समान।

**रांखान्थियारि जिउ :** टेंगाल कछरीफोरनि बांसिन सुबुडा गामियाव थानानै आबाद मावनायनि सायाव सोनारनानै जिउ खाडो। माइ आबादा बिसोरनि गाहाइ आबाद। बेनि अनगायैबो मोसौ, मैसो, हांसो-फारौ, दाउ, बोरमा आरि फिसिनानै बेफोरखौ फाननानैबो थांना थानायनि राहा दिहुनो। बारियाव गइ-फाथै, औवा, आलु, थास' आरो गुबुन गुबुन रबि फसल आबाद मावनानै रांखान्थियारि जेंनाफोरखौ सुझाडो।

**जयै जिउ खानायनि आदब :** मंग'लीय सुबुं माहारनि बयनिखुइ गेदेर आखुथाइया जादों जयै जिउ खानाय आदब। कछरीफोरा मोनफा गामियाव हान्जा दानानै थायो। आबाद मावनाय, न' लुनाय, ना हमनाय, फोरबो-फालिथाइ, खैफोद-आफोद, रंजानाय-बाजानाय, गासैयावबो ज'ज' ओंखारनानै खामानि मावो। टेंगाल कछरीफोरनि गेजेराव "हारिया मता" थामहिनबा "सावरि जानाय" नेमा दासिमनो दड'। हाबा-मेल मिथिडाव सायना लुनाय, न'लुनाय, फोथारनि माइ मारा होनाय, ना हमनाय खामानियाव हान्जा दानानै ओंखारलाडो।

**फोरबो फालिथाइ :** टेंगाल कछरीफोरा बिसोरनि गाव समाजारि फोरबो फुजाफोरखौ थि खान्थियै फालिनाय बादिनो आसामनि हारिमायारि फोरबो बिहुखौबो गोसो होसारना दोरोडारि खान्थिजों फालियो। टेंगाल कछरी सिख्लाफोरा सैथ्र दान हाबनायनिफ्रायनो "राति बिहु" (हरनि बिहु) मोसायोमोन। फाखि बिफां एबा गिदिर बिफांनि सिडाव बिहुनि थालिम होयो। राति बिहुखौ सैत्र दाननि संक्रान्तिसिम थामहिनबा बैसागोनि उरुकासिम मोसायोमोन। टेंगाल कछरीफोरनि गेजेराव 'तराछि' बिहु एबा "बालि हुचरि", "ब'का बिहु" आरो "नराछिडा बिहु" खौ खुंनाय जायो। असमीया हारिमुनि दोरोडारि नेमबादियै काति बिहु आरो माघ बिहु (मागो) खौ थि खान्थियै फालिबोदों।



**जानाय-लौनाय :** टेंगाल कछरीफोरनि गुबै जानाय जामुडा जादों ओंखाम। मैगं-थाइगं जानायजों लोगोसे ना-बेदरा टेंगालफोरनि मोजां मोनजानाय जामुं। खासेव, कचिया, खांखाइ, जिपांकरी (साम') अमलावरि, खुसेंग्रा, इन्दि एम्फौ (लाथा), मुगा एम्फी लाथा, चाकचन, बेरे आरिया टेंगालफोरनि मोजां मोनजानाय जामुं। ना गोरान, बेदर गोरान आरिया सुबुं हान्जाफोरनि थिनानै दोननाय जामुं। टेंगालफोरा मोनसे जुनिया आदबजों ना गोरानखौ देग्लिनानै हासुं एबा हानि थिंख्लियाव सोना दोनो। बेखौनो टेंगालफोरा खुकति मास (फोरानना देनाय ना) होनानै बुडो। नागोरान, फोरानना देनाय ना, बेदर गोरान, खरिया (औवा मेवानि आसार), काहुदि, खारुलि (खारदै इंखि), पानिटेडा, नारजि आरिया टेंगालफोरनि थिनानै दोननाय जामुं।

**गाननाय-जोमनाय :** टेंगाल कछरी हौवा मानसिफोरा असमीया मानसिनि बादि सरासनस्रा सि-जोम गानो। हिन्जावफोरा आसामनि सुबुं हानजानि समाजाव सोलिनाय जेरबायाव मेखेला आरो मेथनि मेरायना लायोमोन। हिन्जावफोरा ब्लाउच गानामोन। हिन्जाव मानसिफोरा आखाइनि हाबायाव जोबोर आखा-फाखा। बिहामजोफोरा रिहा-मेखेला आरो सादोर गानो। बिसोरनि गेजेराव स'ना-रूफानि गहेना बाहायनाया गोदोनिफ्रायनो सोलिबोदों। बिसोर बाहायनाय गहेनाफोरनि मादाव ज'न-बिरि, दुग-दुगी, मादलि, बिरि, बेना, प'वालमनि, थुरिया, केरु, कानफुल, आसान, उका आरो बाखर लागायनाय आसथाम, नाकफुलि आरियानो गुबै। गोदो कछरी समाजाव हौवाफोराबो बाइदि गहेना आखाइ, खोमा आरो गोदोनायाव गानोमोन। गोदान सोदोमस्रि दावगानायनि जाउनाव टेंगालफोरनि समाजारि जिउआव गोबां सोलायनाय फैबाय।

**राव आरो थुनलाइ :** आसामनि जौगा बाहागोआव थानानै जिउ खांनाय टेंगाल कछरीफोरनि रावा असमीया। टेंगालफोरा खुगा (सुबुं) थुनलाइयाव दोहोनि। बिसोरनि गोबां सुबुं फोथायनाय आरो सल'बाथाफोरा राव थुनलाइखौ फोथांना लाखिबोदों। तेजिमला, पानशै, कांचनमति, फुलरा-चतला, लितिकाइ, लखाइ तरा आरिखौ लाफानानै गोबां सल'बाथा बिसोरनि गेजेराव सोलिबोदों। बेनि अनगायैबो बाथ्रा फांथे, बाथ्रा फाव, बाथ्रा खोन्दोब, सुबुं बाथ्रा, सुबुं राव, बिहु गीत, हुचरि मेथाइ, गथ' बुरखायनाय मेथाइ, धाइनाम, आइनाम, लोक्षि सिबिनाय मेथाइ, अपेश्वरी सिबिनाय मेथाइ, दै-खावनाय मेथाइ, खबाहर बिया नाम (हाबा मेथाइ), त'लनि हाबा मेथाइ, एम्बु हाबा होनाय मेथाइ, आहुसि दिखांनाय मेथाइ, ग'पिणी मेथाइ, माइनाव दोननाय मेथाइ, दुलीया अजानि मेथाइया बिसोरनि गेजेराव दिनैसिमबो गुवारै बाहायजाबोदों। टेंगाल कछरीफोरनि गेजेराव सोलिबोनाय खुगा थुनलाइया असमीया थुनलाइ हारिमुनि फोथाराव मोनसे जर'खा बिहोथाय होबोदों।

**दोहोरोम-फोथायनाय आरो फुजा-होनाय :** टेंगाल कछरीफोरनि गाहाइ दोहोरोमा जादों कैरातज। बे दोहोरोमनि गुबै सिबिनां मोदाया जादों शिव। टेंगाल कछरीफोरा बैष्णब दोहोरोम आजावनायनि,

बासुदेब ग'साइनि दिननिफ्रायनो बैष्णब सिबियारि महरै प्रानहरि ग'साइसिम आउनिआटिया सत्रनि सोलौंसा। बेनि बादियैनो बिसोर ब्रह्म जथाइनि मानसि। बिसोर बैदिक आसार-खान्थिखौ फालियो। बेनि जाहोनावनो टेंगालफोरा दुर्गा फुजा, थि जायगायाव बाइथ फुजा एबा मोदाइ फुजा, दैमायाव सुवा गारनाय फुजा, दैमा जिडाव लाउखार ओंखाम जानाय, दैमा खाथियाव माइरं जानाय आरि फुजा होयो। बेफोरनि अनगायैबो नखरारि खैफोद-आफोद होखारनो बैसागो संक्रान्तियाव गोथैसि बाउनाय फुजा होयो। शनि, राहु-केतुनै माइरं जाहोनाय, गुरु प्रणाम जाहोनाय, मोदाइजोनो माइरं दौनाय, अपेश्वरी, ग'पिनी, लक्ष्मी, राटुवाली-बाटुवाली, बाखियाव माइनाव थिसननाय, आयुस खारहोनाय सिबिनाय आरि गोबां फुजा होनाय खामानिफोरखौ टेंगाल कछरीफोरा फालियो। मोदाइ-मोदाइजो, बुहुद-फेथानो नांगौ रोखोमै फुजा होयो।

**हाबानि खामानि :** हाबाया सुबुं समाजनि मोनसे जिउ दाफिननाय फोर्बो। टेंगाल कछरीफोरनि गेजेराव गाहायै मोनब्रै रोखोमनि हाबा सोलियो जैरै-

1. खारखुमाना थानाय एबा दोनखारलानाय हाबा
2. आबियै बिया
3. हाबा गोलाउ (बर बिया)
4. त'लनि हाबा

टेंगाल कछरीफोरनि गेजेराव सोलिनाय गेदेर हाबा आरो आबियै हाबानि आखुथाइया जुदा। ब्राह्मनि नेम-खान्थि बायदियै बैदिकनि खान्थिजों आहुथि सावनानै खुंनाय हाबाखौ हाबा गोलाउ होनना फोरमायदों आरो सरासनस्रायै राइजोनि बोर लाना आलारि सावना खुंनाय हाबाखौ आबियै हाबा एबा जुर'न हाबा होनना बुडो। हिन्जाव गोदान नायनो थानायाव हिन्जाव गोदान जागोननि न'आव गिबियाव गय फाथै होनायखौ बाट सन्दा होनना बुडो।

**शिल्प-हारिमु :** टेंगाल कचारीफोरा स'ना, रुफा, तामा, सोर, तीखा आरि धातु शिल्पजों गाहायै नांथाबनाय। रुफा बुथुमनायनि थाखाय बिसोरखौ रुफा बुथुमग्रा रुप'वाल कछरी होननाबो मिथि मोनो। बिसोर दानाय-लुनाय आरिमुवाव जोबोर आखा-फाखा। टेंगालफोरा न'खरनि जिउ खानायाव नांनाय गासै मुवा दंफां, औवा, बिलाइ आरिजों बानायना लायो।

दानाय-लुनाय आगजुफोर जैरै आबाद मावनाय आगजु नांगोल, जुंगाल, मै, खिला हुखेन, रयना आरि बानायनायाव आखा-फाखा। नाहर दंफांनि दिंखि, सिलिखा, गाम्बारि दंफांनि खोस्ति, ठगा, बान्था (खराइ), खामफ्लाइ, आसन, मासि-आरांगा, दारहा, बिहुआव बाहायनाय दामजु जैरै फेम्फा, गगना, सिफुं, थरखा, ट'कारी, बीण, फतुलि आरिखौ टेंगाल कछरीफोरा बानायनो रोंगौ।

कछरीफोरनि आजै-आजौनि दिननिफ्राय सोलिबोनाय रेचम शिल्पआ गोजाम। मंगलीय किरातफोरा

आसामाव पाट, मुगा, रेचम शिल्पखौ जोनोम होदोंमोन। कछरीफोरानो हाग्रानि मुगाखौ नखराव फिसिदोंमोन। एम्फौ लाथा फिसिनाया टेंगाल कछरीफोरनि हारियारि दोरों। इन्दि एम्फौ, मुगा फिसिनानै बेनिफ्राय खुन्दुं लुना बायदि सि-जोम दाना लायो।

**गोथै गारनाय :** टेंगाल कचारीफोरनि गेजेराव गोथै सह' सावनाय एबा फबनाय मोननैबो खान्थियानो दं। मानसि सासे थैनाय नि उनाव गोबां नेम-खान्थि फालिनाय जायो। गुरुनि खाथियाव शरण लानाया टेंगाल कछरी समाजनि एंगारनो हायि मावथारनो गोनां खामानि। गोथै गारनाय हाबाखौ ब्राह्मन हिन्दु नेमबादियै मावफुडो।

टेंगाल कछरीफोरनि आसामनि मोनसे गोदो-गोदायनिफ्रानो थागिबि थानाय सुबुं-हान्जा। गावनि नेम-खान्थि, दोहोरोमारि दोरोडारि सोलिथाइ, समाजारि सुबुं-आसार खान्थि आरो गोदान सानखांथाइजों मोनफा आलादा सुबुंफोलेरब्लाबो टेंगाल कछरीफोरा गेदेर असमीया हारि दानाय हाबायाव गोनांथार बिफाव लाबोदों। टेंगाल कछरीफोरनि गोबां सुबुंआनो असमीया माहारिनि जिउआव गुबुन-गुबुन बिथिंआव बिहोमा होलांना गोसोखांथाव जानानै दड। गाहायाव बेनिनो सानैसोनि सोमोन्दै गुसुडै फोरमायनाय जाबाय-

### गोहोगोरा ( लहा जिउ ) गिरिधर टेंगाल

आसामनि रांखान्थि-समाजारि आरो राजखान्थियारि फोथाराव थागिबि सुबुं रावफोलेरनि जायफोर सुबुडा दासिम मुंख'जाथाव बिहोमा होलांबाय बिथांमोननि मादाव गिरिधर टेंगालआबो सासे।

ज'रहाट जिलानि तिताबर महकुमानि तिताबर सार्कल अफिसनि सिडाव थानाय टेंगाल मौजानि उलुतली गामिनि सासे जोबोर गोरिब आबादारिनि नख'राव 1921 मायथाइनि 12 जानुवारीयाव गिरिधर टेंगालआ जोनोम मोनो। बिथांनि बिफानि मुडा जिलिराम टेंगाल आरो बिमानि मुडा कान्दुरी टेंगाल। उन्दै समावनो बिमा गोमाजानायलाय बिमायंआ गेदेर-गोलाउ खालामो। 1929 मायथाइयाव गिरिधरखौ बिफाया बजालबारी गुदि फरायसालियाव मुं थिसनो। बे फरायसालिनिफ्राय 1934 मायथाइयाव गुदिफरायसालिनि बृत्ति आन्जादाव ज'रहाट महकुमानि मादाव थामथि जायगा मोनना उथ्रिनानै तिताबरनि गेजेर फरायसालियाव मुं थिसनो। दुखुनांथाव दि गेजेर फरायसालियाव फरायफुबाय थानाय समावनो 1936 मायथाइयाव बिफाया अबथिरा जिउ गोमायो। गेजेर फरायसालिनिफ्राय बृत्ति लाना उथ्रिनानै 1938 मायथाइयाव ज'रहाट सरकारी हाइस्कुलाव मुं थिसनो। बेनिफ्राय 1942 मायथाइयाव मेट्रिक आन्जादखौबो उथ्रियो ज'रहाटनि जगन्नाथ बरुवा कलेजाव मुं थिसनना 1944 मायथाइयाव आइ.ए. आन्जाद आरो 1946 मायथाइयाव बि.ए. आन्जादखौ मोजाडै मोजां उथ्रिनो हायो। 1952 मायथाइयाव गुवाहाटी मुलुग सोलोंसालिनि सिडाव बि.एल. डिग्री मोनो।

सोलोंथाइ जोबखांनानै गिरिधर ठेंगालआ फोरोंगिरि महरै हाबा मावना जिउ खांजेनो। बिथाडा 1952 मायथाइनिफ्राय 1953 मायथाइसिम ज'रहाट जिलानि न-आलि तिताराम बरदलै हाइस्कुलाव फोरोंगिरि हाबा मावो। 1953 मायथाइयाव सोलोंथाइ मुलुगनिफ्राय जानगारना बिथाडा राजखान्थि मुलुगआव आगान होयो आरो गुबुन गुबुन समाजारि जौगाथाइ खामानियाव नांथाबो। बिथाडा ज'रहाट कर्टआव उकिल हाबा मावनायखौ जागायदोंमोन। लासै लासै बिथाडा उकिल साख्रि मावनायनिखुइ राजखान्थियावसो बांसिन गोसो होनो हमो। बेनि गेजेराव गुबुन गुबुन ओन्सोलनि सोलोंथाइ, समाजारि जौगाथाइ, समाजारि बिजिरनाय आरि आयदायाव गावखौ नांथाबहोनायसै। जालुकनिबारी हाइस्कुल, तिताबर नन्दनाथ शइकीया कलेज लुनाय हाबायाव बिथानि बिहोमाया मख'जाथावमोन। बिथानि दैदेननायाव कमिउनिष्ट हान्जानि सोमावसारनायनि नारसिननायाव गोबां खेब आबादारिनि थाखाय लानाय आयेन बाहायनाय आरो माखासे बिबांनि हा गैजायि आबादारिनि गेजेराव हा होनाय राहाखौ सरकारआ खालामदोंमोन। 1978 मायथाइयाव बिथाडा तिताबर बिधान सभा समष्टिनि एम.एल.ए. सायख'जायो। 1984 मायथाइयाव बै समनि छ'थियेट रछियायाव जानाय मास्कीय रांखान्थिनि थाम दानारि सेमिनाराव बाहागो लाहैदोंमोन।

### खन्थाइगिरि, मेथाइ लिरगिरि, दानख'थाइ आरिमु महरगिरि कमल कछरी

'इस्ताहार खन्थाइगिरि' मुडै मुंदांखा खन्थाइगिरि-आरिमुगिरि कमल कछरीया 1939 मायथाइयाव ज'रहाट जिलानि ठेंगाल मौजानि मरधलि कछरी गामिनि मोनसे आबादारि नखराव जोनोम मोनो। बिफानि मुडा उनिराम कछरी आरो बिमानि मुडा खरु आइती कछरी। बिथाडा शिवसागर जिलानि नाजिरायाव थानाय मादुरीयाव थानानै फाहामथाइ बिगियाननि फार्माचिष्ट महरै सावमि (देहा) सिबिनायाब नांथाबो। दानख'थाइ आरिमुगिरि, सावगिरि आरिमुगिरि (महर गिरि), रेडिअ', मेथाइ लिरगिरि, खन्थाइगिरि कमल कछरीनि लिरनाया आसामनि सिगां सिरिनि खौरां लाइसि 'प्रतिध्वनि', 'असमबाणी', 'नीलाचल', 'अग्रदुत', 'सादिन-प्रतिदिन' नि अनगायैबो गुबुन गुबुन बिजोडाव गोबाडै फोसावजादोंमोन। शिवसागर जिला थुनलाइ आफादनि आफादगिरि महरैबो कछरीया मुंदांखामोन।

कछरीया मेथाइ, खन्थाइ, फावथाइ लिरनायनि अनगायैबो बेनार, फेष्टुन, बिजाब लाइसिनि मोखां बिलाइ महर होनाय, दानख'थाइ आरिमुखौ गावनि आखाइजों दानख'नायाव आखा-फाखामोन। कमल कछरीनो असम साहित्य सभाया "बिष्णु प्रसाद राभा बान्था" होदोंमोन आरो शिवसागर साहित्य सभाया खन्थाइगिरिनि मुडैबो "कबि शिल्पी कमल कछरी साहित्य बान्था" होबोदों। आसाम सरकारआ बिथानो थुनलाइयारि आजिरा बान्था (साहित्य पेनछन) होयो।

खन्थाइजों जिउ सुनो नागिरा, सुबुंथिखौ नागिरना मुखुब थाग्रा, उन्दैसमनि सुबुंथिनि लामा संग्रा

बै अनजालु खन्थाइगिरि कमल कछरीया स्निजिबा बोसोराव 2013 मायथाइयाव रंसारि जायो।

### सोंथि

1. मंगलीय किरातफोरनि आखुथाइया मा ?
2. मंगलीय किरातफोरखौ संस्कृत रावआव मा होनना फोरमायदोंमोन ?
3. कछरी मुडा माबोरै सोमजिदोंमोन ?
4. ड<sup>०</sup> भुवन म'हन दासआ मंगलीयफोरखौ मोनबेसे बाहागोआव बोखावदों ?
5. ठेंगाल कछरीफोरा मा रावफोलेरनिफ्राय फैनाय ?
6. ठेंगाल कछरीफोरनि आथिखाल थाथायनि सोमोन्दै मख'।
7. लिरसुंथाइ लिर-
  - (क) गिरिधर ठेंगाल।
  - (ख) कमल कछरी।



## डिमासाफोर

डिमासाफोरा गाहाइयै दासान्दिनि डिमा हासाव जिलानि थागिरिब्लाबो नगावनि ह'जाइ ओनसोल, कार्बि आंलंनि गुबुन गुबुन ओनसोलनि लोगोसे दानि नागालेण्डनि डिमापुर ओनसोलनि गोदोनि थागिरि महरै सिनायजायो।

डिमासाफोराबो स'न'वालफोर बादि सा 40 आजौ आजैनि जाखांबोनाय फोलेर महरै मोन 40 फोलेर एबा क्लेनाव बोखावजानाय। मोनफ्रोम फोलेरआ 'सा' हांखोजों थुंगेयो। जैरै-लांथासा, डिफुसा, गार्ल'सा, ह'जाइसा, माइबांसा आरि। डिमासाफोरनि फोथायनाय बादि डिमासा आइजो एबा सिख्लाया बे 42 सा गाहाइ बिमानि फोलेर जाखांनाय आरो साफ्रोमबो डिमासा आइजो एबा सिख्लाया बे 42 सा गुदि बिमानि फोलेर एबा क्लेनजों सिनायजायो।

डिमासाफोरा बिफानि फोलेरखौ बिफाफोलेर आरो बिमानि फोलेरखौ बिमाफोलेर बुडो। डिमासाफोरनि रावा डिमासा। डिमासाफोरहा जेबो फोलेर (उप-गत्र) खान्थि गैया नाथाय गावनि फोलेरनि गेजेराव हाबाहुखानि सोमोन्दो जानो मोना। बिसोरहा बिमानि फोलेर थामहिनबा बिमाइनि फोलेरनि फिसाज्ला-फिसाजोजों हाबानि सोमोन्दो दानायाव जेबो हेंथा गैया नाथाय हौवा गोदान हिन्जाव गोदान सानैनिबो बिमा फोलेरआ मोनसेयानो जायोब्ला हाबा जानो मोना।

डिमासाफोरा ब्राइ-सिब्राइ आरो आमां-गामांडि एबा शिव-पार्वतीनि दोरोडारि फोथायारिब्लाबो गोखों बैष्णवारि, हिन्दु आरो बोलि-खान्थि फोथायारि, जोबोर गोदोआरि सरैखागिरि।

जारिमिनाव मोननाय बादिब्ला आथिखालनि दुलाराय आसाम, त्रिपुरा आरो बांलादेशनि माखासे बाहागोआ मोनसे समाव डिमासाफोरजों बेंजाना दडमोन। डिमासाफोरा जानुवारि दाननि जोबथा बाहागोयाव आबादनि दैखांनायनि जोबथा सानाव 'बिसु डिमा' मुडै मोनसे रंजाथाइ फोरबो फालियो। बिसु डिमा फोरबोआव दाउ हाथारनानै फुजा होनायजों लोगोसे जौ, अमा आरिजों रायजोनाडैनो ओंखाम जायो। बिसु डिमा फोरबोआव सेंग्रा-सिख्ला, हौवा हिनजावफोरा 4 फुटसो गोलाउ मोनसे जुनिया रोखोमनि आखाइजों दामनाय खाम आरो जोबोर गोलाउ मोनसे रोखोमनि फेमफाखौ दामै दामै थिखानाय मोनसे खबांआव गिदिं गिदिं मोसानानै बे फोरबोखौ फालियो।

डिमासा आइजोफोरा दानाय-लुनायाव आखाफाखा आरो बिसोरनि गाननाय जोमनायफोरा रंगिना

संगिना। डिमासाफोरनि हाबानि थिलिया जुनियायै खुंजानाय गाजागोमजा गैयाब्लाबो जौ आरो दाउ हाथारनानै फुजा होनायजों लोगोसे अमा एबा मैसोनि बेदरजों ओंखाम होनानै हाबा फोरबो खुंनाय जायो। मानसि सावनाय अराव जौ-अमा बेदरजों थैनाय सुबुंनि सारादु खुंनाय जायो।

**सोंथि :**

1. डिमासाफोरा गाहाइयै मोनबेसे फोलेराव बोखावजानाय ?
2. डिमासा रावा आसामनि गुबुन मा रावजों गोरोबनाय नुनो मोनो ?
3. डिमासाफोरा आबादनि जोबथा सानाव खुंनाय फोरबोनि मुडा मा ?
4. डिमासाफोरनि फोलेरफोरनि मुंफोरनि जोबथि हांखोया सरासनम्रा मा जायो ?
5. डिमासाफोरनि मोननैसो फोलेरनि मुं लिर।



## कलिताफोर

कलिता सुबुं हान्जाया बुरलुंबुथुर सेरफांनि हायेन ओन्सोलनि गोजामसिन थागिरि आरो आथिखाल आसाम राज्योनि मोनसे गेदेर सुबुं हान्जा। सानजाहा तिनचुकीया जिलानिफ्राय सोनाबहा धुबुरी जिलासिम बुरलुंबुथुर हायेननि गंफ्रोमबो जिलायावनो कलिता सुबुं हान्जायारि मानसि दं। उदां भारतनि सुबुं साननायाव दाइनथि फारियाव थिसनजायि सुबुं हान्जाफोरनि सुबुं हान्जायारि बिथायारि सुबुं साननायखौ गारनायनि थाखाय दासान्दि कलिता सुबुं हान्जायारि सुबुं अनजिमानि नंगुबै खारिखौ मोननो थाडा। 1871-72 मायथाइयाव ब्रिटिछ भारताव जानाय गिबि सुबुं साननाय खारि बादियै सुबुं साननायाव आलादायै दिन्थिनाय जिउखां राहा गोनां हान्जाफोरखौ लाफानानै गासै कलिता सुबुं अनजिमाया दंमोन सा 3,39,971। बै आथिखाल आसामाव कलिता सुबुं हान्जायारि मानसिनि गासै अनजिमाया 50,00,000 (बाजि लाख) नि खम जानाय नडा होननानै सानजायो।

आसाम आरो सा-सानजा ओन्सोलाव रावबो गोजाम मानसिनि जोबथा सिनायथि मोननाय जायिखायनो जावखांथाइयारियै बे ओन्सोलाव गोजाम मानसिनि न'-बां गैयामोन होनना गरन्थआव फैदों। बेनिखायनो बे ओन्सोलनि आथिखालाव थानाय थागिरिफोरनि मोनफ्रोमनो सुबुं हान्जायानो बबेबा नडा बबेबानिफ्राय हाबफैदों। सोनाबथिं हिमालयनि साखाथियाव थानाय हादरनि हायेन ओन्सोलजों कलिता सुबुं हान्जानि आजै-आजौ आलपाइनफोरा बायदि जाहोनाव हाबखनफैनानै बुरलुंबुथुर सेरफां ओन्सोलाव हाबफैयो। सानजाथिं थाडै थाडै पाटकाइ हाजो मोननायनि उनाव आलपाइनफोरनि दावगानाया थादयो। मानोना हायेननि सुबुं हान्जा महरै खौसेयै हाजो गाखोना पाटकाइ हाजो बारनाया बिसोरनि थाखाय गोरलै नडामोन। बेनि थाखायनो पाटकाइनि सानजाहा कलिता एबा गुबुन रावबो आलपाइन गाहाइ सुबुंहान्जा गैया। आलपाइनफोरनि गिबि हान्जाया जाय समाव बुरलुंबुथुर सेरफां ओन्सोलाव हाबफैदोंमोन, बै समाव बे ओन्सोलाव सुबुं गैयामोन। बेनिखायनो कलिता सुबुं हान्जाया बुरलुंबुथुर सेरफांनि हायेन ओन्सोलनि गिबि थागिरि। बे ओंथियाव बुंनो थांब्ला कलिता सुबुं हान्जाया बुरलुंबुथुर हायेननि फिसा।

दिनैनिफ्राय स्नि रोजा बोसोर सिगां ख्रिष्टगिबि 5,000 निफ्राय ख्रिष्टगिबि 8,500 नि गेजेराव कलिताफोरनि आजै-आजौमोननि गिबि हान्जाया बुरलुंबुथुर सेरफाडाव आगान होदोंमोन होनना आरो ख्रिष्टगिबि 8,000 निफ्राय ख्रिष्टगिबि 3,500 नि मादाव बांसिनै बुरलुंबुथुर हायेन ओन्सोलाव थानो लादोंमोन होनना सानना लानो हायो। सोनाब दिगिनिफ्राय बे हाबफैखननाया जिब्रै जौथाइसिम एफा



एफायै जाबाय थादों। कलिता सुबुं हान्जानि आजै-आजौमोना जाय समाव बुरलुंबुथुर सेरफाडाव हाबफैदोंमोन (स्नि रोजानिफ्राय बा रोजा बाजि बोसोरसो सिगां), बे समाव बेनि हायेननि खाथि-खाला थानाय हाजो-हालाफोराव खायसे मंगलीय गाहाइ सुबुं हान्जा दंमोनब्लाबो हायेननि फारसे बिसोरहा गोसो गुदुं नडामोनखायनो कलिताफोरा सुबुडा सोरजिनाय हैंथा, बादायज्जायनाय एबा गाग्लोबनायनि मोगा मोगि जायालासिनो बुरलुंबुथुर सेरफां ओन्सोलाव गिबियै फामु गायसनदोंमोन। दैमानि सेर सेर हासार गोनां हायाव फिसा फिसा फामु गायसनानै लासै लासै सानजा फारसे दावलांनानै सानजाथाराव पाटकाइ हाजो बारनो हायैनि बुरलुंबुथुर सेरफांनि सानजा बाहागोआव बिसोर फामु गायसनो। बे दाबनै फामुनि जानथाया द'जौ किल'मितारसो जागोन।

आथिखाल आसामनि सुबुं अनजिमाखौ नायनानै गेदेरसिन थागिबि सुबुं हान्जा कलिताफोरनि बाहागोआ मोन नैजिफ्राम, दालाइ बाहागो एबा माहारिफोर दं। बेनिनो बांसिन अनजिमाया भारतारि संबिजिद बादियै साधारण थाखोआव रानजादों (गेदेर कलिता, उन्दै कलिता, कायस्थ, हालै, केअट, साउद, आर्यबैस्य बायदि बायदि) ब्लाबो मोननैसो माहारि एबा बाहागोआ गुबुन गुबुन गोग्लैसोनाया थाखोआव थिसनजादों (शालै, नापित, नट, माली, कुमार, कमार, खहार बायदि बायदि) आरो गुबुन माखासेया फारियाव बोनजानाय हारि (SC- धुबी, हीरा, जालै बायदि बायदि)। दा माहारियाव रानजानाय बे हान्जाफोरा सिगाडाव मोनफा 'रां आरजिग्रा' हान्जासोमोन। संबिजिदारियै गोबां बोसोर बोखावना लाखिनायनि थाखाय गोबाडानो दा सुबुंहान्जा (Ethnic) नि सिनायथिखौ बावलांनानै एबा नागारनानै माहारियारि सिनायथिखौसो गोसोआव लाखिदों। नाथ, य'गी, गनक आरो गोबां अनजिमानि थागिबिया इछलाम दोहोरोमारिफोराबो कलिता सुबुं हान्जायारि। जिनारि बिजिरनाय (Genetic Analysis) आदबजों सन्देहखौ होखारनो थाखाय बेनि नंगुबै सैथोखौ मिथिना लानो हायो। कलिताफोरा गुजिनैफ्राम गुबुन गुबुन बिमुं बाहायबोदों। बिदिन्थि बादियै- कलिता, बर्मन, बर्मा, काकति, बरुवा, बरा, चौधुरी, चौधारी, तालुकदार, डेका, हालै, दास, तहबिलदार, खाटनियार, दत्त, सेनापति, पाकबन्धा, डिहिदार, सरकार, शालै, हुजुरि, देउरी, उजीर, पालदास, साधनिकार, नेअग, मरल, भराली, मेधी, शइकीया, हाजरिका, भुजा, हीरा, माली, मालाकर, बेजबरुवा, बैश्य, साउद, बरबरुवा, रायबरुवा, रायचौधुरी, छकुरीया, पाठगिरि, पाट'वारी, नायक, सुत्रधार, लहकर, हिलैदारी, खारघरीया, लेखारु, फुकन, मजुमदार, पाठक, चहरीया, खाउण्ड, दुवारा बायदि बायदि। कलितानि अनगायैबो गुबुन सुबुं हान्जाफोराबो बेनिनो माखासे बिमुंखौ बाहायबोदों।

दासान्दि 'असमीया' होननानै सिनायथि मोननाय रावा बुंनो थाडोब्ला कलिताफोरनि सुबुं हान्जायारि राव। बबेखानि बेयाव ककेचीय आरो मंगलीय गुबुन गोबां थागिबि सुबुं हान्जायारि थादेरसाफोरखौ लाफानानैसो दानि गोदान, गोखों 'असमीया' महारा जादों। कलिताफोरा दोरोडाारियै खुन, बिलाइ जाग्रा एम्फौ, बेजेनिफ्राय दिहुननाय खुनुं, इन्दि, पात आरो मुगानि सि बाहायो। बेनिनो गिबि रोखोमनैजों सानफ्रोमबो गानग्रा सि आरो उननि रोखोमनैजों फोरबो आरिफोराव (Ceremonial) गानग्रा सि बानायनायाव बाहायो। इन्दि खुन्दनि गाबा गुफुर फुदला आरो बेजों गोजां बोथोराव जोमनो

थाखाय इन्दि सि दाना लायो। पात खुन्दुनि गाबा रुफा गाबनि आरो मुगा खुन्दुनि गाबा स'ना गाबनि, बेजों हाबा-खेराइ, फोरबो-फालिथाइ आरियाव बाहायनो एबा गाननो थाखाय साद्रि मेख्ला, धुति, गस्ला आरि बानायो। कलिता समाजाव बे रोखोमनै सिया दोहोनिनि नेरसोन दिन्थि महरै सानजाबोदों। गाबनि गोनां सि-जोमफोरखौ कलिताफोरा गावनो दाना दिहुनना लायो। सिख्ला-आइजोफोरा साल गान्दैनि खामानि रेंथारनांगौमोन आरो बोसोरनैसो सिगांसिम सि दानो रोडै कलिता सिख्लाफोरा हाबायानो जायामोन। हाबा जानाय हिन्जावा (देरसिननि सिगाडाव) खर'आव सि खोबना लायो। कलिता सुबुं हान्जायारिनि गाननाय जोमनायखौ गुफुर आरो गोजा गाबनि बाहायनायखौ बांसिन नुनो मोनो।

समाजनि थाखाय उफ्रायै गोनांथि जानाय सिजोमखौ सि दाग्रा (गोदो हिसान गोनां) आरो सि दानो गोरों मानसिया राडारि मुलाम्फानि थाखाय मोननै हान्जाया दाना दिहुनदोंमोन। मेखेला-सादरा कलिता आइजोफोरनि माहारियारि गाननाय-जोमनाय, लोगोसे आगुरण, टेलच, रिहा आरिखौबो गानो। हौवाफोरा गामसा, हिसानाव दानाय चुरिया, गस्ला गानो। रुगुडाव गोजा आगर एरनाय गामसाजों गेदेरखौ मान खालामो आरो उन्दैनो अननाय जासियो। स'ना, रुफा आरो फिथलाइजों बानायनाय बायदि रोखोमनि गहेना (गुबैयै हिन्जावफोरा) गानो। हिन्जावफोरा खाफालखौ लांदाडै लाखिया, बिसोर फोथा लायो। हाबा जाखानायनि उनाव सिन्दुरनि फोथा लायो आरो हौवाया थांना थासान्दि सिन्दुरनि फोथा लायालासिनो बाइजोआव ऑंखारलाडोब्ला मोदाइनि गाज्रि नोजोर गोग्लैयो आरो न'खर संसाराव बेनि गोहोम गोग्लैयो होनना सुबुंफोथायनाय दं। खोमायाव गहेना गाननायनि थाखाय सिख्ला बैसोआवनो खोमाखौ सुफलंना लायो। बे खोमा सुफलंनाय हाबाखौ सरासनम्रा काति दाननि पुर्णिमा (लोखि पुर्णिमा) खालि एबा खायसेया बैसाग दाननि पुर्णिमा (बुद्ध पुर्णिमा) नडाब्ला आसिन दाननि शुक्ला दशमी (बिजया दशमी) खालिबो मावो।

कलिताफोरा बुंनो थाडोब्ला आबाद मावनानै जाग्रा। सम सोलायनाय लोगो लोगो गुबुन गुबुन जिउखां राहा आजावनो हमदोंब्लाबो दासिमबो 90% कलिताफोरा थोंजोडै एबा खेंसालियायै आबाद आरो जिब-जुनार फिसिनानै जिउ खाडो। कलिताफोरा मानै (हालिसे) मोसौ एबा मैसोजों 'नांगोल' मुंनि जुनिया आगजुजों हा फोमोननानै आबाद मावो। मोसौ आरो नांगोलजों हाल एवग्रा मानसिखौ बिसोर 'हालै' बुडोमोन। कलिता सुबुं हान्जाया बुंनो थाडोब्ला बंसनि हिन्जावसा हाबा लानाय (Endogamous), बे मोनसे जनजातिफोरनि आखु (Tribal Character)। बहुमनि गुबुन गुबुन जनजातिफोरबादि गाव हान्जायारि जिन फख्रि (Gene pool) नि रैखाथिनि थाखाय आरो हारिमु, आसारखान्थि, दोरोडारि रैखाथिनि थाखाय कलिताफोरा हाबा-हुखा बादि गोदान सोमोन्दोखौ गाव हान्जानि गेजेराव जानायखौ सिगां मोनग्रोथाइ होयो। बंसनि हिन्जावसा (Endogamous) ब्लाबो कलिता समाजाव खाथि सोमोन्दो थानाय (Consanguinous) हौवा हिन्जावनि गेजेराव हाबा जालायनो मोना। सोमोन्दोआव फंबाय-बिनानाव, बिमाइ-बिआनैसो (बियानै फिसा), बिबथै-बियादै आरि थैनि सोमोन्दो थालायनाय गेजेराव हाबा होलायनाय जायो नाथाय थैनि सोमोन्दो गैयि हाबा लालायनाय सोमोन्दो थालायनायनि गेजेरनि हाबा जालायनायखौ बरायना लानाय जायो (जेरै बिबोनांजों बिनानाव एबा फंबायजों बिबोनांखौ

हाबा होनाय)। लांखारना हाबा लानायखौ मानिना लाया। बेफोर बिथिडाव गोरों गोरफोर 'मेल' खुंनंगौ जायो आरो मेलाव लानाय थांखि बादियै जुरिमाना, नाम नआव हान्थु खरायहोना राइजोनि गनायथि लानानैसो संसारखौ जागायनो हायो।

ओंखामानो कलिताफोरनि गाहाइ जामुं। ओंखामजों लोगोसे गुबुन गुबुन मैगं-थाइगंनि ओंखि थायो। संखि ओंखारनायनि सिगां खारैजों ओंखि संना जायोमोन। माखासे दोरोडारि कलिता सुबुं हान्जाया जाग्रा जामुं एबा ओंखिफोर एरैबादि-आलु मेनाय, आलु बाथोन, फान्थाव फिथिखा, खान्थाल बेगर सावनाय ना सावनाय, थाइगिरजों ना संनाय ओंखि, थालिर फस्ला, थस' ओंखि, खुम्ब्राजों हांसो संनाय ओंखि, मुदुफुलजों फारौ संनाय ओंखि, गुबुन गुबुन बाथोन देनाय जैरै- पदिना, दालि आरो गुबुन गुबुन संनाय ओंखिफोर. खुसेरनि रोसि दिहुनना बेखौ फुदुंनानै गुर मेथाइ बानायो। फुंनि जामुं जानायाव क'मल चाउल (ब'का चाउल), चिरा एबा सौराइ देनायखौ थालिर, गुर मेथाइ आरो गाइखेरजों जायो। माइ रुनानै सान्दुडाव फोरानना मोनसे जुनिया रोखोमै कमल (ब'का) चाउल एबा जामुं बानायो। गुबुन फारसेथि सोमनानै दोननाय माइरंखौ उवाल एबा दिंखियाव सौनानै सिरा बानायनाय जायो। ओंखामाव दै होनानै सानसे एबा हरसे दोनना ओंखाम गोजां बानायो आरो सरासनसा आबाद मावनाय बोथोराव सानजौफुआव आबादथिलिनिफ्राय फैनानै आलु मेनाय (सावनाय), ना सावनाय बाथोनजों ओंखाम गोजांखौ जायो। आलासिफोरनो बायदि रोखोमनि लारु (सिबिनि लारु, नालेंखरनि लारु बायदि बायदि), फिथा (सिबिनि फिथा, माइन्नानि फिथा, हासुंनि फिथा, थालिर फिथा, मोसौ थाफिल फिथा बायदि बायदि) आरिजों सिबियो। बेसर फेरेदनानै दिहुननाय थावजों बायदि रोखोमनि मैगं-थाइगं संनानै जायो। गाइखेर आरो गाइखेरनिफ्राय बानायनाय गाइखेर दाखाया कलिता सुबुंजिउनि एंगारनो हायि बाहागो। कलिताफोरा जेबो रोखोमनि फेग्रा बेसाद बानाया आरो बेनिखायनो कलिताफोरनि जिउ खांनायाव फेग्रा बेसादा जायगा मोना। ओंखाम जाखांनायनि उनाव गइ-फाथै जानायनि नेम दं। कलिताफोरनि जिउ खांनायाव गइ-फाथैया मोनसे आलादा मासि दं।

कलिता सुबुं हान्जायारि मानसिया फालिनाय फोरबो एबा फालिथाइफोरनि मादाव मोसौ बिहु, शाकति, औवा फुजा, भथेलि, बिहु, मह'ह' एबा थाम्फै होखारनाय दुलीया, माइ गायनाय एबा बिफां गायनाय फोरबो, माइ गसा लानाय (मायनाव बरायनाय) फोरबो, काति बिहु, माइ हाखांनाय फोरबो, ओंखाम गोरलै जानाय, मागो दमासि, हिन्जावसा लाइमोन जानायनि फारिथाइ, अजापालि, नागारा नाम बायदि बायदि। 'असमीया' होननानै जायखौ संस्कृत सानखांथाइया सोमजिहोदों बेनि गाहाइ एबा सिनस्रि हारायानो जादों कलिता सुबुं हान्जायारि सुबुं हारिमु। 'असमीया' मुंनि हारिमुवारि सानखांथाइ सोरजिनायाव कलिता सुबुं हान्जानि ओरैबादि बिहोमा दं दि 'असमीया सुबुं हारिमु' जों 'कलिता सुबुं हारिमु' आ बायदि महराव आलादा जालांदों। बेनिखायनो आसामनि सोदोमस्रिखौ गुबैयै कलिता सोदोमस्रि होननानै बुंनाय जादों- ("Assam is the Homeland of the Kalitas and its civilization is predominantly kalita civilization. The other sub-castes follow the Kalita social laws and customs in their entirety." (Dr Kaliram Medhi)। मोनसे गेदेरथर "असमीया हारि" दानाय

हाबायाव गोबां बोसोर मुखुब नाजाथाबनानै कलिताफोरा गावनि सुबुं हान्जायारिनि सुबुं आसार आरो सुबुं हारिमुफोरखौ गावनि सुबुं हान्जायारि होननानै सिनायथि होआलासिनो गासैनबो जानानै सिनायथि होबोदों।

कलिताफोरा हायेननि आबाद मावना जाग्रा आरो दैमाखौ फुजिग्रा सुबुं हान्जा। बेनिखायनो कलिताफोरनि सुबुं हारिमुवा बांसिनानो आबाद आरो दैमाजों सरजाबनाय।

**कलिताफोरनि सानैसो मख 'जाथाव सुबुंफोर :**

1. **कुमार भास्कर बर्मा :** गोजाम कामरूप राज्योनि गोहो गोर राजा। राजा सुप्रतिष्ठ बर्माया थैनायनि उनाव 593 मायथाइयाव कामरूपनि राजा जायो। कुमार भास्कर बर्माया राज उलाफादाव गाखोनाय दिननिफ्रायनो असमीया माहारियारि अब्द ('भास्कराब्द') खौ साननाय जायो। सा भारतनि राजा हर्षबर्धनजों बियो लोगोमोन। भास्कर बर्माया हर्षबर्धनजों लोगो जानानै गौड़लि राजा शशांकखौ फेजेनदोंमोन आरो गौड़ आरो कर्णसुबर्णखौ कामरुनि सिडाव लाबोदोंमोन आरो कामरूपनि सिमाया सोनाबहा बिहार आरो खोलाहा उरिष्या राज्यो मोनहैदोंमोन। बेयो भुमखौराडारि बादियै गेदेरसिन कामरूप राज्योमोन। चीन हादरनि दावबायारि हिउवेन चाडनि लिरसुंथाइ बादिब्ला कुमार भास्कर बर्मानि दिनाव कामरूप राज्योनि सिमाया 1675 माइल आरो राजथावनि प्रागज 'तिषपुरनि सिमाया 6 माइलमोन। भास्कर बर्मानि डुबि तामा लिरथि, निधानपुरनि तामा लिरथि, नालन्दानि मैसो आरिया कलिता सुबुं हान्जानि आरो आसामनि बेसेन म'हर जारिमिनारि फुंखा। आन्दाजाव 650 मायथाइयाव भास्कर बर्माया थैयो।

2. **आनन्दराम बरुवा :** गिबिसिन अमसीया ग्रेजुयेत आरो गिबिसिन असमीया (बाथि भारतारि) आइ.चि.एस। जोनोम बिथानि 1850 मायथाइनि 21 मे खालारखालि सा-गुवाहाटीयाव जादोंमोन। बिफानि मुडा गर्गराम बरुवा आरो बिमान मुडा दुर्लभेश्वरी बरुवा। जिला बिसार खुंगिरि मासि मोननाय गिबि असमीया आरो भारतनि मादाव नैथि संस्कृत रावनि सासे आखा-फाखा पण्डित। बिथाडा 1889 मायथाइनि 19 जानुवारी खालारखालि रुंसारि जायो। 2005 मायथाइनिफ्राय गोजौ फरायसालिनि जोबथा आनजादाव मोजाडै मोजां उथ्रिसारनो हानाय फरायसाफोरनो आसाम सरकारा 'आनन्दराम बरुवा बान्था' होबोदों।

3. **मुंख्लं मणिराम देवान :** गुबै मुडा मणिराम दत्तबरुवा, बिथांखौ 'कलिता राजा' होननानै मुं होनाय जादों। बिथानि जोनोम 17 एप्रिल, 1856 मायथाइयाव शिवसागर जिलानि सिडाव। सोलौंथाइ लाखांनायनि उनाव बै समनि इंराज खुंथाइनि खाजोना खांग्रा राजा पुरन्दर सिंहनि 'बरभाण्डार बरुवा' बिबानाव दंमोन पुरुन्दर सिंहखौ खाजोना खांग्रा राजानिफ्राय बोख्लायनायनि उनाव 1837-1839 मायथाइयाव इंराज खुंथाइनि सिडाव टेरेकापार, क'वरपुर आरो मेटेका मौजानि मौजादार महरै बिबान लानायनि उनाव 1839 मायथाइयाव इंराजनि 'आसाम टी कम्पानी'नि देवाननि मासियाव थिसनजायो। 1845 मायथाइयाव चेनीमरा (ज'रहाट) आरो चिंलौ (शिवसागर) आव गाव हारसिडै गंनै साहा बागान खुलिनानै गिबि असमीया आरो गिबिसिन भारतारि साहा आबादारि महरै मुं मोनो। आसामाव इंराजनि हेंथायै उदांसि सोमावसारनायनि लामा दिन्थिगिरियानो जादों मणिराम देवान। राजखान्थियारि उदांसि

मोननाय लोगो लोगो रांखान्थियारि उदांमि गायसननो थाखाय सोर (लहा) आवलिहोग्रा दारिमिन, स'नानि दारिमिन, संखिनि फालांगि, दिडा बानायग्रा दारिमिन , इथानि दारिमिन बायदि बायदि गायसननाय आरो खाउरि बाहायनानै गोदान रांखान्थिनि बिथाखौ गायसनदोंमोन। दिहुनजानाय मुवाफोरखौ फाननायनि थाखाय बुरलुंबुथुर सेरफांनि मोनबा जायगायाव 'हाथाइ' फसंदोंमोन। डिब्रुगड़ जिलायाव बरहाथाइ, शिवसागर जिलायाव नगाहाथाइ, कामरूप जिलायाव गार'हाथाइ, लखिमपुर जिलायाव चिचि हाथाइ आरो दरं जिलायाव दरडारि हाथाइ। 'जारिमिन बिबेक रत्न' मुंनि बिजाब लिरदोंमोन। आसामाव 1857 मायथाइनि सान्थि (सिपाइ) बिग्रायनाय फोसावनायनि थाखाय दायनिगिरि खालामना 1858 मायथाइनि 26 फेब्रुवारी खालारखालि इंराज खुंगिरिया मणिरामखौ ज'रहाटआव राइजोनि गेजेराव फासि होयो।

**4. ड° बाणीकान्त काकति :** बिथांनि जोनोमा 15 नबेम्बर, 1894 मायथाइयाव दानि बरपेटा जिलानि बाटिकुरिहा गामियाव जादोंमोन। बिफानि मुडा ललितराम काकति आरो बिमानि मुडा लह'बाला काकति। 1911 मायथाइयाव आसाम सेरफांनि मादावनो सेथि थाखोआव बरपेटा गोजौ फरायसालिनिफ्राय मेट्रिक आरो 1913 मायथाइयाव कलिकता मुलुग सोलोंसालिनि मादाव सेथि थाखोआव आइ.ए. आनजादखौ उश्रियो। कलिकता मुलुग सोलोंसालिनिफ्राय बि.ए. आरो एम.ए. खौ उश्रिखानानै 1918 मायथायाव कटन कलेजनि, बिबुंगोरा जायो आरो 1947 मायथाइयाव गुवाहाटी कटन कलेजनि गोरायुं जायो। 1916 मायथाइयाव बरपेटानि कनकलता (दास) काकतिजों हाबा जायो। 'कलिता जातिर इतिबृत्त' आरि गानैसो बिजाब लिरदोंमोन। बुंनो थाडोब्ला कलिता सुबुं हान्जायारि रावनि हेफाजाबाव गुबुन सुबुं हान्जाफोरनि बिहोमाजों जानाय 'असमीया' रावखौ मोनसे उदां गोदान राव होनना ड° काकतिआ गायसनलांदोंमोन। 'Assamese It's Formation and Development' बिजाबनि थाखाय कलिकता मुलुग सोलोंसालिया बिथांनो 'डक्टरेट' बिमुं होदोंमोन। बिथाडा 1952 मायथाइनि 15 नबेम्बर खालारखालि रुंसारि जायो।

**सोंथि :**

1. कलिता सुबुं हान्जानि दोरोडारि जानाय-लौनायनि सोमोन्दै मा मिथिगौ लिर।
2. कलिताफोरनि गहेना आरो गाननाय-जोमनायनि सोमोन्दै लिर।
3. कलिता सुबुं हान्जानि फोरबो फालिथाइनि सोमोन्दै सुंद'थै लिर।
4. लिरसुंथाइ लिर -
  - (क) आनन्दराम बरुवा
  - (ख) कुमार भास्कर बर्मन
  - (ग) मणिराम देवान
  - (घ) ड° बानीकान्त काकति

## तिवाफोर

तिवाफोरा गोदोनिफ्रायनो आसामाव रायजो जाबोनाय मोनसे सुबुंहान्जा। रावारि बिथिनिफ्राय बिसोर इण्ड'-चीननि सिङाव थानाय तिब्वत बर्मी राव-हान्जा फोलेरनि गेदेर बड' दालाइनि सुबुं। दासान्दि बे हान्जानि सुबुंफोरा आसामनि नगाव, मरिगाव, कामरूप, कार्बिआंलं, ज'रहाट, धेमाजी, लक्ष्मीपुर, शदिया आरो मेघालय राज्योनि माखासे जायगायाव गोसारनानै दड'। तिवाफोरखौ दातिअलीया, पाहारीया आरो थल'वाली होनना मोनथाम बाहागोयाव राननाय जायोब्लाबो गुवारै दासान्दि हाजोयारि आरो हायेनारि महरै मोननै बाहागोयावसो राननाय जायो।

जारिमिन बिलाइयाव तिवाफोरनि जायगाया गोसो होथाव। तिवा बीर ज'डाल बलहुआ जारिमिन लिरनायनि सिगां मुगानि सासे खिरिमिनारि राजा। गेजेर मुगायावबो ग'भा, नेली, खला, चहरीखौ लाफाना माखासे फिसा गिदिर राज्यो बिसोरनि दैदेननायाव कपिली सेरफाडाव गायसनजादोंमोन। बिनि अनगायैबो आहमनि रहा आरो जागीनि सिङाव थानाय 'पाच' राज्य' आरो 'सात' राज्य' होनना गंजिनै फिसा-फिला राज्योखौ हमनानै दमाल-दन्दुवा आरि राज्योनि जोनोम जादोंमोन। 1835 ख्री: आव ग'भा राजाया साथाम बृटिछखौ हमना लाबोनानै काली मोदाइजोनि सिगाडाव बोलि होनानै इंराजनि फाखनाव गोगलैनानै राज्यो खोमानो गोनां जादोंमोन। भारतनि उदांसि दावहायाव तिवाफोरनि जुनिया बिहोमा दड'। आसामनि गिबि आबाद बिग्रायनाय 'फुलगुरि धेवा'नि जोनोम होगिरि आरो दैदेनगिरिया तिवाफोरानोमोन। बिग्रायनायनि दयाव च'वाबर लालुडखौ लाफाना आरोबाव गोबां सुबुंआ थैनायनि अनगायैबो साजिसे सुबुंआ अराय जिउ हादोर नागारनायनि साजा मोनदोंमोन। ब्रैजिनैनि सुबुं सोमावसारनायावबो तिवा जनजातिनि सुबुं हेमराम पाटश मुंख्लं जादोंमोन।

गुबैयै बिमा गाहाइ खान्थिनिफ्राय जोनोम जानाय तिवाफोरनि समाज दाथाया न'खरनिफ्रायनो जुरिजेनो। गंनै गंथाम न'खर लोगो नांनानै मोनसे माहारि, गोबां माहारि लोगो नांनानै मोनसे फोलेर, मोनसे एबा बेनि बांसिन फोलेर लोगो नांनानै मोनसे खेल आरो मोनसे एबा बेनि बांसिन खेल लोगो नांनानै गंसे गामिनि जोनोम जायो। खेलनि खुंथायारि आरो समाजारि गाहेला बिथांखौ हायेनाव 'जेला' होनना बुडो आरो हाजोयाव गंसे पिनुडनि (खेलजों समब्रासमब्रि) गाहेला बिथांखौ 'लर' होनना बुडो।

हारी कुवरीया समाजनि मोनसे मानगोनां बिबान। हायेन ओनसोलनि मोनफ्रोमबो नखराव आर'जन' 'बरघर' एबा 'न'बार' थानाया नोजोर होथाव। गुबुन फारसेथिं हाजो ओनसोलनि मोनफ्रोमबो न'खरनि गाहेलाखौ 'जेला' होनना बुंनायनि अनगायैबो थाग्रा न'माखौ 'न'बार' होनना बुंनाय जायो। न'खर मिरुयारि फुजा फाथालखौबो बियावनो होनाय जायो। 'चामादि' एबा डेकाचांआ हाजोयारि तिवाफोरनि हारिमुवारि जिउमिरु। दोहोरोमारि बिथिंनिफ्राय तिवाफोरा गुबैयै जड़बादी एबा सुथिगैयै (मुसुखा), जिउगैयैखौ फुजिग्रा आरो गोदो सुबुं आजौ आजैफोरखौ फुजियो। मिथिंगानि बायदि बेसादफोरखौ फुजा खालामनायनि अनगायैबो रंजाथाइ फोरबोफोराव बिसोरो आजौ आजैफोरखौ मोदाइ जाबाय होनना फुजा खालामो। हिन्दु दोहोरोमनिफ्राय जोनोम जानाय गुबुन गुबुन हान्जा जैरै- शाक्तबाद, बैष्णवबाद, शैवबाद, नव बैष्णवबादनि सायावबो बिसोरहा फोथायनाय दड'। नाथाय हाजोयारि ओनसोलफोराव नैजि जौथाइनि जुरिजेननायनिफ्रायनो ख्रीष्टान दोहोरोमा गाजा बेरखाडो।

तिवाफोरनि हारिमुआरि थिलिया जोबोरैनो दोहोनि। अनलायनाय, मोजां मोनलायनाय आरो बिदा-फंबाइ सानमिनि-मोन्नोगैयै नेरसोन 'जनबिल' मेलाया गोजाम रांखान्थिनि गोजाम दलिल। बेनि अनगायैबो हाजो हालामनि गुबुन गुबुन फुजा फोरबोया जाबाय-वानसुवा, छग्रा, यांली, मुइनारी कान्थि, लांखन, माइ पथाला, माइ रावा, खापलां रावाने फुजा, पान्थाइच्यावा आरि। गुबुनफारसेथिं हायेन हालामनि रंजाथाइ फोरबोफ्रा जाबाय- जनबिल मेला, बरत, ग'साइ दिहुननाय मेला, बैसागु रंजानाय, मागो दमासि आरो खाथि गासा फोरबो। तिवाफोरनि हाबा-हुखा आरो रंजाथाइ फोरबोफोराव बायदि मेथाइ-रोजाबनाय, मोसानाय आरो दामनाय-देनायफोर सोलियो। तिवाफोरा ख्राम (ढ'ल) बार, ख्राम खुजुरा, ख्राम फान्थाइ, दुमदिं, दगर, पातिढल आरि जुनारनि बिगुरनि दामग्रा, औवानि फाबुजों बानायनाय वाफां ख्राम, थकथररक; खुगाजों सुनानै आसिजों थुनानै दामनाय पांशी (सिफुं) थ'रां, मैसोनि गंजों बानायनाय फेमफा, मुहुरि आरो खावां (ताल) आरि दामजु बाहायनाय नुनो मोनो।

तिवाफोरा गावारि आखुथाइ गोनां गोसो बोथाव बायदि बायदि बिबारनि आगर एरखांनाय जि-जोम गानो। हौवाफोरा थाना, तागला, थेनाच, फालि, फागा आरि आरो आइजोफोरा काछां, फाछकाइ, नारा आरि गानो। बेनि अनगायैबो तिवाफोरा गुबुन गुबुन रोखोमनि मणि जैरै- चापल, चिंलि ल, कल पान्था आरि गानो। खाइदं, छन्याने खाइदं आरो रुफाने खाइदं मुंनि गहेनाफोरखौ खोमायाव गानो।

बेदर जानो मोजां मोनग्रा तिवाफोरनि टु मेछाम (दाउन बेदर) आरो वा मेछाम (अमा बेदर) आ जोबोर मोजां मोनजानाय जामुं। दोरोडारि आदबजों जुनियायै बानायनानै लोनाय दैलाव मुवाखौ बिसोरो 'ज्यु' होनो।



तिवाफोरनि हारियारि आरो समाजारि जौगानायनि बेलायाव मख'जाथाव बिहोमा होनाय गेदेमा सुबुंफोरनि सोमोन्दै गाहायाव सुंदयै सावरायनाय जाबाय।

### इन्द्रसिं देउरी :

तिवा जनजातिनि गेजेराव हारियारि सांग्रांथि जाखांहोनायनि बिथिडाव जिउनाडै जुजिग्रा मुंख'जाथाव सुबुडा जाबाय इन्द्रसिं देउरी। बिथानि जोनोमा सोनाब कार्बि आंलं जिलानि गोग्लैसोनाय हालाम रंखैपार गामियाव 1932 मायथाइयाव जादोंमोन। मालचिं प'मा आरो मामा आमचिनि बिथाडा थामथि फिसाज्जामोन। 1939 मायथाइयाव कार्बि आंलं जिलानि बाउलाग'ग गुदि फरायसालियाव सोल्लोंथाइ जिउखौं जुरिनानै नगाव जिलानि डिमौ गोजौ फरायसालियाव दाइन थाखोसिम फरायनानैनो राडारि आंखालाव सोल्लोंथाइ जिउखौं फोजोबनो गोनां जायो। 1949 मायथायाव भारतारि बिग्रायारि कमिउनिष्ट हान्जाजों सोमोन्दोयाव फैनानै उनाव हान्जायाव हाबनानै मुखुबै खामानि मावो। हान्जायाव थानाय समाव बिथाडा तिवाफोरनि समाजारि, राजखान्थियारि रंखांथियारि आरो सोल्लोंथाइ बिथिंनि गाज्जि हालसालनि बाथ्रा सानदोंमोन। नाथाय न'खरनि रंआरि राहानि थागिदायाव गोग्लैनानै बिथाडा 1951 मायथाइयाव भेतेरिनारि बिफाननि साखियाव हाबदोंमोनब्लाबो हारिनि सायाव थानाय गिलिर बिबाननि थाखाय बिथाडा 1953 मायथाइयाव गार' पाहार जिलानि तुरानिफ्राय साखिखौं नागारना तिवा हारिखौं फोजाखांनाय खामानियाव मुखुब जाफिनो।

कार्बि आंलं जिलानि तिवाफोरनि गेजेराव थानाय खोमसि फोथायथिफोरखौं होखारना सोल्लोंथाइनि सोरां बिलाइनायजों लोगोसे तिवा समाजखौं गोदान समाजजों सिनायथि जाहोनायनि गोसोजों जोबोर जारलाजों इन्द्रसिं देउरीया बिन माछलाइ, रबटसिं आमचि आरो पदकान्त काकतिखौं लाफाना सांग्रां सुबुंफोरनि हेफाजाबाव 1960 मायथाइयाव थाराखुन्जी गामियाव 'तिवाचा मिचन' मुंनि मोनसे समाजारि फसंथान जोनोम होयो। बै फसंथाना तिवा गामिफोराव गुदि फारायसालिजों लोगोसे बैसोगोराफोरनि फरायसालि गायसंनानै फरा फोरेंनो राहा लादोंमोन। तिवा समाजनि न'खर शिल्पखौं दावगालांहोनी थाखाय मिचना जुनिया बिफाव लादोंमोन। अब्लानो इन्द्रसिं देउरीया 'अ' तिवा, अ' तिवा छेराण चावा', मुंनि दोंसे बयजोंबो मोजां मोनजानाय मेथाइ रनसायदोंमोन।

'तिवासा मिचन' नि खामानिया सोलिबाय थानाय समाव 'अल पार्टी हिलच लिडार कनफारेन्स' आ बाहागोसे तिवा ओनसोलखौं लाफाना मेघालय राज्यो दानायनि दाबि दैखांनायाव इन्द्रसिं देउरीया हेंथा होनी थिरांथा लायो। मानोना बेनि सिगां जुथाइ मिकिर पाहार आरो साहा काछार हाजो जिला दानाय समाव तिवा थाथाय गाहाइ हालामा बोखावजादोंमोन। तिवा हारिनि जौगाथाइनि जानानै खामानि मावनाय मुंखजाथाव मोनसे गौथुम 'लालुं दरबार'आ 1967 मायथायाव इन्द्रसिं देउरीनि दैदेननायावनो



जोनोम जादोंमोन ।

इन्द्रसिं देउरी गेदेमाया गिबि गिबियावनो कार्बि आंलं गाव खुंथाइ परिषदआव 1976 मायथाइयाव सासालग सोद्रोमा महरै सायख 'हरजायो आरो उननि खोलोबाव परिषदनि लेडाइ बुंथिगिरि महरै सायख' जायो । कार्बि आंलं गाव खुंथाइ परिषदनि 1981 मायथायाव खुंजानाय साधारण बिसायखथियाव आमरि बियाबनिफ्राय लालुं दरबारनि जानानै उदां बिजाथि महरै गसंनानै देरहासार जायो आरो उननि समफोराव परिषदनि बुंथिगिरि बिबानावबो थिसनजादोंमोन ।

इन्द्रसिं देउरी गेदेमाया तिवा थुनलाइ हारिमुनि बाख्रिखौबो दोहोनि खालामना दोनलांदों । बिथांनि गोबां तिवा खन्थाइ, मेथाइ गुबुन गुबुन सानलाइमालाइसिफोराव फोसावजादों । बेफोरनि मादाव 'तिवा तचिमा' मेथाया तिवा हारिमायारि मेथाइ महरै गनायजादों । बे तिवा हारिमायारि मेथाइनि देंखोखौ बिथाडा गावनो होदोंमोन ।

इन्द्रसिं देउरी गेदेमाया सासे तिवा हारिमायारि जिउनि आगदारिमोन । बिथाडा सिरिबाडैः गौथुम दागिरि, सांग्रां समाज सिबियारि, समाज फोसाबगिरि, लिरगिरि, रोजाबगिरि, देंखोगिरि आरो आखा फाखा राजखान्थिगिरिमोन । बेनिखायनो हाजोयारि तिवाफोरा इन्द्रसिं देउरीखौ 'फा परै' (हारिनि बिफा) होनना गाबज्रियोमोन । तिवा हारिया थांनानै थाजासिम इन्द्रसिं देउरी गेदेमायाबो तिवा हारिनि गेजेराव अरायबो थांनानै थागोन । बिथाडा 1994 मायथाइनि 20 आगष्ट खालाराव रुंसारि जालाडो ।

### बलाइराम सेनापति :

बलाइराम सेनापतिया आसामनि थुनलाइ-हारिमु मुलुगनि सासे राफोद लिरगिरि, हारिमु सिबिसुला । बिथांनि जोनोमा 1931 मायथाइनि 3 मार्चआव नगाव जिलानि जारिमिनदांखा बारपुजीया गामियाव जादोंमोन । बिथांनि बिफाया जादों बगाराम सेनापति आरो बिमाया पद्मेस्वरी बरदलै । बारपुजीया एल. पि. आरो एम. भि. फरायसालियाव गुदि सोल्लोंथाइ लानाय सेनापतिया गेजेरारि सोल्लोंथाइखौ लादोंमोन नगाव गवर्णमेन्ट गोजौ फरायसालियाव । न'खरनि जेंनानि थाखाय गोजौ फरायसालिनि सोल्लोंथाइ फोजोबाब्लानो सेंग्रा बैसोयाव बिथाडा 1953 मायथाइनिफ्राय 1963 मायथाइसिम जुथाइ सा-काछार आरो मिक्किर हाजो जिलानि बरथल गेजेर इंराजी फरायसालियाव फोरोंगिरि मावदोंमोन । 'मिक्किर पाहारत कि हैछे' मुंनि 'रामधेनु' याव फोसावजानाय रायथाइखौ लिरनायनि थाखाय सरकारि मावख 'गोरानि खैसाराव गोगलैनानै जि बोसोर सिमल' फोरोंगिरि जाना बरथल एम. इ. फरायसालिनि गाहाइ फोरोंगिरिनि साख्रिखौ गारनानै फैनो गोनां जादोंमोन आरो आबादनि खामानियाव नांथाबदोंमोन । बलाइराम सेनापतिया फरायसा समनिफ्रायनो थुनलाइ हारिमु आयदानि सायाव गोसो गुदुंमोन । तिवाफोरनि मेथाइ-खन्थाइ, मोसानाय-दामनाय आरिनि सोरसिनाय आरो गोसारहोनाय बिथिडाव मोनसे खान्थियारि सर'नि थाखाय

गोनांथार राहा लादोंमोन। बिथाडा सुजुनाय तिवा सुबुं मेथाइनि देंखो लिरथि (स्वरलिपि) यानो साबसिन बिदिन्थि। बिथाडा तिवा सुबुंहान्जानि गावारि हारिमुनि सरैखाथिनि थाखाय 'तिवा कृष्टि आफाद' गायसननायाव जरखायै बाहागो लादोंमोन। तिवा रावखौ गायसनायनि बिथिडाव बिथाडा आगदारि बिबान लादोंमोन। सेनापतिनि बांसिन थुनलाइ रनसायनाया असमीया रावावनो सोरजिजादों। बेनि जोहै बिथाडा खालि तिवा थुनलाइ हारिमुखौ गेरेमसा खालामनायानो नडा असमीया थुनलाइनि बाखिखौबो गोगोम खालामलांदों। बिथाडा 'रामधेनु' सानमालाइसियाव बै समाव गुबुन गुबुन लिरबिदांनि जोहै आसामनि थुनलाइ-हारिमुनि मुलुगजों सिनायथि जायो। मेथाइगिरि, देंखोगिरि, रोजाबगिरि सेनापतिया 1954 मायथाइयाव 'मुकुल' मुंनि गांसे मेथाइनि बिजाब रनसायनानै फोसावो। बिथाडा रामधेनुयाव लिरनाय तिवाफोरनि 'रातिसेवा' आयदानि रायथाइया बै समाव समब्रा समब्रियै आसामनि गोरोंगोरा समाजनि नोजोर बोनो हादोंमोन। सेनापतिया गोबां बोसोरसिम असम साहित्य सभानि मावफुं सोद्रोमामोन। बिथाडा 2000 मायथाइयाव 'तिवा माथनलाइ तखा' थामहिनबा तिवा साहित्य सभानि आफादगिरिनि मासिखौबो समायहोदोंमोन। थुनलाइगिरि महरै बिथांनि सोरजिफोरा जाबाय 'अतीतर सन्धानत' (1997), 'पाच'रजीया अञ्चलर लालुडर लोकगीतर ओपरत सामान्य आलोकपाट' (पाँचरजीया ओनसोलनि लालुंनि खुगा मेथाइनि सायाव खेन्दासे रिफिनाय) 1997 आरो 'तिवा-जनग'ष्ठीय संस्कृतिर आलोकपाट-तिवा समाज आरु संस्कृति' (तिवा सुबुंहान्जानि हारिमुनि रिफिनाय, तिवा समाज आरो हारिमु) 2010 बे गांथाम बिजाब। बिजाबसा महराव फोसावजानाय 'तिवा जनजाति आरु बैष्णव समाज' मुंथिनि 'अनन्तदेव गोसोखां बिबुंसार'नि बिबुंथियाव सेनापतिनि साननायनि गोथौथि आरो समाज बिजिरनायनि आखा फाखाथिया समायना महरै बेरखांदों। सेनापतिनि थैनाय उनाव 'बलाइराम सेनापतिनि रनसाय बिदां' आ फोसावजायो 2017 मायथाइयाव। बायदि रादाबबिलाइ, सानमालाइसि, गोसोखां बिजाब, खुगालाइसिफोराव बिथाडा लेन्थियै लिरोमोन। बेफोरनि मादाव रामधेनु, आमार प्रतिनिधि, सादिनीया असमीया, नबजुग, रिचां, आजिर असम गरीयसी आरिनि मुंखौ जुनियायै रायखांजायो।

थुनलाइनि थिलियाव बिथां होलांनाय मुंख 'जाथाव बिहोमानि गनायथि महरै 1991 मायथाइयाव आसाम सरकारा बिथांनो थुनलाइयारि पेन्सन होयो। बेनि अनगायैबो तिवा समाज हारिमुनि अराय जिउ सादोनगिरि, संजिरगिरि पण्डित महरै नगाव जिला साहित्य सभाया 2011 मायथाइयाव तिलक चन्द्र देवशर्मा स्मारक 'ड० सूर्य कुमार भुया बान्था' आरो आसामनि सुबुंहारिमुनि सादोनगिरि महरै बकुल बन न्यास, आसामा 2011 मायथाइयाव 'बकुल बन बान्था' गथायदोंमोन।

बलाइराम सेनापतिनि जोहै रनसायजानाय मेथाइ फावथिनाफोरखौ नगाव आरो गुवाहाटी रेडिअ' सेन्टरआ फोसावदों। अल इण्डिया रेडिअ'नि जोहै फोसावजानाय बलाइराम सेनापति रनसायनाय मेथाइ फावथिनाफोरा जाबाय-नगार नरत्तम ग'साइ श्रीराम, फुलगुरिरि धेवा, तिवा समाज-संस्कृति, हेरुवा दिनर

सुर आरो स्वाधीनता संग्रामर बिप्लबी गीत।

गुवार सुबुंथिनि बिगुमा बबेखानि गोरलै सादा-सिदा जिउ खांनाय बारा बाश्रा बुडै बिथां गेदेमाया 2014 मायथाइनि 11 मेखालि रुंसारि जालाडो।

**सोंथि :**

1. रावारि बिथिंनिफ्राय तिवाफोरा बबे दालाइनि सुबुं?
2. तिवाफोरा बिसोरनि रंजाथाइ फोरबोफोराव बाहायनाय बायदि बायदि दामजुफोरा मा मा?
3. तिवा समाजआव 'जेला' होनना सोरखौ बुंनाय जायो?
4. तिवाफोरनि मोननैसो फोरबोनि मुं लिर।
5. तिवाफोरनि हारिमुवारि जिउमेरुवा मा?
6. 'जनबिल मेला'या मानि दलिल?
7. लिरसुंथाइ लिर :  
 (क) इन्द्रसिं देउरी  
 (ख) बलाइराम सेनापति



## देउरीफोर

आसाम आरो सान्जा ओन्सोलनि मंगलयड हारिनि सुबुंफोरनि मादाव देउरीफोरा मख'जाथाव सुबुंफोलेर। मंगलयड फोलेरनि सिडाव थानाय देउरीफोरा सा-सानजाथिनिफ्राय आसामाव हाबफैयो आरो बुरलुंबुथुरनि जौयेन बाहागो आथिखालनि अरुणाचल प्रदेशनि ल'हित जिलानि सिडाव थानाय जैदाम हाजोनि खाथि-खाला थानो लायो।

देउरीफोरा समाजारि बादियै मोनब्रै माहारियाव रानजानाय-डिबडीया, टेडापनीया, बरगजा आरो पाटगजा। डिबां दैमानि सेराव थानायफोरा डिबंगीया, टेडापानी दैमानि सेराव थानायफोरा बरगजा आरो पाट-शदियाव थानायफोरा पाटगजा होननानै मिथिजायो।

शदिया ओन्सोलावनो देउरीफोरा गोबां बोसोर थानानै जिउ खांदोमोन आरो बेयावनो बिसोरनि सोदोमस्रिया जाखांदो। समनिफारियाव जानो हागौ मिथिंगायारि जाथाय, गेजेरफोलेरारि दावहा-बिग्रायनाय एबा हासार गोनां हा नागिरनानै बे दाबसे जायगाखौ नागारनानै दैमानि गेजेरजो फैनानै बै समनि बोखावजायि शिवसागर जिलानि माजुली आरो लक्षिमपुर जिलानि डिब्रंग दैमानि सेराव गिबियाव थानो लाजेनो आरो बेनि उनाव गुबुन गुबुन जायगासिम गोसारनो हमो। देउरीफोरा आथिखालाव खर'सा आसामनि गं 8 जिला-तिनिचुकीया, डिब्रुगड, शिवसागर, ज'रहाट, माजुली, धेमाजी, लक्षिमपुर आरो बिश्वनाथ जिलायाव दं। देउरीफोरा गावसोरखौनो "जिम'चैणाया" होननानै सिनायथि होयो। देउरीफोरा मोनसे गाव आखुथाइजो आबुं थागुबै सुबुंफोलेर। भारतनि संबिजिदा बिसोरखौ S.C. (Schedule Caste) जनजाति महरै गनायथि होदो।

### राव :

देउरी रावा गुबैयै चीन-भारतारि राव फोलेरनि तिबर्बत बार्मायारि राव नखरनि बर' दालाइनि सिडाव। बे रावहा गाव आखुथाइ माखासे दं। 2005 मायथाइनि 28 जानुवारी खालारखालि आसाम सरकारआ देउरी रावखौ सरकारी राव महरै गनायथि होदो आरो गुदि थाखोआव मोनसे राव आयदा महरै थिसननायनि थांखि लायो।

**दोहोरोम :**

देउरीफोरा इसोरखौ फोथायग्रा मानसि। बिसोर 'कुन्दि' दोहोरोम (धर्म) खौ फोथायो। 'कुन्दिमामा'या जादों बिसोरनि सिबिजाथाव मोदाइ। 'कुन्दि'नि ओंथिया जादों सिबिजाथाव हौवा इसोर आरो 'मामा'नि ओंथिया जादों मिथिंगा। बे कुन्दिमामायानो बिश्व ब्रह्माण्ड (मुलुगमा)खौ सोरजिदों आरो खांग्रा-बाग्रा होननानै बिसोर फोथायो।

देउरीफोरा सरासनम्रायै बुंनो थांब्ला आबाद मावना जाग्रा सुबुं। बिसोरनि जिउ आरो थांना थानाय राहाया आबादनि सायावनो गोबां बिबाडै सोनारो। माइ, सबाइ, बेसर, फाथो आरो बायदि रोखोमनि मैगं-थाइंगं आबाद मावनाया बिसोरनि गाहाइ आबाद। थानो थाखाय सरासनम्रा देउरीफोरा दैमा सेरनि जायगाखौ सायख'ना लायो। देउरीफोरा सिगांनिफ्रायनो दंफां, औवा, राइदों आरो थुरिजों बैसां न' लुनानै थाबोदों।

**फोरबो :**

आसामनि गाहाइ मोनथाम हारिमायारि फोरबो-रंजालि बैसागु (बिहु), मागो आरो काति बिहुखौ देउरीफोराबो फालियो। बेनि अनगायैबो बिसोरनि आलादा गावनि हारिमायारि फोरबो जेरै-आबादजों सोमोन्दो गोनां फोरबो-हाबा बयु गिबा मेच्चु (उदां बोथोरखौ बरायनाय) बैसागो फोरबो-चिगादागारेबा बिचु, 'बिचु दाबेबा मेच्चु', 'मिदि देरुवा मेच्चु' (राज केबां) दोहोरोमजों सरजाबनाय शावननि फुजा आरो बायदि बायदि।

देउरीफोरनि गेजेराव असमीया माहारियारि जिवाव बिहोमा होना अरायनि गोसोखाजांथाव जाना थानाय गेदेमा सुबुंफोरनि सोमोन्दै गाहायाव सुंदयै सावरायनाय जाबाय।

**सुबुं दैदेनग्रा भीमबर देउरी :**

गेदेर आसामनि दुइसिन अस्थाइयाव थानानै आसामनि गेदेर सार्थ रैखानि थाखाय नाजाथाबना जिउखौ जुरिजेननाय सुबुडानो जादों भीमबर देउरी। खरसा आसामनि खना मोनसेयाव जोनोम लाना बोखावजायि आसामनि मोनसे खर'निफ्राय गुबुन मोनसे खर'सिम गिदिंथिना गासै सुबुं माहारिनि गेजेराव गावखौ बाउसोमना आसामनि हारिमायारि खौसेथि गायसंनो भीमबर देउरीया नाजाथाबदोंमोन। सुबुंफोलेरनि गेजेराव सासे जानानै गासै सुबुंफोलेरनि राजखान्थियारि आरो समाजारियै गायसंनो थाखाय सान-हर खामानि मावनानै भीमबर देउरीया सुबुं दैदेनगिरि जायो। बिथानि दैदेनथिनि सिमाया सुबुंफोलेरनि गेजेरावल' सिमनागोथे जाना थायाखिसै। भीमबरनि दैदेननायाव आसामाव फारफ्रोम दावगानाया जाफुंनायसै। बे

गुनखौ आसामनि गिबि गाहाइ मन्थ्रि ल'कप्रिय ग'पीनाथ बरदलैया नुनानै आसामनि स्वार्थनि थाखाय भीमबर देउरीखौ “जननेता” (सुबुं दैदेनग्रा) बिमुं होदोंमोन।

1903 मायथाइनि मे दाननि 16 खालार आरो असमीयानि जेठ दाननि 3 खालार कृष्ण चतुर्दशी खालि भीमबर देउरीया जोनोम जायो। बिथानि बिफानि मुडा गदराम (गदरा) देउरी आरो बिमानि मुडा बाजती देउरी (बाजं देउरी)मोन।

बिथानि जोनोमा शिवसागर जिलानि पानिदिहिं ओन्सोलनि बरगयाँ देउरी गामियाव जादोंमोन। (आथिखालाव बै गामिया बुरलुंबुथुर बिखायाव (गेजेराव)) उनाव राजाबारी गामियाव थाजोरै थायो। बिफानि सिगांनि गामिया शदियायावमोन होन्ना खोनानो मोनो।

1908 मायथाइयाव 57 नं बरगाव गुदि फरायसालियाव सोलोंथाइ जिउवा जागायजेनो। 1913 मायथाइयाव गुदि फरायसालिनि जोबथा आन्जादखौ शिवसागर महकुमानि मादावनो सेथि जायगा लाना उथ्रियो। 1918 मायथाइयाव सरकारी एम.भि. फरायसालिनिफ्राय जर'खायै साबसिन हामसिन (Special Distinction) एम.भि. खौ उथ्रिनानै दानसेयाव 4 राडै बृत्ति मोनो। 1925 मायथाइयाव शिवसागर सरकारी हाइस्कूलनिफ्राय एन्ट्रेन्स आन्जादाव मोनबा आयदायाव लेटार नम्बर लानानै उथ्रियो।

1925 मायथाइनि 14 जुलाइयाव कटन कलेजाव मुं थिसनो। कटन कलेजनिफ्राय 1927 मायथाइयाव सेथि थाखोआव आइ.ए. आन्जादखौ उथ्रियो आरो रंखान्थि बिफानाव मेजर (major) लानानै कटन कलेजाव बि.ए. फरायो। 1929 मायथाइयाव कटन कलेजनिफ्राय रंखान्थि आयदायाव नैथि जायगा लानानै बि.ए. आन्जादखौ उथ्रिसारो। 1931 मायथाइयाव कलिकतानिफ्राय आयेन (law) आन्जादखौ उथ्रिनानै बि.एल. जायो। एखे समावनो प्रेचिडेन्सि कलेजाव एम.ए. थाखोखौ फरायदोंमोन। रंनि आंखालाव गोग्लैनानै आन्जाद होआबालानो साख्रि मावनो गोसो जानानै आसामाव गिदिंबोफिनो। 1932 मायथाइयाव आसाम सिभिल सार्भिस (APAC) आन्जादखौ उथ्रियो आरो ए.डि.सि, मासियाव थिसनथाइ मोनो। नाथाय सरकारआ बिथानि खामानियाव हेफाजाब होवाखैसै। बेयावनो भीमबर देउरीया गोसो बायनानै साख्रि मावलिया होनना समाय लायो आरो उदाडै उकिल हाबा मावनो लायो। उकिल हाबाया भीमबर देउरीनि राइजोआरि हाबा मावनायाव गोसो दुंखांहोयो।

1932 मायथाइयाव डिब्रुगड़ कर्टआव उकिल हाबा मावजेनो। 1933 मायथाइयाव भीमबर देउरीया गोहो लानानै देउरी, स'न'वाल कछारी, मटक, मिछिं, बर', तिवा, राभा आरि सुबुंफोलेरखौ खौसे खालामनाय थांखियै 17-04-1933 खालारखालि नगाव जिलानि रहायाव आसामनि हायेन ओन्सोलनि सुबुंफोलेरनि सेथि जथुम्मा खुंनानै Assam Backward Plains Tribal League सुंद'यै ट्राइबेल लीग जोनोम होयो। बे जथुम्मायाव भीमबर देउरीया आफादाव मोदोम दुंखांनानै बिबुंथि लाखियो। भीमबर देउरीनि बानबुंथाइ गोनां बिबुंथिनि थार बाथ्राखौ बुजि मोननानै आसामनि गासै सुबुंफोलेरनि

जानानै खामानि मावनायनि बिबानखौ बिथाडानो लानो हागोन होनना जनजाति राइजोफोरा फोथायो। बेनिनो फिथाइबादियै भीमबर देउरीया बयनिबो मदद मोननानै गाहाइ नेहाथारि सायख'जायो। बे मासियाव जिथाम बोसोर लेनश्रियै 1946 मायथाइसिम दंमोन। 1935 मायथाइयाव भीमबर देउरीनि दैदेननायाव ट्राइबेल लीगनि दाबि दैखांनायाव आसाम बिधान सभानि गासै 108 मासिनि गेजेराव मोन 4 मासिखौ हायेननि जनजातिफोरनि थाखाय थिखानाय जायो।

1938 मायथाइयाव भीमबर देउरीखौ डिब्रुगड़ जायगायारि मण्डलनि सासे सायख'जानाय सोद्रोमा महरै राज्यो बेंगिरिया थिसनथाइ होयो। 1939 मायथाइयाव ट्राइबेल लीगनि एम.एल.ए. फोरनि खावलायनायाव आरो राज्यो कंग्रेछ हान्जानि गनायथियाव आसामनि राज्यो बेंगिरिया भीमबर देउरीखौ गोजौ परिषद थामहिनबा आसाम बिधान परिषदनि सोद्रोमा मासियाव सायख'जानाय सोद्रोमा महरै थिसनो।

1940 मायथाइनि 18 फेब्रुवारीयाव मन्थ्रि रूपनाथ ब्रह्मनि फिसाजो कमलावती ब्रह्मजों भीमबर देउरीया ब्रह्म दोहोरोमनि नेम बादियै क'क्राझारनि बाशबारी गामियाव हाबा जायो। 1945 मायथाइनि नबेम्बर दानाव शिलंआव बे सुबुंफोलेरफोरनि थान्दैफोरजों जनाय जथुमायाव "आसाम ट्राइबस एण्ड रेछेच फेडारेसन"नि जोनोम जायो। बेनि गाहाइ गुदि हमजेनग्राया भीमबर देउरीमोन। 1946 मायथायाव गोजौ परिषदनि सोद्रोमानि मावसमा जोबनायाव राज्यो बेंगिरिया फिन बिथांखौ सोद्रोमा (M. L. C) महरै नैथि खेबनि थाखाय सायख'यो। 1946 मायथाइयाव चर्दार पेटेलनि बिथोन बादियै फारियै भीमबर देउरीखौ हाग्रा आरो खामानि (Forest and Labour) बिफाननि मन्थ्रि महरै ग'पीनाथ बरदलैनि कंग्रेछ मन्थ्रि आफादनि सोद्रोमा खालामो। 1947 मायथाइयाव भीमबर देउरीया भाइचरय लर्ड अवाडेलखौ लोगो हमना समष्टि दानाय, पाकिस्तानाजों आसामखौ सरजाबनाय, आलादा जथाइ बिसायख'थि आरि आयदायाव ट्राइबेल लीगनि रोखा बिबुंथिखौ मिथिहोदोंमोन आरो आसामखौ माब्लाबाबो पाकिस्तानजों लोगोसे सरजाबनो होनाय जानाय नडा होनना रोखायै फोरमायथिदोंमोन। 1933 मायथाइनिफ्राय 1946 मायथाइसिम भीमबर देउरीया जनजाती सुबुंफोलेरनि थाखायल' नडा आसाम आरो आसामनि सुबुं माहारिनि सार्थनि थाखाय जौगानाय हाबायाव गावखौ बाउसोमदोंमोन।

हादराव गुबुनारि हाबफैनायखौ होबथानाय, मिथिंगायारि सम्पद सरैखा खालामनाय, उन गोग्लैसोनाय हारि-माहारिनि थाखाय मासि लाखिनायनि रहा, मिरुनिफ्राय राज्योफोराव गोबां गोहो रानसारना होनाय, जारखुंथाइ गोहो, बिधान परिषद दानाय, गासैबो सुबुं फोलेरनि गेजेराव रांखान्थियारि समानथि दानाय बायदि खान्थि दिहुननानै गावनि रोंग'थिखौ दिन्थिनायनि गेजेरजों राजखान्थियारि, समाजारि जिउखौ दैदेनदोंमोन।

बिथाडा 1947 मायथाइनि 30 नबेम्बरखालि 44 बोसोर बैसोआव रुंसारि जायो। थैनाय समाव बिथाडा

बिसि कमलावती देउरी, फिसाज्ला फारियै पीताम्बर देउरी, पृथीबर देउरी, मन्दिबर देउरी आरो फिसाजो भारती देउरीखौ नागारना थाडो।

### राधाकान्त देउरी :

रुंसारि राधाकान्त देउरीनि जोनोमा 1931 मायथाइनि जुन दाननि 1 खालारखालि लक्षिमपुर जिलानि बाहगड़ा देउरी गामियाव जादोंमोन। बिथानि बिफानि मुडा आदिचन देउरी आरो बिमानि मुडा ताइबा देउरी मोन। बिमा-बिफानि नायल'-जाल' सासेल' फिसाज्ला राधाकान्त देउरीहा साथाम बिब' बिनानाव दंमोन। गामिनि उदां आबहावायाव थानानै गेदेर गोलाउ जानाय देउरीनि नखरनि हाल-साला बारा मोजां नडामोनब्लाबो बिथाडा लेखा फरायनायाव जोबोर गोसो गुदुंमोन। बिफानि आंखालखौ मिथिखा-हसिखा फरायसालियाव मुं थिसनालासिनो गाव लोगो आरो गुबुन मानसिनिफ्राय बिना लाबोनानै बिजाब, फार्ला बुथुमनानै गामिनि 11 नं मरनै गुदि फरायसालियाव 1942 मायथाइयाव सोल्लोथाइ जिउखौ जुरिजेनो। बेबादिनो बिथाडा आंखालनि गेजेरजों फरायनानै मेट्रिक आन्जादखौ उथ्रिनानै ज 'रहाटनि जे. बि. कलेजाव मुं थिसननानै कलेजनि फरायनायखौ जागायो आरो 1958 मायथाइयाव बि. ए. डिग्रीखौ लायो। 1959 मायथाइयाव शिवसागर सरकारी गोजौसिन फरायसालियाव आखान्थि फोरोंगिरि महरै थिसनथाइ मोनो। बिथाडा ज 'रहाटआव फैनानै बि. टि. खौ पास खालामो आरो 1985 मायथाइयाव बिथाडा शदियानि चपाख'वा सरकारी गोजौसिन फरायसालियाव लोगो फोरोंगिरि महरै मावनो खाबु मोनो। बेयावबो बारा गोबाव सान मावालासिनो 1986 मायथाइयाव एखे मासियावनो लक्षिमपुर सरकारी गोजौसिन फरायसालियाव साखि मावनानै फोरोंगिरि जिउखौ थिराडै सामलायनो हमो।

सुबुंमाहारि आरो असमीया राव थुनलाइयाव देउरिनि बिहोमाया जोबनो गैया। बिथाडा सासे देउरी राव हारिमुनि बिजिरसंग्रा पण्डितमोन। गुबुन गुबुन खौरां बिलाइ, लाइसि आरियाव बिथानि लिबिदांफोरा सेरखाय-बेरखाय जानानै दं। देउरी रावनि गेजेरजों असमीया राव थुनलाइयाव गोबां बिहोमा होलांनाय देउरीनि बेसेन गोसा बिजाबफोरा जादों-देउरी च्चुबिब' (देउरी राव बिहुं), च्चिबा जिमचाया च्चुबिब' (गोदान देउरी सोदोब बाखि) बे गांनैयानो गाहाइ, बेनिनो नैथि बिजाबा थाम रावारि (देउरी, असमीया, इंग्रजी)। बेयो आबुं देउरी रावनि राव बिहुं। "देउरी सोदोब बाखि" (देउरी शब्द सम्भार) आ बिथानि मख'जाथाव सुजुनाय बिजाब।

### समाज सिबियारि आरो राजखान्थिगिरि बर्गराम देउरी :

लक्षिमपुर जिलानि बिहपुरीया मौजानि उन गोगलैसोनाय बाहगड़ा देउरी गामिनि थागिरि बर्गराम देउरीया 1938 मायथाइनि 1 आगष्ट खालारखालि जोनोम जायो। 1944 मायथाइयाव बाहगड़ा देउरी एल. पि. स्कुलाव सोल्लोथाइ लानानै 1959 मायथाइयाव लक्षिमपुर गोजौ फरायसालिनिफ्राय मेट्रिक आन्जादखौ सेथि थाखोआव



उश्रियो । उनाव बर्गराम देउरीया ज'रहाट जगन्नाथ बरुवा कलेजनिफ्राय बि. एस. चि. उश्रिखानानै गुवाहाटी मुलुग सोल्लोसालियाव लाइफां बिगियान आयदायाव मुं थिसनो आरो एखे समावनो गुवाहाटी मुलुग सोल्लोसालिनि आयेन कलेजावबो फरायो । बिथाडा एम. एच. चि. आरो एल. एल. बि. खौ एखे समावनो मोजाडै मोजां उश्रिनानै उनाव पान्जाब मुलुग सोल्लोसालियाव ह'मिअपेथिक सोल्लोथाइ लानो थाडो आरो बेयावबो बिथाडा मोजाडै मोजां स'नानि मेडेल लाना डिग्री लायो ।

बर्गराम देउरीया गुवाहाटी मुलुग सोल्लोसालियाव फरायबाय थानाय समावनो कामरूप एकाडेमी फरायसालियाव फोरेंगिरि हाबा मावदोमोन । 1971 मायथाइयाव लक्षिमपुर बारआव थाफानानै उकिल हाबा मावना जिउखौ जुरिजेनो । बै समाव मणिपुर कलेजाव बिबुंगोरा महरै हाबदोमोनब्लाबो बैयाव गोसो जयिनि थाखाय गिदिबोफिनो आरो लक्षिमपुरावनो उकिल मावफिनो । बोखावजायि लक्षिमपुर जिलानि धेमाजि चिरिपानी देउरी गामियाव 1971 मायथाइयाव खुंजानाय देउरी सन्मिलननि आफादाव बिथांखौ आफादगिरि महरै सायख 'यो ।

1978 मायथाइयाव बंगालमरा गामि पन्सायतनिफ्राय काउन्सिलर महरै बिसायख 'जायो । 1983 मायथाइयाव आसाम बिधान सभासिम बिहपुरीया समष्टिनिफ्राय बिथाडा गिबि खेबनि थाखाय बिसायख 'जाना एम. एल. ए. जायो । 1991 मायथाइयाव बिहपुरीया समष्टिनिफ्राय आसाम बिधान सभासिम बिसायख 'जानानै आसाम सरकारनि हायेन जनजाति आरो गुबुन गुबुन गोगलैसोनाय थाखोनि जौगाथाइ बिफाननि अनगायैबो रेचम आरो आखाइजों दानाय-लुनाय आरो सि दानाय बिफाननि केबिनेट मन्थि महरै हाबा मावो ।

बर्गराम देउरीया मन्थि जाना थानाय समावनो आसामनि ट्राइबेलफोरनि थाखाय ट्राइबेल रेष्ट हाउस (जिराय सालि) आरो आकाशी हस्पेल आरिखौ लुयो । बिथाडा मन्थि जाना थानाय समाव बाहगड़ा देउरी गामिनि मिनि हस्पिटल आरो भेटेनेरी हस्पिटल गनैखौ लुनाय जायो । देउरी रावखौ राव महरै गनायथि होनाय आरो देउरी रावफोलेरनि राजखान्थियारि आरो रांखान्थियारि जौगानायनि थाखाय देउरी गावखुंथाइ गुथुम(देउरी स्वायत्व शासित परिषद) होनायाव बर्गराम देउरीनि बिहोमाया मख 'जाथावमोन । नाथाय बिथाडा 2004 मायथाइयाव हरखाब बिखानि बेरामाव गुवाहाटीयाव थैयो । भीमबर देउरीनि उनाव बर्गराम देउरीया सुबुंफोलेरनि नैथि राजखान्थिगिरि आरो आसाम सरकारनि मन्थिमोन ।

### समाज सिबियारि श्रीचन्द्र सिं देउरी :

श्रीचन्द्र सिं देउरीया गेलेग्रा, सुबुं आरिमुगिरि आरो लिरगिरि । बिथांहा देउरी सुबुंफोलेरनि गेजेराव मोनसे जुनिया सिनायथि दं । बिथाडा 1927 मायथाइनि 28 एप्रिलखालि जोनोम मोनदोमोन । बिथांनि बिफानि मुडा ग'पाल देउरी आरो बिमानि मुडा आतबानि देउरीमोन । बिथाडा उन्दै समाव उपर देउरी एल. पि. स्कुलनिफ्राय

गुदि सोल्लोथाइखौ लाखांनानै ज'रहाट सरकारी गोजौ फरायसालियाव सोल्लोथाइ लादोमोनब्लाबो बिथाडा ज'रहाट पलितेकनिक हाइस्कुलनिफ्राय 1949 मायथाइयाव मेट्रिक आन्जादखौ मोजाडै मोजां उश्रिनो हायो। उनाव बिथाडा 1962 मायथाइयाव आरिमु आयदायाव मुं थिसननानै चिलं कलेजनिफ्राय आइ. ए. आन्जादखौ उश्रियो।

1955 मायथाइनि 1 अक्ट'बर खालारखालि भारत सरकारनि सिडाव S.C. आरो S.T. बिफाननि थामथि थाखोनि साखि मावग्रा महरै हाबो आरो 1988 मायथाइनि 31 मार्च खालार खालि अफिसार महरै साखिनिफ्राय आजिरा लायो। 1959 मायथाइनि दिल्लीयाव खुंनाय सुबुं खुंथाइ सानाव बिथानि दैदेननायाव देउरी सुबुं मेथाइ (खुगा मेथाइ) आरो सुबुं मोसानाय दिन्थिनायनि अनगायैबो 1959 मायथाइनिफ्राय 1975 मायथाइसिम गुवाहाटी रेडिअ' सेन्टराव सुबुं मेथाइ रोजाबो। लिरगिरि महरै बिथाडा 1903 मायथाइनिफ्राय लेनश्रियै- (1) आराव (1903), (2) आर्चिय इबा (2014), (3) आमिरिया इबा (2013), (4) बिचु (2015), (5) हिचरि (2016), (6) देउरी जनजीवन (2016) आरि बिजाबखौ गावनि नाजानायाव सेबखांन दिहुनो।

### सोंथि

1. देउरीफोरनि गोजाम श्रागा जायगाया बबेयावमोन?
2. देउरीफोरा समाजारियै मोनबेसे बाहागोआव बोखावजानाय आरो मा मा मख'।
3. शदियानिफ्राय हाबखनफैनानै देउरीफोरा गिबियाव आसामनि बबे बबे जिलायाव थादोमोन? आथिखालाव आसामनि गंबेसे जिलायाव बिसोर दं?
4. देउरीफोरा गावसोरखौनो मा होनना सिनायथि होयो?
5. देउरी रावा तिब्तबर्मी रावफोलेरनि बबे राव नखराव सरजाबनाय? बबे मायथाइयाव देउरी रावखौ आसाम सरकारआ सरकारी राव महरै गनायथि होदोमोन?
6. देउरीफोरा फालिबोनाय मोनब्रै फोबोनि मुं मख'।
7. देउरीफोरा मा दोहोरोमखौ फोथायो?
8. लिरसुंथाइ लिर :
 

(क) भीमबर देउरी	(ख) राधाकान्त देउरी
(ग) बर्गराम देउरी	(घ) श्री चन्द्र सिं देउरी।



## नेपाली रावारि ग 'खाँफोर

### जागायजेननाय :

नेपाली रावारि सुबुं होनना बुडोब्ला आर्य-मंगल-किरातनि गलायमोनदेर सुबुंसाफोरखौ मिथियो। बोहैथि बुब्लियाव भारतनि 'नेपाली रावारि' सुबुंखौ 'ग'खाँ' मुडैबो मिथिनाय जायो। सोरबा सोरबा पण्डितनि बादिब्ला नेपालीफोरनि बांसिनानो 'खच' निफ्राय सोमजिनाय। 'खच' हारिनि सोमोन्दै पण्डित कलहननि 'राजतरंगिनी' आरो जयचन्द्र बिद्यालंकारनि 'भारतीय इतिहास की मिमांशा' बिजाबआव गोबां खारि मोननाय जायो। बिद्यालंकारआ मोनसे समाव आथिखालनि काश्मीरनिफ्राय नेपालसिम हिमालय हालामाव 'खच' फोरनि थाथाइ दंमोन होनना बुंदों।

2011 सुबुं सानखोनि खारिबादि आसामनि नेपाली रावारि सुबुंनि अन्जिमाया 5,96,210 सा। नाथाय खारियाव जुदायै दिन्थिनाय तामां (2063 सा), लिम्बु (780 सा) आरो राइ (1110 सा) गासिबो ग'खाँ माहारिनि सुबुं। बे बायदिब्ला बे सुबुंहान्जानि गासै सुबुं अन्जिमाया 6,00,163 सा। फोरमायथिनांगौ बाश्राया जाबाय सुबुंसानखोनि समाव बे सुबुं हान्जानि गोबाडानो असमीया रावखौनो बिमा राव होनना थिसनहोयो।

### आसामाव थानायनि जारिमिन :

गोजाम बिजाब, जारिमिन आरो सुबुंहान्जानि फुजा फोरबो आरो हारिमुवारि खामानिफोरनिफ्राय ग'खाँफोरदि आसामनि गोजाम थागिरि बेनि गोबां फोरमान मोननाय जायो।

बा रोजा बोसोरसो सिगांनिफ्रायनो (ख्री:पु: 3139) थामहिनबा महाभारतनि समनिफ्रायनो आसाम आरो नेपालनि गेजेराव गावजोंगाव सोमोन्दै आरो थांलाय फैलाय दड'मोन। अब्ला बे गासै हालामा 'जम्बुदीप' एबा 'आर्यवर्त' मुडै मुंदांखामोन। आसामनि नेपाली रावारि सुबुंफोर बोसोरारि बिफानि सारादुआव फिन्ददान होयोब्ला मोनथोरजों लोगोसे गावनि थंखौ मुंख'नानै 'जम्बुदीपआव, आर्यवर्तआव, भारतबर्षआव, आसाम फारसे' होनना बुडो।

गोजाम दोहोरोम बिजाबनि बादिब्ला कामाख्या मन्दिरनि लुफुंगिरि आरो प्रागज्य 'तिषपुरनि राजा नरका आथिखालनि नेपालनि सुनसरी जिलानि बराह मुनि जायगायाव जोनोम मोनदोंमोन आरो बियो कामाख्या मन्दिरआव फुजा खालामहोनो नेपालनिफ्राय फुजारि लाबोदोंमोन। उनाव बिसोरो कामाख्या मन्दिराव 'लालम'हरीया पाण्डा' महरै मुदांखा जायो।

असम साहित्य सभानि बारग' आफादगिरि तीर्थनाथ शर्मानि बादिब्ला जिबा जौथाइयाव श्रीमन्त शंकरदेबनि सोलोंसा नेपाली ब्राह्मण रतिकान्त उपाध्यायआ आथिखालनि तियक आरो नगावआव नेपाली सत्र गायसंदोंमोन। समनि दाहाराव उपाध्यायनि फिसा-फिसौआ असमीया समाजजों गोरोबलानानै सिगांनि सिनायथिखौ खोमानायनि थाखाय सुबुं बिगियानगिरिफोरा दिनै बिसोरखौ नागिरनानै मोना।

बे समाव बृटिछ आरो नेपालनि गेजेराव 1815-16 मायथाइयाव जानाय सुगौली गोरोबथानि बादियैब्ला, नेपालनि नोगोरारिजों भारतनि साहानि नेपालनि गोबां हा-बाहागोआ भारतजों गोरोबलाडो। सुगौली गोरोबथानि उनाव बृटिछआ ग'र्खा रेजिमेन्ट (अब्ला ग'र्खा राइफलस) दादोंमोन आरो माखासे रेजिमेन्टखौ मान सान्थिखौ होखारहरनो आसामाव लाबोदोंमोन। आसामनिफ्राय मानसान्थिखौ होखारहरनायनि उनाव इयाण्डाबु गोरोबथा (1826) जायो।

### आसामनि समाज जिउआव ग'र्खाफोर :

ग'र्खा सान्थिफोरा आजिरा मोनखानायनि उनाव आसामावनो थानो लायो। हाग्रा-बंग्राजों बुंफबनाय आसामाव जिगुजौ जौथाइयावनो थाव दारिमिन, खैलाखनि, रेल लामानि खामानि मावनो बृटिछ साहा भारत आरो नेपालनिफ्राय रादाय खानानै गोबां 'गिरमिटे' नेपालीफोरखौ लाबोदोंमोन आरो बिसोरो गिदिंनानै थांफिनाब्लानो भारतनि उदांसि दावहानि बाहागोगिरि जादोंमोन। छबिलाल उपाध्याय, दलबीर सिं ल'हार, बिष्णुलाल उपाध्याय, भक्त बाहादुर प्रधान, प्रसाद सिं सुब्बा मोननि दैदेननायाव नेपाली रावारिफोराबो उदांसि दावहायाव बारसोमदोंमोन, जेल जानांदोंमोन। नैजि जौथाइनि ब्रै जिथाइसिम आसामाव नेपाली रावारिफोरा गावनि हारिनि गौथुम दायाखैमोन। बेनिनो जायगानि सामाजारि आरो राजखान्थियारि गौथुमजों बिसोर लोब्बा दडमोन। अम्बिकागिरि राय चौधुरीनि हांखायनायाव उदांसिनि उननि सुबुं सानखोआव गोबां नेपाली रावारिफोरा बिसोरनि बिमारावखौ असमीया होनना लिरदोंमोन।

ग'पीनाथ बरदलैया गिबिमन्थि जाना थानाय समाव 1947 मायथाइयाव दाजानाय 'ट्राइबेल बेल्ट आरो ब्लक' आव नेपाली रावारिफोरखौ गुबुन गुबुन हारि बादि 'संरैखाथि' थाखोनि जायगा मोनदोंमोन।

असमीया रावनि सोमावसारनाय, बिजोंनि सोमावसारनाय आरो आसाम सोमावसारनाय गासैयावबो नेपाली रावारि सुबुंफोरा मदद खालामबोदों। आसाम सोमावसारनाय समाव बे सुबुंहान्जानि साद' सुबुं मुंख्लं जायो।

आसामनि राव सोल्लोथाइनि बिथिडावबो ग'र्खा सुबुं-हान्जानि बिहोमथाया मुंख 'जाथाव। आथिखालाव बिसोर गावनि बिमाराव बिजोनि सोलायै असमीया बिजोखौ बजबना लाबाय आरो गावनि रावखौ मोनसे आयदा महरै फरायनायनि थिरांथा लादों। असमीया बिजोनि गिबि थाखोनि फरायसालिनिफ्राय मुलुग सोल्लोसालि गायसननायसिम ग'र्खाफोरा बाहागो लानाय नुनो मोनो।

आसामनि थुनलाइ, हारिमु आरो गेलेनाय मुलुगआवबो बे सुबुं हान्जानि थोजासे बिहोमा दड'।

राजखान्थियारि आरो खुंथायारि बिथिंआवबो ग'र्खाफोरा उन गोगलैनानै थायाखै। आसामनिफ्राय गोबां ग'र्खा सुबुं संसदसिम बिसायख'हरजादों आसामनि गोबां मन्थ्री आफादाव नेपाली रावारि सुबुंथान्दैया जायगा मोनदों, असम बिधान सभानि बुंथिगिरि आरो केबिनेट थाखोनि मन्थ्रिबो जानो हादों। खुंथायारि सिबिथाइनि (Administrative Service) गासै थाखोनि साखियाव बे सुबुंहान्जानि मानसिखौ थिसनजानाय नुनो मोनो।

### रंजाथाइ फोरबो :

ग'र्खा सुबुंहान्जानि मानसिफोरा बोसोरनाडै गुबुन गुबुन रंजाथाइ फोरबो फालियो। आइजोफोरा फालिनाय 'तीज', फोलेरारि सोमोन्दो गोरा खालामनाय फोरबो 'बड़ा दशै' आरो बिदा-बिनानाव अनलायनायनि फोरबो 'तिहार' आरि फोरबोफोरानो मखजाथाव। ग'र्खाफोरनि 'चेलरुटि' आरो 'पक्कु' लागायनाय बेदर आ दिनै बयनिबो गोबां अनसायनाय मोनदों।

आसामनि ग'र्खा सुबुंहान्जानि सानैसो मुंख 'जाथाव सुबुंफोरनि सोमोन्दै गाहायाव सावरायनाय जाबाय :

### छबिलाल उपाध्याय :

1882 मायथाइनि 12 मे खालि आथिखालनि बिश्वनाथ जिला बुढी गाडआव जोनोम जानाय काशीनाथ उपाध्यायनि फिसाला छबिलाल उपाध्यायनि फसंथानारि सोल्लोथाइया गेजेर खलबावनो थाबथाहैयो। नाथाय बिथाडा बायह्ना सोल्लोथाइनि बोलोजों आरो चन्द्रनाथ शर्मा, घनश्याम बरुवा, लकनायक अमियकुमार दास मोननि गोहोमाव भारतनि उदांसि दावहायाव बारसोमदोंमोन। बै समाव बृटिछ सरकारा काजिरडानि खाथि खाला थानाय ग'र्खा आरो मिसिं सुबुंनि मोसौ मैसोनि बाथोनखौ होख्रांहरनो थियारि खालामो। छबिलाल उपाध्यायआ 1919 मायथाइयाव तेजपुराव गायसंजानाय 'असम एछ'चियेचन'नि जथुम्मायाव बे होख्रांनायनि बेरेखायै बिथांखि दैखाडो आरो बिथांखिया नाजावजायो। 'असम एछ'चियेचन'जों लोब्बा गोनां 'छबिलाल बाबु'नि आफाद खुंनायाव 1921 मायथाइनि 18 एप्रिलखालि जरहाटाव जानाय जथुम्मायाव 'आसाम एछ'सियेसन'खौ आसाम प्रदेश कंग्रेछ कमिटि होनना मुं सोलायनाय जायो। छबिलाल बाबुआ आसाम प्रदेश कंग्रेछ कमिटिनि गिबि आफादगिरि

महरै बिसायख'हरजायो। कंग्रेछआव मदद होनायनि थाखाय उपाध्यायखौ बृटिछआ एरेष्ट खालामो। बेनिखायनो बिथाडा 1921 मायथाइयाव बम्बेयाव (दासान्दि मुम्बाइ) खुंजानाय दुलाराय भारतारी कंग्रेछ जथुम्मायाव थानो हायाखिसै। 1921 मायथाइयाव महात्मा गान्धीया आसामाव फैदोंमोन। गान्धी फैनायनि सिगां सिगां बृटिछआ आसामनि कंग्रेछनि दैदेनगिरिफोरखौ उदांसि दावहानिफ्राय आनज्रायना लाबोनो बायदि लुबैथि होदोंमोन। छबिलालनोबो मौजादार, काउन्सिलार, बरलाट, गावबुरा आरि लुबैथि बिबान जासिदोंमोन। बिथाडा बे गासैबोखौ नेवसिनानै गान्धीनि दैदेननायाव सोलिनाय हेफाजाब होयै सोमावसारनायाव भलन्टियार महरै बारसोमदोंमोन आरो द'दान फाटकसालियाव थानांदोंमोन। जोबथेसालिनिफ्राय ओंखारबोनानै बिथाडा गुबुन हादरारि मुवा जोगारनाय हाबाफारियाव मदद होफायो आरो गिबियावनो गावनि न'याव थानाय गुबुन हादरारि मुवाफोरखौ अर सावनानै सेव हांगार खालामो। बिथाडा जायगानिनो गाव हादरारि फरायसालि गायसननायाव बाहागो लायो। 1942 मायथाइयाव महात्मा गान्धीनि दैदेननायाव सोलिनाय भारत नागार सोमावसारनायनिफ्राय बिथांखौ आनज्रायना लाखिनो बृटिछआ फिन लुबैथि जासियो। नाथाय उपाध्याया बे गासैखौबो नेवसियो आरो आसामखौ 'चि' गुपआव सोखननाय सोलोखौ गोखों हेंथा होयो आरो बिथांनि दैदेननायाव 'अखिल भारतीय ग'र्खा लिग'नि हांख्रायनायाव तेजपुराव 30 रोजा नेपाली रावारि सुबुंखौ खौसे खालामना जिन्नानि बे बिथांखनि बेरेखायै गोहो दिन्थियो।

### दलबीर सिं ल'हार :

दलबीर सिं ल'हारनि जोनोमा 1915 मायथाइनि 26 जानुवारियाव डिब्रुगड़ खलिहामारियाव जादोंमोन। बिथांनि बिफानि मुडा अनन्तराम ल'हार। 15 बोसोर बैसोयावनो ल'हारआ हरिमायारि सोमावसारनायाव भलन्टियार हान्जायाव बाहागो लायो आरो 1930 मायथाइयाव कराचीयाव जथुमनाय अखिल भारतारि कंग्रेछ कमिटिनि जथुम्मायाव आसामनि जानानै दैदेनो। ल'हारआ 1930 मायथाइयाव अनागारि कानिंहाम सार्कुलारनि बेरेखा खालामना दान मोनथाम जोबथेसालियाव थानाडो। गिनोरोडै आरो उदांसि मोजां मोनग्रा ल'हारआ बृटिछनि सुबुंबेरेखा खान्थिनि बेरेखा खालामना फिन 1931-32 मायथाइयाव द'दान जोबसालियाव थानांगौ जायो। दांथावै एबा हारि बासिनाय खान्थिखौ फोजोबस्रानो बिथाडा गोखों बाहागो लादोंमोन आरो मावमिन हान्जा दानायाव बाहागो लादोंमोन। बिथाडा मावदांसा सोमावसारनायनि दैदेनगिरिमोन आरो ट्रेड इउनियन दानायाव गावखौनो गोसो होथाबदोंमोन। बिथाडा नैथि मुलुग दावहायाव भारतखौ लोब्बा लाफानाय खामानियाव हेंथा होनायनि थाखाय ननिफ्राय जायखारना थानो गोनां जादोंमोन आरो खालि गवालपारा जिलायावल' थानो गनायथि होनाय जादोंमोन। मोनसे समाव लहारआ गवालपारानिफ्राय स्रोदयै थाइलिर बिफानि दिडाजों बुरलुंबुथुरनि बिखाजों दावबायनानै न' मोनफैदोंमोन। न' मोनफैनानै बिथाडा फिन उदांसि सोमावसारनायाव बारसोमदोंमोन आरो जोबथेसालियाव थानो

गोनां जादोंमोन। 42 नि सुबुं सोमावसारनायाव बारसोमनो फरायसाफोरखौ खौसे खालामनाय दायाव बृटिछआ बिथांखौ फिन एरेष्ट खालामो। 1946 मायथाइयाव दलबीर सिं ल'हारआ मावदांसा आरो गोग्लैसोनाय थाखोनि दैदेनगिरि महरै तिनिचुकीया हालामनिफ्राय बिधान सभासिम बिसायख'हरजायो। दलबीर सिं ल'हारआनो जाबाय आसामनि नेपाली रावारि गिबि एम. एल. ए.। बिथाडा 1953-55 मायथाइसिम शदिया कंग्रेछ कमिटिनि आफादगिरिबो जादोंमोन। 29 जुलाइ 1969 मायथाइआव बिथाडा रुंसारि जालाडो।

### हरिप्रसाद ग'र्खा राइ :

नागालेण्डनि राजथावनि कहिमायाव धनराज राइ आरो यश'दा राइनि फिसा महरै 1915 मायथाइनि 15 मार्चआव जोनोम मोननाय हरिप्रसाद राइआ उनाव गावखौनो हरिप्रसाद ग'र्खा राइ महरै सिनायथि होदोंमोन। आबाहन मुगानि मुख'जाथाव लिरगिरि महरै सिनायजानाय ग'र्खा राइआ धनबाहादुर स'नार आरो ग'बिन्द चन्द्र पैराजों लोगो नांना थुनलाइ सोरजिनायाव गोसो होयो। बै त्रिमुर्तिया असमीया बिजोंजों सोलोंथाइ लादोंमोन आरो असमीया राव-थुनलाइ सोरजिनायाव मुखुब जादोंमोन। असम साहित्य सभानि गिबि आफादगिरि पद्मनाथ ग'हाइबरुवानि गोहोम गोग्लैनानै थुनलाइ मुलुगाव आगान खोख्लैनाय ग'र्खा राइआ धनबाहादुर स'नार आरो ग'बिन्द चन्द्र पैरानि मददआव असम साहित्य सभानि कहिमा दालाइ आफाद दायो। उदां नडि भारताव हारिमायारि सांग्रांथि आरो जांग्रिखांनाय लाबोनो थाखाय थुनलाइ सोरजिनायखौ बिजों महरै लानाय सुबुंफोरनि गेजेराव ग'र्खा राइयाबो सासे। सावरायगिरि ग'बिन्द प्रसाद अधिकारीनि बादिब्ला ग'र्खा राइआ 1935 मायथाइयाव असमीया रावनि राजखान्थियारि रायथाइ लिरदोंमोन। नाथाय बृटिछनि नोजोराव गोग्लैनायनि गिनायजों बे रायथाइखौ बिथाडा- Psychological Fiction होनना मुंख'दोंमोन। असमीया आरो नेपाली मोननैबो रावाव थुनलाइ सोरजिग्रा ग'र्खा राइआ थार ओंथियाव खौसेथि आरो गोरोबज्जलायनायनि नेरसोनमोन। बिथांनि सल'फोराव हाजोआरि जनजाति आरो अजनजातिफोरनि सुबुंजिउनि गोरोबलायनायनि सावगारि बेरखांनाय नुनो मोनो।

गमामायै हरिप्रसाद राइनि मुंजों 'ग'र्खा' सोदोब दाजाबनायनि आन्दोनि सुबुंआ मुंदांखा थुनलाइगिरि मित्रदेव महन्त। फोरोंगिरि महरै जिउ खांनो जुरिजेननाय ग'र्खा राइआ उनावहालागै आकाशबानीआव सिबिथाइ होना नेपाली आरो असमीया थुनलाइखौ सिबिलांदों।

राइआ गोबां रावबिहुं रनसायदोंमोन। जैरै-

(क) मिकिर सब्दक'ष (1974-76)

(ख) माराम सब्दक'ष (1974-76)

(ग) पुमेइताड-खुल सब्दक'ष (1974-76)

(घ) मेइरिड सव्दक'ष (1974-76)

(ङ) असमीया सव्दक'ष (1974-76)

(च) नेपाली सव्दक'ष (1974-76)

बेनि अनगायैबो नेपाली रावाव सोर्जिलांनाय बिथानि बिजाबफोरा जाबाय :

(1) बाबरी (खन्थाइ बिदां, 1974)

(2) मनचरिक' ब'ली (खन्थाइ बिदां, 1977)

(3) यहा बदनाम हुन्स (सल' बिदां, 1974) आरि

### सौंथि

1. नेपाली एबा ग'र्खा सुबुंहान्जानि सुबुंफोरा मा मा सुबुंहान्जानि सुबुंनि गलायमोन्देर?
2. 'लाल म'हरीया पाण्डा' होनना बुडोब्ला मा मिथियो?
3. असम प्रदेश कंग्रेछ कमिटिनि गिबि आफादगिरिनि मुडा मामोन?
4. ट्राइबेल बेल्ट एण्ड ब्लकआव नेपाली रावारि सुबुंफोरा माब्ला सरैखाथि थाखो जायगा मोनदोंमोन?
5. रतिकान्त उपाध्याया सोरमोन आरो बिथाडा बबे बबेयाव सत्र गायसनलांदोंमोन?
6. ग'र्खा माहारीनि सुबुंफोरा फालिनाय गाहाइ रंजाथाइ फोरबोफोरा मा मा?
7. 'जम्बुदीपाव, आर्जवर्तआव, भारतबर्षआव, आसाम फारसे' होननाय बाश्रानि गोनांथिया मा?
8. सुगौली गोरबथाया माब्ला जादोंमोन आरो बे गोरबथा बादि मा हादोरनि हा-बाहागोआ आरो सुबुंहान्जाया भारतनि सिडाव हाबफैदोंमोन?
9. लिरसुंथाइ लिर :
 

(क) छबिलाल उपाध्याय	(ख) हरिप्रसाद ग'र्खा राइ
(ग) दलबीर सिं ल'हार	





## बर'फोर

बर'फोरा जाबाय गावनि गोख्रों समाजारि रहा, राव-थुनलाइ, दोहोरोम आरो गेरेमसा हरिमु थानाय मोनसे माहारि। बर'फोरा सा-सानजा भारतनि गोजाम सुबुंहान्जा। सार एडवार्ड गेइटनि बादिब्ला आसाम आरो सा-सोनाब बंगआव बर'फोरनि गुवार राज्यो दड'मोन। (History of Assam, Chapter X. page 248)

बुनो थाडोब्ला बड' (बर') सोदोबा गुवार ओंथियाव समानहान्जानि गुबुन गुबुन सुबुनि ज'थाइ। बिसोरखौ सा-सानजा बंग, ग'वालपारा जिलायाव 'मेच' आरो नेपालाव 'मेचे' महरै मिथिनाय जायो। बर'फोरखौ आसामनि गुबुन गुबुन जायगायाव गोसारनानै थानाय नुनो मोनो। बिदिनो बड' रोदानि-स'न'वाल कछरी, टेडाल कछरी, चुतीया, देउरी, लालुं, राभा, गार', हाजं आरो त्रिपुरी सुबुंफोरा लक्षिमपुर, तिनिचुकीया, डिब्रुगड, शिबसागर आरि गुबुन गुबुन जायगायाव रायजो जानाय नुनो मोनो। कार्बि आंलं आरो डिमा हासाव जिलायाव थानाय डिमासा कछरीफोरा गेदेमा बड' हान्जानिनो मोनसे दालाय। आसामनि गुबुन गुबुन जायगायाव रायजो जाना थानाय क'च राजबंशीफोरजों लोगोसे त्रिपुरा आरो बांलादेशाव थानाय कक बरकफोरा बे हान्जानिनो सुबुं होनना जारिमिनाव मोननाय जायो।

सोलोंथाइ-दोहोरोमखान्थि, राव थुनलाइ आरो आरिमु हरिमु बिथिडाव बर'फोरा जोबोर जौगानाय आरो गोगोमसार। बर'फोरखौ गावनि आसार खान्थि फालिनायाव थोजासे गोनांथि होनाय नुनो मोनो। गावनि माहारिनि थामोनथानि थाखाय बिसोरखौ दासान्दि सिगांनिखुइ बांसिन सांग्रां जाना खामानि मावनाय नुनो मोनो।

### बर'फोरनि राव आरो थुनलाइ :

बर'फोरहा गावनि गोख्रों राव दड'। बे रावा भारत संबिजरनि दाइनथि फारियाव गनायजानाय राव। बेयो बर'फोरनि बिमा राव आरो बेखौनो बर'राव होनना बुडो। बर'फोरहा गोजौ मान थाखोनि आरो गोनोखोआरि सोदोब बाख्रि दड'। बर' रावा शदियानिफ्राय सानजा बंगसिम आरो साहा नेपालनिफ्राय बांलादेशसिम गोसारलानाय, सोलिनाय आरो गेवलांसारनाय मोनसे राव। राव बिगियानगिरि प्रम'द चन्द्र

भट्टाचार्यनि बादिब्ला किरात राज्यो खुंनयनि समाव बर' रावा सरकारि आरो बिजिरसालिनि राव महरै सोलियोमोन।

बर' रावा जाबाय चीन तिब्बत बर्मी राव फोलेरनि। पण्डितफोरनि बादिब्ला तिब्बतीय रावनि मोननै गाहाइ रावा जाबाय-

(1) तिब्बत बर्मीय आरो

(2) टाइ-चीन राव

तिब्बत बर्मीय गेदेर रावआ जाबाय बर'-नागा राव। सिगाडाव बर' नागा रावा मोनसे फोलेरनिनो सिडावमोन। उनाव नागाफोरा गावनानै थाडो। बर' रोदानिफ्राय सोमजिनाय रावफोरा जाबाय-डिमासा, गार', राभा, चुटिया, लालुं, हाजं आरो तिवा। बर' रावा आसामनि डिमासा आरो तिवा मेघालयनि गार' आरो त्रिपुरानि ककबरक रावजों खाथि सोमोन्दो दड'।

इं 1963 मायथायाव बर' रावआ गुदि थाखोयाव बिजों महरै गनायथि मोनो आरो 1968 मायथायाव गोजौ फरायसालि थाखोयाव सोखनजायो। बेनि अनगायैबो बर' रावखौ 1977 मायथायाव गुवाहाटी मुलुग सोलोंसालिया भारतारि गोदान राव महरै थिसनो। 1984 मायथाइनिफ्राय बर'रावखौ आसामनि राज्योआरि राव महरै गनायथि होयो। 2005 मायथायनि 17 अक्ट'बर खालाराव बर' रावा भारतनि जौसिन उदां थुनलाइ फसंथान साहित्य अकाडेमीनिफ्राय गनायथि मोनो आरो 2005 मायथाइनि डिसेम्बर दाननि 3 खालाराव केन्द्रीय ल'कसेवा आय'गा बर' रावखौ मोनसे आयदा राव महरै सोखनना लायो। इं 2003 मायथाइयाव भारत सरकार, असम सरकार आरो बर' लिबारेसन टाइगारजों जानाय ब्रिटिसि (बड'लेण्ड टेरिटरियेल काउन्सिल) रादाय बादियै बर' रावआ संबिजिरनि दाइनथि फारियाव सोखनजायो। संबिजिरनि दाइनथि फारियाव सोखनजानायनि उनाव बर' रावा जौगानो थाखाय खाबु मोनो।

दासान्दि बर' रावा गुवाहाटी, बर'लेण्ड, डिब्रुगड़ आरो कटन मुलुग सोलोंसालिनि मोनसे आबुं बिफान महरै जायगा आवग्रिनानै दड'। बड' साहित्य सभाया थानाय 1952 मायथाइनि 16 नबेम्बराव गायसनजानायनिफ्रायनो बर' राव, थुनलाइ आरो हारिमुवारि बिथिडाव गोसारनाय आरो जौगाहोनायनि थाखाय आगु बिबान लाबोदों। बर' रावनि गिबि बिजाबा जाबाय-गंगाचरण कछरीनि बर' फिसा अ'आयेन (1915), चित्तरन्जन मोसाहारीनि फैमाल मिजिंक (1970) आ बर' थुनलाइनि गिबि सुंद' सलनि बिजाब आरो जुजाइनि अर (1972) आ गिबि सल'मा बिजाब। बर' रावाव गुबुन गुबुन खौरां बिलाइ फोसावजाना ओंखारदों। जेरै- बनजार, अरों, रादाब, बड'सा, बर'लेण्ड खौरां, गोदान खौरां, बड'लेण्ड सानसि, बड'लेण्ड इंखं, हायेननि रादाब आरि।

भारत हादरा उदांसि मोननायनि सिगाडाव बृटिछनि खुंथाइ समाव खिष्टान मिछनारी आरो गुबुन गुबुन पण्डितफोरा बर', राव, इराजी आरो असमीया रावाव गोबां बिजाब रनसायलांदों। बै बिजाबफोराव

बर' कछारीफोरनि बागै गुवारै बर्नायनाय दड आरो बर' माहारिखौ जारिमिन मुलुगाव फोथानानै लाखिदों। बर'फोरनि बागै लिरनाय मुंख 'जाथाव बिजाबफोरा जाबाय- An Outline of Kachari Grammar (S. Endle-1884), The Kacharies (S. Endle-1911), A Short Grammar of the Mech or Boro Language (L. C. Skrefshrood-1889) बर' भाषा संग्रह (कैलास चन्द्र चौधुरी-1932), बर' भाषा (बंकिम चन्द्र ग'हाइ-1937), टिप्राइ आरो बर' भाषा (1938)। बेनि अनगायैबो गुबुन गुबुन मुंदांखा आरो गागि लिरिगिरि बिथांमोना बर' राव आरो माहारिनि बागै बिजाब रनसायलांदों। बेफोरनि मादाव मुंख 'जाथाव बिजाबफोरा जाबाय- A Descriptive Analysis of the Bodo Language (ड° प्रम'द चन्द्र भट्टाचार्य-1977), Bodo Relative Terms- A Social Linguistic View there of (प्र: मधुराम बर'-1978) आरि।

### बर'फोरनि दोहोरोम :

बर'फोरनि गोजाम दोहोरोमा जाबाय बाथौ दोहोरोम। बाथौ बोरया बर'फोरनि देरसिन मोदाइ। बर'फोरा हा, बार, दै, अर (सान), अखां। बै मोनबा गोथौ खान्थिनि सोरजिगिरिखौ इसोर महरै मानिना लायो। बिखौनो बाथौ होनना बुंनाय जायो। खेराइया बर'फोरनि दोहोरोमारि फोरबो। समाजनि बइनिबो गाहामनि थाखाय दौदिनि आरो दौरिनि मददाव खेराइ फोरबोखौ खुंनाय जायो। बर'फोरखौ बाथौ दोहोरोमनि अनगायैबो गुबुन गुबुन दोहोरोम जेरै-खृष्ट्यन, अनुकुल, बैष्णव दोहोरोम नाजावनाय नुनो मोनो। बेनि अनगायैबो ब्रह्म दोहोरोमखौबो बर'फोरनि माखासे सुबुडा गावनि दोहोरोम महरै बजबनानै लादों।

### बर'फोरनि हारिमु :

बर' आइजो एबा हिनजावफोरा जि-जोम दानाय-लुनायाव जोबोद आखा-फाखा। बर'फोरनि समाजाव मोनफ्रोमबो न'खराव खमैबो जरासे हिसानसालि नुनो मोनो। बर' आइजोफोरा दखना आर'नाइ, रेगे-रेगां फालि, साद्रि आरि दायो। बर' आइजोफोरा जि-जोमफोराव एरखांनाय आगरफोरा जाबाय-दाउथु आगर, फारेव मेगन, मुफुर आफा, दावराइ मोखेब, थाइगिर बिबार, हाजो आगर आरि। आर'नाइखौ बर'फोरा मान बाउनाय आरो सिबिनायनि नेर्सोन महरै बाहायो।

### मेथाइ रोजाबनाय आरो दामग्रा-देग्रा :

बर'फोरहा गावनि आंगो मोसानाय, मेथाइ रोजाबनाय आरो दामग्रा देग्रा दामजु दड'। गोदोनिफ्रायनो बर'फोरनि गेजेराव थानाय मोसानाय, रोजाबनाय, दामनाय-देनाय रिगुं दामसा महरगिरिफोरनि बागै सावरायनाय खोनानो मोनो। बर'फोरनि गाहाइ मेथाइफोरखौ सिडाव होनाय रोखोमै मोनथाम बाहागोआव बोखावनो हायो-

1. आर'ज मेथाइ
2. खुगा मेथाइ
3. गोदान मेथाइ

आर'ज मेथाइफोरा जाबाय- खेराइ आर'ज, मोनथोर रायसंनाय, देमग्लाइ मेथाइ, बैदासि मेथाइ आरो दाहानि मेथाइ। खुगा मेथाइफोरा जाबाय- बैसागु मेथाइ, हाबा मेथाइ, गथ' बुरखायनाय मेथाइ, बखालि मेथाइ आरि। गोदान मेथाइफोरा जाबाय दासान्दि गोदान देंखोजों रोजाबनाय मेथाइ-फावथिना, सावथुननि मेथाइफोर। बेफोर आयदाया देंखो, खबां आरो आदब खान्थिजों आबुं।

बर' मोसानाया मोननै रोखोमनि- (1) गोजाम मोसानाय आरो (2) गोदान मोसानाय। खेराइ मोसानाय, बैसागु मोसानाय, हाबा जेंलावनि मोसानायफोरा गोजाम बर' मोसानाय। बागुरुमबा, बारदैसिख्ला मोसानाय, दावसि देलाइ मोसानायफोरा खेराइनि आदबै दाजानाय सुबुं मोसानायब्लाबो गोदान मोसानायनि खान्थिजों दाजानाय। बागुरुमबा आरो बारदैसिख्ला मोसानाया भारत हादोरावल' नडा दुलाराय बहुमावनो गोसारनाय मोनसे बर' हारिमायारि मोसानाय। बर'फोरनि गाहाइ दामग्रा-देग्रा दामजुवा जाबाय-खाम, सिफुं, ज'था, सेरजा आरो गंगोना।

### बर' गोरोबथा ( रादाय ) :

गाहाइ मन्थि पि. भि. नरसिंह रावनि दैदेननायाव भारत सरकार मिरु रैखाथि मन्थि शरत पावार बिथानि हेफाजाबाव गोबांखेब सावरायनायनि उनाव दुलाराय बर' फरायसा आफाद (एबसु), बर' गण संग्राम समिति (बि.पि.ए.सि.) आरो आसामनि गिबि मन्थि हितेश्वर शइकीया बिथानि गेजेराव जानाय सावरायनाय बादियै 1993 मायथाइनि 20 फेब्रुवारि अक्ट'आव बड'लेण्ड अट'न'मास काउन्सिल (बि.ए.सि.) दानाय जायो।

बेनि उनाव बर'फोरनि हारिमु, राव, सोलोंथाइ आरो रांखान्थियारि बिथिंआव जौगाहोनो भारत सरकार, असम सरकार आरो बड' लिबारेसन टाइगार्सनि गेजेराव फिन इं 2003 मायथाइनि 10 फेब्रुवारि अक्ट'आव बड'लेण्ड टेरिटोरियल एरियास डिष्ट्रिक्ट मुं होनानै मोनसे गोदान गोरोबथा (रादाय) खालामनाय जायो। बे गोरोबथा बादियै बि. टि. सि. (बड'लेण्ड) हादाबाव गासै गं 3079 गामि सरजाबफाना कक्राझार, सिरां, बागसा आरो उदालगुरि बे गंभ्रै जिला दानानै गावआरि खुंथाइनि राहा खालामनाय जायो।

### हारिमायारि बान्था मोनगिरि अस्ताद कामिनी कुमार नार्जारी :

अस्ताद कामिनी कुमार नार्जारीया जाबाय आरिमु मुलुगनि थरसे अलंबार। मोसानाय महरगिरि अस्ताद कामिनी कुमार नार्जारीया गाव सुफुंथाइ गैयै आरो नारा नाथा नाजानायजों बर' मोसानायखौं रायजोयारि थाखोनिफ्राय हादरारि थाखोसिम लांनायाव थोजासे बिहोमा होदों। बिथाडा 1926 मायथायाव दासान्दि ग'साइगाव महकुमानि सिडाव बिन्याखाटा हालामनि बामोनखुरा गामियाव जोनोम लादोंमोन। बिथानि

बिफानि मुडा बजाराम नार्जारी आरो बिमानि मुडा थांगाली नार्जारीमोन।

इं 1955 मायथाइयाव दिल्लीयाव जानाय अल इण्डिया रेडिअ'नि गोवलां दिन्थिफुं हाबाफारियाव बिथाडा बाहागो लाना हाबाजैलावनि मेथाइ रोजाबदोंमोन। बे हाबाफारिनिफ्राय गिदिंबोफिननानैनो अस्ताद कामिनीया बर' हारिमुनि जौगाथायनि थाखाय गुबुन गुबुन बिथिडाव ख्रामानि मावनो लायो।

1957 मायथाइनि 26 जानुवारी अक्ट'आव दिल्लीयाव खुंजानाय सुबुंदारा सानाव अस्ताद कामिनी कुमार नार्जारीया मोनसे हारिमुवारि हान्जा लानानै बाहागो लाहैयो। बेयाव मोसानाय बादायलायनायाव बर' कृष्टि हान्जाया बागुरुमबा मोसानाय दिन्थिनानै भारतनि मादावनो सेथि जायगा आवग्रिनो हायो।

इं 1992 मायथाइयाव एछिया मेला 13 आव बाहागो लानानै बर' नाछिना मोसानाय दिन्थिफुंनानै नायगिरिफोरनिफ्राय रोजा रोजा साबायखर मोनदोंमोन। इं 1976 मायथाइयाव गुवाहाटीयाव जानाय भारत-छभिथेट मन्थ्रि जथुम्मायाव बर' कृष्टि दिन्थिफुडो। बेनि अनगाथैबो नार्जारीनि हान्जाया इं 1982 मायथाइनि 29 जुलाइ अक्ट'आव गुवाहाटीनि रबीन्द्र भवनाव खुंजानाय जनजाति सुबुं मोसानाय दिन्थिफुंनय हाबाफारियाव कामिनी कुमार नार्जारीनि बर' कृष्टि हान्जाया बाहागो लायो। अस्ताद कामिनी कुमार नार्जारीया 1982 मायथाइनि मार्च दाननि 14 अक्ट'आव हादरारी थाखोनि बान्था "संगीत नाटक एकाडेमी एवार्ड" मोनदोंमोन।

अस्ताद कामिनी कुमार नार्जारीया जाबाय सासे आदर्शगोनां बर' कृष्टिनि गायसंगिरि। बिथानि नाजानायावनो बर' हारिमुवा हादरारि थाखोनि मानखौ आर्जिनो हाबाय। बे गेदेमा महरगिरिया 1998 मायथाइनि 16 मे खालाराव सोरगोयारि जालाडो।

### सुबुंथिनि थान्दै मुंख्लं बिनेश्वर ब्रह्म :

मुंख्लं बिनेश्वर ब्रह्म बिथाडा इं 1949 मायथाइ 28 फेब्रुवारी खालाराव आथिखालनि ककराझार जिलानि भातारमारी गामियाव जोनोम मोनो। बिथानि बिमा बिफानि मुडा फारियै तारामनि ब्रह्म आरो स'नटि ब्रह्म।

बिनेश्वर ब्रह्म बिथानि गुदि सोल्लोंथाइया गावनि गामियावनो 365 नं गुदि फरायसालियाव 1954 मायथाइयाव जुरिजेनो। बेनि उनाव 1959 मायथायाव गुदि सोल्लोंथाइखौ फोजोबनानै ककराझार हायार सेकेण्डारी माल्टिपारपास स्कुलाव 1960 मायथायाव मुं थिसनो। बे फरायसालिनिफ्रायनो एम. इ. खोन्दोआव वृत्ति मोननायजों लोगोसे 1967 मायथायाव पि. इउ. एस. सि. आनजादाव सानखान्थि आयदायाव लेटार नाम्बार लाना सेथि थाखोयाव उथ्रिसारो। बे बोसोरावनो जरहाटनि आसाम एग्रिकालसार कलेजआव आरिमु जालिया डिग्रीयाव मुं थिसनो आरो 1972 मायथाइयाव बै एग्रिकालसार कलेजनिफ्राय बि. एस. सि. एग्रिल डिग्रीबो मोनो।

बिथाडा 1973 मायथाइनि फेब्रुवारी दानाव गिबि खेबनि थाखाय 'हिन्दुस्थान हासार निगम' आरो 'आबाद संजिरारि बिफानाव' साख्रि जिउ जुरिजेनो। बै बिफानावनो बिथाडा गुबुन गुबुन मासियाव

जिरायनानै धुबुरी, ककराझार आरो मंगलदै आरि जायगाफोराव थानानै खामानि मावो। बे बिफानाव 1980 मायथाइसिम थानायनि उनाव आगस्ट दाननिफ्राय भारतीय खाद्य निगम (FCI) बिफानाव Quality Control नि Deputy Manager महरै गुवाहाटीयाव गोदानै थिसनजायो। 1981 मायथाइनिफ्राय 1983 मायथाइसिम बिहारनि राजथावनि पाटनायाव साखि मावहैनांगौ जायो। फिन इ 1983 मायथाइयाव गुवाहाटीसिम Regional Officer महरै गोजौ मासि मोननानै गिदिंबोफिनो। उनाव 1998 मायथाइयाव बै बिफाननिनो Jonal Officer आव Manager (Movement) महरै गोजौसिन मासिसिम प्रम'सन जायो।

मुंख्लं बिनेश्वर ब्रह्मआ सासे गोबौ मेलमबहरा, सोलोगोरों, सानसुमै, समाजसिबियारि, थुनलाइगिरि आरो गहाम गौथुम दागिरिमोन। लोगोसे बिथाडा गोबां रावनि गियाननि बिगुमामोन। बिथाडा 'बर', इंराजी, असमीया, बडाली, हिन्दी, नेपाली, भ'जपुरी आरो राजबंशी गासै मोन 8 रावखौ सलसल बुंनो हायोमोन।

बिथाडा इ 1990 मायथाइनिफ्राय 1993 मायथाइसिम बड' साहित्य सभानि गाहाइ नेहाथारि मासियाव सायख'जायो। फारियै इ 1993-1996 मायथाइयाव लेडाइ आफादगिरि महरै बिबान रुजुननायनि उनाव 1996 मायथाइनिफ्राय 1999 मायथाइसिम आरो बेनि उनाव 1999 मायथाइनिफ्राय 2002 मायथाइसिम मोननै समबुब्लिनि थाखाय बड' साहित्य सभानि आफादगिरिनि मासिखौ समायहोयो। नाथाय जोबोर दुखुनांथाव बाथ्रा दि बिथाडा 2000 मायथाइनि 19 आगष्ट अक्ट'खालि गुवाहाटीनि भेतापारायाव थानाय गावनि न'आवनो सिनायमोनि थिउरियानि आखायाव अबथिरा थैनायखौ बजबना लानो गोनां जायो।

बिथाडा लिस्लांनाय बिजाबफोरा जादों - "आइनि मोदै" (खन्थाइ बिजाब-1985), "बारदै सिखला (खन्थाइ बिजाब-1997) आरो "आंनि गामि भातारमारि" (रायथाइ बिजाब)।

### आरिमु मुलुगनि मुंदाखा महरगिरि श'भा ब्रह्म :

ड° श'भा ब्रह्मआ भारतनि सासे गेदेमा लंथाइगिरि आरो आसामनि आरिमु मुलुगनि लामा दिन्थिगिरि। बिथानि सोरजिथाइफोरा बर' आरो असमीया समाजनि थार सायखंसावगारिखौ रिफिखांहोयो। बै गेदेमा महरगिरि बिथाडा इ 1929 मायथाइनि 18 अक्टबर खालाराव दासान्दि ककराझार जिलानि ग'साइगाव महकुमानि भुमका मुंनि गंसे गोग्लैसोना थानाय गामियाव जोनोम जादोंमोन। बिथानि बिफानि मुडा हरिचरण ब्रह्म आरो बिमानि मुडा देवसि ब्रह्म मोन।

ड° ब्रह्मआ गावनि गामिनि गुदि फरायसालियाव सोलौंथाइ लादोंमोन। बेनि उनाव धुबुरीनि सापटग्राम गोजौ फरायसालिनिफ्राय 1950 मायथाइयाव जारिमिन आयदायाव लेटार लानानै सेथि थाखोयाव उथिसारनानै गुवाहाटी जौमा फरायसालियाव मुं थिसनो। ब्रह्म बिथाडा उन्दैनिफ्रायनो सासे सावगारि महरगिरि आरो लंथाइखुलिनि महरगिरि जानायनि सिमां नुदोंमोन। ललितकला रत्न ड° श'भा ब्रह्म बिथाडा 1950 मायथाइयाव कबिगुरु रबीन्द्र नाथ ठाकुरा गायसंलांनाय कलिकतायाव थानाय शान्ति

निकेतनाव मुं थिसनो आरो 1957 मायथाइयाव देरहासारै आरिमु आयदायाव आरिमु जालिया डिग्री लानानै आसामसिम गिदिंबोफिनो।

बिथाडा आसामाव गिदिंबोफिनानैनो गिबि गिबियावनो तारिणी चरण गोजौ फरायसालियाव फोरोंगिरि हाबा मावो। बिथानि सोर्जिलु जिउनि मोननै थांखि दंमोन। गिबियानो जाबाय आसामाव आरिमु जौमा फरायसालि गायसननाय, नैथिया जाबाय- सा सानजानि गुबुन गुबुन हारि सुबुं हान्जानि कृष्टि आरिमु, सुबुंजिउ फरायसंनानै मोनसे जुनिया आरिमु बोहैदाहार सोमजिहोनाय। बिथाडा गोजौ फरायसालियाव फोरोंगिरिनि खामानि मावदोंब्लाबो दामिन आरिमुखौ गोदान महरै साजायनानै गायसंनो गोसोयाव अरायबो मिजिं थिनानै दोनदोंमोन। निखावरि आरो गोब्राब रंआरि आंखालब्लाबो बिथाडा दामिनारि दाहारनि सोरजिनि आन्थोर जयै नाजानायाव माब्लाबाबो थाद'वाखैमोन। 1964 मायथाइयाव 31 जानुवारी खालाराव दासान्दिनि गभर्णमेन्ट आर्ट एण्ड क्राफ्ट कलेजआव गोरायुं महरै थिसनजायो। बे जौमा फरायसालिखौ सरकारी खालामनायजों लोगोसे कलेज थाखोसिम लांनो थाखाय जेसे हायो नाजादोंमोन। बेनि थाखाय बिथाडा गावनि जिउआव गोबां हेंथा हेंथिजों मोगा मोगि जानांदोंमोन। गेजेर गेजेर गोबां मन्थ्रि एम. एल. ए. मावख 'गोराफोरनि सेराव थांनानै गावनि गोखा मोन्दांथिजों दुखुनां गोसोयै न'मोखां जानो गोनां जादोंमोन। थेवबो बिथानि गोसोया दोरोदाखैमोन। बेनि थाखाय जेबो दुखु गैयामोन। ड° श'भा ब्रह्म बिथाडा जेब्लाबो माबा नडा माबा मोनसे खामानि मावनानै मोजां मोनोमोन। बिथाडा गावनि जिउआव रंजानायखौ नेवसिगारना गोदान जोलैनि थाखाय मेंनोरोडै महरै खामानि मावदोंमोन। गावनि सावगारि मुसुखानि जोहै हारि राव हान्जा सायख'वाब्लानो बइखौबो गोरोबहोनानै हादर आरो गावनि बिमाखौ बुखानो थुलुंगा होदोंमोन। बिथानि मोनफ्रोमबो सावगारिया गांफा गांफा बिजाब बायदि। 1965 मायथाइयाव बिथानि सावगारि आरो लंथाइफोरखौ गिबिखेबनि थाखाय गुवाहाटी जिला बिजाब बाखियाव दिन्थिफुंनय जादोंमोन। बेनि उनाव बिथानि सोरजिफोरखौ शिलं, दिल्ली, कलकाता, मुम्बाइनिफ्राय बुलगेरिया, सेक'स्लभाकिया आरि गुबुन गुबुन हादराव दिन्थिफुंनय जादोंमोन। बिथानि सोरजिथाइया गाव हादरनि लोगोसे गुबुन हादरनि गुबुन गुबुन हालामाव आरिमु अनसाइग्राफोरनि गोसोखौ जै खालामनो हादोंमोन। हादरनि गुबुन गुबुन दोनथुमसालियाव बिथानि सावगारिया जायगा मोनदोंमोन।

सावगारि बोनाय लंथाइ खामानिनि अनगायैबो बिथाडा थुनलाइ सोरजियावबो थोजासे आखाइ दड'मोन। 1989 मायथायाव आर्ट एण्ड क्राफ्ट आरो आरिमु-जौमा फरायसालिनि गोरायुं मासिनिफ्राय आजिरा लानायनि उनाव थुनलाइ रनसायनायाव नांथाबदोंमोन। बिथानि बिजाबफोरा जाबाय शिल्पकलार नव प्रजन्म, भारतीय चित्रकला (रावस्लायनाय), गोदान उजि (बर'), लिउ-नार्ड-दा-भिन्सि, र'जेछ रेज एण्ड ग'ल्ड (इंराजी) आरो खन्थायान्जली (बर' रावस्लायनाय)।

ड° श'भा ब्रह्म बिथांआ गावनि बिहोमानि थाखाय रायजोआरिनिफ्राय हादरारि थाखोसिम बान्था मोननो हादोंमोन। बिथाडा मोननाय बान्थाफोरा जाबाय-आसामनि शिल्पी पेन्सन बान्था (1977), आसाम

सरकारनि हारिमुयारि पेन्सन बान्था (1990), कमल कुमारी बरुवा फाउण्डेसन बान्था (1991), आसाम रायजोयारि बिष्णु राभा बान्था (1996), प्रणव बरुवा शिल्पी बान्था (1996), सदभावना बान्था (2002), इंखं ट्राष्ट कमिटि बान्था (2006), बर'लेण्ड टेरित 'रियेल काउन्सिल एवार्ड फर आर्ट एण्ड कालसार (2006), ललितकला रत्न एवार्ड (2007) बेनि अनगायैबो डिब्रुगड मुलुग सोल्लोसालि आरो कलिकतानि रबीन्द्र भारती बिश्व बिद्यालयनिफ्राय ब्रह्म बिथाडा दि-लिट बिमुं मोनदोमोन।

ड° श'भा ब्रह्म बिथांआ आइजोफोरनि सायाव सोलिनाय उदखारि आरो मानसिया गावनि गावसुफुंथाइखौ सुफुंनो थाखाय मिथिंगाखौ सिलिंखार खालामनायखौ सहायनो हायाखैमोन। बिथाडा बिमा हारिनि गोरबोनि दाहाखौ सावगारिनि जोहै हुखोमोरनायनि बाथ्रा सानदोमोन। भुमकायाव बर' आइजोनि सायाव खालामनाय उदखारिथिनि दुखुनांथाव जाथाया बिथांनि सावगारियाव बेरखांदोमोन। आसामनि मिथिंगानि समायना दैमा-दैसा, अन्थाइ आरो सोमखोर हाजोनि समायना नुथाया बिथांनि गोसोखौ बोदोर खालामोमोन। आरो बेनो बिथांखौ दामिन आरो लंथाइ मुलुगसिम दैदेनलांदोमोन।

सावगारि आरिमु आरो लंथाइख'जो लो गोसे थुनलाइ सोर्जिनायाव गोसो जिउ बाउसोमना बे गेदेमा महरगिरिया इं 2012 मायथाइनि मार्च दाननि 5 खालारखालि सोरगोयारि जायो।

मखजाथाव दि बिथांमोननि अनगायैबो बर'फोरनि जौगानायनि बेलायाव बिहोमा होलांनाय गुरुदेब कालिचरण ब्रह्म आरो उपेन्द्रनाथ ब्रह्ममोननि मुडबो मखजाथाव। कालिचरण ब्रह्मआ बर' समाज फोसाबनायनि गुदि हमगिरिमोन। बिथाडा बर'फोरनि गेजेराव दोहोरोमारि आरो समाजारि गालाय-गुजायखौ नुनानै ब्रह्म दोहोरोमखौ फोसावदोमोन। बर'फा उपेन्द्रनाथ ब्रह्मआ बर'फोरनि गेजेराव सोल्लोथायारि, समाजारि आरो राजखान्थियारि सांग्रांथि लाबोनायाव मखजाथाव बिफाव लादोमोन।

### सोँथि :

1. बर' रावआ मा राव फोलेरनि दालाइ ?
2. बर' रावा माब्ला गुदि सोल्लोथाइनि बिजोँ महरै गनायथि मोनदोमोन ?
3. बर'फोरनि बागै लिरनाय गांनै बिजाबनि मुं लिर।
4. बर' रावनि गिबि बिजाबआ मा मोन ?
5. मोननैसो बर' आगरनि मुं लिर।
6. लिरसुंथाइ लिर :
  - (क) श'भा ब्रह्म
  - (ख) अस्ताद कामिनी कुमार नार्जारी
  - (ग) बिनेश्वर ब्रह्म





## मटकफोर

### सिनायथि

मटकफोरा आसामनि मोनसे गोजाम टाइ मंगलीय सुबुंहान्जा। मटक सोदोबा टाइ रावनि सोदोब। टाइ रावआव म माने गोहोगोरा, सोलोगोरा एबा गियानि आरो 'टक' माने आरजाथाव, ज'खा, फेर, आनजाद नायनाय। थामहिनबा आरजाथाव, गियानि, गोहोगोरा पण्डित। 1228 ख्रीष्टाब्दआव चुकाफाया आसाम मुंनि बे हादाबसिम हाजोलामा बारबोनानै फैनाय समाव गोजाम आसामनि सौमारपीठआव मटकफोरा फिसा फिसा राज्यो दानानै साफा साफा गाहाइनि सिडाव थानो लार्दोमोन। आबादानो बिसोरनि गुबै जिउराहामोन चाउलुं-चुकाफाया स'नाथि आबादनि हादोर आसामाव हाबफैनानै टिपाम हाजोनि खाथिखाला हालामावनो मटकफोरखौ गिबियै लोगो मोनदोमोन। तिपामाव लोगो मोननाय मटकनि गाहाइसानि हेफाजाबाव चुकाफाया नागाफोरखौ फेजेनदोमोन। बे सासे मटक गाहाइसाया राजानो गोबां बिबांनि गाव-दिहुननाय फानथाव लाबोना होफैदोमोन। फानथाव होफैनायनि थाखायनो सर्गदेवजो फैफानाय कांगन (Kang-Gang) बरगाहाइया मटकनि गाहाइनो 'लानमाखु' मुं होदोमोन। "लानामाखु" आ मोनसे टाइ रावनि सोदोब। 'लान' माने फिसौ आरो 'माखु' माने फानथाव थामहिनबा मटक गाहाइखौ 'फानथावनि फिसौ' होनना बुडोमोन।

### मटकनि जोनोमनि जारिमिन :

मटक सोदोबनि जोनोमनि जारिमिनखौ नागिरना थाडोब्ला 'फुखाव' (Phukhao) सोदोबनि जारिमिनखौ नायनांगोन। फुखावा टाइनि मोनसे नागारहायै दालाइ। बे दालाइया टाइ मंगलीय फुथाइ दालाइनि सिडाव। 'फु' माने टाइ रावआव 'बिगुमा' एबा मानगोनां मानसि-आरो 'खाव' माने 'गुफुर'। टाइनि मोनसे गिदिर दालाइया जाबाय फुथाइ। फुथाइफोरखौ चीन हादरनि लाव रायजोयाव थानायनि थाखायनो लाव होननानैबो बुंनाय जायो। फुथाइफोरखौ मोनथाम बाहागोयाव राननाय जादो। बे बाहागोफोरा जाबाय- (क) फुखाव (गुफुर गानग्रा टाइ) (ख) फुडाम एबा टाइ डाम (गोसोम गानग्रा

टाइ) (ग) टाइ डें (गोजा गानग्रा टाइ)। खोला चीन, थाइलेण्ड, भियेटनामनिफ्राय आसामसिम लावफोरा गोसारनानै दड'। आहमनि जारिमिन बादिब्ला फुखावफोरा बेगर फोनाय एबा आबाद फोनाय गुदिनिफ्राय जोनोम जादों। आबाद फोनाय गुदिनि फुखावफोरनिफ्रायनो मटकनि जोनोम जादों। गुबुन मोनसे सोनारथाव खारिनिफ्राय मिथिना मोनोदि सोर्गोराजा इन्द्रआ खुनलुं खुनलाइखौ राज्यो फसंनो थाखाय दैथायहरनायनि समावनो आबादनि बिफा च्यावफुरा आलडा जोनोम जादोंमोन। च्यावफुरा आलंनि सिगांनि मुडा खेनखाम लांकुरिमोन आरो आबादनि बिफा महरै केखावचावथावलुं मुं लादों। बे खेनखाम फोलेरनि दोरोडा जुरिजेनो जोबोर गोजाम युनान आरो हुनान सोदोमस्रिनिफ्राय। बे सोदोमस्रिया ख्रीष्टनि सिगां ब्रै रोजानिफ्राय थामरोजा बोसोर गोजाम। आबादनि बिफा-सुबुं च्यावफुरा आलडनि स्नि फोलेरावनो मटकफोरा जोनोम जादों। टाइ मंगलीय रोदानि मटकफोरा गिबियावनो चीन हादर म्युंफीया जानांगौ युनान हादराव थानो लादोंमोन। सम बाबेननाय लोगो लोगो मटकफोरा लासै लासै सुबुं अन्जिमा बांनायनि थाखायनो जा एबा गुबुन जाहोननि थाखायनो जा आबाद मावनाय हानि गुमुर नागिरनानै आसामथिं दावबोयो। चीन हादरनि युनान हादरसार्थिनिफ्राय थाइलेण्ड, म्यानमार जाना गोजाम आसामाव हाबफैनानै बिसोरो तिपाम हाजोनि खाथिखाला हालामाव दोरेंखौ रैखा खालामना गुदि दोहोरोमखौनो फालिनानै गामियारि आबाद बिथायारि समाज गायसननानै जिथाम जौथाइसिम थानो लादोंमोन। बे मटकखौनो चुकाफाया तिपामाव लोगो मोनदोंमोन आरो 'फुखाव' फोलेरनि होनना सिनाय मोनदोंमोन।

### मटकनि दोरोडारि दोहोरोम :

टाइ मंगलीय सुबुंहान्जा महरै मटकनि दोरोडारि दोहोरोमआ जाबाय ताड। बिसोर मिथिंगा मुलुगनि गाथियाल मोदाइखौ फुजियो। जिब जिबिनि बिगुमा गुबुन गुबुन मोदाइ, रुंसारि जानाय सुबुं, मितुक मोदाइ, मुलुग बिमा आइ, माइनाव आइ आरि गुबुन गुबुन मोदाइखौ फोथायो। उनावहालागै मटकफोरा जिस्नि जौ जौथाइयाव काल संहतिनि सोरजिगिरि गपाल देवनि सोलोंसा अनिरुद्ध देवआ फोसावनाय मायामरा बैष्णव दोहोरोमखौ नाजावदोंमोन। मायामरा दोहोरोमखौ नाजावखांनानयनि उनावबो बिसोरो गलाय मोन्देर महरै गावनि दोरोडारि दोहोरोम फोथायनायफोरखौ हमथाना लाखिदों।

मटकफोरनि सानैसो गेदेमा सुबुंफोरनि सुद' जिउखौरांखौ गाहायाव होनाय जाबाय-

### मटक राजा सर्बानन्द सिंह :

सर्बानन्द सिंहनि बिफानि मुडा मरुतनन्दन आरो बिमानि मुडा पातयमोन। बिमा-बिफानि सासेल 'फिसा सर्बानन्दआ गोरलै समावनो बिमाखौ खोमानो गोनां जादोंमोन। जोबोर सासालग खाथिनानै जाग्रा मरुतनन्दनआ मटकनि बुरुक चुतीया खेल (फोलेरनि) मानसिमोन। सर्बानन्दनि बिफा होनाय

मुडानो 'मेजेरामोन'। बिमा गैजायै मेजेराखौ जेब्लाबो समाव मरुत नन्दना लोगोयाव लानानै बेरायनो गोनां जायोमोन आरो जोबोर जोथोनै खाडै बायै गिदिर गोलाउ खालामदोंमोन। मरुत नन्दनआ खनसे मेजेराखौ बिखुडाव बानानै फुख्रि जावबाय थानायाव राजाया नुनानै बिथांखौ खामानिनिफ्राय आजिरा होदोंमोन। बिफानि खानाय बानायाव लासै लासै मेजेराया देरनानै सेंग्रा जानायसै।

मेजेराया जोबोर दोहोरोमसुलामोन। बिथाडा मायामरा दोहोरोम गुरु अष्टभुज गसाइनि सेराव शरण लादोंमोन। शरण लानाय समाव ग'साइया शरण लाग्राखौ मोनफा मोनफा मुं दोननाया मायामरा बैष्णब दोहोरोमनि मोनसे दोरों। बेनिखायनो मेजेराखौ अष्टभुज ग'हाइया सर्बानन्द मुं होदोंमोन मवामरीया बिग्रायनायनि गाहाइ दैदेनगिरि मटकफोरनि सायाव राजा नखरा अनागारि खालामदोंमोन। बिग्रायनायनि दैदेनगिरिफोरखौ नागिरनानै मोनैनि सासालग दायगैयै मानसिखौनो खानानै जोबथेसालियाव जोबनानै दोनदोंमोन। बे समावनो सर्बानन्दआ मवामरीया बिग्रायनायखौ दैदेनदोंमोन। जोबथेसालिनि सिं आरो बायजोनि गासै मटक सुबुंफोरनि गोसोबोलोखौ बांहोदोंमोन। सर्बानन्दनि दैदेननायाव बिग्रायारि फोरजाया आहमनि राजउलाफारखौ दखल खालामदोंमोन। लोगो लोगो आहम राज्योनि गुबुन हालामाव मवामरीया बिग्रायनायनि माखासे दैदेनगिरिफोर (मोनफा मोनफा) दखरा दखल खालामना गावखौनो उदां राजा होनना बुंन लादोंमोन। सर्बानन्दआ बेंमरायाव राज्यो फाथिनानै गावखौनो राजा होनना मिथिसारहोदोंमोन। सर्बानन्द सिंहआ राजा जाना गिबियावनो आथिखालनि तिनचुकीयानिफ्राय जि किल'मितरफ्राम साहा रडागड़ायाव 1788 ख्रीष्टाब्दआव राजथावनि गायसंदोंमोन आरो 1791 ख्रीष्टाब्दआव बेंमरा थामहिनबा दासान्दिनि तिनचुकीयासिम राजथावनिखौ जायगा सोलायदोंमोन। राजा जानानै सर्बानन्दआ टाइ बोहै लाखिनानै सर्गदेउ बिमुं लादोंमोन। गावनि मुडाव सना आरो खाउरि बानायहोना सोलिहोदोंमोन। बे खावरिफोर थाइसेनि खावसे आरो आधा महीया थामहिनबा थाइसेनि दाइन बाहागोनि मोनसे बाहागो महरैमोन होनना मिथिनो मोननाय जायो।

मटक राज्योनि जौगानायनि थाखाय सर्बानन्द सिंहआ गुबुन गुबुन सुबुंअनसायारि खामानि आखाइयाव लादोंमोन। लामा-सामा बानायनानै हान्था-मेलानि राहाखौ जौगाहोदोंमोन। रडा गड़ा आलि, ग'धा आलि, राजगड़ आलि, हाती आलि आरि आलिखौ खोहोदोंमोन। फोरजानि खाबुनि थाखाय राजथावनिनि सिडाव आरो बायजोआव गासै गनैजिब्रै फुख्रि जावहोदोंमोन। बेफोरनि मादाव बेंमरा फुख्रि, थामख 'नायारि फुख्रि, देवी फुख्रि, शेलुकीया फुख्रि, बर फुख्रि, चाउलख 'वा फुख्रि, ग'धा फुख्रि आरियानो गाहाइ। सर्बानन्दआ जावहोनाय थामखनायारि फुख्रिनि मुं बायदियैनो उनाव बेंमरा नोगोरनि मुडा तिनचुकीया जादोंमोन।

सर्बानन्द सिंहनि राज्यो खुंनयाव फोरजा फिसाफोर गोजोनै रायजो जादोंमोन होनना मिथिनाय जायो। गोनां जानाय हाथियार आइजें आइलाखौ गावनि रायजोयावनो दाना लादोंमोन। सर्बानन्द सिंहआ

इयुन सानगिरि आरो जोबोद सोलो गोनां राजामोन। फोरजाफोरजों सर्बानन्दआ जोबोर मोजां मोनजायोमोन। फोरजा अनसुला बे राजाया नोरजिया जानानै बोसोरनैसो गोग्लैसोना थानानै 1805 मायथाइयाव रुंसारि जालाडो। सर्बानन्दनि थैनाय उनाव बिनि नेवथोन फिसाज्ला मातिबर बरसेनापतिया मटक राज्योनि राजा जादोंमोन।

### सोलोंथाइगिरि पवन नेउग :

पवन नेउगआ 1933 मायथाइनि 18 अक्टबर खालारखालि बरगुरि, तिनिचुकीयायाव जोनोम जायो। बिफानि मुडा आसाम्बर नेउग आरो बिमानि मुडा ग'लापी नेउग। बिमा थैनायनि उनाव बिमादै मुहीला नेउगजों खांजानानै बा बोसोर बैसोआव सोलोंथाइखौ तिनिचुकीया आदर्श गुदि फरायसालियाव जुरिजेनो। गुदि सोलोंथाइखौ फोजोबनानै चेनाइराम हायार सेकेण्डारि फरायसालियाव मुं थिसनो आरो बे फरायसालि निफ्राय 1953 मायथाइयाव मेट्रिक आनजादखौ उथ्रिनो हायो।

गेलेनाय-बादायलायनायाव गोबां गोसो थानाय नेउगआ जरखायै जोलुर (बल) आरो बुलुर (भलिबल) गेलेनायाव फरायसालिनि मादाव सासे मोजां गेलेगिरि महरै मुंदांखा जादोंमोन। बिथाडा मेथाइ रोजाबनो मोजां मोनोमोन आरो जेसेबां हागौ सर'बो खालामदोंमोन। बिथाडा बांबा मेलेमनि थाखाय गासै फोरोंगिरिफोरनि जोबोर अनजालु फरायसा जानो हादोंमोन। मेट्रिक आनजादखौ बारग'नायनि उनाव बिथाडा गोजौ सोलोंथाइनि थाखाय जरहाट जे. बि. कलेजनि आरिमु आयदायाव मुं थिसनो। फरायनायनि अनगायैबो बिथाडा देहाश्री दिन्थिनाय बादायलायनायाव मुंदांखा जायो। Muscle Control बिफानाव बिथाडा रोंग'थि दिन्थिनायनि थाखाय 1955 मायथाइयाव Mr. J. B. बिमुं मोनो। N.C.C. आव हाबनानै गावनि आखा फाखाथिनि थाखाय सासे मोजां दैदेनगिरि महरैबो सिनायथि जादोंमोन। 1956 मायथाइयाव बिथाडा नैथि थाखोयाव आइ. ए. खौ उथ्रिसारनो हायो।

बेनि उनाव आरिमु जालिया फरायनो गुवाहाटी कटन कलेजआव मुं थिसनो। कलेजआव थानायावनो कलेज गेजेरारि बादायलायनायाव बिथांखौ Physique महरै बिसायख'हरदोंमोन आरो बिथांनो Mr. Cottonian बिमुं होनाय जादोंमोन। बै बोसोरवनो थामहिनबा 1957 मायथाइयाव Gymnasium बादायलायनायाव Mr. Guwahati University बिमुं मोननानै बान्था मोनो। 1958 मायथाइयाव बिफाया नोरजिया थानानायनि थाखाय आरिमु जालिया थाखोखौ फोजोबनो हायाखिसै। 1959 मायथाइयाव बिथाडा सेनाइराम हायार सेकेण्डारि फरायसालियाव फोरोंगिरि जायो। 1960 मायथाइयाव बियो फिन आरिमु जालिया आनजाद होयो आरो डिग्री लायो। 1962 मायथाइयाव D.S.P. महरै थिसनथाइ मोनदोंमोनब्लाबो बिथाडा फोरोंनाय खामानिखौ नागारनो हायाखैमोन।

बिथांनि गोसोनि बोलो आरो गोहोया सिमना गैयामोन। गथ' गथाइफोरखौ जोबोर अननायमोन।

जायगानि खैफोद आफोदाव गोग्लैनाय सुबुंफोरखौ बियो मोजां सुबुरुन्थाइ होनानै मदद खालामोमोन।

1992 मायथाइनि 30 सेप्टेम्बरआव बिथाडा साख्रिनिफ्राय आजिरा लायो। बै समाव बिथानि सोलेरा इसे लोरबां जाबोनायनि थाखाय गासै खामानियाव गोसो होना मावनो हायाखैमोनब्लाबो एफा एनैखौ मावनो नागाराखैमोन। 2001 मायथाइयाव बरगुरियाव फसंजानाय Art School आव बिथाडा आगुबिबान लादोंमोन। बे जायगायाव गंसे Montessory खुलिनायनि थाखाय बिथाडा सोलोंथाइगिरिफोरजों सावरायलायदोंमोन। नाथाय गोसोनि मिजिंआ गोसोयावनो थालाडो। 11 आगष्ट 2002 अक्ट'खालि बिथाडा जोबथा हां गारो।

### राजकुमार लंकेश्वर ग'हाइ :

राजकुमार लंकेश्वर ग'हाइआ बै समनि बेंमारा राज्योनि (1788) गायसनगिरि राजा सर्गदेउ सर्बानन्द सिंहनि फिसौमोन। राजा सर्बानन्द सिंहनि साथाम फिसाज्ला माटिबर, कलिबर आरो कमलेश्वर। माटिबरहा भगबर, भगीरथ, दुखीरथ, सुक मोनखौ लानानै गासै साजि फिसाज्ला दड'मोन। भगीरथनि थामथि फिसाज्ला बिशबरनि ग'दाय आरो द'थि फिसाज्लाया राजकुमार लंकेश्वर ग'हाइमोन। लंकेश्वर ग'हाइया 01-05-1954 अक्ट'आव बै समनि लक्षिमपुर जिलानि जिला मावफुंगिरिनि सिगाडाव जारिमिनारि बेंमरा राज्योखौ फिन बोखांफिननो थाखाय होनाय ग'चरनि साक्षीयाव बिथानि जोनोमा 1887 मायथाइयाव तिनिचुकीयायाव जादों होनानां मुंख'नाय दड'। सर्गदेउ सर्बानन्द सिंहआ थैनायनि उनाव राजफोलेरजों लोगोसे बेंमरा राज्योनि गुबुन गुबुन बिबानगिरिफोरा गुबुन गुबुन जायगायाव गोसारनानै थानो लादोंमोन। राजखुंगुर लंकेश्वर ग'हाइआ 10-12 बोसोरसो जानाय समाव नखरैनो चाबुवासिम खारलाडो। राजाफोलेर थानायनि थाखाय जायगानि मुडा उननि समाव राजाबारी मुडै मिथिजायो। बै समाव आबादनि सायाव सोनारनायनि थाखाय राजखुंगुरनि फोलेरखौनो लानानै राजाफोलेरनि माखासे सुबुडा आबाद मावनाय हानि गुमुर संनानै आथिखालनि तिनिचुकीया जिलानि डिराक सिम खारलाडो आरो डिराकआवनो दिदोमै थानो लायो।

राजखुंगुर लंकेश्वर ग'हाइया फसंथानारि गोजौ सोलोंथाइजों गोरों नडामोनब्लाबो साहसगोरा, मिजिसुला आरो सानसुमै सुबुंमोन। बिथाडा समाजखौ दैदेननो हाग्रा थार गुन गोनां सुबुंमोन। राजानि गुबै दैदेनगिरि महरै हादरा उदांसि जानायनि सिगांनिफ्रायनो बेंमरा राज्योखौ फिन बोखांफिननो आरो जुनिया गनायथि मोननायखौ लाखिनो थाखाय सरकारनि सेराव गोख्रों दाबि दैखांदोंमोन। बिथाडा थागिबि सुबुंहान्जानि हानि मोनथाइ, दोहोननि मोनथाइ राजखान्थियारि मोनथाइ आरिखौ रैखाथि होनायनि थाखाय बेंमरा राज्योनि थाखाय जुनिया गनायथिनि मोननो थाखाय दाबि दैखांबोदोंमोन। बिथाडा आथिखालनि अरुनाचल हादरसानि महादेवपुरआव दंफानि मिल खुलिनानै दंफानि फालांगि खालामदोंमोन। दंफानि अनगायैबो स'ना आरो मैदेर फालांगियावबो मुं खामायनो हादोंमोन। राजफोलेरनि थान्दै महरै

इंराज मावख 'गोराफोरजों लोब्बा दड 'मोन। मैदेर हमनाय आरो फोरोंथाइ होनायाव बिथाडा आखा-फाखा मोन। बिथाडा ब्रह्मदेशनि राजाजों लोगो जानानै मैदेर हमोमोन। मणिपुरनि राजानो लोगोनि सिनायथि महरै बिथाडा मानै मैदेर बान्था लादोंमोन। बिथांहा चिकिमजोंबो मोजां सोमोन्दो दड 'मोन। राजखुंगुरआ बार्मिज, मणिपुरी, सिंफौ, खामति, मिसिं, देउरी, नक्टे आरिखौ लाफाना गोबां राव बुंनो रोंगौमोन। बिथाडा फालांगिनि खामानियाव गुबुन गुबुन जायगायाव गिदिंथिडोमोनब्लाबो गावनि थांखिनिफ्राय दोरोदाखैमोन। बिथाडा बे गुवार हालामनि गुबुन गुबुन हारि, सुबुंहान्जानि रायजो आरो गाहेलाफोर आरो राजाफोरजों जोबोर मोजां सोमोन्दो लाखिदोंमोन। बिनिखायनो बिथांमोना राजखुंगुरनि सोमावसारनायाव मदद होदोंमोन। बिथांमोननि मादाव अरुनाचल हादरसानि टंकेश्वर देउरी, खामति राजखुगुर चौखामुन ग'हाइ, बिचा राज्योनि चिंफौ राजखुंगुर जखं आरो गामि बोराइ पिन लंलंदेव मोना बिथांनि सोमावसारनाय हाबाफारियाव बाहागो लानायनि अनगायैबो रांआरि मदद होयोमोन। बिथाडा गावनि राज्योनि अनगायैबो अरुनाचल, मणिपुर, चिकिम, नागालेण्ड, मेघालय आरि हालामनि समाज सिबियारिफोरजों सुबुंहामब्लायारि आरो दाउगालु खामानिजों गावखौनो लोब्बा लाखिदोंमोन।

जोबथा समाव राजखुंगुर लंकेश्वर ग'हाइया नोरजिया जाना एमाव गोलैसोनानै 1973 मायथाइनि 7 मार्चखालि डिस्कनि गावनि थागा न'आवनो जोबथा हां हगारहरो। बै सानखालि जिला मावख 'गोराया जायगायारि बन्द सान फोसावदोंमोन।

### सोंथि :

1. मटक सोदोबनि ओंथि लिर।
2. मटक सोदोबनि जोनोमनि सोमोन्दै लिर।
3. मटकफोरा सरासनम्रायै मा दोहोरोमनि सुबुं?
4. मटकफोरजों म'वामरीया बिग्रायनायनि सोमोन्दै लिर।
5. मटक राज्योनि जौगाथाइनि थाखाय सर्बानन्द सिंहआ मावनाय सुबुंसिबिथायारि खामानि दामानिफोरखौ बर्नायनानै लिर।
6. लिरसुंथाइ लिर :
  - (क) सोलोंथाइगिरि पवन नेउग
  - (ख) राजकुमार लंकेश्वर ग'हाइ
  - (ग) सर्बानन्द सिंह।



## मराणफोर

मराणफोरा आसामनि मोनसे जोबोर गोजाम किरात मंगलीय दालाइनि सुबुंहान्जा। बिसोर आसाम आरो सा-सानजा ओन्सोलनि थागिबि। गुवार गेदेर हिमालय हाजोनि खोलानि आसाम हादर आरो सा-सानजा ओन्सोलनि बे हासारगोनां ओनसोलाव मराणफोरा गोदोनिफ्रायनो थाबोदों। बबेबा मिथिसहायै समनिफ्रायनो बे हा मिथिंगायारि ओन्सोलाव थाबोनाय मराणफोरखौ बेखायनो बे हा-खोन्दोनि आगु जारिमिनारि सुबुंहान्जानि मोनसे थि हान्जा महरै सिनायनाय जादों। आसामनि बै समनि मुंख'जाथाव सुबुं बिष्णु राभाया बिथानि 'असमीया कृष्टि' मुनि बिजाबाव एरैबादि फोरमायदों- "बिथामोननि दिनावनो आसामाव गोख्रै तामा मुगा, फिथलाइ मुगा आरो लहा मुगा जागायजेनदोंमोन।" ड° स्वर्णलता बरुवानि बादिब्ला "ख्रिष्ट जोनोम जानायनि गोबां बोसोर जौथाइनि सिगांनिफ्राय मराणफोरा बुरलुंबुथुर सेरफाडाव थाबोदों।" मराणफोरादि आसामनि गोजाम थागिबि बेनि सोमोन्दै पण्डितफोरा गारांसे (एकमत) बिबुंधि होलांदों। मोनसे समाव बे मराणफोरा दि बुरलुंबुथुर सेरफांजों लोगोसे हिमालयनि खोला हायेन ओन्सोलाव गोसारना दंमोन, बेनि सोमोन्दै मोननैसो जारिमिनारि नेरसोन मोननाय जायो। मुगा सोलायनायजों गुबुन गुबुन गोजाम सुबुंफोलेरफोरनि बादिनो मराणफोराबो नायनानै माखासे सोलायनायजों जोबोर बाडाइ समावनो गोबां बिबाडै तिनिचुकीया जिला डिब्रुगड़ जिला आरो अरुणाचलनि नामचाइ आरो चांलां जिलायाव थानायजों लोगोसे शिवसागर, चराइदेउ, ज'रहाट, धेमाजि आरि जिलाफोरावबो गोबां बिबांनि नखर दं। बेनि अनगायैबो ग'लाघाट, नगाव, शणितपुर, लक्षिमपुर आरि जिलाफोरावबो मराणफोरनि गेसैं नखर नुनो मोनो। मराणफोरनि गोबाडानो बेंखनना लाखिनाय हाग्रानि खाथि-खाला गोथौ ओन्सोलफोराव गामि गायसनना थायो। जोबोर खम सुबुंफोरासो फिसा फिसा जौगामोखां मिरु एबा नोगोर सेरनि जायगायाव थायो।

**मराणफोरनि फोलेरारि सिनायथि :** मराणफोरा गेदेर किरात मंगलीय फोलेरनि मोनसे मख'जाथाव सुबुं हान्जा। सूर्य कुमार भूयाया बिथानि "कछरी बुरन्जीआव" जिनै नखर कछरी दंमोन होनना मख'दों। स'न'वाल कछरीफोरनि सासे लिरगिरि रजनीकान्त हाजरिकानि 'मंग'ल कछरीर तप इतिहास' मुनि बिजाबावबो जिनै नखर कछरीनि खोथा मख'नाय दं। बेनि अनगायैबो खर'सा आसामनि

कछरीफोरनि खुगा सल' बादियैबो कछरीफोरहा मोन जिने फोलेरनि मुं दंमोन। बेफोर जादों- दमचय (डिमाचा), इनटुहजय (ह'जाइ), बिहदय (बर'), जुहल-लुइवा (लालुं एबा दानि तिवा), बादु स'नलय (स'न'वाल), इनटु मिनखय (मराण), दिउनय (देउरी), इनटु-मेचय (मेछ), कुचुबय (क'च), इनटु-गार'य (गार'), राभा किराटय (राभा), बादु हजय (हाजं)। मखजाथाव दि उनाव मोनसे समनिक्राय बे किरात कछरीफोरा जयै गेदेर बर' एबा बर'फोलेर होननानैबो मिथिजानायसै आरो बेनिखायनो आथिखालाव मराणफोरजों लोगोसे गुबुन गुबुनफोरखौबो जयै बर'फोलेरनि मानसि होननानै साननाय जायो। बेनि अनगायैबो बर'फोलेरनि गुबुन गोबां दालाइ दंबावो जेरै- त्रिपुरा, नेपालनि मेछे बाइदि बाइदि।

गोदो गोदायनिक्रायनो मराणफोरनि गेजेराव 'बर'रुची' मुंनि मोनसे बर'दालाइ राव दंमोन। बे रावआ जिदाइन जौथाइनि जोबनायसिम सोलिना दंमोन होनना एडवार्ड गेइट चाहाबा मख'दों। गोदोनि मराण रावनि मोननैसो सोदोबा जादों दि (दै), सिम (संखि), माइ (माइ), माइरुम (माइरं), मियाम (ओंखाम), महन (बेदर), चान (सान), दान (अखाफोर), हाटाइ (हाथरखि), मकुहां (अखा), चैनफं (बिफां), हिंका (सि-जोम), खेर' (खर'), हान (साह), हाटाइ (हाथाइ), हापाटला (आथिं), हिवा (हौवा), हिचि (हिन्जाव), मादाइ (मानगोनां मानसि), तादाइ (सेंग्रा), चेखला (हिन्जावसा)। गोदोनि मराण रावा गोमालांदोंब्लाबो मख'नाय सोदोबफोरजों लोगोसे गोबां बेबादि रावनि सोदोबफोरा मराण गामि समाजाव दिनैसिमबो सोलिना दं। सोदोबफोरा बर', डिमाछ, देउरी आरि रावजों गोरोबनाय दं।

चाउलुं चुकाफा फैनायनि समाव मराणफोरहा गंसे उदां राज्यो दंमोन। राज्योनि सिमाया साहा बुढीदिहिं, खोलाहा दिचां, सानजाहा चाफ्राइ आरो सोनाबहा बुरलुंबुथुर। बै समाव मराणनि राजाया बड'सा एबा बदौसामोन। बदौसानि ओंथिया जादों बर'नि फिसा। बे बदौसायानो मराणफोरनि जारिमिनारि मुगानि जोबथा राजा। बदौसानि सिगां सा दाइन राजाया गुबुन गुबुन समाव आसामनि दाब दाब बाहागोआव राज्यो खुंनायखौ मिथिनो मोनो।

हारिमु बिथिङाव मराणफोरा जोबोद दोहोनिमोन। बिहुआनो मराणफोरनि गाहाइ फोरबो। गोदोनिफ्रायनो मराणफोरा शदियानि केचाइखाती थानजों लोगोसे तिनचुकीया जिलानि माकुमनि यग्य'ख'वा, दउशाल, चराइेदउ आरियाव थानसालि गायसननानै मोदाइ-मोदाइजोनि फुजा होयोमोन। बैसाग दाननि सेथि मंगलबारै मोदाइ-मोदाइजोनि फुजा होना, आरज गाबनानै बिहुखौ बरायदोंमोन आरो मंगलबाराव उरुका, बुधबाराव मोसौबिहु आरो बृहस्पतिबाराव मानसि बिहु महरै स्नि सान स्नि हर बिहु मोसायोमोन आरो बेबादिनो गुबुन गुबुन असमीयाफोरनिखुइ गुबुन गुबुन सान-बारायाव दिनैबो बिसोर बिहु फालियो। जोबोर आंगो देउरीफोरनि बिहुबादिनो मराणफोरनि बिहुखौ 'मराण बिहु' मुडै मिथिनो मोनो। बिफां



सिंनि बिहु, हरनि बिहु, धर्म हुचरि, बरमगा आरियानो मरणफोरनि बिहुखौ समायहोदों। मरणफोरनि ढलनि महर दाथाइ, दामनायनि ताल-लय, बिहु मोसानायनि आव-फाव, मेथाइनि देंखो-खबाम बादि आरिया आखुथाइजों आबुं। गुबुनफारसेथिं मरणफोरनि बाइदि बाइदि हारिमुफोरनि मादाव मख'नो गोनांफोरा जादों कुलाबुढी मोसानाय, जेवजा मोसानाय, रणुवा मोसानाय-मेथाइ, ध्रुतं, लावखार मेथाइ, झुम थिलिनि मेथाइ, मैदेर सोलोंनाय मेथाइ बाइदि बाइदि।

मरणफोरनि गेजेराव गोबां खेल-माहारि दं। बे खेल-माहारि (गियाति) फोरा जिउखुं राहायारि, जायगायारि, गुन दिन्थिग्रा, हारि दिन्थिग्रा, जेरै- तेलपरा तेलेपीया, नाव बानायग्राफोरखौ नावशलीया, चिकरि सानग्रा, काड़ी गया, दह'टीया, डिमौगुरीया, दाउचलीया, पेटुधुवा, हातीमुरीया, रंज'गनीया, रुपाइ सानग्रा, माजुलीनि राइजो, हालाधिबरीया, सौकादरा, खाट'वाल बाइदि बाइदि।

### मरणफोरनि समाज दाथाइ एबा समाज सामलायनाय :

मरणफोरनि गंग्रोमबो गामियाव गामिनिफ्राय सायख'जानाय सासे गावबुढा थायो बिजों लोगोसे गोनांथिखौ नायनानै सानै एबा बेनिखुइ गोबांसिन बरबुढा थायो। बिसोरनि दैदेननायावनो दोहोरोमारि, समाजारि हाबा-हुखा, बिसार खुंनाय खामानिया सामलायजायो। बेबादिनो सेंग्राफोरनि गेजेरावबो सासे हानजागोरा एबा लेडाइ हानजा गोरा थायो। बिसोरनो समाज सामलायनाय हाबायाव बाहागो लायो।

बे मरणफोरनि माहारियारि आबाद मावनायफोरनि मादाव कमलाया मख'जाथाव। बेबादिनो हारिमायारि जुनारा मैदेर आरो हारिमायारि बिफाडा ह'लुं। मरणफोरनि गेजेराव गोबां सुबुडा असमीया माहारियारि जिउवाव गोबां बिथिडाव बिहोमा होनानै गोसोखांथाव जानानै दं। गाहायाव बेनिनो सानैसो सुबुंनि सोमोन्दै सुंदयै फोरमायनाय जाबाय।

### खौसेथिनि लामा दिन्थिगिरि शौर्य बदौसा :

आसामनि गुबुन सासे गोजाम थागिनि किरात-मंगलीया फोलेरनि सिडाव थानाय मरणफोरनि जारिमिनारि मुगानि जोबथा राजाया जादों बदौसा राजा। 1928 ख्रिष्टआव चाउलुं चुकाफाया आसामाव हाबफैनाय समाव बदौसानि सिडाव साहा बुढीदिहिं, खोलाहा दिचां, सानजाहा चफ्राइ आरो सोनाबहा बुरलुंबुथुर दैमानि गेजेर खोन्दोआव गंसे दोहोन-दौलदजों बुंफबनाय मरण राज्यो दंमोन। आथिखालनि शिवसागर जिला आरो डिब्रुगड़ जिलानि बाहागो मोननैसोखौ लाफानानै मरण राज्योनि सिडाव दंमोन। मरण राज्योनि सेरावनो बराही राज्यो दंमोन आरो गुबुन गुबुन ओन्सोलाव चुटीया, कछारी, भुया राज्योनि अनगाथैबो हाजो-हायेननि गासैबो गोजाम फोलेरनि गावबा गाव हाखोन्दो दंमोन। बे गोजाम राज्योफोरनि गेजेराव हारि-सुबुंफोलेरफोरनि गेजेराव खैफोद-आफोद, नांज्लाय-खमज्लाय, दावहा आरि जानायखौ जारिमिनाव मोननो थाडा। बेनिखायनो गासै हा-खोन्दोआवनो हाजार-कौटी गोजाम गोजोन-अनलायनाय

आरो खौसेथिनि आबहावा सोलिदोंमोन होननानै गोरलैयै सानखानो हायो।

कलागुरु बिष्णुप्रसाद राभाया बिथानि 'असमीया कृष्टि' मुनि बिजाबाव बै समनि मरणफोरखौ गोहो गोरा होननानै बुंलांदों। बिथां गेदेमा बिजिरसंगिरिनि बाथ्रायानो बदौसानि गोहोगोरा गोहोमनि खोथाखौ फोरमायदों। बै समनि बेसेबा गोजान आरो हाबनो हायि हाजो-हाजोमासिम मरणफोरनि थाबोनाय खौराडा बेसेबा गुवार ओन्सोलाव आथिखालावबो थाना थाबोनाय बिथिडाव बदौसानि गोहो गोरा बिहोमानिनो इसारा होयो।

चाउलु चुकाफाया बेनिखायनो राज्यो गायसननाय मावथांखिखौ मोखथां महर होनो बेनि मरणफोरखौ गिबियाव लोगो हमदोंमोन। जोबोर आलासि सिबिग्रा बदौसाया चुकाफाजों लोगोसे फैनाय टाइफोरखौ बरायना लादोंमोन। राजा बदौसानि गनायथि आरो सिबिनायाव चुकाफा आरो बिथानि लोगोफोरा बेनि खामानि मावनानै जाग्रा मरण, बराही, चुतीया, कछरी समाजजों गोबां बोसोर गोरोबलायनानै थाना बयनिबो आंगो आरो मावै दाडै जाग्रा समाजनि नागारनो हायि बाहागो जादोंमोन। लोगोआव हिन्जाव लानानै फैयि टाइफोरा बेनि मावै-दाडै जाग्रा सिखलाफोरखौ हाबा खालामना मोजां सोमोन्दो दादोंमोन।

फिसाज्ला गैजायि बदौसाया मोजां लैखोन गोनां, मोजां खान्थिनां जोहोलाव चुकाफानो गावनि फिसाजोखौ हाबा होनाय थांखियै बिहाव-बिजामादै सोमोन्दो खादोंमोन। बेनिखायनो बदौसाया गावनि बोराइ बैसोआव बिजामादै चुकाफानि आखाइयाव मरण राज्योनि खुंथाइनि बिबानखौ होदोंमोन आरो बुजिलायनायनि गेजेरजों बराही राज्योआबो सरजाबजादोंमोन। बदौसा आरो बराही राजा थाकुमथाबनि बोसोन बादियै चुकाफाया मरण-बराहीनि गोथार फुजासालि चराइदेउआव राजथावनि गायसननानै मरण राज्योखौ आह'म राज्यो मुं दोननानै गंसे खौसे गोरोबलायनाय राज्यो जुरिजेनदोंमोन। बेबादिनो चुकाफाया गेदेर आसाम आरो गेदेर असमीया हारिनि बेगर फोयो। नाथाय चुकाफानि बेफोरबादि गेदेमा खामानिनि आन्दोआव थानाय बदौसानि गेदेर बिहोमाया माब्लाबाबो गनायथि मोनाखिसै। बेनिखायनो चाउलुं चुकाफाखौ असमीया हारिनि बिफा होनना बुंनाय बादिनो बदौसाखौ असमीया हारिनि बिफा महर होनना बुंनो हायोब्लासो बिथाडा गायसनना दोनलानाय मुगा जै खालामनाय नेरसोनथिया आसाम आरो सा-सानजा ओन्सोलनि खौसेथिखौ अराय जोरसार खालामना लाखिनायनि लामाया गेवसारगोन।

### जोहोलावजो राधा-रुकुणी :

मुलुग जारिमिननि सुबुं बिग्रायनायफोरनि मादाव गेजेर मुगानि आसाम हादरसायाव जानाय म'वामरीया सुबुं बिग्रायनाया मुंख'थाव। बे सुबुं बिग्रायनायाव आइजो गोहोनि गोगोम बाहागो लानाया मोनसे सोमोनांथाव आयदा महरै सिनायथि मोनदों।

द'जौ बोसोर आह'मनि राज्यो खुंनायनि जोबनायथि उदखारि जानाय सुबुं खुंथाइनि लाजिथाव अन्याय-

बिसार गैयि, गुलाय-गुजाय सहायथाविनि बेरेखायै गासै हरि-हारिसा आरो सरासनस्रा आबादारि फोरजाफोरा बिग्रायनायाव गोख्रोडै बाहागो लानायखौ दैदेनदोंमोन मराणफोरा। बीर राघव मराण आरो नाहरख 'वा मराणनि (शइकीया) सिगांग्रो बिफाव लानायजों समान फोरजाफोरखौ जयै खौसे खालामनो थाखाय गोहो गोरायै बाहागो लादोंमोन नाहरनि फिसाजो सानै भातुकी, भाबुली एबा राधा-रुकुणीया।

मवामरीया बिग्रायनायनि जाहोनाव सोलायनायबो फैदोंमोन बिसोर सानै थानाय समावनो। राजा लक्षी सिंहआ गेदेर धाक बानायनो थाखाय बिफां दाननो हाग्रायाव मानसि दैथायहरदोंमोन। राधा रुकुणीया गामिनि मानसिफोरखौ ज' खालामनानै 'बेयो मावै-दाडै जानाय राइजो राजानि गोदो गोदायनि हाग्रा-बंग्रा, समायना-रमायना मिथिंगायारि सम्पद, बेनि सायाव राजाया मोनथाइ गैया' होननानै राजानि मानसिखौ फिदिंन थिनहरफिनदोंमोन।

गोसो होनो गोनांदि बे सानै जोहोलावजोआ बै मुगानि बहुमाव माब्लाबाबो जाफेरै-नुफेरै मोनसे गोहोगोरा दावहा नांग्रा हान्जा दादोंमोन। गिबियै जेब्ला बिग्रायारि हान्जा आरो राजानि सान्थि हान्जानि गेजेराव मोगा-मोगि दावहा नादोंमोन अब्ला राधा आरो रुकुणीनि गोख्रों गाग्लोबनायाव थावरिनो हायिनि राजानि सान्थिफोरा गाज्रियै जेनदोंमोन। राधा-रुकुणीनि गोहोबोलोनि सायाव पद्मनाथ ग'हाइ बरुवाया बिथानि 'आसामनि जारिमिन'याव मख'दों एरैबादि- "बै दावहायाव राधा आरो रुकुणीया हौवानि खसाब गाननानै बोरला थिर लानानै दावहा नादोंमोन। बे हिन्जाव सानैया जोबोर सोलो गोरामोन आरो दावहानि सोलो आदब खायदाखौ रेंनायनि थाखाय बिसोरनि मोदोमाव रावबो बोरला थिर एबा अन्थाइनि गुलि फोनांनो हायामोन।" बेनि अनगायैबो बे सानै दैदेनगिरिनि जोबरोडै गोहो बोलोनि बेफोरबादि सैथो बाथ्राया जारिमिननि बिलाइयाव सरजाबजानानै दं। बिग्राइयारि हान्जाया रंपुरखौ दखल खालामनानै रमाकान्तखौ राजा फाथिनायनि समावबो बे सानैया बोसोनगिरि महरै नुजाफैदोंमोन।

उननि समाव राजा खान्थिनि खैसारिनि बोलि जाना सानैबो थैनादोंमोनब्लाबो राजा नखरनि जारिमिना नाजासेयावबो बिथामोननि देरहासारनायखौ खोबथेना लाखिनो हायाखिसै। बेनिखायनो रावनिबो गेजेन जानो रोडै मानसिनि गोहो बोलोआ बे सानै गेदेमा आइजोआ जारिमिनाव मुगानि उनाव मुगा थैनो रोडै जाना थागोन आरो दिनैनि गेदेर आइजो समाजनि सहस सायखं आरो थुलुंगानि फुंखा जानानै थागोन।

### बीर सान्थिगाहाइ झपरा जगधा :

झपरा जगधाया जिथि जौथाइनि मराण सुबुं हान्जानि सासे बीर जोहोलावमोन। बिथानि बिफानि मुडा दारबिमोन। जिथाम जौथाइयावनो आसामाव चावलुं चुकाफाया फैनानै मराण, बराही, कछरी बादि हरिफोरखौ लाफानानै गेदेर आह'म राज्यो खुंदोंमोन। जिबा जौथाइनि उनसमसिम मराणफोरबादि गोबां सुबुं हान्जाफोरा गुदुं हाग्रामा गेजेराव थानानै जिउ खांदोंमोन। बिथामोना हान्जा दैदेनगिरि एबा

गामि गोरानि सामलायनायाव समाज दानानै थादोंमोन। बेफोरबादि सासे हान्जा गोरया जादों खावखाइ। गोजाम सौमार खोन्दोनि मोनसे गुवार ओन्सोला बिथानि दैदेननायाव मख'जाथाव बिफाव लादोंमोन। मख'नो गोनांदि मरणफोरा आह'म राज्यो आरो असमीया हारि गायसननायाव गाहाइ बिफाव लादोंमोन। बेनिखायनो बिथांमोना आह'म राज्यो खुंथाइनो खाजोना होनाडामोन। खावखाइ आरो दारस्निहा सा द' फिसाज्ला-खादुन, किचिम, फेफेला, हुइलाव, जगधा, खाखाइ आरो चिकचौ। जगधाया बाथि फिसाज्लामोन। बिथाडा बयनिखुइबो बोलोगोरा आरो गोहो गोनांसिनमोन। उन्दै समावनो बिथाडा दैज्जां बोथोराव डिब्रु दैमा बारलानानै हाग्रामानिफ्राय मैदेर हमना लाबोनो हागौमोन। गुबुन सा जि गथ'निखुइ जगधाया गोहो, बोलो गोरसिन आरो साननाय हनाया जोबोर सिगांसिननायमोन। लोगोजों खेला गेलेनाय, दाउ मैहुर खालामनाय आरियाव जगधाया बिदाफोरनिखुइ आगानसे दावगासिननाय। बेनिखायनो बयबो बिथांनो गाहाइ जायगा होदोंमोन। लासै लासै गेदेर जाबोनाय लोगो लोगो बियो बिहु हान्जानि गोबां हान्जानि, सेंग्रा-सिख्लाफोरनि हान्जा दैदेनगिरि जानायसै। बै समाव बिथांमोना शदियानि केचाइखाती थानसालिनिफ्राय बुधबारखालि मोसौ बिहु खुंनानै बिहु (बैसागुखौ बरायो) खौ बरायदोंमोन।

बै समाव गुबुन ट्राइबेल (सुबुं हान्जा) फोरजों अजायै दावहा, नांज्लाय-खमज्लाय सोलिबाय थायोमोन। खावखाइनि फिसाज्ला जगधानि दैदेननायाव मोनसे गेदेर दावहा नांग्रा सान्थि हान्जा दानाय जादोंमोन। जगधानि देहानि दाथाइया गुबुनफोरनिखुइ आलादासिनमोन। बिथाडा दानगासेयावनो बिफां फांसेखौ खोख्लैनो हायोमोन। जगधानो बयबो सान्थि गाहाइनि बिबान होदोंमोन। गोरोंनिफ्राय दावहा नांनयनि सोलोखौ सोलोंना लानानै सान्थिफोरखौ फोरेंथाइ होनानै आखा-फाखा खालामदोंमोन। गुबुन गुबुन समाव बिथानि सान्थि हान्जाया गुबुन गुबुन हारि-हारिसाफोरखौ गाज्रियै फेजेननानै खेबनैजि जेनहोदोंमोन। गुबुन गुबुन मरणफोरनि गाहाइ ओन्सोलाव उदखार खालामनाय हाजोआरि हारि-हारिसाफोरखौ होखारनो जगधानि सान्थि हान्जाखौ खावलायनाय जादोंमोन। जगधानि खर'आ गोबां गेदेर आरो खानाया जायफ्रा जानायनि थाखाय मानसिफ्रा बिखौ झपरा होननानैबो बुडोमोन। उनाव बिथांखौ बयबो झपरा जगधा होननानै बुंदोंमोन।

खेबसे खामतिफोरा मरण गामिखौ फारसेनिफ्राय गाग्लोबदोंमोन। सान्थि गाहाइ झपरा जगधाया सानस्नि दउचाडाव सुथुरफोरखौ दबथायनो थाखाय केचाइखाइतिनो फुजा होदोंमोन। बिथाडा थुंग्रि (मरण रावआव हानचाइ) दिहुनना मोसा मोसा दावहाथिलिसिम सिगांलांदोंमोन। बे दावहायाव आबुं महराव सुथुरफोरखौ सान्थि गाहाइ झपरा जगधाया फोजोबस्रानानै हाजोआव होखांहरदोंमोन।

बेफोरबादि गोबां दावहायाव झपरा जगधाया गावनि हारिखौ रैखा खालामना हारिनि बीर महरै सिनायजादोंमोन। दिनैबो मरण समाजाव बिथानि मुडा थैनो रोडि जानानै दं।

## मराणफोरनि सिबिजाथाव जोहोलाव म'हन शइकीया :

मराणफोरनि हान्जाफोरनि गोदान मुगानि आगानसुरजेननाय सुबुंफोरनि मादाव रुंसारि मह'न शइकीयाबो सासेमोन। गोदो आसामनि गोहोगोरा सुबुंफोलेरब्लाबो गुबुन गुबुन जारिमिनारि जाथायाव गोग्लैनानै आथिखालाव जोबोर जेंना आरो फारफ्रोमथिंबो दावगानो हायि मराण समाजनि गिबिसिन सानैसो लेखा गोरोंफोरनि मादाव शइकीयानि मुडा मुंख'थाव।

1930 मायथाइनि 22 नबेम्बर खालारखालि तिनचुकीया जिलानि तालापनि मोनसे गोग्लैसोनाय ओन्सोलनि 22 नं तामुलि गामियाव बिथाडा जोनोम मोन्दोंमोन। बिफानि मुडा रुंसारि ग्यानेन्द्र शइकीया आरो बिमानि मुडा रुंसारि शुकानि शइकीयामोन। गुदि सोलोंथाइखौ गामियावनो लानानै 1950 मायथाइयाव डाडरी गोजौ फरायसालिनिफ्राय मेट्रिक आन्जादखौ उथ्रिनानै 1955 मायथाइयाव डिब्रुगड कानै कमार्च कलेजनिफ्राय बि.कम. खौ उथ्रियो आरो उनाव डिब्रुगड जिलानि चार्कल अफिसाव केराणी साख्रियाव हाबो। बिथाडा मेलेम बह्ना आरो जेरावबो आखा-फाखा होनना खर'सा आसामाव मिथिजादोंमोन। जाहोनाव महाकाली साहा बागाननि बिगुमाया बिथानो मेनेजार साख्रि जासिदोंमोन। बेनि अनगाथैबो अ. एन. जि. चियाव मोजां साख्रिबो मोन्दोंमोन। नाथाय बे गासैखौबो बिथाडा नागारना गोग्लैसोना थानाय ओन्सोलाव सोलोंथाइनि सोरांखौ गोसारहोनो काकपथार गोजौ फरायसालियाव फोरोंगिरि महरै हाबनानै उनाव टडना गोजौ फरायसालिनि गाहाइ फोरोंगिरि बिबानखौ आजावना लायो।

समाजारि जिउवाव बिथाडा मराण सुबुंफोलेरनि समाजाव गोबां बिहोमा होदों। सानैसो लेखा गोरों सुबुंखौ लोगोआव लाफानानै गिबियाव 1965 मायथाइयाव 'असम मराण सभा' आफादखौ दायो। मराण सभा (मराण आफाद) नि गेजेरजों बिथाडा मराण समाजखौ बेंगुरा खालामनाय फेग्रा बेसाद कानिखौ नागारहोनाय मावथांखिखौ जागायनानै गामि गामि सांग्रांथि लाबोनो मेल-मिटिं खुंदोंमोन। बे गेदेर खामानिनि थाखाय बिथाडा समाजनि खायसे मानसिफोरजों रायखुमाजादोंमोन। बिथानि दिनावनो मराणफोरखौ जौगाफारियाव लाबोनाय, मराणफोरनो प्रिमियाम होनाडाजासे हानि पाट्टा होनाय, मराण बेल्ट एन्ड ब्लक दानाय आरिखौ लाफानानै गोबां दाबी थानाय गोसोखां बिलाइ सरकारनि आखाइयाव गथायनाय जादोंमोन। बिथाडा असम मराण सभानि गायसनगिबि नेहाथारि महरै जागायनानै गोबां बोसोर खामानि मावदोंमोन। बिथाडा थियारि खालामनानै सरकारनो गथायनाय "Moran Development Plan" मुंनि मावथांखिखौ मराण समाजाव दिनैसिमबो सावरायनां आयदा महरै सानजाबोदों। बिथाडा हारिमायारि जारिमिन, हारिमुनि सायाव मोननैसो जौगा थाखोनि लिरबिदां लिरनानै दोनलांदों आरो बिथानि नाजानायावनो डिगबैनि खाथियाव दैबानायाव खहा जाजानाय सुबुंफोरखौ लानानै तामुलि बनगावा गायसनजादोंमोन।

मेहेरगोनां आखुथाइजों बुंफबनाय 'मराण बिहु'खौ बिथाडानो ग'रा समाजनिफ्राय बायजोआव दिहुनना

गुवार समाजाव सिनायथि खालामना होदोंमोन। बिथाडा गिबि खेबनि थाखाय 1951 मायथाइयाव काकपथारनिफ्राय बिहु मोसानाय हान्जाखौ लाना आसामनि दाब दाब जायगानि जौसाडाव मरण बिहुखौ दिन्थिदोंमोन। बेनि थाखायबो बिथाडा बयजोंबो मुंसुजानो गोनां जादोंमोन। बिथाडा सोरजिनाय मरण बिहु मेथाइनि केसेट 'ह'टै-पातौ'आ मरण हारिमुनि मोनसे साबसिन हामसिन बिदिन्थि।

आसामनि गुबुनारि होखारनाय सोमावसारनायावबो बिथाडा सिगां सिगां बाहागो लादोंमोन आरो गोबां दुखु-जारला सहायनो गोनां जादोंमोन। उन समाव बिथाडा असम गण परिषदनि सासे मख 'जाथाव दैदेनगिरि महरै सिनायजादोंमोन। बेबादि रावनिबो सिडाव गंगलायि सोमावसारग्राया सरासनस्रा जिउ खादोंमोन। बिथाडा मरण समाजाव अरायबो गोसोखांजाबाय थागोन।

### बीर राघब मरण :

आसाम मुलुगाव जानाय मुलुगनि सेथि म'वामरीया सुबुंजांख्रिथाइनि गाहाइ दैदेनगिरियानो जादों बीर राघब मरण। द'जौ बोसोर आह'म राज्यो खुंनायनि जोबनायथि उदखारि जाबोनाय राज्यो खुंथाइनि बांद्राय अनागार, गादबनाय-सोबख 'नायनिफ्राय राज्योनि गासै हारि-हारिसा मावसोमना जाग्रा फोरजाफोरनि उदांमिनि थाखाय बे गेदेमा बीर सुबुंनि दैदेननायावनो जोनोम जादोंमोन मुलुगनि गिबि जथाइ (सुबुं) सोमावसारनाया।

राजा नखरनि जारिमिननि बिलाइयाव बे जांख्रिथाइखौ मरणनि हिंसायारि, राघब मरणखौ निस्थुर, अनागारि, हिन्जावफोर लांखारग्रा महरै गाज्रियै फोसावनायनि उत्थायै गोदान मुगानि दावगालु पण्डित ड° अमलेन्दु गुह, ड° हीरेन ग'हाइ, ड° स्वर्णलता बरुवा, ड° ध्रुवज्य'ति बरा, ड° देबब्रत शर्माखौ लाफानानै गुबुन गोबां सान्थौगिरि सुबुडा राघबनि खुगानिफ्राय ओंखारनाय "राइजोआनो राजा" मोन्थोरजों फोसावनाय बे जांख्रिथाइखौ गादबग्रा आरो गादबजाग्रानि गेजेराव जानाय नखर दावहा होन्ना फोरमायदों। मख 'नो गोनांदि जारिमिनदांखा फराची जांख्रिथाइनि नैजि बोसोरनि सिगाडावनो बे जांख्रिथाइया जादोंमोन।

बे बाथ्रायाबो दिनै रोखादि सरासनस्रा आबादारिनि फिसा राघब मरणआ दावहानि सोलोंथाइ गैयि सरासनस्रा फोरजा, औवानि लाउथि, जं, बोरला थिर आरि गोरलै हाथियारजों गोबां राजानि सान्थ्रिफोरखौ फेजेननानै राजानि खुंथाइखौ बुखुनाय बादि सिगाडाव जाफेरै आरो सोमोनांथाव जाथाइखौ मुलुगनि जारिमिनाव मोननो थाडा। जांख्रिथाइनि गासै जाथाइखौ फरायसंनाय-बिजिरसंनाया राघब मरणनि गेदेर आखुखौ सोराडाव लाबोदों।

राघबनि हांखायनायाव हारि-फोलेर सायख'वाजासे गासैबो फोरजाफोरा सांग्रां जाना हान्जा हान्जा ओंखारबोनाय जाथाइया बिथाडादि बयजोंबो नाजावजानाय दैदेनगिरि बे बाथ्राखौनो फोरमायो। राज्योनि फारफ्रोमथिंबो राजानि खुंथाइखौ बेंखननानै जांख्रिखांग्रा हान्जाखौ थख'थख'यै थियारि खालामनाय, दावहायाव गोलेरनि सोलो बाहायनाया राघब मरणनि गोख्रों गौथुमारि रोंग'थि, दावहानि देरहासारनायखौ

फोरमायो। बेनि अनगायैबो राजा लक्षी सिंहखौ खानानै राज्योआरि मान होनाय, नंगुबै सुबुंनि सुथुरफोरखौ जिउ साजा होनायनि अनगायैबो फिसा दायनि दायनिगिरिफोरखौ खम साजा होना नै हगारनाय, खारखुमानाय राज्योनि सान्त्रिफोरखौ थांनो होनाय, दायनिगिरिफोरखौ उदां जायगायाव राइजोनि सिगाडाव आरो राइजोफोरनि बोसोन लानानै थिरांथा लानाय आरिफोरा बिथां गेदेमानि मानसिफोरनि फारसे अननाय थानाय, सुबुंथियारि बेसेन मोनदांथि थानाय आरो सुबुंखुंथायारि आखुखौ दिन्थिसारो। बेनिखायनो गासैबो मानसिया नागिरनाय एबा लुबैनाय हारि सायख'नाय गैथि समाज दानायनि थार लामा दिन्थिगिरि महरै बिथाडा मुगानि उनावबो मुगा थांनो थागोन। बेनि अनगायैबो आसामनि समाज जिउनि बोहैथिखौ गोजो महर होनो थाखाय खौसेयै गोहो गोरा समाजा फोथांनो लाखिनो राघव मरणखौ आदर्श महरै गोसोआव लाखिनाया गोनां।

### सोंथि :

1. मरणफोरनि फोलेरारि सिनायथिनि सोमोन्दै सुंदयै लिर।
2. आसाम आरो अरुणाचलनि माबे माबे जिलायाव मरणफोरनि थाथाया बांसिन?
3. जारिमिनाव मख'जानाय जिने नखर कछरीनि मुं लिर।
4. मोन 10 मरण रावनि मोन जि सोदोब लिर।
5. मरणफोरनि जारिमिनारि मुगानि राज्योनि सोरगिदिं सिमाखौ मख'।
6. मरणफोरनि जारिमिनारि मुगानि जोबथा राजानि मुडा मामोन?
7. मरणफोरा बैसागो बिहुखौ माब्ला आरो माबोरै फालियो?
8. मरणफोरनि हारिमायारि आबादा मा?
9. मरण सेंग्राफोरनि हान्जा दैदेनगिरिनि बिबाना माबादि?
10. बबे बबेयाव मरणफोरनि मोदाइ-मोदाइजोखौ फुजा होनायनि थानसालि दंमोन?
11. लिरसुंथाइ लिर :
 

(क) बीर सान्त्रि गाहाइ झपरा जगधा	(ख) म'हन शइकीया
(ग) राघव मरण	(घ) किरात सुर्य बदौसा
(ङ) जोहोलावजो राधा-रुकुनि	



## मिचिंफोर

आसामनि नैथि गेदेर जनजाति सुबुंफोलेरा जादों मिचिं। मिचिंफोरखौ 'मिरि' मुडै-बो मिथिनो मोनो। भारतनि संबिजिदाव मिचिंफोरखौ आसामनि हायेनारि जनजाति महरै 'मिरि' मुडै- सिनायथि होदों। मिरि सोदोबखौ मिचिंफोरा गावसोर बाहाया। 'मिरि' सोदोबखौ मिचिंफोरा समाजनि मोनसे थाखोनि मिबु एबा पुर'हितनि बिथिडावसो बाहायो। 'मिरि' सोदोबखौ बाजि जौथायाव नब-बैष्णब दोहोरोमनि फोसावगिरि शंकरदेबआ बाहायजेनदोंमोन होननानै सोरबा सोरबाया बुडोब्लाबो जारिमिननि बादियैब्ला शंकरदेबनि सिगां मिरि सोदोबखौ बाहायाखै बे नडा। उन समाव इराजफोराबो बे मोनसे सोदोबखौनो बाहायनानै लिरनाय फरायनायाव बाहायदोंमोन। गुवार ओंथियाव बिसोर गावखौनो 'तानि' होननानै सिनायथि होयो। 'तानि' सोदोबनि ओंथिया मानसि एबा सुबुं।

मिचिंफोरनि गोजाम थानाय जायगाया आसामनि साहानि हाजोखौनो बुंजायो। आथिखालनि अरुणाचलनि 'आबर' हाजोनिफ्रायनो मोजाडै जिउ खानायनि जायगा नागिरनानै मिचिंफोरा हान्जा हान्जा आसामनि हायेनसिम ओंखारख्लायबोयो। मिचिंफोरनि बे आगान होफैनाय समखौ लानानै पण्डितफोरनि गेजेराव गोरोबलायै नुनो मोनो। सोरबा सोरबा जारिमिनगिरिफोरनि बादिब्ला आसामाव आह'म राज्यो गायसंनाय थामहिनबा 12 जौथाइनि सिगांनिफ्रायनो मिचिंफोरा सोदोमभिनि सोमोन्दोआव फैनानै आसामनि हायेन ओन्सोलाव थाफैदोंमोन।

मिचिं सुबुं फोलेरनि गेजेराव गोबां रोखोमनि हाबा खुंनाय जायो। बाय बाहागि एबा माहारि साननायखौ हौवानि नखरनिफ्राय खालामनाय जायो। गोसोआ नागिरनाय बादि जिउनि लोगो नागिरनायनि बेलायाव सेंग्रा-सिख्लाफोरनि गेजेराव उदांभि दं। हाबानि उनाव फारनै नखरनिफ्राय गनायथि होलायोब्ला गासैबो जेंनाया सुस्रांजायो। नाथाय हाबाखौ मोनसे कुलनि गेजेराव खुंनाय जायो। कुल बिजिरनायाव गोजौ-गाहाय बिजिरनाय एबा साननाय थाया।

मिचिंफोरा आबाद गाहाइ समाजनि सोद्रोमा। आबादानो मिचिंफोरनि थांना थानायनि फुंखा। बोसोराव गुबैयै रोखोमनै माइ आबाद मावनाय नुयो आसु आरो माइसालि। माइ आबादनि अनगायैबो मिचिंफोरनि गुबुन गुबुन आबादफोरा जाबाय-सबाइ, बेसर, बायदि रोखोमनि आलु, थास', हाइजें, बानलु आरि।



मिसिंफोरा आबाद आरो मोसौ-मैसोनि सायावनो सोनारनाय।

मिचिं गामिफोराव गोजोन-गोरोबलायनाय लाखिनो थाखाय साफा साफा गामि बोराइ (गावबुढा) थायो। सोरबा सासे मानसिया दाय मावोब्ला 'कौबां' एबा मेल खुंनानै गामि बोराइनि सामलायनायाव दाय मावग्रानि सायाव बिसार खुंनाय जायो। निमाहा होजाथावै दाय मावनाय मानसिखौ नागारनाय एबा एरखनाय नेमबो दं। बेबादि कौबां एबा मेलखौ मुरंधर एबा गामि बोराइनि सिथलायाव खुंनाय जायो।

मिचिंफोरनि हारिमुनि सिनायथिया गाननाय-जोमनायनि गेजेरजों बेरखाडो। हौवाफोरा मिबु गालुग, गनर उगन टडालि दुमौर आरि गानो। बेबादिनो हिन्जावफोरा रिहा-मेखेला, रिबि-गासैं आरिनि अनगायैबो गहेनाबो गाननाय नुनो मोनो। बाश्रायाव बुंनाय दंदि मिचिं हिन्जावफोरा सालगान्दैयाव सिमां सुजुनो हागौ। साल गान्दैन सि दानायनि अनगायैबो मुंदांखा गादु एबा मिरिजिमआ मिचिंफोरनि हारिनि फुंखा।

मिचिंफोरनि गेजेराव महापुरुषारि, शैव, शाक्त तान्त्रिक आरो जुनियायै केवलीया एबा हराव सिबिग्रा दोहोरोमखौ आजावनाय नुनो मोनोब्लाबो "दयि-पल"आ मिचिंफोरनि गाहाइ दोहोरोम। सुबुं फोथायनायखौ मिचिंफोरा जोबोर फोथायो। दाउज्लाखौ खैफोद-आफोदनि रैखा कबच महरै फोथायो। दुबुर फुजाया मिचिंफोरनि दोहोरोमारि फोरबो। बायदि मोदाइखौ गोजोनहोनो थाखाय दुबुराव फुजा होयो। न'नि खैफोद-आफोद आरो दावगानायाव मोदाइनि नोजोर दं होन्नानै फोथायो। जोनोमनिफ्राय थैजासिम जिउखौ 'दयि-पल' एबा सान-अखाफोरा दैदेनो होन्ना मिचिंफोरा फोथायो। मिचिंफोरा जोबोर फोरबो मोजां मोनग्रा हारि। हारियारि फोरबो आलि-आ:ये लृगां नि अनगायैबो माग बिहु, रडाली बिहु (बैसागु) आरो काति बिहुखौ मिचिंफोरा फालियो। मिचिंफोरा गोदो गोदायनिफ्रायनो आलि-आये लृगां फोरबोखौ फालिबोदों। आबादारि बिथानि बे फोरबोजों बडहर चंलु, मपिन फोरबोफोरा गोरोबनाय दं। मिचिंफोरनि हारियारि फोरबो आलि-आ:ये लृगांआ मोनथाम सोदोबनि जथाइ। आलि, आ:ये आरो लृगां। आलिनि ओंथिया जादों हा सिडाव जानाय, आ:ये आ जादों बिफानि बिथ'आव एबा मोदोमाव जानाय फिथाइ एबा बेगर आरो लृगां सोदोबनि ओंथिया जादों गायनाय हाबाखौ जागायजेननाय। थामहिनबा जोलै बेगर गायनायखौ जागायजेननाय। फागुन दाननि गिबि बुधबार खालि बे फोरबोआ जागायजेनबोदों। बे सानखौ सानना लानानै बेगर जोलै गायनायखौ जागायजेनो। पुरां आपिन एबा थफला ओंखामजों जाफानाय (दिनचान), डचान थामहिनबा ना गोरान, बेदर आरो आपंआ बे फोरबोनि गाहाइ जामुं। आपंआ मिचिंफोरनि सिगांनिफ्रायनो सोलिबोनाय रोखोमसे दैलाव मुवा। आलि आ:ये लृगां सानखालि आपंखौ गिबियाव मोदाइनो उनाव, गेदेर गोलाउनो नखरा बाउग्रोयो। गुमरागनि मोसानाय आरो मेथाइ रोजाबनाया मिचिंफोरनि जारिमिनारि आरो गोजोनै थानो मोजां मोननायनि सिनायथि होयो। मागो बिहु, बैसागो बिहु आरो काति बिहुखौ मिचिंफोरा दोरोडारि नेमजों फालियो।

मिचिं रावा सुबुं थुनलाइनि बिथिडाव जोबोर दोहोनि। लिरजायि महराव थानाय बोसोर बोसोर सोलिबोनाय मेथाइ-फावथाइफोरखौ आथिखालाव लिरनाय महर होनो नाजानाय जादों। मिचिं रावा चीन-तिब्वतारि राव फोलेरनि तिब्वतबर्मी दालाइनि सिडाव। बिबुंगिरि नाहेन्द्र पादुनआ मिचिं रावनि जौगानाय थाखोखौ गुबैयै मोनथाम बाहागोआव राननानै सावरायदों। बेफोर जादों-गोजाम थोरफो, गेजेर थोरफो आरो गोदान थोरफो। गोजाम थोरफोआव मिरू एबा आः बाडर मेथाइ आरो सुबुं-बाथ्राफोरा गोगलैयो। बेफोर गोजाम थोरफोनिफ्राय 1886 मायथाइसिम। बेफोरनि लिरनाय महर गैयामोन। पुर'हित एबा मिबुफोरनि खुगा खुगा बे थाखोनि एबा रोखोमनि मेथाइ-खोथाफोरा मुगानि उनाव मुगा बागलायबोदोंमोन। उनाव आःबां आरो गोजाम मेथाइफोरखौ बुथुमनानै लिरनाय महर होनायनि बिथिडाव 1964 मायथाइयाव फोसावनाय सुरेन दलेनि "लेके निः तम" आ मख'थावना। गेजेर थोरफोरखौ 1886 मायथाइनिफ्राय 1986 मायथाइसिम हमना लानो हायो। गेजेर थोरफोखौ मोननै बाहागोआव राननो हायो। बेनिनो मोनसे बाहागोखौ मिछनेरि थोरफो आरो गुबुन मोनसेखौ मिचिं रावनि सोमोन्दो गोनं थोरफो एबा मुगा होननानैबो बुंनो हायो। आथिखालाव मिचिं रावाव खन्थाइ, सल', नायजाब, सल'मा, रावखान्थि, सोदोब बिहुं आरि लिरनानै खन्थाइगिरि, सल'लिरगिरि, नायजाब लिरगिरि आरो सल'मा लिरगिरिफोरा राव-थुनलाइ जौगानायाव बेसेन गोसा बिहोमा होबोदों।

मिचिं समाजा आबुथिगोनां समाज। बेनि गाहाइ जाहोना जादों थाखो सायख'नाय गैयि। हौवाफोरबादि मिचिं हिन्जावफोराबो आबादनि खामानि, नखरनि खामानिफोराव समानै बाहागो लायो। खायफा जयै मावनाय खामानिफोराबो मिचिं हिन्जावफोरा बाहागो लायो।

मिचिंफोरनि गेजेराव मख'जाथाव बिहोमा होनाय गेदेमा सुबुंफोरनि सोमोन्दै सुंदयै सावरायनाय जाबाय :

### गागि थुनलाइगिरि भृगुमुनि कागयुं :

भृगुमुनि कागयुंनि सिगांनि आजै-आजौनि मुडा कार्तमोन। कार्तहा साथाम फिसाज्ला दंमोन-बिसोर जादों-तामन, खहुवा आरो कुशराम। 1932 मायथाइनि अक्ट'बर दाननि बबेबा मोनसे मोजां समाव आलिमुर गामियाव खहुवानि फिसाला भृगुमुनिया जोनोम मोनदोंमोन। भृगुमुनि कागयुंआ उन्दै बैसोखौ आलिमुर गामियावनो बाबेनहोदोंमोन।

भृगुमुनि कागयुंआ गामिनिनो 58 नं आलिमुर गुदि फरायसालिनिफ्राय गुदि सोल्लोंथाइखौ लादोंमोन। ज'रहात सरकारी बहुमुखी गथ'सा गोजौसिन फरायसालिनिफ्राय 1958 मायथाइयाव बिथाडा प्राइभेटयै आनजाद होनानै मेट्रिक आनजादखौ उथ्रियो। भृगुमुनि कागयुंआ उन्दैनिफ्रायनो गावखौ फोथायग्रामोन। बिफा थैखांनयनि उनाव फरायनायनि खरसाखौ बिथाडा गावनो दिहुनना लादोंमोन। बेनिखायनो साननि सिगां गावनो रां दिहुननायनि थांखि लानानै गुबुन गुबुन फसंथानफोराव खामानि मावदोंमोन आरो

हरनि समाव कलेजाव फरायदोंमोन। बेबादिनो बिथाडा जे. बि. कलेजनिफ्राय आइ. ए. (पि.इउ) आरो बि. ए. डिग्री लायो। बेनि अनगायैबो कागयुंआ 1992 मायथाइयाव महीशुरनि Institute of Indian Language- आव मिचिं बैसो-गोराफोरनि फराय बिजाब सेबखांनायनि थाखाय फोरोंथाइ लायो। बे फसंथानावनो बिथाडा आयदायारि फोरोंथाइ लादोंमोन।

गोजौ फरायसालियाव फरायबाय थानाय समावनो कागयुंआ आसामनि गिबि मुंख्लं खौरंगिरि कमला शइकीयाजों लोगो नांना 1952 मायथाइयाव दिखौमुख एम. इ. स्कुल गायसडो। बे फरायसालियाव बिथाडा बेतन गैयाजासे सिबिथाइ होलांदों।

बेनि उनाव 1958 मायथाइयाव ज 'रहाट भकेश्वनेल कलेजियेट हाइस्कुल (Vocational Collegiate High School, Jorhat) आव फोरोंगिरि महै हाबो। बे समावनो Jorhat Industrial Institute नि Instructor मासियाव साननैसो साख्रि मावो। भृगुमुनि कागयुंआ ज 'रहाट सरकारी बहुमुखी गथ 'सा गोजौसिन फरायसालियाव 1964 मायथाइनिफ्राय 1966 मायथाइसिम थाम बोसोर फोरोंगिरि साख्रि मावो। उनाव बिथाडा 'आसाम बैसोगोरा सोलोंथाइ मावख 'आव' साख्रि मावो। बे मावख 'निफ्रायनो भृगुमुनि कागयुंआ 1990 मायथाइयाव आजिरा लायो।

असमीया खन्थाइ थुनलाइयाव भृगुमुनि कागयुंनि बिहोमाया जोबनो गैया। बिथांनि लिरनाय असमीया खन्थाइ बिजाबफोरा जादों- कबिता कलि, आनाहुत, मन बननिर जुइ आरो कबिता कुसुम। 'कबिता कलि' मुंनि खन्थाइ बिजाबखौ बिथाडा थाखो स्नियाव फरायबाय थानाय समावनो लिरदोंमोन। भृगुमुनि कागयुंनि बयनिखुइ मुंदांखा खन्थाइ बिजाबनि मुडा जादों 'अनाहुत'। भारत सरकारनिफ्राय बिथाडा 'अनाहुत' खन्थाइ बिजाबनि थाखाय 1971 मायथाइयाव हादरगिरिनि दारै बान्था मोननो हादोंमोन। 'मन बननिर जुइ' खन्थाइ बिजाबनि थाखायबो भृगुमुनि कागयुंनो 1994 मायथाइयाव हादरगिरिनि दारै बान्था होनाय जायो। भृगुमुनि कागयुंआ मिचिं फोलेरनि गिबि हादरगिरिनि बान्था मोनजेननाय थुनलाइगिरि।

भृगुमुनि कागयुंनि खन्थाइया रमान्तिक आरो गोदानथिनि गलाय-गथाय महर। हादरखौ अनसायनाय, रमान्तिक, जारिमिनारि मोनदांथि, सुबुंथि आरो समाजनि फारसे बिबान बुजिनाया भृगुमुनि कागयुंनि खन्थाइनि गाहाइ जुनियाथि बिथांनि खन्थायाव बेरखाडो।

भृगुमुनि कागयुंआ असमीया रावजों समानै मिचिं रावआवबो खन्थाइ लिरदोंमोन। कागयुंनि गुबुन गुबुन समाव लिरनाय मिचिं खन्थाइ बिजाबा जादों 'कःकां मोतम दःयिं'।

बिथांनि लिरनाय आरो सुजुनाय बिजाबनि अनजिमाया गासै गां 27 (नैजिस्ति)। बिथांनि लिरनाय लिरबिदांफोरनि गेजेराव 'आबेगिक ऐक्य साधनत श्रीमन्त शंकरदेव', 'आन्सलिक भाषा बनाम त्रिभाषा मिचिं कृष्टिर चमु आभास, भाषा आरु शिक्षार भूमिका, मिचिं शब्दक 'ष, मिचिं लजन आरो भृगुमुनि

कागयुडर मिचिं जनजीवन : चिन्ता-बिचित्रा।

भृगुमुनि कागयुंआ सासे आखा-फाखा लिरगिरि आरो मुंदांखा सुबुं-हारिमुनि बिजिरसंग्रा। असमीया आरो मिचिं राव-थुनलाइनि गोथौ फरायसंनाय आरो चर्चा खालामनाया बिथानि जिउनि ब्रतमोन। बेनि अनगायैबो बिथानि बाजौनिखुइबो बांसिन बिजिरसडारि आरो गोथौ सानस्रिजों लिरनाय लिरबिदांफोरा गुबुन गुबुन खौरां बिलाइ-लाइसि आरियाव सेरखाय बेरखाय जानानै दं।

2011 मायथाइनि 27 मार्चआव गेदेमा थुनलाइगिरि आरो मुंदांखा खन्थाइगिरि भृगुमुनि कागयुंआ जिउ गारो।

### मुंख्लं कमला मिरि :

गावनि जोनोम हादरखौ मालायनि आखाइनिफ्राय उदां खालामनो जायफोरा जिउखौ नेहाद साननानै गावनि जिउखौ बाउलांबाय बिथामोनखौ समाजाव मोदाइनि मासि होनानै फुजा होनाय नुनो मोनो। जोनोम हादरखौ सोर्गोनिखुइबो देरसिन होनना बुंनाय जायो। बेफोरबादि गेदेमा मुंख्लंफोरनि मैखोम बिहोमाया उन जोलैनि थाखाय जोबनो गैयि थुलुंगानि फुंखा जाना फैयो। बेफोरबादि गावखौ नागरथाबना खामानि मावनाय सासे सुबुडानो जादों कमल चन्द्र लई, जाय कमला मिरि मुडै सिनायजाबोदों।

1894 मायथाइयाव शिवसागर जिलानि (आथिखालनि ग'लाघाट जिला) रडामाटि मौजानि बेन्दोडाव थानाय अपर टेमेरा गामियाव कमला मिरिया जोनोम मोनदोंमोन। अपर टेमेराया समनि फारियाव गोबां गामियाव गावसाबाय आरो कमला मिरि जोनोम जानाय गामिखौ दासान्दि गुलुं टेमेरा मुडैसो मिथिनो मोनो। कमला मिरिनि बिफानि मुडा चिकौ लई आरो बिमानि मुडा मंगली लईमोन। बै समाव अपर टेमेरा गामियाव गंसेबो फरायसालि गैयिनि थाखाय भ'लागुरिसिम थांदोंमोन आरो बै समनिफ्रायनो उदांसि दावहारु आपिराम गगैजों लोगो जालायनो खाबु मोन्दोंमोन होनना मिथिनो मोनो। सोरबा सोरबाया स'नाराम मित्र मुंनि सासे बांला गोरों मानसिनिफ्राय कमला लाइंआ सोलौंथाइ लादोंमोन होनना बुंनो नागिरो।

महात्मा गान्धीनि दैदेननायाव जानाय उदांसि सोमावसारनाया भारत हादरनि खना खनला हादर मोजां मोननायनि दोहौ लाबोदोंमोन। दुलाराय भारत हादरजों लोगोसे आसाम आरो ग'लाघाट जिलानि (बै समाव शिवसागर जिला) कमला मिरि आरो बिथानि लोगो मिचिं सेंग्राफोरखौबो हादर मोजां मोननाय बै थैनोरोडि खौराडा (बाणी) मोदोम दुंखांहोदोंमोन आरो सोमावसारनायाव बारसोमदोंमोन। कमला मिरिनि दैदेननायावनो महुरा मौजानि बंकुवाल ओन्सोलावबो बिकाराम मिरि, बेजिया लई, भुटाइ लई, धातुराम पेगु, ब'न्दा लई, शम्भुराम मिरि मोना उदांसि सोमावसारनायाव बारसोमदोंमोन।

बै समाव रेल-मथरनि खोथायाथ' गोजाननि खोथा लामा आरियाबो मोजां नडामोन। ग'लाघाटसिम

अपर टेमेरानिफ्राय 20 माइलनिखुइबो बांसिन लामा थाबायना थानो गोनां जायोमोन। बे समाव एसेबां गोजान लामा बारनानै मिरु आफादजों लोब्बा लाखिनाया जोबोर साहस गोनांनि खामानिमोन। नाथाय देहानि रोदा रोदा थै खारसारनाया हादर मोजां मोननाया थानायखाय बेफोरबादि जारला सैनाया जेबो गेदेर बाश्रायानो नडामोन।

बै समाव अपर टेमेरानिफ्राय जागायजेनना गेलाबिलनि साहा बाहागोनि गामिफोरव कानि, भां आरि फेग्रा बेसादजों बुंफबनायमोन। जुनियायै कानियाजों बुंफबनाय अपर टेमेरा गामियाव कानियानि रां खानायखौ बन्द खालामनायखौ कमला मिरि आरो बिथानि लोगोफोरनि बाखनायथाव हाबा होननानै बैसोआव देरसिनफोरा दिनैसिमबो मानिना लायो।

महात्मा गान्धीनि दैदेननायाव 1942 मायथाइनि 8 आगष्ट'आव मुम्बाइ नोगोराव जानाय 'अल इण्डिया कंग्रेछ कमिटि'नि थांखिबादियै ब्रिटिछनि बेरेखायै भारत नागार सोमावसारनायखौ फोसावनाय जायो आरो 9 आगष्ट खालाराव महात्मा गान्धी, जवाहरलाल नेहरू आरि गोबां दैदेनगिरिखौ ब्रिटिछ सरकारा हमनानै जेलाव जोबथेना दोनो। बै समाव कमला मिरिनि दैदेननायाव 18-08-1942 खालारखालि रडामाटि मौजानि अपर टेमेरा गामियाव शान्ति सेनानि दल (हान्जा) दानानै सा जिदाइन सोद्रोमानि मोनसे हान्जाखौ ग'लाघाटाव पिकेटिं खालामनो सायख'यो। आफादनि थांखिबादियै कमला मिरिया गाहाइ बिबान (दैदेननाय) लानायनि अनगायैबो स'नधन पेगु, मालिधर पेगु, बल'राम लई (नेहाथारि), बेपुं पाटरी, जारमन मरां, कार्टिक मरां, ब'म्बा बरि, फेदला लई, ठगि बगि, बेलेम लई, मेकना लई, बुबाबरि, दचया बरि, कमल लई, एल'क पाठरी, नन्दीराम लई, मेतुं बरिया शान्ति सेनानि खामानि मावनो सदबांसा लायो।

1942 मायथाइनि सेप्टेम्बर दाननि जोबनायथिं ग'लाघाट कंग्रेछनि मावखुलियाव बिग्रायनायनि खौरां लानो थानायाव कमला मिरि आरो लोगो मावथिफोरखौ ब्रिटिछ सान्थिफोरा हमो। बे बोसोरावनो दाइन अक्ट'बरखालि ग'लाघाटनि बै समनि बिसारगिरि आशु दत्तआ हमजानायफोरखौ बिसार खालामनानै साफ्रोमखौबो दाइनदान साजा होनानै ज'रहाटनि मिरु जोबथेसालियाव दैथायहरो। जोबथेसालियाव बिथाडा ग'पीनाथ बरदलै, फकरुद्दिन आलि आहमेद, महम्मद तैयबुल्ला, अमिय कुमार दास, हेम बरुवा आरि दैदेनगिरिफोरखौ लोगो मोनो। जोबथेसालिनि सिडाव ग'पीनाथ बरदलैनि सेराव कमला मिरिया हिन्दी सोलोंदोंमोन आरो जेन्थेरजों खुन्दुं थुनदोंमोन। जोबथेसालियाव थानाय समाव कमलानि सावस्रिया हमनायाव नोरजिया जाबोनायाव जोबथेसालिनि हस्पितालाव थिसननाय जायो। कमला मिरिनि सावस्रिया जोबोर गाज्जि जानायलाय जेलनि बिफानारिया 23 एप्रिलखालिनो उदां खालामना होनो थि खालामदोंमोन। 1943 मायथाइनि 23 एप्रिलखालि बयखौबो सोगाबनानै बे बुहुमनिफ्राय आनज्रायलाडो।

### मिचिं हारिमुनि बिफा महर ऐराम बरि :

मिचिं हारिमुनि बिफा ऐराम बरिनि जोनोमा जादोंमोन ब्रिटिछ खुंथाइनि 'नेफा' (NEFA) नि सिडाव थानाय अयान गामियाव (अयाना आथिखाल आसाम सिमायाव थानाय अरुणाचलनि गंसे मख 'जाथाव मिचिं गामि)। बिथांनि जोनोम सानखौ बिमा-बिफाया गोसोआव लाखियाखैमोनब्लाबो हमना लानाय बादियै 1877 मायथाइयाव जोनोम जादोंमोन होननानै उन समाव नखर आरो खुरमाफोरनिफ्राय मिथिनो मोननाय जादों। बरिनि बिफा आरो बिमानि मुडा फारियै रुंसारि ताकिर बरि आरो मडली बरि।

बै समाव रुंसारि बरिनि गामिनि खाथि-खाला फरायसालि गैयामोन। अब्लाबो फरायनानै गुनि-गियानि मानसि जानो नागिरनाय बरिया हाग्रा-बंग्रा, दैमा-दैसा बारसोमग्रा गावनि गामिनिफ्राय 30-35 किल'मिटर हायेननि गोजाम मुकंचेलेकनि सिडाव थानाय गुदि फरायसालियाव थाखो ब्रैसिम फरायो।

ऐराम बरिआ जारिभिननि बिखायाव गोमालांनो हमनाय मेहेरगोनां मिचिं हारिमुखौ संरैखा खालामना लाखिनाय खामानिखौ 1950 मायथाइनि सिगांनिफ्रायनो नाजादोंमोन। 1952 मायथाइनिफ्राय हारिमु मोजां मोनग्रा सानैसो सेंग्रा-सिख्लाफोरखौ लोगोआव लाफानानै मिचिंफोरनि बेसेन गोसा ऐनि:तम, चोल्लया, लोरोलि, ल:ले, काबान, तौब:तौकां, बृनि, मिबुं आ:बां बाइदि बाइदिनि खान्थिनां चर्चा, सरैखाथि आरो दोनथुमनाय खामानियाव नांथाबो। बिथांजों मदद होफानाय सा जिबानिखुइबो बांसिन सेंग्रा-सिख्लानि हान्जा दंमोन। हान्जाया ऐराम बरिनि सामलायनायाव 1957 मायथाइयाव जनाइयाव खुंनाय 'जनाइ मिचिं कौबाड'नि आफादाव हान्जायै जौसाडाव मिचिं हारिमु मोसानाय दिन्थिजेनो। बेनि अनगायैबो बरि गेदेमानि हारिमु हान्जाया ज'नाइ, पाचिघाटनिफ्राय जागायनानै गुवाहाटी, ज'रहाट, डिब्रुगड, माजुलीसिम सुबुंहारिमु दिन्थिनानै मिचिंनि गावारि आखुथाइजों बुंफबनाय समायना-रमायना हारिमुखौ गोसारहोयो। गोसोखांनो गोनांदि मिचिं हारिमुनि साधना खालामग्रा बरि गेदेमाया साबा सिख्लाफोरनि हेफाजाबाव खान्थिनां लृगां-ल:ले, गुमराग मोसानायखौ दिन्थिफुंनानै मिचिं हारिमुखौ (मोसानाय) गोदान महर होबाय। बेनि अनगायैबो गोदो गोदायनि मुकंचेलेक ओन्सोलनि उनजाना थानाय मिचिं गामिफोराव गिदिंनानै फरायनाय, साखोन-सिखोनै थानाय, गामियारि समाजाव हेफाजाब होलायनाय खामानि मावना होनाय, सोलिबाय थानाय समाजारि हेंथाफोरखौ गैया खालामनाय बायदि बायदिनि अनगायैबो गेदेर-उन्दै सानालासैनो गामियारि समाजखौ गोगो आरो गोखों महराव फोथांनो लाखिनो थाखाय हाबाफारि लानायाव बिबान लादोंमोन। बिथाडा 'ओन्सोलखौ फोसाबनाय आरो जौगाथाइ आफाद' निफ्राय हमजेनना 'भारतनि उदांसि सोमावसारनाय'सिम गोबां बेसेन गोसा खामानि मावलांबाय।

गोदोनि 'नेफा' खुंथाइगोरा आर्नल्ड साहाब आरो माथुर साहाबनि मावथांखियाव, ऐराम बरिनि

दैदेननायाव अयान चारिआलिनिफ्राय चियां बुरलुंबुथुरसिम जायगानि राइजोफोरा लामा दोंसे बानायो। 1958 मायथाइयाव 'नेफा' खुंथाइखौ बे लामानि जोबथानायाव गोरोबनाय चियां बुरलुंबुथुर घाटखौ (गाथोन) 'ऐराम घाट' मुडै मुं दोनो। हारिखौ थारैनो मोजां मोनग्रा समाज मावथि ऐराम बरिनि जिउ थाजासिम मावनायनि मान दिन्थिनाय महरै बेयो 'नेफा' खुंथाइनि गोसोआव लाखिनो गोनां खामानि होनना बुंजायो। दासिमबो अयान चारिआलिनिफ्राय खोला-सानजाथिं थांब्ला बरि गेदेमानि हाबा-हारिमुनि खिन्थाइखौ 'ऐराम घाट' मुडै फोथांना लाखिबोदों।

1964 मायथाइनि 25 मार्चआव ऐराम बरिया बे संसारखौ नागारना थाडो।

### पद्मश्री यादब पायें :

बिफां थाब्लासो मानसि थागोन। थामहिनबा बिफां आरो मानसिनि गेजेराव एंगारनो हायि सोमोन्दो दं। बे बहुमनि मिथिंगायारि आबहावाखौ रैखा खालामनाय बिथिडाव मानसिहा गिदिर बिबान दं। बेनि थाखाय नांगौ गोसो आरो आबहावा रैखा खालामनायनि मिजिं। बे गेदेर बिबानखौ रुजुननानै गासै बहुमनि सुबुं समाजखौ मिथिंगा रैखा खालामनायनि खौरां होनो सिगांबोनायसै ज'रहाटनि ककिलामुखनि 1 नं मिचिं गामिनि थाखो जिस्मिल' फरायनाय मुस्त्रि यादब म'लाइ पायें। 1979 मायथाइयाव बिफां गायनो लाजेननाय यादब पायेंआ थांनाय 40 बोसोरसिम बिफां गायदों आरो बेफोरखौ जोथोन लाबोदों। लोगोसे म'लाइ काटनियाव थानाय आरो गिदिंनो फैनाय जिब-जुनार, दाउमा-दाउसाफोरखौबो बिथाडा फिसिदों। मिथिंगा अनफावरि आरो आबहावा मावथि, भारतनि 'अरनबारि सुबुं' यादब पायेंआ आसामनि बै समनि शिबसागर आरो आथिखालानि ज'रहाट जिलानि ककिलामुखनि बरघ'प गामियाव जोनोम मोनदोंमोन। 1959 मायथाइनि 30 अक्ट'बरखालि। बुरलुंबुथुरनि खहानिफ्राय बारगनो न' सोलायनो गोनां जानायाव आथिखालाव ककिलामुखनि 1 नं मिरि गामियाव थानो लायो। बिथानि बिफानि मुडा लक्षीराम पायें आरो बिमानि मुडा आफुली पायें। बिमा-बिफानि सा 11 गथ'गथायनि मादाव यादब पायेंआ थामथि फिसाज्ला। खाथिथारनि ब्राह्मन गामिनि यदुनाथ बेजबरुवानि सामलायनायाव यादब पायेंआ 90 नं बालि गाव गुदि फरायसालियाव सोलोंथाइखौ जुरिजेनदोंमोन। बिथानिफ्रायनो पायेंआ आबहावा सरैखाथि खालामनाय आरो जिब-जुनारनि फारसे अननाय गोसो थानायखौ सोलोंजेनदोंमोन। थाखो जिस्मिल फरायनाय पायेंआ मेट्रिक आनजाद होआलाबानो न'सिम गिदिंनो फैफिनदोंमोन। न'आव फैनानै नुफैयो दि औना हाफौवाव (चापरि) बुरलुंबुथुरनि दैबानाजों बुखारना दोनलांजानाय जिबौ-एम्बुखौ हमफानानै फिसा-फिला जोबनो गैयि जिब-जुनारफोरा सानदुंनि दुंखावनायाव थैनांदों। बे समाव सानदुंनि दुंखावनायाव थैहां-बरबहां जानाय रावनिबो मदद मोनि फालोसे जिबौखौ बिथाडा नुसनहरनायसै। अनसुला गोसोनि पायेंआ जिबौफोरखौ रैखा खालामनाय थांखियै

खाथि खाला गामिनि बैसोगोरा मानसिफोरनिफ्राय सुबुरुन लाना फां 50 औवा गायदोंमोन। बेनि उनाव बोसोरफ्रोमबो बिफां गायनाय हाबाया बिथांनि हुदाबादि जानायसै। समनि फारियाव 1979 मायथाइयाव बिफां गायजेननो लानाय यादब पायेंआ बेसेबा गुवार दंफानि बागान (काठनि) जाखांहोबाय। जायखौ दिनै मुलुगा 'म'लाइ काठनि' होनना मिथियो। बे म'लाइ काठनिया आथिखालाव गोदानै दाजानाय माजुली जिलानि औना एबा अरुणा हाफौनि सेराव दं। ज'रहाटनि ककिलामुखनिफ्राय थाडोब्ला बुरलुंबुथुरनि एरांसुति बारनानै थांनांगौ; गुबुन फारसेथिं माजुलीथिं थाडोब्ला बरनै बारनानै म'लाइ काठनि मोनहैयो।

आथिखालाव 1360 एकर थामहिनबा 4050 बिघा हायाव म'लाइ काठनिया दं। यादब पायेंआ उनहालागै बा बोसोरनि मादाव 2000 एकर हासिम म'लाइ काठनिखौ फेहेरनायनि बिथांनि लादों। पायेंनि म'लाइ काठनिनि गेदेर नखरनि मादाव बेसेन गोसा गोजा चन्दन, गुफुर चन्दन, सिसु बिफां, हलख, गाम्बारि, तिताचाप, पमा आरियानो गाहाइ। बेनि अनगायैबो बायदि रोखोमनि मुलियारि बेन्दों बेनलाजों बुंफबनाय। माब्रै दिंखिया मोसाया म'लाइ काठनिनि गाहाइ मेगनाव नांथाव। बोसोरफायाव थाम-ब्रै दाननि थाखाय फैनाय मा 115 मैदेर, 500 निखुइबो गोबां मै या म'लाइ काठनिनि सोद्रोमा। काजिरडानिफ्राय गिदिंनो फैनाय गं थसेयारि माथाम गान्दाया म'लाइ काठनिनि आलासि सोद्रोमा। फिसिनाय एबा न'नि जिब-जुनारनि मादाव मैसो, मौसौ अमा, हांसो-दाउ बायदि बायदि। बेनिनो मा 90 मैसो, मा 50 मोसौ गाइ आरो मा 10 अमा दं। मोसाफोरा पायेंनि फिसिनाय मोसौ मैसोखौ जायोब्लाबो बिथाडा गाज्जि मोना; मानोना बेफोरनो मोसानि आदार। अदेबानि मानसिया हाग्रा-बंग्रा फोजोबस्रानायनि जाउनाव मोसा, मैदेर आरि जुनारफोरा आदार आरो गिदिंथिंनाय जायगानि आंखाल जानायनि थाखाय बिथाडा मानसिखौनो दाय होनो सानो। सिगुन, साम'जाग्रा दाउ, दाउब', हुदु, हादिदग्ला, फानखावरि, दाउखा, बादामालि, दाउथु आरि गुबुन गुबुन रोखोमनि दावबायदिंग्रा दाउमा-दाउसाया पायेंनि म'लाइ काठनिनि नागारनो हायि सोद्रोमा। बिथांनि बुंथि- 'बिथांखौ लोगो हमनो फैनाय मानसिफोरा बिथांनो गामसा होनायनिखुइ म'लाइ काठनियाव थांनानै फांसे बिफां गायोब्ला बिथाडा जोबोर गोजोननाय मोनगोन।' फिसिनाय मोसौ-मैसोनि मुडाव बिथाडा बोसोरफायाव थाम रोजा रां सरकारनो खाजोना होयो।

आबहावा रैखाथि होनायनि थाखाय यादब म'लाइ पायेंआ मावफुंनाय गेदेर खामानिनि बिहोथाइ महरै 2012 मायथाइयाव गोदान दिल्लीयाव थानाय जवाहरलाल नेहरु मुलुग सोल्लोंसालिया बिथांनो भारतनि हाग्रामा सुबुं (Forest Man of India) बिमुं होयो। बे बोसोरावनो बै समनि भारतनि हादरगिरि ड' ए. पि. जे. आब्दुल कालामा 250 लाख रंजों-लाबजों 'हीरा दाफबनाय बान्था' होयो आरो लोगोसे गाहाम हामलायनाय जासियो। 20, 21, 22 नबेम्बर, 2012 मायथाइयाव पेरिचनि U. N.



Global Conference आव बिथांखौ मानबावनाय जायो। मिथिंगानि गोजोनखौ मोजां मोनग्रा यादब पायेंनो 2015 मायथाइयाव भारत सरकारा भारतनि ब्रैथि जौसिन सुबुं बान्था पद्मश्री बिमुंखौ होयो। बिथाडा दासान्दि चीन, टाइवान, श्रीलंका आरबनि ज'हा, चुइजारलेण्ड, फ्रान्स, बांलादेश बायदि हादरफोराव हांखायजाबाय आरो बरायजाबाय।

बेनि अनगाथैबो मिचिं माहारियाव आरो गोबां गेदेमा सुबुंफोर दं। बिदिन्थि बादियै मिचिं समाजनि गिबिसिन हाग्रा बिफाननि मावख'गोर, महीचन्द्र मिरि जायनि थाखाय काजिरडाया मुलुगनि मानसावगारियाव जायगा मोनदों। बिथाडा काजिरडानि गान्दाखौ गिबिसिन हादरगेजेरारिनि जुनारसालियाव दैथायहरनानै गं थसेयारि गान्दानि जायगाया काजिरडा होनना सिनायथि होदोंमोन।

मिचिंफोरनि गुबुन सासे मख'जाथाव सुबुडा जादों मुलुगनां पान्जा चेम्पियन राजेन्द्र कुमार मिलि। 1977 मायथाइयाव कलिकतायाव खुंनाय हायुडारि 'आर्म रेचलिं' बादायलायनायाव बाहागो लानानै हायुडारि चेम्पियनसिप मोन्दोंमोन। 1979 मायथाइयाव बिथाडा कानाडानि एडमान्टआव जानाय इन्टारनेसनेल 'आर्म रेसलिं' बादायलायनायाव भारतनि जानानै बान्था मोनो। 1981 मायथाइयाव भारतनि कलिकातायाव 'वार्ल्ड आर्म रेसलिं' बादायलायनायाव आसाम आरो भारतनि जानानै देरहासारनायनि बान्थाखौ मोनदोंमोन।

### सोंथि :

1. 'मिचिं' जनजातिनि सोमोन्दै मोनसे लिरसुंथाइ लिर।
2. मिचिंफोरनि रोखोमथाम गाननाय-जोमनायनि मुं लिर।
3. मिचिंफोरनि दोहोरोमखान्थिनि सोमोन्दै लिर।
4. आलि आये लिगां माखौ बुडो आरो बेखौ माब्ला खुंनाय जायो?
5. आलि आये लिगां सोदोबनि सोमजिखांनायखौ लिर।
6. लिरसुंथाइ लिर :
 

(क) भृगुमनि कागयुं	(ख) मुंख्लं कमला मिरि
(ग) ऐराम बरि	(घ) पद्मश्री यादब पायें



## मणिपुरीफोर

आसामा समायना-रमायना बायदि सुबुं फोलेरनि मानसि थानाय जायगा। जारिभिना संना मोनि समनिफ्रायनो बायदि समाव गुबुन गुबुन सुबुं फोलेरारि मानसिया बे समायना हासार गोनां हा खोन्दोआव हाबफैदोमोन। बे सुबुं फोलेरफोरनि मादाव 'मणिपुरी'फोरबो मख'जाथाव।

आसामाव गाहाइयै बराक आरो बुरलुंबुथुर सेरफाडाव मणिपुरीफोरा थायो। बराक सेरफांनि काछार, हाइलाकान्दि आरो करिमगन्ज जिलायाव मणिपुरीफोरा थायो। 1819 ख्रिष्टाब्दआव माननि सान्श्रिया मणिपुर राज्योखौ गाग्लोबदोमोन। मणिपुरी फोरजाफोरनि सायाव मान सान्श्रिफोरा बुग्लुं-बुसि खालामनाय आरो अनागारि खालामनायखौ सहायनो हायिनि बिसोर काछार, छिलेट (आथिखालनि बांला हादरनि सिडाव) आरि जायगासिम थाहैदोमोन होनना बुंनाय जायो। उनाव बै मानसिफोरा गाव थानाय जायगासिम थांफिनालासिनो काछार (आथिखालनि काछार, हाइलाकान्दि आरो करिमगन्ज जिला) जिलायावनो थाजोरै थानो लायो। गुबुन फारसेथिं बुरलुंबुथुर सेरफांनि दाब दाब जायगायाव बे सुबुंफोरा सेरखाय बेरखाय जाना थाबोदो। आथिखालानि ह'जाइ जिला, कामरूप नोगोरमा गुवाहाटी, दरं जिलानि अदालगुरि, कार्बिआंलं, डिमा-हाचाव, खर'सा आसामनि शिवसागर, डिब्रुगड, ग'लाघाट, लक्षिमपुर आरियाव बाडाइ-गोबां बिबाडै मणिपुरी रावारि मानसिफोरा थाजोरै थाबोदो।

मणिपुरी एबा मैतै/मीतै सोदोबा राव आरो माहारि मोननैखौबो बुजायो। मैतैल'न एबा मीतैल'न आ जाबाय मैतै/मीतैफोरनि राव। ल'न सोदोबनि ओंथिया राव। बे सुबुं फोलेरारि मानसिफोरा तिर्बत-बर्मीय राव फोलेरनि। मीतै मयेकआ मणिपुरीफोरनि गावसोरनि हांखो। 1992 मायथाइयाव मणिपुरी रावआ भारतारि संबिजरनि दाइनथि फारियाव थिसनजायो। मणिपुर, आसाम, त्रिपुरा, मिज'राम, मेघालय, नागालेण्डनि अनगायैबो खोला-सानजा एसियानि म्यानमार आरो बांला हादरावबो बे रावा सोलियो।

बराक सेरफाडाव थानाय मणिपुरी राव बुंग्रा मानसिफोरा 1954 मायथाइनिफ्राय मणिपुराव थानाय गाहाइ ओन्सोलनि गुदि फरायसालिफोराव मणिपुरी रावखौ सोलौंथाइनि बिजो महरै आसाम सरकारा बाहायबाय। 1984 मायथाइयाव आसाम सरकारा मणिपुरी रावखौ सोलौंथाइनि बिजो महरै हाइस्कूलनि जोबथा आन्जादाव नेमबादियै आन्जाद होहोनो गनायथि होयो।

गुबुन फारसेथिं, बुरलुंबुथुर सेरफाडाव थानाय मणिपुरीफोरा स्कुल-कलेजफोराव असमीया रावखौनो सोलोंथाइनि बिजों महरै नाजावबोदों। आसामनि राव सोमावसारनाय, बिजों सोमावसारनाय आरो गुबुनारि होखारनाय सोमावसारनायावबो मणिपुरीफोरा दिनैसिमबो बाहागो लाबोदों।

मणिपुरी एबा मैतै/मीतै समाजा मोन स्नि 'येक-छालाइ' थामहिनबा खेल एबा हान्जायाव बोखावनाय। बेफोर जादों-मडां (निंथौजा), लुवां, खुमन, म'इरां, अड'म, खाबा-डानबा आरो चेंलै। बे मोनफ्रोम खेल एबा हान्जाया माखासे दालाइ हान्जायाव बोखावजानाय। बे दालाइ हान्जाखौ 'युमनाक' एबा 'शागै' होनना बुंनाय जायो। मणिपुरी समाजाव बे येक-छालाइ राहायानो खौसे खालामना लाखिदों।

मणिपुरी समाजाव मोनफा 'युमनाक' एबा "शागै"नि साफा साफा 'पीबा' थामहिनबा गाहाइ थायो। थि 'शागै'नि फोलेर बादिथै फैनाय देरसिन फिसाज्लाखौ उन मोनगिरि बादिथै 'पीबा' मासि होनाय जायो। 'पीबा'फोरा गावसोरनि नखर मोदाइ थामहिनबा 'युमलाइ'नि फुजा-आर'ज गाबनाय समाव गोनांथार बिफाव लायो।

मणिपुरीफोरा आबाद मावनाय-दांनाय खाबुनि थाखाय सरासनस्रायै दैमा जिं एबा गोरलैयै दै मोननाय जायगायाव गामि गायसडो। बारिनि उनथिंजाय हाजों खोबनानै होनाया मणिपुरी गामिनि मोनसे मख'जाथाव आखुथाइ। बेखौ 'लैपन ताखत्पा' बुडो। गामिफोरखौ सामलायनो थाखाय 'खुन अहन' गामि गोरा (गावबुढा) नि राहा दंमोन। आथिखालाव 'खुन अहन'नि गोनांथिया खम जाबोनो हमबाय। गामिनि समाजारि जिउआव गोजोन आरो नखरनि मानसिजों थानो थाखाय गंफ्रोम गामियाव मोनफा मोनफा 'ग'पाल हनजबा' आरो 'गपाल हिदं' समाजारि आफाद थायो। गामिनि बैसोगोराफोरनि गेजेरनिफ्राय सानै मानसिखौ थिसननाय जायो। गामियाव मोनफा मोनफा 'शिडलुप' थायो। बेखौ गामि जौगाथाइनि थाखाय दानाय जायो।

मणिपुरी हारिमुवाव हिन्जावफोरनि गोनां बिफाव दं। जायखिजाया दोहोरोमारि खामानि एबा समाजारि फोरबो, आफाद आरियाव हिन्जाव मानसि थायाब्ला जागायजेननो हाया। बे बिथिडाव हिन्जावफोरनि जायगाया हौवाफोरजों समान। मणिपुरी आइजोफोरा गाव गावनि हारिनि गाननाय-जोमनाय गाननानै हारिनि हारिमुखौ हमथाना लाखिबोदों।

मणिपुरीफोरनि गाहाइ खाजाया ओंखाम आरो नाया मोजां मोनजासिननाय जामुं। समाजारि बादिथै बेदर जानो मोना। मणिपुरीफोरा बैष्णव दोहोरोमारिब्लाबो बिसोर सिबिजाथाव मोदाइ "लाइनिंथौ छानामही", 'इमा लैमरेण शिदबी' आरि मोदाइ-मोदाइजोखौ दोरोडारि आसार-खान्थिजों फुजा होयो।

मणिपुरीफोरा बुंनो थाडोब्ला आबाद मावना जाग्रा हारि। बिसोरनि समाज आरो हारिमुवाबो आबादनि सायाव सोनारनाय। मणिपुरी फोरबो 'लाइ हरावबा'आ आबाद बिथायारिब्लाबो सुबुं आसारजों लोब्बा गोनां। 'लाइ हरावबा'नि ओंथिया जादों 'नुवाथारिखौ गोजोनहोनाय'। 'लाइ हरावबा'या मणिपुरी हारिमुनि

नेर्सेनबादि। मणिपुरीफोरा गोजाम जड़देवताखौ 'उमंलाइ फुजा' दरखडावनो 'लाइ हाराउफम'आव बोसोरफ्रोमबो फालियो। 'लाइ हारावबा'नि गाहाइ महरगिरिया माइबा-माइबी। बे मोसानायनि गाहाइ दामजुडा जादों पेना। बीना रोखोमसे हारियारि दामजु। 'थाबल चं'बि', 'माइबी जग'इ (लाइ हारावबा मोसानाय) या मणिपुरी सुबुं-हारिमुनि बेसेन गोसा सम्पद। बे मोसानाया मणिपुरी हारियारि आरो जारिमिनारि सिनायथि लाखिबोदों। 'लाइ हारावबा' फोरबोनि अनगायैबो 'शजिबु चैरावबा' फोरबोखौ बैसाग दानाव बा सानसिम गोदान बोसोरनि थाखाय फालियो।

नखरारि सोमोन्दो, हाबायारि सोमोन्दोनि बेलायाव 'येक' एबा 'खेल' रहाजों मणिपुरीफोरा दोहोरोमारि नेम-खान्थि, सुबुं आसार खान्थिफोरखौ रैखा खालामनायजों लोगोसे गाव समाज खान्थियाव गुबुन गुबुन सुबुं फोलेरजों गोरोबलायनानै जिउ खांबोदों।

असमीया माहारियारि जिवाव बिहोमा होनाय सानैसो मणिपुरी गेदेमा सुबुंफोरनि सोमोन्दै सुंदयै फोरमायनाय जाबाय।

### नावरिया फुल'

गोदान मुगानि मणिपुरी थुनलाइनि लामा दिन्थिग्रा सुबुंफोरनि मादाव नावरिया फुल'आ गोबां रेंगौथिनि बिगोमा। 1888 मायथाइन 28 आगष्ट खालारखालि आसामनि हाइलाकान्दि जिलानि राजेश्वरपुर मौजानि 'लाइश्रम खुन' मुनि गामियाव नावरिया फुलआ जोनोम जादोंमोन। बिथाडा नावरेम चावबा आरो थम्बौ देवानि बाथि फिसाज्ला। जोनोमावनो महर लाना जोनोम मोननाय सख्ल'-बख्ल' गथ'खौ बिबौआ 'फुन्द्रेइ' थामहिनबा कुन्द मुं दोननायसै। फरायसालिनि फोरोंगिरिया बारसे बिबार बादि नुनाय समायना गथ'नि मुंखौ 'फुल' दोननायसै।

बिथांमोननि आजै-आजौवा राजाजों खुंजानाय मणिपुर हादाबनि फोरजामोन। बिथांमोननि सोरबा सासे बिबौनि बिबौआ राज आफादनि मावख'गोरामोन। उनाव मान बोखावनायाव बिबौनि बिबौ हेरान्दआ गावनि हादरखौ नागारनानै बोखावजानाय हान्जाजों फैनानै बे गामियाव थाजोरै थानो लायो।

नैजि जौथाइनि थामथि जिथाइयावबो (1920-30) मणिपुरी गोदान थुनलाइनि अरुण'दयनि सम। बे जिथाइयावनो सोनाबारि सोलोंथाइजों सोलोंथाइ मोननाय माखासे बिमा राव मोजां मोनग्राफोरा थुनलाइ लिस्नायाव गोसो होयो। नावरिया फुल'आ फोरोंगिरि हाबा मावबाय थानाय समनिफ्रायनो थुनलाइ सोरजिनायखौ राव दानस्लायनायनि गेजेरजों जागायजेनो। 1918 निफ्राय 1919 मायथाइसिम हिन्दु धोरोम बिजाबनि सल'खौ गासै गांबा नायजाब लिरो। बेफोर जाबाय-(1) 'इनिंथौ हरिचन्द्र' (राजा हरिचन्द्र) (2) 'सीता बनबास' (3) 'रामना बनबासतगी हल्लक्लबदा'- (बनबासनिफ्राय रामनि गिदिंफिननाय) (4) 'दुष्मन्त शकुन्तला' (5) 'श्रवन कुमार' उनाव 1930-1940 बोसोरनि गेजेराव खन्थाइ आरो रायथाइ गासै गां 19 बिजाब लिरो।

बिथानि रायथाइफोरनि मुंखथाव बिजाबफोरा जाबाय-(1) “मीतै हौभम वारी” (मीतैनि जारिमिनारि खौरां) (2) “गौड़ धर्म चङ्कपा मतां” (गौड़ एबा गौड़ि दोहोरोम आजावनाय सम) (3) “मीतै येलहौ मयेक”-(मीतै गोजाम हांखो लिरथाइ) (4) ‘अहन याथं’-(गुरुनि बोसोन) (5) “हौरकपा अमसुं हौभम” (आबुं बेंखन) (6) “बाम'नगी मतिक’ (बामोननि गोहोम) (7) एगी वारें (आंनि रायथाइ लिरनाय) बायदि बायदि।

(1) युमलाइर'न-1930 (नखर मोदाइ-मोदाइजोनि मोन्थोर) (2) शिंथा चैथार'न 1930 (दोहोरोमारि नेम-खान्थिनि मोन्थोर) (3) सक'क थीरेन 1931 (सोरजिनि तत्व खोथा) (4) चीनु लाइर'न (चिंनु देवीनि मोनथोर) (5) तेंबानबा अमसुं लाइनिं थौ लाइपाव-1933 (सोरजिग्रानि बाथ्रा बुंनाय) आरो (6) लाइनिंथौ थाइन नंडन-1936 (सोलेरारि आरो संसारारि दोहोरोम लामानि बोसोन) (7) पामहैबा-1947 (पामहैबा राजानि जिउ आखल) (8) अथैबा सैरें-1934 (सावसिन हामसिन खन्थाइ) बायदि बायदि।

1930 मायथाइनि 13 एप्रिलाव नावरिया फुल'आ बिथानि सा 12 गावखौ मोजां मोनग्रा मानसिफोरखौ लाफानानै “अप'कपा मरुप” (अप'कपा समाज) दायो। बे आफाद'नि गेजेरजों बिथानि मोजां बोसोन फोसावनाय आरो गोसारहोनायनि थाखाय बांसिन थुलुंगा मोनना सिगांनो हमो। उन समाव मणिपुरआव अप'कपा समाजखौ दायो। सुबुंनि नोजोराव बिथाडा फिनगायसनफिनग्रानि दैदेनगिरि जानायसै।

बिथानि खन्थाइफोरा दोहोरोमारि सानसि गोनां आरो गोमालांनो हमनाय मीतै मोदाइ-मोदाइजोनि आर'ज, सिबिनाय, मोन्थोर, मेथाइ रोजाबनाय आरिजों आबुं। बेफोर थुनलाइनि बेसेनगोसा सम्पद।

गोबां मेलेम गोनां बे सुबुडा 53 बोसोर बैसोआवनो 1941 मायथाइनि 30 जुन खालारखालि रूसारि जायो।

### मोसानायनि फोरोंगुरु के. यतीन्द्र सिंह

‘बिश्व भारती शान्तिनिकेतन संगीत भवन'नि आजिरा मोननाय गोरायुं गेदेमा मोसानाय आरिमुनि गुरु बिबुंगोरा के. यतीन्द्र सिंहआ 1943 ख्रिष्टाब्दनि एप्रिल दाननि 22 खालाराव आसामनि काछार जिलानि लक्षिमपुराव जोनोम जादोंमोन। गुरु के. यतीन्द्र सिंहआ मणिपुरी नट-संकीर्तन गुरु के. कामिनी सिंह आरो मुस्त्रिमा पश'तलैमा देवीनि फिसाज्ला। उन्दै समनिफ्रायनो बिथाडा जोबोर नोरोम, अनजालु, मेथाइ एबा मोसानो मोजां मोनग्रामोन। फोलेरनि सिनायथिखौ मोजाडै लाखिनो उन्दैयावनो बिफा आरो के. कामिनी सिंहनिफ्राय नाटसंकीर्तन आरो मोसानायनि गुदि फराखौ लायो। उननि समाव बै समनि मणिपुर राज्योनि मुंदांखा मोसागुरु, गुरु ल'केश्वर, गुरु अमुबी आरो गुरु अत'म्बानिफ्राय मोसानायनि गियान लादोंमोन।

1965 मायथाइयाव स्कलारसिप मोननानै बिश्वभारती शान्तिनिकेतनसिम मोसानायनि सोल्लोथाइ लानो फेदोमोन। उनाव मोसानाय सोल्लोथाइखौ फोजोबनानै बेयावनो बिथाडा मोसानाय आरो मेथाइ बिफानाव बिबुंगोरा (प्रफेसार) मासियाव थिसनथाइ मोननानै शान्ति निकेतनाव थाजोरै थानो लायो। फोरेंनायजों समानै बिथाडा मोसानायनि साधनायाव गोसो होथाबो। गुबुन गुबुन मोसानायनि सरजाबनाय आरो गलाय मोन्देरनि गेजेरजों बिथाडा समायना-रमायना गोदान मोसानाय आदब दिहुननानै सोल्लोसाफोरखौ फोरेंदोमोन। हायुडारि आरो हादर गेजेरारि थाखोआव खुंनाय मोसानायनि गोबां मावसाला, सावराय मेल आरो हारिमुवारि हान्जासुरनाय मोसानायनि दिन्थिफुंनाय बिबुंथि लाखिनानै नायग्राफोरनि गोसोखौ जै खालामनो हादोमोन। बिथानि दैदेननायाव शान्ति निकेतननि बेफोरबादि गोबां आरो सावरायमेल खुंनानै मणिपुरी आरो रबीन्द्र मोसानायखौ दावगालांहोनो जेब्लाबो नाजायो। बिथानि सामलायनाय आरो दिथा होनायाव बिथानि फरायसा आरो बिश्व भारतीनि मेथाइ बिफाननि खनगिरिजों लोगोसे खोला आमेरिका, चीन, जापान, मालयछिया, छिंगापुर, फ्रान्स, रछिया, म्यानमार आरो बांला हादरखौ लाफानानै मुलुगनि गुबुन गुबुन जायगायाव मणिपुरी आरो रबीन्द्र मोसानायखौ दिन्थिनानै नायग्राफोरनिफ्राय जोबोर बाखनायनाय मोनदोमोन। मोसानायव बिथाडा जोबोर आखा-फाखा आरो बिथानि आथिंआव जादु गोनांबादि। फुजिजाथाव आरिमुगिरि बिथाडा हादर आरो गुबुन हादरनिफ्राय मोननाय मान आरो देरगानायनिखुइबो फरायसाफोरनि अननाय आरो मोजां मोननायखौ बिथानि गोलाउ समनि मख'जाथाव देरहासारनाय होननानै सानो।

बिश्व भारती, शान्ति निकेतनाव गिबियाव फोरेंगिरि आरो जोबनायाव बोसोरनैसो गोरायुंबादि गिलिरि बिबान लानानै खामानि मावना 2010 मायथाइयाव आजिरा लायो। आजिरा लाखानानैबो मेथाइ-मोसानाय आरियाव जिउ थुंगेजासिम सिबिनाय होलांदोमोन। बिथाडा 'त्रिधर' आरो 'मीरजिंगानसा' मुंनि मोननै टेलिफिल्मावबो फाव दिन्थिदोमोन। गुरु के. यतीन्द्र सिंहखौ 2006 मायथाइयाव मणिपुरी साहित्य परिषद, आसामआ 'मोसानायनि गुरु' 2010 मायथाइयाव राजकुमार बुद्धिमन्त मेम 'रियेल डान्स एकाडेमी, त्रिपुराया राजकुमार मेम 'रियेल एवार्ड' आरो 2012 मायथायाव मणिपुरी साहित्य परिषद, इम्फलआ 'नृत्यरत्न' बिमुंजों मान होयो।

बेसेन गोसा रेंगौथिगोनां गेदेमा आरिमु मोसानायनि गुरु (नृत्यगुरु) के. यतीन्द्र सिंहआ थांनाय 2 एप्रिल 2018 मायथाइनि स'मबारखालि शान्तिनिकेतननि अबल पल्लीनि गावनि नआव जिउ गारो।

### समाज सिबियारि सरस्वती सिंहा

आसाम सोमावसारनायनि दैदेनगिरि, समाज सिबियारि सरस्वती सिंहाया 1958 मायथाइनि 8 सेप्टेम्बरखालि ह'जाइ जिलानि लंका हालामनि आमपुखुरी गामिनि गंसे आबादारि नखराव जोनोम मोनो। बिफानि मुडा वाहेंबम जयचन्द्र सिंह आरो बिमानि मुडा वाहेंबम फजबी देबी।

बिथांनि सोलोंथाइ जिउआ आमपुखुरी गुदि फरायसालिनिफ्रायनो जागायजेनो। काशीपुर एम.भि. स्कुलनिफ्राय वृत्ति लानानै एम.भि. खौ उश्रिनायनि उनाव लंका राष्ट्रभाषा हाइस्कुलनिफ्राय 1976 मायथाइयाव H.S.L.C. आन्जादखौ नैथि थाखोआव उश्रियो। बेनि उनाव नगाव गार्लस कलेजनिफ्राय 1981 मायथाइयाव बि.ए. खौ उश्रियो। गोबां बोसोरनि उनाव 1993 मायथाइयाव नगाव आइन कलेजनिफ्राय एल.एल.बि. डिग्रीखौ लायो।

1982 मायथाइयाव आसाम सरकारनि समाज जौगाखां बिफानाव अंगनबाड़ी खामानि मावग्रा महरै हाबा मावजेनो। साननैसोनि उनाव आमपुखुरी एल.पि. स्कुलाव फोरोंगिरि महरै हाबो। 1985 मायथाइनि 14 सेप्टेम्बर खालि फोरोंगिरि हाबानिफ्रायबो ओंखारबोयो।

2005 मायथाइयाव सरस्वती सिंहानि नाजानायाव मणिपुरी राव थुनलाइ जौगानायनि थाखाय ह'जाइयाव "पान मणिपुरी लिटारेरी फ'राम" (दुलाराय मणिपुरी थुनलाइ आफाद) गायसनो। बे जौसां (मन्स') नि मुडाव बिथाडा गावनि दोहोनजों गुबुन सासे जायगानि खन्थाइगिरि, शानौ राजकुमारआ गांसे खन्थाइ जथायना नं'प'कथ'ड हाडले'खौ सरस्वती सेबखांग्रानिफ्राय दिहुनाय जायो। मणिपुरी राव-थुनलाइ जौगानायनि थाखाय बिथाडा सार्थ गैयाजासे जिउ थाजासिम सिबिलांदोंमोन।

आयेननि डिग्री लानाय सरस्वती सिंहाया 1996 मायथाइयाव ह'जाइनि शंकरदेब नगर कर्टआव सासे उकिल महरै हाबायाव हाबो। बिथांनि बाश्रा दान्थेनाय, मोगा-मोगि जानाय आरो नाजाथाबनाय गुननि थाखाय जोबोर खम समनि गेजेराव सासे जिउखाडारि आयेनगोरों महरै गावखौ गायसंनो हादों। मख'नो गोनांदि बिथाडा आसामनि बुरलुंबुथुर सेरफांनि गिबि मणिपुरी आइजो उकिल।

बिथांनि गोर्बोआ मोनदांदोंमोन-आइजो समाजखौ सिरिमोनखांहोनाया गोनांथार। बेनिखायनो ह'जाइ, लंका, नगाव ओन्सोलनि आइजोफोरनि जौगाखांनायनि थाखाय बायदि आइजो आफाद दानानै बिथाडा गावनो बेनि गुदि हमजेनदोंमोन। बेनि मादाव बयनिखुइ मख'जाथावसिन आफादा जादों ह'जाइनि 'मैरा पाइबी लुप' थामहिनबा 'बोलो फोरानाय आइजो हान्जा' मुंनि आइजो आफाद। 1970 मायथाइयाव नसुंनि मणिपुराव 'अल मणिपुर उइमेन स'सियेल रिफ'रमेसन एण्ड डेभेलपमेन्ट समाज' मुंनि मोनसे आइजो आफाद जोनोम मोनो। बिसोरनि गोख्रों बोलोआ अर सालायनि महर लाना समाजनि खोमसि फोथायनाय आरो गाज्जि खान्थिखौ होखारनो समाजनो सोरां दिन्थिगोन। बे आइजो सान्थ्रियानो समायना समाज दानायनि थाखाय समाजनि गाज्जि आसार-आखुनि हेंथायै सोमावसारनायाव ओंखारबोदोंमोन।

गिबियाव फेग्रा मुवा बाहायनाय आरो जुवा गेलेनायखौ फोजोबस्रानो समाजनिफ्राय जागायजेनदोंमोन। बिथाडा ह'जाइ-लंकानि आइजो समाजाव गोदान सिरिमोनखांनायनि दोहौ लाबोनानै मोनसे जावरिखांनाय लाबोनो हादोंमोन। बिथांनि गोसो मोदोम जिउ होनानै समाज सिबिनाय आरो बिहोमा होनायनि थाखाय मणिपुरी साहित्य परिषद, आसामआ 2012 मायथाइयाव 'समाज सिबिग्रा' बिमुं आरो बान्था होनानै मान हायो। 2012 मायथाइनि 5 डिसेम्बर खालारखालि बिथाडा रुंसारि जायो।

### नं'थ'म्बम बिद्यापति सिंह

मणिपुरनि बायजोआव थानाय मणिपुरीफोरनि गिबिसिन एम.एल.ए. नं'थ'म्बम बिद्यापति सिंहआ सासे बाडारि (गोबां) मेलेम गोनां मानसिमोन। बिथाडा 1912 मायथाइनि 24 नबेम्बर खालारखालि आथिखालनि हाइलाकान्दि जिलानि लाला सोहोराव जोनोम लादोंमोन। बिथांनि बिफा रुंसारि ललित सिंहआ सासे अजा आरो ज्य'तिषीमोन। बिमा रुंसारि माइचन देबीया आसामाव थानाय मणिपुरीफोरनि गिबि डेपुटी इन्स्पेक्टर हिजम रमन सिंहनि बिब'मोन। बिथाडा 1931 मायथाइयाव कलिकता बुहुम फरायसालिनि सिडाव सेथि थाखोआव मेट्रिक आनजादखौ उथ्रिना बेनि उनाव शिलेट मुरारीचान्द फरायसालिमानिफ्राय इन्टरमिडियेट उथ्रियो बै फरायसालिमानिफ्रायनो 1935 मायथाइयाव ढाका बुहुम फरायसालिनि सिडाव जारिमिन आयदायाव अनार्च लाना बि.ए. खौ उथ्रियो।

नं'थ'म्बम बिद्यापति सिंहआ 1936 मायथाइयाव काछर जिलानि स'नाइ एम.इ. स्कुलाव इंराजी आयदानि फोरेंगिरि हाबा मावो। बै समाव स'नाइ ओन्सोलाव एम.इ. बारग'खांनानै गोजौ फरायसालियाव फरायनायनि जेबो खाबु गैयामोन। बेनिखायनो बिथांनि नाजानायाव स'नाइ एम. इ. स्कुलाव गोजौ फरायसालि गायसननानै हाइस्कुलनि सोल्लोंथाइ लानायनि आंखालखौ होखारो।

नं'थ'म्बम बिद्यापति सिंहआ बै समनि सासे गोजौ सोल्लोंथाइ लानानैबो गोरलै जिउ खांदोंमोन। जेब्लाबो धुति पान्जाबी गाननानै सासे नेसोंन दिन्थिग्रा हौवा महरै सानजादोंमोन। बिथाडा फरायनाय-लिरनायाव गोसो होनायनि अनगायैबो नायजाब आरि हारिमुवारि बिथिडावबो सिगांनायमोन।

बिथांनि आफाद दैदेननायाव 1939 मायथाइयाव 'काछर मणिपुरी युव संघ' मुंनि मोनसे आफाद दानाय जादोंमोन। बै संघनि गेजेरजों गाव हारिनि सेंग्राफोरखौ सांग्रां खालामदोंमोन।

1935 मायथाइयाव भारत खुंथाइ आयेननि सिडाव 1946 मायथाइयाव जानाय आसाम बिधान सभानि बिसायख'थियाव बिथाडा खोला हाइलाकान्दि मिरुनिफ्राय कंग्रेछनि सायख'जानाय थान्दै महरै सायख'जादोंमोन। बिथाडा 1951 मायथाइसिम एम.एल.ए. जानानै दंमोन। एम.एल.ए. जाना थानाय समाव बिथाडा गावनि बिमा राव मणिपुरी बिजोंजों सोल्लोंथाइ लानायनि खाबु मोननो थाखाय गोबां खेब दाबी दैखांदोंमोन। बेनि फिथाइ महरै उन समाव आसाम सरकारआ मणिपुरी रावखौ सोल्लोंथाइनि बिजों महरै गनायथि होदोंमोन।



भारतआ उदांसि मोननायनि उनाव 1948 मायथाइयाव सानजा पाकिस्तानाव थानाय मणिपुरीफोरखौ बुग्लुं-बुसि खालामनाय खौरांखौ खोनानानै बिथाडा काछरनि साथाम मणिपुरी दैदेनगिरि आरो सेजौ फरायसाफोर दैथायहरना बै समाव बे जायगायाव थानाय मणिपुरी फोरजा आरो नसुंनि फोरजाफोरनि गेजेराव मोजां सानलायनायजों गोरबलायनानै थानो थाखाय मोजां सुबुरुन होदोंमोन।

गावनि हारि आरो सुबुंनि थाखाय सार्थ गैयाजासे खामानि मावना 42 बोसोर बैसोआव 1954 मायथाइनि 14 सेप्टेम्बर खालारखालि स'नाय सोहोराव नं'थ'म्बम बिद्यापति सिंहआ थैयो।

### सोंथि

1. माब्लानिफ्राय मणिपुरीफोरा आसामाव थाजोरै थानो फैदोंमोन?
2. भारतारि संबिजिरनि दाइनथि फारियाव मणिपुरी रावा माब्ला थिसनजादोंमोन?
3. मणिपुरी मीतै-मैतैफोरनि गेजेराव मोनस्नि खेलनि मुंफोरा मा मा?
4. मणिपुरी मीतै-मैतैफोरनि गावनि नआव फुजा आरो आर'ज गाबनाय मोदाइ-मोदाइजोनि मुडा मा मा?
5. लाइ हारावबाया मा? बोसोरनि बबे दानाव लाइ हारावबा फोरबोखौ फालिनाय जायो? लाइ हारावबा फोरबोआव बाहायनाय रोखोमसे दामजुनि मुं लिर।
6. मणिपुरी मीतै-मैतैफोरनि माखासे मोसानायनि मुंखौ लिर।
7. लिरसुंथाइ लिर :
  - (क) नावरिया फुल'
  - (ख) मोसागुरु के. यतीन्द्र सिंह
  - (ग) समाज सिबियारि सरस्वती सिंहा
  - (घ) नं'थ'म्बम बिद्यापति सिंह



## राभाफोर

राभाफोरा गुबैयै मोनसे थागिबि हारि। बिसोर आसाम, मेघालय आरो सोनाब बंगनि दाब दाब जायगायाव गोसारनानै दं। आथिखालाव राभा हारिनि जायगा, सुबुंअनजिमा आरो सिनायथिफोरा समजों लोगोसे सोराडाव फैबाय आरो गोनोखोआरियै फरायसंनायनि दाहारखौ थियै लाखिलांबाय थायोब्ला राभा सुबुंहारिनि जारिमिनारि उन बिथाया बांसिन रोखा आरो थि महर मोनगोन। 1903 मायथाइयाव सेबखांजानाय Linguistics Survey of India नि बादिब्ला गार' हाजो जिलानि फुलबारीनिफ्राय खोला कामरुपनि रानीसिम, गार' हाजो आरो खाचीया हाजो जिलानि सा सिमायाव थानाय खायसे ओनसोला राभाफोरनि थाग्रा ओनसोल। बेनि अनगायैबो गुबुन गुबुन हादर-नेपाल, भुटान, बांलादेश आरो भारतबर्षनि गुबुन गुबुन राज्योजों लोगोसे आसामनि गुबुन गुबुन जिला-क'कराझार, बडाइगाव, चिरां, बागसा, अदालगुरि, कामरूप, शणितपुर, ग'लाघाट, नगाव, धेमाजी, डिब्रुगड़, शिबसागर आरि जिलानि गुबुन गुबुन जायगायाव जिउ खांनानै दं।

राभाफोरा गावनि जारिमिन, फोथायथि आरो खौगान्थाइजों आबुं मोनसे हारि। भारतनि संबिजिराव राभाया मोनसे जनजाति महरै गनायथि मोननाय हारि। मंगलीय हान्जानि राभा सुबुंहारिया समाजारि बिथिनिफ्राय गोबां दालाइयाव बोखावजानाय जेरै- रंदानी, पाति, दाहरी, मायतरी, क'च, बितलिया, हाना, मदाही आरिफोर।

**राव :** राभा सुबुंहारिया गावनि आंगो राव (दवान) दं। सानखान्थियारि सानजिमाबो दं। राभा रावा थारैनो रावखान्थियारि गनायथाव राव। बिजिरसंनाय आरो सर' खालामनायनि आंखालाव सिगाडाव राभा रावा गोमालांहां थासारि जादोंमोनब्लाबो आथिखालाव बे रावा गोबाडै बुरखांजादों आरो फिन बुरखांनाय आरो सरैखा खालामनायनि गोदान हाबाफारि लानायाव राभा रावा जिउ मोनखांदों।

दासिम राभा रावनि गांनै सोदोब बिहुं दिहुनजाबाय आरो निखिल राभा साहित्य सभानि जानानै आरोबाव गांसे सोदोब बिहुं दिहुननायनि लामायाव। राभा, इंराजी आरो असमीया रावाव 'सामलायसिनि रावछामि' मुंनि आबुं खुंथाइयारि रावबिहुं सेबखांजाबाय। आथिखालाव निखिल राभा साहित्य सभानि

नाजानायव 'फामानसिनि' (सिनायथि) निफ्राय पोरमोतकापसिनि (एम.ए.) थाखोसिम राभा डिप्ल'मा क'र्च' आन्जादनि थाखाय गावबा गाव नाजानायजों फरा बिजाब जथायनानै दिहुनदों आरो आन्जाद खुंबोदों।

**राभा राव जौगानायनि गिबि सम :** राभा राव जौगानायखौ स'नाथि मुगा 'चाम्पाय' आरो 'आगु चाम्पाय' होननानै बुंनाय जादों। 'चाम्पाय' लाइसिनि गेजेरजों राभा रावा जिउ मोनखाडो। बेनि गोबां बोसोरनि उनाव थामहिनबा 2005 मायथाइयाव राभा रावनि जिबा सानारि रादाबबिलाइ 'चिडि' खुरां'आ दिहुनजादोंमोनब्लाबो गोबाव सम जोराखिसै।

**समाज :** राभा समाजा गिबियाव बिमा गाहाइमोनब्लाबो फारियै बिफा गाहाइयाव सोलायो। बबेखानि गथ'-गथाया बिमानि बाराय (ग'त्र) याव थायो। बिफानि बाराया 'पाम' जायोब्ला बिमानि बाराया रंख जायोब्ला गथ'-गथाया 'रंख' बारायाव हाबगोन। बिमानि बारायथिनिफ्राय जेसेबां बाराय जोनोम मोनो बिसोरनो 'माहारी' आरो माहारीखौ नायनानै खाथि सोमोन्दो गोनां माहारीहा दोहोन-दौलदनि बेलायाव आबुं मोन्थाइ थायो। नाथाय एखे माहारीनि रावबो हौवाहा बै दोहोनखौ दाबीनायाव जेबो हेंथा थाया। बेथिनिफ्राय राभाफोरा बिमा गाहाइ हारि।

**हारिमु :** राभाफोरा गावनि मेहेरगोनां सुबुं हारिमु दं। बेबादिनो सुबुं मेथाइ सल'बाथा, सुबुं फोथायनाय आरो सुबुं हारिमुजों बुंफबनाय। राभा समाजाव बाइदि फुजा-होनाय, फोरबो फालिनाय आरियाव मेथाइ खनन्नाय आरो मोसानाय हुदा सोलिबोदों। बे मोसानाय आरो मेथाइफोरा रंजानायनिफ्राय दुखुसिम, गोसो थोनायनिफ्राय नागारलायनायसिम रोखोम रोखोमनि मेथाइ दं।

राभा मोसानाय हारिमुवाव गोदोनिफ्रायनो सोलिबोनाय नेसोना जादों 'मानचालेंका' एबा मासलांखार दाउ। बे मासलांखारनि महराव दंफांनि करुवा आरो दाउदिंखुर आरो गुरुगुवा दाउखौ लानानै गंसे गनसायाव फोनांजाबना लानाय जायो आरो मोसानायनि खबांजों बेखौ हौवाफोरा मोसाहोयो। लोगोसे आइजो मोसाग्राफोरा राभानि गोजाम बीर, जोहोलाव-जोहोलावजोनि थुंग्रि आरो दाहाल लानानै मोसायो। गोदोनि सल' आरो दोरोडारि फोथायनाय बादिब्ला राभाफोरनि राव, हारिमु, जानाय खाजा बायदिखौ बुहुम सोरजिगिरि रिछिनिफ्राय दान महरै मोनदोंमोन। बेयो राभा समाजनि सुबुं फोथायनाय।

**राभा जोहोलाव-जोहोलावजोफोर :** 'बाहारी-स्तान-इ-घायेबी' जारिमिन बादिब्ला जिस्नि जौथाइनि नैथि जिथाइयाव 'छाम्भर' राज्योनि राजाया बीर राजा परशुराम राभामोन। बेफोरबादि राभा जारिमिनाव बीर राजा ददान, मारुक्षेत्री आरि दावहारुफोरनि मुं मोननो थाडो। बे जोहोलाव-जोहोलावजोफोरनि गोबां सल' लिस्थुमनानै दोननाय दं। बेसोरनि खुंथाइ समनि गोबां गोसोखां नेरसोनथिफोरा माकरी हाजो, रंजुलि, कल्यानपुराव दासिमबो दं। बेनि अनगायैबो फेडार ड'बायाव ददाननि जोबथा गोसोखां नेरसोना सिरियै दं।

**राभाफोरनि फोरबो फुजा फालिथाइ :** जारिमिननि बादिब्ला राभाफोरनि बीर राजा ददाननि जोहैनो 'बायख' फुजा होनाय जादोंमोन आरो फारियै बायख'आ फुजायाव महर सोलायनायसै। राभाफोरनि गाहाइ मोदाइया रिछि एबा महादेव। बुंनाय बादिब्ला बाय-ख'कचि मुंनि सानै बिदा-बिनानाव मोदाइनिफ्रायनो बायख' मोदाइ आरो ख'कचि मोदाइजोखौ गोदो गोदायनिफ्राय राभाफोरा फुजा होबोदों। बेनि अनगायैबो लाडा मोदाइखौ हमफाना गुबुन गुबुन मोदाइ-मोदाइजोखौ फुजा होबोदों। राभाफोरा जिउ गैयि बेसादखौ फुजिग्रा। अन्थाइ, बिफां-लाइफांखौ फुजा होनानै अमा, दाउ, फारौ आरि बावो।

**समाजनि आसार-खान्थि :** गोजाम मुगानिफ्रायनो राभाफोरा समाजारियै खौसेथिखौ रैखा खालामबोदों। हाग्रानि जिब-जुनार मैहुर खालामनाय, ना हमनाय आरिखौ हौवा-हिन्जाव जयै खालामो। गामिनि फुजा होनाय, हाबा, सारादु आरियावबो समानै बाहागो लायो। गोजाम मुगायाव जानाय दावहा बिग्राइनायफोरावबो हौवा-हिन्जाव गोखोडै हेफाजाब होलायनायनि फोरमान दं। आबाद मावनाय समाव बयबो लोगो लालायनानै मावो। दावहा-बिग्राइनायखौ मोजां मोनोखायनो राभा हारिखौ क्षत्रिय होननानैबो बुडो।

राभाफोरनि जेसेबां दालाइ दं बेफोरनि मादाव रंदानी, मायतरी आरो क'च राभाफोरासो राभा रावखौ रोंगौ। पाति, दाहरी, बिटलीया हाना आरिया राभा रावखौ रोडाब्लाबो जोबोर आंगो बिसोर गावसोरनि बिमा राव राभा रावखौ बजबना लादों।

राभाफोरनि गोबां सुबुंआ असमिया समाजारि जिउआव बायदि बिथिंआव बिहोमा होबोनानै गोसोखांजाथाव जानानै दं। गाहायाव बेनिनो सानैसोनि सोमोन्दै सुंदयै फोरमायनाय जाबाय।

### कलागुरु बिष्णुप्रसाद राभा :

बिश्वर सन्दे सन्दे

महानन्दे

आनन्दे

नाचा

नाचा तम'हर देउ

नाचा.....

खन्थाइगिरि, थुनलाइगिरि, फावथाइ लिरगिरि, मेथाइगोरों, मोसागिरि, फावखुंगुर बिष्णुप्रसाद राभानि जोनोमा ढाका नोगोरमानि मिलिटरी केम्पआव 1909 मायथाइनि 31 जानुवारियाव जादोंमोन। चर्दार बाहादुर ग'पाल चन्द्र राभा आरो गेथी बाला राभानि गोर्बोआव जोनोम मोननाय बिष्णु प्रसाद राभाया कलागुरु मुडै मिथिजायो। बिष्णुप्रसाद राभानि गुदि सोलेंथाइया ढाकानि गंसे गुदि फरायसालिनि इंराजी बिजोडाव जागायजेनदोंमोन। नाथाय बिफाया उनाव बांला बिजोडाव मुं थिसनदोंमोनब्लाबो उनाव

तेजपुराव फैनानै असमीया बिजोंडाव सोलोंथाइ लायो।

1926 मायथाइयाव तेजपुर हाइस्कुलनिफ्राय जिलानि मादावनो सेथि मासि लानानै मेट्रिक आन्जादखौ उश्रियो आरो 'कुइन एमप्रेछ' बान्था मोनदोंमोन। गोजौ फरायसालियाव फरायफुबाय थानाय समनिफ्रायनो बिष्णु राभाया सिगां सारिनि गेलेग्रामोन। बिथाडा मोजां जोलुर, क्रिकेट, हकी गेलेयोमोन, बेनि अनगायैबो मोजां मेथाइ रोजाबोमोन, मोसायोमोन, फाव दिन्थियोमोन, सावगारि आखियोमोन। महापुरुष (गेदेमा) श्रीमन्त शंकरदेवनि फारसेबो बिथांहा सिबिनाय दंमोन। 1926 मायथाइयाव कलकातानि चेन्टपल कलेजाव बिगियान थाखोआव मुं थिसनो आरो बे बोसोरावनो कलेजनि क्रिकेट हान्जानि केप्टेइन सायख'जायो। चेन्टपल कलेजनिफ्राय सेथि थाखोआव आइ. एस. सि. खौ उश्रिखांनायनि उनाव 1930 माइथाइयाव रिपन कलेजाव बि. एस. सि. थाखोआव मुं थिसनो आरो मुवा बिगियान आयदायाव अनार्च लानानै फरायो। रिपन कलेजावबो जोलुरनि केप्टेइन सायख'जायो। बै समावनो भारतनि उदांसि सोमावसारनाया कलकाता नोगोरमायाव गोहोम खोख्लैदोंमोन। हादर अनसुला बिष्णु राभायाबो सोमावसारनायाव बाहागो लानायनि थाखाय बृटिछनि नोजोराव गोग्लैयो।

सोलो गोरों बिष्णु राभाया सिरि सिरि रिपन कलेजखौ नागारनानै क'च बिहारनि भिक्ट'रिया कलेजाव मुं थिसनो। 21 बोसोर बैसोनि भिक्ट'रिया कलेजनि फरायसा बिष्णु प्रसाद राभाया भारतनि उदांसि सोमावसारनायाव बारसोमनानै बृटिछ खुंथाइनि बेरेखायै खन्थाइ लिरनानै आलायना दोननायसै-

“राइजोहा दं मानै बोरमा  
मासे गोसोम मासे गुफुर  
राइजोनि मोजां हास्थायोब्ला  
मानैबो बोरमाखौ बोलि हो।”

बेयो जादों बिष्णु प्रसाद राभानि जिउनि बिग्रायनायनि जागायजेननाय। बृटिछ सरकारनि खैसाराव गोग्लैनानै भिक्ट'रिया कलेजाव फरायनायनि लामाया गोथेनायाव फिन माइकेल कलेजाव मुं थिसननानै फरायनायाव गोसो होफिननायसै। नाथाय सायख'नाय आन्जादाव बयनिखुइबो बांसिन नम्बर मोनदोंमोनब्लाबो पुलिसनि साजा मोननांनानै माइकेल कलेजखौ नागारनो गोनां जायो। 1931 मायथाइयाव बिथांनि फरायसा जिउवा थुंगेयो।

बिथाडा कलकातासिम थांनानै आखाइयाव खोलोम दैना आबाहन, बाही, लाइसिआव लिरजेननो लानानै असमीया थुनलाइ सिबिग्रा अनसायग्राफोरनि गेजेराव बिष्णु प्रसाद राभा मुडै गोदानै सिनायजादोंमोन। मेथाइ साधनायाव मुखुब थानाय समावनो राछियानि मुंदांखा एकट्रेस आना पाभलभानि मोसानायखौ नायनानै बिथांजों सिनायथि जालायो आरो बिथांनि महरगिरि जिवा बेसेबांबा थुलुंगा मोनखांसिननायसै। आसामनि हारिमुवारि फोथाराव मुंदांखा रोजाबगिरि ज्य'तिप्रसाद आगरवालाखौ लोगो मोननानै बिष्णु प्रसाद राभाया जोबोर गोसो थुलुंगाखांनाय मोनदोंमोन। मेथाइ खननाय, मोसानाय आरो

गुबुन गुबुन हारिमुवारि खामानियाव मुखुब थानाय समावनो खनगिरि प्रियलता दत्तजों 1937 मायथाइयाव हाबा जादोंमोनब्लाबो 28 सानल' संसार जानायनि उनावनो बिसिया थैयो। दुखुआव गोग्लैनानै बिष्णु राभाया मेथाइ सुजुयो-

‘परजनमर शुभ लगनत  
जदिहे आमार हय देखा  
पुराबाने प्रिये एइ जनमर  
मर हियार अपुर्ण आशा

1939 मायथाइयाव काशी हिन्दु मुलुग सोलोंसालिनि हांखायनाय बादियै बिष्णु प्रसाद राभाया मोसानाय दिन्थियो। महादेवनि ताण्डब मोसानायखौ दिन्थिफुंनानै ड° सर्बपल्ली राधाकृष्णनखौ सोमोनांहोनायजों लोगोसे हाजासे साबायखर मोनदोंमोन। बिग्रायारि बिष्णु प्रसाद राभाखौ 1962 मायथाइयाव हादरनि सुथुर खालामना जोबथेना दोनो। बे समावनो नैथि बिसि कनकलता मेधिनि मुन मुन (पृथ्वराज), थुन थुन (हेमराज) नि जोनोमनि उनावनो बिसिया अबथिरा थैयो। बेनि उनाव न'-बां गैजायि जिउ खांदोंमोनब्लाबो बिष्णु राभाया बै समाव स'नपाही, मिसिं कनें, असमीया कृष्टिर चमु आभास आरो अतीत असम आरि बेसेनगोसा बिजाब लिरनानै गालांदों।

बिष्णु राभाया जोबनायाव म'हिनी राभाजों हाबा जायो। गासै जिउखौ नासयजानाय आरो गादबजानायनि बेरेखायै जुजिग्रा बिष्णु प्रसाद राभानि जिउवा जोबनो गैयि दुखु-दाहानि गेजेरजोंबो बिथांजों सोरजिजानाय मेथाइ, मोसानाय, लिरनायफोरा बिथांखौ सुबुं समाजाव थैनारोडै खालामना गालांबाय। 1969 मायथाइनि 20 जुनखालि बिथां बिग्राइयारि दैदेनगिरि कलागुरु बिष्णु प्रसाद राभानि जिउवा अरायनि थाखाय थुंगेयो।

### राजेन राभा :

गुनगोनां फोरोंगिरि, थुनलाइगिरि, अराय समनि बिजिरसंग्रा राजेन राभानि जिउ आरो मावथाइया गुवार। 'सोदोब बिहुडानो आंनि गुरु' होनना बुंनाय राजेन राभाया 'राभा सल', 'राभा जनजाति' आरिनि अनगायैबो ब्रैजिनिखुइबो बांसिन रायथाइ लिरना असमीया थुनलाइखौ दोहोनि खालामना गालांबाय। 1920 मायथाइनि 18 सेप्टेम्बराव दुधनैयाव जोनोम मोननाय राजेन राभाया एम. इ. स्कुलनिफ्राय ओंखारनानै बा रंल' बेथन लानानै गंसे मार'वारी गलायाव खामानि मावनानै जिउ खाडो आरो गावनि नाजानायाव प्राइभेटयै मेट्रिक आनजाद (1955), आइ. ए. आरो जोबनायाव असमीया बिफानाव एम. ए. (1971) खौ उश्रिनानै राभा आरो समाज हारिमु आयदायाव फरायनो लायो। जिउ थाजासिम थुनलाइ सिबिलांनाय, समाज आरो सुबुं मोजांमोनग्रा राजेन राभानि मेहेरगोनां जिउनि सिगां समा जोबोर दुखुनांथावमोन। 1949 मायथाइयाव ज'रहाट नर्माल स्कुलाव दानफायाव 20 रां बृत्ति लानानै लेखा सोलोंनो खाबु मोनो। ग'वालपारा स्कुल ब'र्डआ बिथांखौ जयरामकुछि गेजेर फरायसालिनि

गाहाइ फोरोंगिरि महरै थिसनो। बेयाव थानाय समाव 'उदयन' मुंनि थाम दानारि लाइसि गांसे दिहुनो। बबेखानि बेनि सिगां बिथाडा आबाद मावनाय हाबायावबो गोसो होनायजों लोगोसे मणिहारी दखानबो होदोंमोन। उदांसि सोमावसारनायावबो बाहागो लानानै 'मावगोन नडाबा थैगोन' हान्जायाव हाबदोंमोन। 1938 मायथाइयाव ज'रहाटनि क'किला मुखआव सासे गोरायुंनि सिडाव 'आसाम बंगआरि सारस्वत आस्रम'नि ऋषि बिद्यालयाव बोसोरसे सम संस्कृत आरो बांला राव सोलोडो। बेनि उनाव क'क्राझार गुरु ट्रेनिं मिरुनिफ्राय (1948) डिष्टिंसन लानानै सेथि जायगा, ज'रहाट नर्माल स्कुलनि थाम बोसोरारि जोबथा आन्जाद (1952) आव मोनबा आयदायाव लेटार लानानै नैथि जायगा लाना उथ्रियो आरो तिताबराव बुनियादी फोरोंथाइ कलेजनिफ्राय फोरोंथाइ लायो। 1957 मायथायाव वार्धानि राष्ट्रभाषा प्रसार समितिनफ्राय हिन्दी बिशारद आरो 1972 मायथायाव ड<sup>०</sup> महेश्वर नेउगनि दिथायाव The Rabhas : Their Language and Culture आयदानि सायाव पि. एच. डि. (प्रभिजनेल) लायो आरो 1977 मायथायाव (फोसाबफिननाय) The Rabhas : Their Society and Culture with Special Reference to Non-sanskritized Groups आयदानि सायाव पि. एच. डि. (फाइनेल) खालामो। बबेखानि बे बिजरसडारि (थेसिस) बिजाबखौ गोबां जाहोनाव मुलुग सोलोंसालियाव गथायनायनि खाबुखौ मोनाखैब्लाबो राभाफोरनि सोमोन्दै लिरनाय बेयो गांसे बेसेनगोनां बिजाब जाना थागोन। बिथाडा असम साहित्य सभानि बडाइगाव जथुम्मनि लेडाइ आफादगिरि आरो दुधनै जथुम्मनि रायदाव आफादनि आफादगिरिमोन। बिथानो आसाम सरकारा थुनलाइआरि पेनसन होनायजों लोगोसे 1946 मायथाइआव हादोरारि गुनगोनां फोरोंगिरि बान्थाबो होयो।

### राभा हारिमुनि महरगिरि प्रसन्न पाम :

प्रसन्न पामनि जोनोमा जादोंमोन 1932 मायथाइनि 20 खालाराव ग'वालपारा जिलानि बालिजान सार्कलनि सिडाव थानाय लातापारा गामियाव। बिफानि मुडा कमल कुमार राभा आरो बिमानि मुडा दाखेल बाला राभा। सानजा गार' हाजो जिलानि माणिकगन्ज गुदि फरायसालियाव सोलोंथाइ जुरिजेननाय प्रसन्न पामआ आगिया एम. भि. स्कुलनिफ्राय उथ्रिदोंमोन।

राभा हारिमुनि महरगिरि प्रसन्न पामआ उन्दैनिफ्रायनो राभा हारिमुनि साधनायाव गोसो होथाबदोंमोन। रेडिअ' आर्टिस महरै मुं मोननाय पामआ गोबां मेथाइ लिरनानै देंखो होदोंमोन। बेफोर मेथाइनि बाथ्रा आरो देंखोआ दासिमबो जोबोर अनसायजाबोदों। 'ददान बीर' नायजाबनि गेजेरजों मुंदांखा जानाय प्रसन्न पामनि मारुक्षेत्री (नायजाब), सृष्टिबिधान, मयरा शक्ति, लाडामुक्ति, कामगिरि शक्ति, पिदान संसार, माया हाछं, लेखा तेवा जमा तंचा बाइदि बाइदि बिजाबा फोसावजायालासिनो थालांबाय।

जिउ थाजासिम राभा हारिमुनि थाखाय गोसो होथाबनानै साधना खालामनाय प्रसन्न पामआ 1952 मायथाइयाव अमनीबाला राभाजों हाबा जानानै साब्रै फिसाज्ला आरो साथाम फिसाजोनि बिफा जायो। थानाय 20-02-1978 खालारखालि मोनसे बिसायख'थिनि फोसावथाइयाव गिदिंथिनायाव जाब्रबथायाव गेदेमा सुबुंनि जिवा अबथिरा गोमायो।

## ड° बीरुबाला राभा :

दायना बुथारनायखौ समाजनिफ्राय फोजोबझानानै मोनसे गोगो समाज दानाय हाबायाव नांथाबनानै गावखौनो बावसोमग्रा सोमावसारग्रा आइजो दैदेनगिरियानो जादों बीरुबाला राभा। ग'वालपारा जिलानि ठाकुरबिला मुंनि गोथौ गामि गंसेयाव 1949 मायथाइयाव जोनोम मोननाय बीरुबाला राभानि बिफानि मुडा कालियाराम राभा आरो बिमानि मुडा सागरबाला राभा मोन। गुदि फरायसालिखौ थाम थाखोसिम फरायनानै 15 बोसोर बैसोआवनो हाबा जानाय बीरुबाला राभानि जिउ मावथाइया जुरिजेनो दानाय-लुनाय खामानिनि गेजेरजों। बेनि लोगो लोगो समाजारि गाज्जि आखु दायना बुथारनायनि हेंथायै गोख्रों बाहागो लायो। जिरायनाय गैयाजासे बे खामानियाव नांथाबनाय बीरुबाला राभाया बिथांनि खामानिनि गनायथाइ महरै मोननाय बान्था आरो गनायथाइ मोननायफोरखौ गाहायाव मख'नाय जाबाय-

2005 मायथाइ : गोजोन नबेल बान्था।

2005 मायथाइ : Real Hero गनार्याथि, IBN 18 Network and Reliance Group.

2011 मायथाइ : 'सर्बेश्वर दत्त' मेम'रियेल बान्था।

2011 मायथाइ : उर्मिला दास मेम'रियेल बान्था।

2012 मायथाइ : डिब्रुगड़ महिला क्लबनि 'जयमती बान्था'।

2013 मायथाइ : इंखं वेलफेयार स'साइति क'कराझार जिलानि जोहै 'मेन अब दा इयार' बान्था।

2014 मायथाइ : शिवसागर स'नारी टाइ आह'म युब परिषदनि जोहै 'बीरांगना मुलागाभरु' बान्था।

गुवाहाटी मुलुग सोल्लोसालिनिफ्राय बीरुबाला राभानो माननि डक्टरेट डिग्री होनाय (2015 मायथाइ)।

आथिखालाव 'Mission Birubala'नि गेजेरजों थद'वाजासे दायना बुथारनाय बादि खोमसि फोथायनायनि हेंथायै खामानि मावबोगासिनो दं।

## सोंथि :

1. राभाफोरनि गोजाम थानाय जायगाया बबेयावमोन?
2. समाजारि बिथिंनिफ्राय राभाफोर मा मा हान्जायाव गावझानाय?
3. राभा हारिमुनि नेरसोना मा?
4. राभाफोरनि गाहाइ मोदाइया मा?
5. राभाफोरनि गाहाइ फुजानि मुडा मा?
6. लिरसुंथाइ लिर :
 

(क) बिष्णुप्रसाद राभा	(ख) राजेन राभा
(ग) प्रसन्न पाम	(घ) बीरुबाला राभा





## स'न'वाल कछारीफोर

स'न'वाल कछारीफोरा गिबियावनो मंगलीय महरै आसामाव हाबफैदोंमोन। बिसोर गिबियावनो मुसुखा एबा सुथि (जिउ) गैयैखौ फुजिग्रामोन। समफारियै बिसोरो किरात दोहोरोम नाजावनानै आबादथिलि आरो हान्थामेलानि खाबुनि थाखाय दैमा एबा हाजोनि खाथि-खाला जायगायाव थानायनि थाखाय दैमा-सेरफां थामहिनबा कक्षात→कच्छत→कच्छजों अरि दाजाबदेरनानै कच्छ + अरि कच्छारी एबा कछारी मुडा जोनोम जायो होनना पण्डितफोरा बुंलांदों। ड° सुनीति कुमार च्याटार्जी (चट्ट'पाध्याय) नि बादिब्ला कछारीफोरा दावबायबोनानै गिबियाव 'कुशी' दैमानि बोरि सेरफांआव थानायनि थाखाय बिसोरखौ 'कुशीमार' आरो बै हालामखौ कुशारीयारनि थाखाय कुशीयार→कुशार एबा काशार→कुशारी एबा कछारी होनना बुदों। बे सुबुंहान्जाया जायफोर दैमा-दैसानि सेरफाडाव थानो लादोंमोन बैफोर दैमा-दैसानि सिगाडाव दि एबा टि हांखो बासेब सोदोब दाजाबनानै गाव गावनो दैमानि मुंखौ दोनदोंमोन। बिफोरनि मादाव दिहिं, दिचां, डिब्रु, दैयां, दिमौ, दिखौ, दिगारु, दिछै, डाङरी, डुमडुमा, दिराक, दिखारी, दिक्रं, दिल्लीहर आरियानो गाहाइ।

डिमाचा रावआव स'न'वाल माने गोजों आरो दोहोनि। दासान्दि नेपाल हादरनि सानजाहा किराति होनना गावखौ सिनायथि होग्रा 'सुनवार' सुबुंहान्जानि गेजेराव बे सुनुवार सोदोबखौ मोननाय जायो। बिनिखायनो स'न'वाल सोदोबा तिब्वत बर्मी राव हान्जानि सुनुवार सोदोबनिफ्रायनो फेदों। आदिमफाया लिरनाय साचिपातनि बिजाब 'महान जातिर इतिहास' आव रायखांनाय बादि चुकाफाया सौमारआव हाबनायनि गोबां बोसोर सिगाडावनो स'न'वालफोरा स'ना बुथुमदोंमोन आरो अब्ला, आथिखालनि स'न'वाल सोदोबनि सोलायै सुनुवालसोमोन। गुबुन फारसेथिं जारिमिनगिरि उपेन्द्र नाथ गुहदेव बिथाडा 'कछारेर इतिवृत्त' आव रायखांनाय बादिब्ला सुनाचिरि (दासान्दि सवनसिरि) दैमानि सेरफांआव थानाय मानसिफोरखौ सुनुवाल होनना बुंनाय जायोमोन। बिथाडा बेखौबो बुंदोंदि बुरलुंबुथुरनि साहा सेरफांआव थानाय जायगाखौ हाबुं होनना बुंनाय जायोमोन आरो बियाव रायजो जानानै थानाय कछारीफोरखौ गिबियावनो हाबां→हाबुडीया कछारी होनना बुंनाय जायोमोन। बे हाबुडीया कछारीफोरखौनो सुनुवाल (दासान्दि स'न'वाल) कछारी होनना बुंनाय जायो।

## आथिखाल समाजाव खुंनायनि राहा :

श्रीमन्त शंकरदेवनि रायखांजाथाव बिहोमाया जाबाय नामघर। गामिखौ आबुथियै दैदेनलानो गामियाव बारीक, पाठेक, आशीर्बदीया, गीत घाइ, मेधि, तामुली, रन्धनी आरि बिबान दाना होनाय जायो। गामिनि गायामारि खामानि, रंजाथाइ फोरबो तिथि आरिखौ बिबानगिरिफोरा मोजाडै सामलायनांगौ। स'न'वाल कछरी गामिनि नाम घराव रायजोनि मेल मकदमा आरो बायदि दाय-फोदो बिजिरनायनि जथुम जयो। बिजिरनायाव जुरिमाना नाडोब्ला रायजोनि थुबिलाव दोनथुमगिरिया जमा दोनो।

**दोहोरोम :** स'न'वाल कछरीफोरा 830 खी: निफ्राय शाक्त एबा पुरातन दोहोरोम फुजिग्रामोन। नाथाय 1681 मायथाइ (1600 शक) याव आहमनि सर्गदेउ गदापानिनि राज फाखनाव गोग्लैनानै श्रीश्रीकेशवदेव ग'स्वामी देवआ शदियानि स'न'वालफोरनि गोहोमारि हालाम आथुकढा चापरि आथिखालनि कुण्डिल आरो बुर्लुबुथुर सेरफानि हालामाव थाखुमाना थानाय समाव जोबोर सोलोजों स'न'वाल कछरीफोरखौ 'शरण' लाहोनानै मोननै दोहोरोमाव बोखावनानै दोनो। सत्राधिकारनि सेराव शरण लानायफोरखौ हिन्दुरीया आरो शरण लायैफोरखौ बेहारी होनना मुं दोननायसै। आरो बै समनिफ्रायनो स'न'वालफोरनि गेजेराव 'ग'साइ नाम' सोखनजायो। सत्राधिकारआ शरण लाहोब्लाबो दासान्दि स'न'वाल कछरीफोरा मोननै दोहोरोमारि। शरण लानायनि उननिफ्राय स'न'वालफोरनि गेजेराव नामघर गायसननाय खान्थिया सोलिनो हमो।

**स'न'वाल कछरीफोरनि समाज खान्थि :** स'न'वाल कछरीफोरनि गिबि सिनायथिया सँच एबा न'खर, फोलेर, खेल आरो कुचीया। दासान्दि स'न'वालफोरनि मादाव मोन 135 सँच दं। बेनिनो मोनब्रै एबा बेनि बांसिन सँच लोगो नांना मोनफा फोलेर जायो। स'न'वाल कछरीफोरनि गेजेराव गासै मोन 25 फोलेर दड। बेनिनो मोन जिब्रै फोलेरखौ सायख'नानै कछरीनि हादर गाहाइ माणिका हालाली राज्योखौ खुंदोंमोन। स'न'वाल कछरीफोरनि जुलिन बिथिडाव गिबियावनो सँच आरो फोलेर बिजिरनाय जायो। मोनसे सँच एबा फोलेरनि मानसिखौ न'खरसेनिनो बिदा-बिफं महरै गनायनाय जायो।

**स'न'वाल कछरीफोरनि न' लुनाय खान्थि :** हायदां मेथाइनि बादिब्ला-सानजाहा बाख्रि, सोनाबहा गन्द्रा, साहा इसिं आरो खोलाहा मोसौ गलि। बिसोर नमा न'खौ सानजाहा मोखांयै आरो मारल न'खौ साहा खोलायै लुयो। साहाथिडै मजिया एबा इसिं न'खौ लुयो। आलासि जिरायनो थाखाय मारल न'खौ लुयो।

**सुबुं थुनलाइ :** सुबुंनि खुगा खुगा सोलिनाय एबा रनसायजानाय थुनलाइयानो सुबुं थुनलाइ। बेदि थुनलाइया खुगा खुगा बारस्लायबोनानै मुगा मुगा सोलिबोनानै कृष्टि, हारिमु जारिमिन रुजुनना लाबोदों। बेनि अनगायैबो खुगा खुगा रनसायनाय, खुगा खुगा बारस्लायबोनानै फोथाना लाखिनाय गोजाम नाम, बेलाड, बाथ्राफाव, बाथ्राफान्दाय, सल'बाथा आरिफोरा मुंख'जाथाव। दासिम मोननाय सुबुं थुनलाइफोरनि

गेजेराव हायदां मेथाइ, हुसरि मेथाइ, बहुवा मोसानायनि मेथाइ, आइनाम, धाइनाम, लखिमी नाम, अपेस्वरी नाम, ग'साइनि मेथाइ, फुलक'वर, मणिक'वरनि मेथाइ, जना गाभरुनि मेथाइ, मारा होनाय मेथाइ, बिहु मेथाइ, तरासिया मेथाइ आरियानो गाहाइ। खुगा खुगा बारस्लायबोनाय बै थुनलाइफोरा अदेबानि दासान्दि लिरनाय महराव फोसावजानो हमबाय।

### स'न'वाल कछरीफोरनि दोहोरोम बिथायारि फुजा-फोरबो :

स'न'वाल कछरीफोरनि गेजेराव मोननै दोहोरोमा गोहोम गोलैदों। शाक्त आरो बैष्णव। रामायण महाभारतनि दिननिफ्रायनो स'न'वालफोरा किरात एबा गोजाम दोहोरोम फालिबोगासिनो दड'मोन। नाथाय 1681 मायथाइनिफ्राय बैष्णव दोहोरोमनि गोहोम गोलैदोंब्लाबो गोदान बैष्णव दोहोरोमा स'न'वालफोरनि फुजिनाय थिनायाव जुनियायै गोहोम खोख्लैनो हायाखै। दोरों महरै सोलिबोनाय गेवलांसारबोनाय फुजाफोर जैरै-बाइथ' फुजा, गुजाइ फुजा, गातिगिरि फुजा, सर्गदेउ फुजा, जलखाइ फुजा, क्षत्रिय शालनि फुजा, बुढ़-बुढ़ी शालनि फुजा, बलिया बाबानि फुजा, केचाइखाती फुजा, कलि आइ सबाह, लामा गाथेनाय सबाह, खिनभडा फुजा, ग' कालिका फुजा, कुलातामन फुजा, बरचामन फुजानि अनगायैबो-लखिमी त'ल सबाह, भुर फोजावहरनाय सबाह, बालि सबाह, चेडेली माछइ सबाह, नरा छिगा भ'ज, गरखीया सबाह, बारी चुकर सकाम, मराक दिया, पिण्ड होनाय, आयुत'ला, आइ सबाह, अपेस्वरी सबाह आरि दड'। मोसानायनि गेजेराव बहुवा नृत्य, हुग्रानृत्य, लेछेरी, कुला बुढ़ी मोसानाय, हायदां मोसानाय आरिया स'न'वालफोरनि गेजेराव जोबोर गोनांथार जायगा लानानै दड'।

स'न'वाल कछरीफोरनि दासान्दि थाग्रा जायगा : मिथिंगा आरो गुबुन गुबुन हान्जाजों लोगोसे दावहा नांनो गोनां जानायाव स'न'वालफोरनि बाहागोसेया शदियानिफ्राय फैनानै खर'सा आसामनि दासान्दि जिसे जिलायाव गोसारनानै थायो। खर'सा आसामनि बै जिलाफोरा जाबाय-लक्षिमपुर, धेमाजी, तिनचुकीया, डिब्रुगड़, शिबसागर, ज'रहाट आरो ग'लाघाट जिला।

असमीया हारिमायारिखौ दाफुनायाव बिहोमा होनाय सानैसो सन'वाल कछरी गेदेमा सुबुंफोरनि जिउखौरांनि सोमोन्दै गाहायाव सुंदयै सावरायनाय जाबाय।

### निजोम सोरसिगिरि गगन चन्द्र स'न'वाल :

थुनलाइ हारिमुनि सोरसिगिरि गगन चन्द्र स'न'वाला तिनचुकीया जिलानि बरहापजाननि खाथिनि शुकानगिरि चाहाबागानाव 1926 ख्रीष्टाब्दि 24 डिसेम्बर खालाराव जोनोम जायो। डाडरि गामिनि तिलक स'न'वाला बिथांनि बिफा आरो अदिति स'न'वाला बिथांनि बिमा।

माकुम गुदि फरायसालियाव बिथांनि सोलेंथाइ जिउवा जुरिजेनो। बिनि उनाव डाडरी गेजेर इंराजी फरायसालियाव फरायो आरो डाडरी इंराजी फरायसालिनिफ्राय मेट्रिक आनजादाव उश्रिसारो। डिब्रुगड़नि

गोजौ सोल्लोथाइनि मिरु डिब्रुगड़ हनुमान बक्स कानै कलेजनिफ्राय आरिमु बिफानाव प्रि-डिग्रि आनजादाव उश्रिसारनायनि उनाव बिथानि सोल्लोथाइ जिउआ एसेयावनो थुंगेहैयो। तिनचुकीया जिलानि काकपथाराव 1947 ख्रीष्टाब्दआव गेजेर इंराजी फरायसालियाव सासे गायसंगिरि फोरोंगिरि महरै खामानि मावना 1988 ख्रीष्टाब्दनि 31 डिसेम्बरआव हेफाजाबगिरि फोरोंगिरि मासिनिफ्राय आजिरा लायो। फोरोंगिरि मावनायनि अनगायैबो स'न'वाल बिथाडा गावनि आथिडाव गसंना जिउ खानायनि थाखाय आबादनि खामानियावबो नांथाबदोंमोन।

डाडरीनि गेजेर इंराजी फरायसालियाव बा थाखोयाव फरायबाय थानाय समावनो गगन चन्द्र स'न'वाल बिथाडा थुनलाइ सोर्जिनाय खामानियाव आखाइ होजेनो। फरायसालिनि आखाइजों लिरनाय सानमालाइसि बिलाइयावनो 1942 ख्रीष्टाब्दआव “मानव सभ्यता आरु क्रमबिकाश” रायथाइखौ जिसे बोसोर बैसोआव लिरदोंमोन। बे समाव मुंदांखा गुवाहाटीनि ‘तरुण लेखक संघ’नि गिबि ओंखारजेननाय खुगा बिलाइ “तरुण जागरण” आव “स'न'वाल कछारीनि” हायदां मेथाइखौ फोसावदोंमोन। बिथाडा रनसायनाय मोन नैजिसे सल'बाथाखौ असम साहित्य सभाया “स'न'वालर साधु” मुडै 1978 ख्रीष्टाब्दआव फोसावो। स'न'वाल बिथानि थुनलाइ सोरजिफोरा जादों- (1) स'न'वाल कछारीसकलर ऐतिज्य' (स'न'वाल कछारीफोरनि जारिमिन); (2) 'असमर संस्कृतित स'न'वालसकलर अवदान' (आसामनि हारिमुवाव स'न'वालफोरनि बिहोमथाय) आरि गां नैजिब्रै गावनि रायथाइ; (3) सुबुं थुनलाइ बुथुमनाय जेरै-गीत-मात, हायदां हुचरि, आइनाम, अपेस्वरा नाम, लखिमी नाम आरि (4) गुबुन गुबुन सुजुबिदांआव दड' जिथाम बेसेनबहरा रायथाइ (5) बिबुंसार मालायाव सोखनजादों मोनजिगु बिबुंसार। हारिमुवारि जिउनि गुरु बिष्णु प्रसाद राभाजों लोगो नांना स'न'वाल कछारीनि समाज जिउनि जारिमिन हुचरि मेथाइखौ छैख'वानि बिछनी गामिनिफ्राय 1942 ख्रीष्टाब्दआव बुथुमदोंमोन।

बिथाडा काकपथाराव गिबि दालाइ थुनलाइ आफाद दादोंमोन। बोखावजायै डिब्रुगड़ जिलानि आफादगिरिनि मासिखौबो समायहोदोंमोन। असम साहित्य सभानि गोबां जथुम्मायाव बिथाडा थान्दै महरै बाहागो लादोंमोन। असमीया राव-थुनलाइ हारिमुनि सासे गोसोगोनां मावथि महरै गनायथि होनानै असम सरकारा स'न'वाल बिथानो थुनलायारि पेन्सन होयो। गगन चन्द्र स'न'वाला सदौ असम जनसंस्कृति परिषदनि गिबि मावफुं आफादगिरि जादोंमोन आरो उनाव आफादगिरि मासिनि गिलिर बिबानखौ बानस'दोंमोन।

2009 ख्रीष्टाब्दनि 27 अक्ट'बर खालाराव गगन चन्द्र स'न'वाला सोरगोआरि जायो। थांना थानाय समाव बिथाडा मावलांनाय गायामारि गाहाम हामब्लायारि आरो दावगालु मावखान्थियारि सानस्रिया गगन चन्द्र स'न'वालखौ गोसोखांहोबाय थागोन।

**परशुराम स'न'वाल :**

परशुराम स'न'वाला जोनोमा जायो 1904 मायथाइनि 25 मे खालाराव नगाघुलि चाहा बागानाव. बिथांनि बिफानि मुडा पन्सानन स'न'वाल आरो बिमानि मुडा गुटिमाला स'न'वाल। ग्रेहेम बजानि गुदि फरायसालियाव परशुराम स'न'वाल बिथाडा गुदि सोलोंथाइखौ जुरिजेनो। उनाव गभर्णमेन्ट बयेस हायार सेकेण्डारि स्कुलाव मुं थिसनो आरो बै फरायसालिनिफ्रायनो 1924 मायथाइयाव सेथि थाखोयाव मेट्रिकनि देवनाखौ बारग'यो आरो कटन कलेजनिफ्राय आइ. ए. आरिमु बिफानाव सेथि थाखोयाव उश्रिसारनानै कलिकतानि प्रेसिडेन्सि कलेजआव मुं थिसनहैयो। बै कलेजनिफ्राय 1928 मायथाइयाव जारिमिन आयदायाव अनार्स लानानै आरिमु जालिया (B.A) डिग्रीखौ सेथि थाखोयाव उश्रिनो हायो। 1930 मायथाइयाव इउनिभारसिटि अब कलकातायाव मोनसे समावनो मोननै मुंथियाव थामहिनबा आरिमु गोरा (M.A) आरो एल. एल. बि आव मुं थिसननानै 1932 मायथाइयाव आरिमु गोरा (M.A) याव जारिमिन आयदायाव सेथि थाखोनि नैथि जायगा आरो लोगोसे एल. एल. बि. नि आनजादाव मेरिटनि फारिलाइयाव इउनिभारसिटिनि मादावनो नैथि जायगा मोननानै गावखौनो मेलेम गोनां होनना सिनायथि होनो हादोंमोन।

परशुराम स'न'वाला खालि सासे सोलोंथाइनि बिथिंआवल' जाफुंसारमोन बे नडा गेलेनाय, मेथाइ रोजाबनाय, लिरनाय (सल' रायथाइ) आरिजों लोगोसे मुसुखा आरिमुआवबो आखा फाखामोन। बिथांनि सल'आरिया बै समाव फोसावजानाय Illustrated Weekly of India सानमालाइसियाव लेन्थ्रियै फोसावजादोंमोन आरो गोनां जानाय सावगारिफोरनि स्केसबो गावनो हादोंमोन।

जा समाव आसामाव टेनिछ, फुटबल आरो हकी खेलानि जेबो सिनायथियानो गैयामोन, बै समखिनियाव परशुराम स'न'वालआ गावनि आखाफाखाथिजों प्रेसिडेन्सि कलेजनि फुटबल, हकी आरो टेनिछ गेलेनायाव मोनसे आलादा मासि आवग्रिनो हादोंमोन। बिथांनि आखा-फाखाथिखौ नुनानैनो इउनिभारसिटि अब कलकातानि हकी हान्जानि दैदेनगिरि महरै बिसायख'हरजानानै गोबां बादायलायनायाव गावनि गोहोखौ दिन्थिनो हादोंमोन आरो आसामाव बेनि गोसारहोनो हादोंमोन। बिथाडा खामानि जिउखौ जुरिजेनो 1934 मायथाइनि 14 एप्रिलखालि। बै अक्ट'आवनो बिथाडा डिब्रुगड़ उकिल सन्थायाव मुं थिसनो। बे उकिल सन्थायाव मुं रेजिस्टार खालामनाय एम. ए., एल. एल. बि. गिबि असमीया सुबुंआनो जाबाय परशुराम स'न'वाल।

बिथांनि खामानि जिउआव बिथाडा गोबां समाजारि (गायामारि) खामानियाव लोब्बा लाखिदोंमोन। इंराजनि खुंथाइ समाव आसामाव जा गोदानारि जिउ खानाय आदब जाखांबोदोंमोन, बैफोराव परशुराम स'न'वालआ गासैबो बिथिडावनो हेफाजाबनि आखाइ फोलावदोंमोन। गोजौ सोलोंथाइनि थाखाय डिब्रुगड़ नोगोरनि गोबां नोगोरारिया कलेज गंसे गायसंनो जा बिथांखि नाजावदोंमोन, परशुराम स'न'वालआ

बेनि सायाव मदद होना नै बेसेन लायाजासे बोसोरसे हारसिडै-नो कलेजनि जारिमिन बिफानखौ सामलायदोंमोन।

बेफोर समाजारि जिउजों लोब्बा गोनां स'न'वाल बिथाडा फारियै डिब्रुगड़ ल'केल बर्डनि मावफुंसोद्रोमा, आसाम मेडिकेल स्कुल बर्डनि सोद्रोमा, जिला ट्राइबेल लीगनि आफादगिरि आरि जों सरजाबफाना डिब्रुगड़ उकील सन्थानि खेबनै नेहाथारि महरै खामानि मावनानै बयनिबो नोजोर बोनो हादोंमोन। उदांमिनि उननिसम बुब्लियाव आसामनि गोग्लैसोना थानाय सुबुं माहारि हान्जाफोरनि गामियारि, सोलोंथाइयारि, रांखान्थियारि आरो हारिमुवारि बिथिंखौ जौगाहोलांनो दाजानाय दुलाराइ आसाम ट्राइबेल लीगनि थाखाय बिथाडा गावखौ बाउसोमनानै गोबां बिहोमा होलांदों।

बिथाडा 1960 मायथाइनि से अक्टबरखालि रुंसारि जालाडो।

### बरायजाथाव थुनलाइगिरि आरो सोलोंथाइगिरि ज'गेश दास :

1927 मायथाइयाव डुमडुमानि हाहचरा चाहा बागानाव गोसोखांजाथाव सोलोंथाइगिरि आरो मुंदांखा थुनलाइगिरि ज'गेश दासा जोनोमा जादोंमोन। बिथानि बिफानि मुडा सुर्यकान्त दास आरो बिमानि मुडा चिन्तामनि दासमोन। चाहा बागाननि हायना गोनां मिथिंगानि सोरदिंथाइयाव गेदेर-गोलाउ जानाय ज'गेश दासा चाहा बागाननि गुदि फरायसालियावनो सोलोंथाइ जिउखौ जुरिजेनो। डुमडुमा गेजेर फरायसालिनिफ्राय देरहासारै उथ्रिसारनानै डिब्रुगड़ जर्ज इन्ष्टिटउसन आथिखालनि बाग्मीबर नीलमनि फुकन हायार सेकेण्डारि फरायसालियाव गोजौ फरायसालिनि सोलोंथाइखौ नाजावो। 1954 मायथाइयाव जोबोर देरहासारै मेट्रिक आनजादखौ उथ्रिसारो। 1949 मायथाइयाव कटन कलेजनिफ्राय आरिमु जालिया बिमुंखौ मोननानै गुवाहाटी मुलुग सोलोंसालिनिफ्राय 1953 मायथाइयाव आरिमुगोरा बिमुं मोनो। फरायसा समनिफ्रायनो बिथाडा सल' रनसायनानै सासे राफोद सल' लिरगिरिनि सिनायथि होदोंमोन। 1953 मायथाइयावनो बिथानि सल'मा 'खहारि पाइ' बिजाबा फोसावजादोंमोन।

**खामानि जिउ :** डुमडुमा गोजौ फरायसालियाव फोरोंगिरि मावनायजों खामानि जिउ जुरिजेननाय ज'गेश दासा 1953 मायथाइनिफ्राय 1988 मायथाइसिम गुवाहाटी बि. बरुवा. जौमा फरायसालियाव बिबुंगिरि जायो आरो असमीया बिफाननि गाहाइ बिबुंगोरा महरै आजिरा लायो। गियाननि सोरसिनायानो बिथानि जिउनि गाहाइ थांखिमोन।

फोरोंगिरि मावनाया बिथानि गोरबोनि हांखायनाय आरो जिउनि गोथारथि हास्थायनायब्लाबो समब्रा-समब्रि महरै असमीया थुनलाइखौ जौगाहोलांनानै मुलुग दरबाराव गायसंहैनायनि जा थुलुंगा बिथानि गियान-अरथाइ हुदा-फारियानो बेनि साबसिन बिदिन्थि। फोरोंनाय, थुनलाइ सोरसिनाय, गियाननि फोसावथाइ-गोसारथाइखौ बिथाडा जिउनि ब्रत महरै गनायथिदोंमोन। बेनिखायनो मावनां हाबा आरो बिबाननि सायाव बाया मोजोमा रादाब बुथुमगिरि बिथिंआवबो लोब्बा लाखिनानै जोबोर गोसो होथाबनानै

हादोर सिबिनाय, सुबुं सिबिनाय आरो समाज सिबिनायाव मुखुब जादोंमोन। 'नतुन असमीया' रादाब बिलाइनि लोगो सुजुगिरि 'दैनिक आसाम' रादाब बिलाइनि लोगो गाहाइ सुजुगिरि 'प्रहरी' आरो 'अधिनायक' नि सुजुथाइजों लोब्बा दडमोन। बिथाडा 'असम साहित्य सभा-पत्रिका' निबो सुजुगिरि मोन।

**थुनलाइयारि बिहोमा :** ज'गेश दासा सासे मुंदांखा, जाफुंसार आरो सुबुंथियारि गोनां थुनलाइगिरि। ज'गेश दासनि सल' बिजाबफोरा जादों-पपीया तरा (1956), डावरर आरे आरे (1958), त्रिबेणी (1961), मदारर बेदना (1963), आरो हजार ल'कर भीर (1965)। सल'माफोर- सँहारि पाइ (1953), डावर आरु नाइ (1955), जनाकीर जुइ (1956), उत्कन्थ उत्कन्थ (1960), छा जुइ खेदि (1961), निरुपाय निरुपाय (1963), एमुठि धुलि (1965), हेजार फुल (1967), अबैध (1972), जुइर ध'वा (1972), नरेश, मालती (1977) आरो रजनी बिदूर (1981) आरि। बेफोरनि अनगायैबो बिथाडा गुबुन गुबुन गोबां बिजाब लिरनानै गालांदों। बेफोर जादों इंराजी बिजाब Folklore of Assam, रावस्लायनाय बिजाब 'बने बने', जिउखौरां बिजाब 'हेम बरुवा' आरि।

**मान मोननाय आरो बान्था मोननाय :** 1985 मायथाइनि 8, 9 आरो 10 फेब्रुवारीयाव बिहपुरीयानि श्रीश्रीमाधबदेब क्षेत्रयाव ज'थुमनाय असम साहित्य सभानि बाजिथि जथुमानि आफादगिरि जायो। साहित्य सभानि आफादगिरिनि बिबुंसारव बिथाडा जोबोर दोल गोनां आरो अराय गोसोखांथाव बिबुंसार होनानै सासे गेदेमा सानसुमैनि सिनायथि होलादों।

बिथां रोंगसार लिरगिरि ज'गेश दासा जिउआव गोबां बान्था नाजावनो हादों। 1980 मायथाइयाव 'पृथिबीर असुख' मुंनि बिजाबनि थाखाय साहित्य अकाडेमी बान्था मोनो। 1986 मायथाइयाव 'आकौ बने बने' बिजाबनि थाखाय 'म'क्षदानन्द पाठक शिशु साहित्य बान्था' 1989 मायथाइयाव 'सीतानाथ ब्रह्म चौधुरी बान्था' मोनो। 'एनाजरी' बिजाबनि थाखाय 1994 मायथाइयाव बिथांनो 'असम उपत्यका बान्था' होनाय जायो।

बिथाडा 1999 मायथाइनि 9 सेप्टेम्बराव रुंसारि जालाडो।

### आसामनि बारग' गिबिमन्थि ज'गेन्द्र नाथ हाजरिका :

आसामनि बारग' गिबिमन्थि ज'गेन्द्र नाथ हाजरिकाया आसामनि सुबुं समाजनि गेजेराव योगेन हाजरिका मुडै बांसिन मुंदांखा। मानसिया गासैबो गुनजों समाइफबनाय, गाननायाव गुफुर खहरनि खसाब, समायना सोलेरनि दाथाय, दिदोम गुरै, गासैबो बिथिडावनो आबुथि, रायलायनाय-बुंनायाव जोबोर हमथा हमथा, जोबोर माहि आसार आखु, सोलोगोरों सुबुंथिनि गुनजों आबुं सासे गुफुरै गोजौ गेदेर गोरलैयैनो बयखौबो गोसो बोनो हानाय सुबुंमोन। बिथाडा निहोरनि दै बायदि जोबोर गोथार गोरबोनि आरो गोगो आखुनिमोन।

बिथाडा फारियै सासे गोरों फरायसा, आदर्श समाज खान्थियारि, गाहाम गौथुम दागिरि, मोजां लिरगिरि, सोलोगोरा, सानमालाइसि सुजुगिरि, आइन खान्थियारि, राफोद सांसद, भारतनि गिबि गुबुनारि बिफाननि संसदारि नेहाथारि, सोलोगोरों राजखान्थिगिरि, एम. एल. ए. राफोद खुंगिरि, बिधान सभानि बुंथिगिरि आरो आसामनि बारग' गिबिमन्थ्रि।

आसामनि डिब्रुगड़ जिलानि टेडाखात ओनसोलनि पुरनिखडीया गामियाव 1924 मायथाइनि 24 फेब्रुवारी खालाराव गोरिब न'खराव ज'गेन हाजरिका बिथाडा जोनोम जादोंमोन। बिथांनि बिमा-बिफा फारियै ग'लाप चन्द्र हाजरिका आरो रत्ना हाजरिकामोन। रांआरि थोब्ले-माब्लेनि थाखाय बिथांनि न'खरा जोनोम जायगा टेडाखातनिफ्राय बुढीदिहिंनि सेरफांनि हातीबन्धा गामिसिम खारलांदोंमोन। हातीबन्धा गामियाव बै समाव गंसेबो गुदि फरायसालि गैथैलाय ज'गेन हाजरिकाया टेडाखाटघाहि गामिनि गावसोरनि फोलेरनि गंसे न'खराव थानानै खाथिनिनो भेक'वाजान गुदि फरायसालियाव सोलोंथाइ लायो। रांआरि लोरबांथिनि थाखाइ योगेन हाजरिकाया चाना बादाम फानथिंन रां बुथुमनानै सोलोंथाइ लानो गोनां जादोंमोन। सानै अनजालु सुबुं बै समनि डिब्रुगड़नि ल'केल बर्डनि सेयारमेन, चाहा-आबादारि डम्बरुधर शइकीया आरो डिब्रुगड़नि गिबि सिरिनि आइनगिरि, सोलोंथाइगिरि, समाज सिबियारि परशुराम स'न'वालनि थुलुंगा, रांआरि अनसुंथाइयाव 1941 मायथाइयाव डिब्रुगड़ गभर्णमेन्ट बयेस हाइस्कुलनिफ्राय मेट्रिक आनजादाव उथ्रिसारनानै 1946 मायथाइयाव कटन कलेजनिफ्राय आरिमु जालिया (बि.ए.), 1989 मायथाइयाव कलिकता मुलुग सोलोंसालिनिफ्राय रांखान्थि बिगियानाव आरिमुगोरा (एम.ए) आरो 1952 मायथाइयाव आइननि डिग्री लायो। मुंख'थावदि ज'गेन हाजरिकाया स'न'वाल हारिनि नैथि एम. ए. आरो थामथि बि. एल. डिग्री मोननाय सुबुंमोन।

1952 मायथाइयाव उदांमि भारतनि गिबि साधारन बिसायखथिखौ खुंदोंमोन। हाजरिका बिथाडा बे बिसायख'थियाव डिब्रुगड़ ल'कसभा समष्टिनिफ्राय भारतारि हारिमायारि कंग्रेछ हान्जानि जानानै बिजाथि जानानै गोबां भ'ट मोननानै देरहासार जानानै एम. पि. महरै बिसायख'हरजायो आरो फारियै 1967 मायथाइसिम ल'कसभानि एम. पि. मोन। गिबि साधारण बिसायखथिनि सिगां 1951 मायथाइयाव बिथाडा दुलाराय आसाम ट्राइबेल लीगनि दैदेनगिरि जाना थानाय समाव बोसोरसे सम जुगामिनडै एम. पि. नि दैथायहरजानाय सोद्रोमामोन होनना मिथिनाय जायो। बिथाडा ल'कसभानि सासे रोंखा-राखा एम. पि. मोन। बेफोरबादि आखा-फाखा गुननि थाखाय बै समनि गाहाइ मन्थ्रि जवाहरलाल नेहरु बिथाडा ज'गेन हाजरिकाखौ 1952 मायथाइनिफ्राय 1967 मायथाइसिम गुबुनारि बिफाननि संसदारि नेहाथारि महरै थिसनदोंमोन।

संसदारि राजखान्थिनिफ्राय हाजरिका बिथाडा दाइनजि जिथायाव आसामनि राजखान्थियाव बिधान सभानि सिथलायाव आगान होयो। बिधान सभानि बिसायख'थियाव बिथाडा डिब्रुगड़ जिलानि



दुलीयाजान समष्टिनिफ्राय जनता दलनि टिकट लाना बिजाथि महरै गसंनानै आसाम बिधान सभासिम बिसायख'हरजायो आरो आसाम बिधान सभानि मानगोनां बुंथिगिरि मासियाव जिरायो। बेनि उनाव 1979 मायथाइयाव हाजरिका बिथाडा जनता दोलोखौ गारनानै “असम जनता दल” दानानै 91 साननि थाखाय आसामनि गिबि मन्थि जायो।

ज'गेन हाजरिका बिथाडा कलिकता मुलुग सोलोंसालियाव आइननि सोलोंथाइ लादोंमोन। बिथाडा 1952 मायथाइयाव आइननि डिग्री लायो। आइननि डिग्री लाखांनानै हाजरिका बिथाडा 1952 मायथाइयाव कलिकतानि हाइकर्टआव उकिलगिरि जिउ जुरिजेननानै बै बोसोरावनो डिब्रुगडसिम फैनानै बार लाइब्रेरीयाव जइन जाफैयो। बेनि अनगायैबो बिथाडा गुवाहाटीनि हाइकर्टआवबो उकिलगिरि मावदोंमोन। राजखान्थियारि जिउनिफ्राय आजिरा लानायनि उनाव बिथाडा दिल्लीनि सुप्रिम कर्टआवबो उकिल गिरि जिउ जागायफिनदोंमोन। मुख'जाथावदि भारतनि सुप्रिम कर्टआव हाजरिकायानो स'न'वाल कछरीफोरनि सासेल' एडभ'केटमोन।

हाजरिका बिथाडा सासे जनजाति दैदेनगिरि महरै जनजातिफोरनि गासै बिथिडाव जौगाहोनाय खामानियाव गोसो-मोदोम होना गावखौनो बाउसोमदोंमोन। जनजातिफोरनि गासै बिथिडाव जौगाहोनायनि थाखाय दाजानाय मोननैसो हान्जा गौथुमफोरजों बिथाडा माबायदि लोब्बा दड'मोन बेनि मोनसे सुंद'फोरमायथि होनाय जाबाय।

(क) 1993 मायथाइयाव आसामनि हायेननि गासै सुबुं हान्जानि जर'खा राजखान्थि गौथुम “ट्राइबेल लीग” दाजादोंमोन। बै ट्राइबेल लीगनि आदर्शवा हाजरिका बिथांखौ गोथौवै गोहोम खोख्लैदोंमोन। बै बादि बिथिडाव ट्राइबेल लीगनि बै समनि नेहाथारि भीमबर देउरी आरो सोद्रोमा परशुराम स'न'वालनि बिबान समखिनियाव हाजरिका बिथाडा बिथांमोनजों लोब्बा लाखिनानै ट्राइबेल लीगनि खामानियाव गावखौनो बाउसोमदोंमोन।

(ख) 1940 मायथाइयाव “दुलाराइ आसाम प्रगतिशील कछरी सन्मिलन”नि नेहाथारिनि गिलिरि बिबानखौबो लादोंमोन।

(ग) हाजरिका बिथाडा गुवाहाटीयाव फरायसंनानै थानाय समाव All Assam Plains and Hills Tribe Students Association मुनि मोनसे गौथुमनि जोनोम जादोंमोन। हाजरिका बिथाडा बे गौथुमनि आफादगिरिनि बिबानाव थानानै बे गौथुमनि गासैबो बिथिं जौगानायनि थाखाय दुखु सैदोंमोन।

ज'गेन हाजरिकाया थुनलाइ सोरजिनायावबो गोसो होदोंमोन। “नायक” मुनि गांसे सानमालाइसि सुजुनायनि अनगायैबो बिथाडा असमीया आरो इंराजी रावाव रायथाइ आरि लिरदोंमोन। “भारत स्वधीनतार चमु बुरन्जी आरु गण परिषद”(भारतनि उदांस्रिनि सुंद'जारिमिन आरो गण परिषद) आरो "Consideration on Twenty Five Million Soul of Trial India"-आ हाजरिका बिथांनि गांनै

अरायबो मुंख'जाथाव बिजाब।

गियाननि हांखुर हाजरिका बिथाडा बिथांनि गोलाउ जिउ बुब्लियाव गोबां बेसेनबहरा बिजाब बायनानै आरो बैफोर बिजाबखौ फरायसंनानै गावनि गियाननि बाख्रिखौ आबुं खालामदोंमोन। बिथाडा जिउ थासान्दियाव बुथुमनाय नै रोजानिखुइबो बांसिन बेसेन गोनां बिजाबखौ डिब्रुगड़ मुलुग सोलोंसालिनि राजखान्थि बिफान आरो टेडाखाट कलेजनि बिजाब बाख्रियाव दान होलांदों।

हाजो-हायेन गोरोबलायनायनि सोरसिगिरि, जनजाति दैदेनगिरि, गावसुफुंथि गैयि आरो आंगो हादोरखौ मोजां मोनग्रा बे गेदेमाया 1997 मायथाइनि 30 सेप्टेम्बर खालारखालि जिउनि फावथिनाखौ फोजोबनानै बे संसारनिफ्राय आनज्रायलाडो।

**सोंथि :**

1. डिमासा रावाव स'न'वालनि ओंथिया मा?
2. स'न'वाल कछरीफोरा मा दोहोरोम सिबिग्रामोन?
3. स'न'वाल कछरीफोरनि सुबुंथुनलाइफोरनि सोमोन्दै लिर।
4. स'न'वाल कछरीफोरनि समाज राहाखौ बिजिरना लिर।
5. स'न'वाल कछरीफोरखौ मानो मोननै दोहोरोमारि होनना बुंनाय जायो?
6. लिरसुंथाइ लिर :
 

(क) गगन चन्द्र स'न'वाल	(ख) परशुराम स'न'वाल
(ग) ज'गेश दास	(घ) ज'गेन्द्र नाथ हाजरिका।



## हाजंफोर

हाजंफोरा आसामनि हायेननि मोनसे जनजाति सुबुंहान्जा। बिसोरो गाहाइयै ग'वालपारा, धुबुरी जिलानि खोला शालमारानि अनगायैबो मानकासार महकुमायाव रायजो जानानै दड'। गुबुन फारसेथिं बुरलुंबुथुर सेरफांनि गोबां जिलानि गुबुन गुबुन हालामावबो बिसोर गोसारनानै दड'। मेघालयनि सोनाब आरो खोला गार'हाजो जिला आरो खासिया हाजो जिलानि हाजोयारि समान हालामावबो माखासे हाजं मानसिफोरा जिउ खानानै दड'। भारत संबिजिरनि 1950 मायथाइयाव आजावनाय आइन बादि आसामनि बोखावजायि हाजोयारि गाव खुंथाइ जिलाफोरावसो हाजंफोरा जनजाति महरै गनायजानायमोन। उननि समाव भारतारि संबिजिरा फोसाबजानायाव "गनायजानाय हारि आरो गनायजानाय जनजातिनि बिथोन (फोसावजानाय) आयेन 2002" बादियै आसामनि हायेननि जिलाफोराव रायजो जाना थानाय हाजंफोरा हायेननि गनायजानाय जनजाति महरै गनायथि मोनो।

सुबुं बिगियानगिरिफोरनि बादैब्ला हाजंफोरा इण्ड'-मंगलीय सुबुंहान्जानि। बुंनाय दडदि हाजंफोरा तिब्वतनिफ्राय दाउबायबोनानै कचबिहारनि साहा भुटननि सिमायाव "हाजं" मुनि हालामाव बेसेबा जौथाइसिम रायजो जाना दड'मोन। सोरबा सोरबानि बादिब्ला हाजंफोरा तिब्वतनिफ्राय गिबियावनो कामरूप जिलानि हाज' ओनसोलाव थाजोरै लादोंमोन होनना मिथिनो मोननाय जायो। उनावहालागै बिथांमोना फारियै ग'वालपारा जिलानि बुरलुंबुथुर सेरफांसिम आवगायबोनानै खोलाफारसे फैयो आरो लक्ष्मीपुर खाथिनि शुवारक'नानिफ्राय खोलासिम धुबुरी जिलानि मानकासार शालमारा हाजोनि समान हालाम आरो बांलादेशनि मयमनसिंह जिलानि साहानि हाजोआरि ओनसोलाव गोसारो। गुबुन फारसेथिं सानजानि सोनाब खासिया हाजोनि गाहाय ओनसोलखौ लाफानानै श्रीहट्ट जिलासिम गोसारद्लायो। गोजाम आसामनि मोनसे थांखिजानाय बुहुम खौराडारि सिमाहांखोनि गेजेराव हाजंफोरा गोबां जौथाइहालागै रायजो जाना थानाय बाश्राया मुंख'नाय दड'। बे हादाबनि सोरगिदिं सीमाया जादोंमोन- साहाथिं ग'वालपारा जिलानि लक्ष्मीपुर खाथिनि (1) शुवार क'ना, सानजाहा श्रीहट्ट एबा छिलेट जिलानि (2) जामक'ना खोलाहा मयमन सिंह जिलानि (3) जंक'ना आरो सोनाबथिं मानकाचारनि खाथिनि (4) मरक'ना मुंनि गंब्रै हाजं गामि। जिगुजौ जौथाइनि जोबनाय थिडै हाजंफोरा बै ओनसोलफोराव

थाजोरै थानो लादोंमोन। उननि समाव राजखान्थियारि, रांखान्थियारि बादि गुबुन गुबुन जाहोनाव बे सुबुंहान्जाया बै हालामनिफ्राय गुबुन गुबुन हालामसिम गोसारलाडो। गुबुन फारसेथिं उदांमिनि उनाव सानजा पाकिस्थाननिफ्राय (आथिखालनि बांलादेश) 1964 ख्रीष्टाब्दआव बडाली हिन्दु, गार', क'च, डालु, बानाइ बादिजों लोगोसे गार'हाजो सिमानि मयमनसिंह जिलानि साहाहालामनि हाजंफोरा गावसा आसामसिम न बां हा गैजायै (शरणार्थी) महराव फैयो। बै सुबुंफोरा आसामनि गुबुन गुबुन हालामाव सरकारनि हेफाजाबजों गायसनथाय मोनना फिन रायजो जानानै दड। हाजंफोरा आथिखालनि आसामनि ग'वालपारा, धुबुरी, कामरूप, बाकसा, उदालगुरि, सिरां, दरं, लक्ष्मीपुर, धेमाजी, नगाव बादि जिलानि दाबदाब जायगायाव गुबुडै गोसारदलानानै रायजो जानानै दड'।

**मुं दोननाय :** हाजं मुंनि गुदिखिथानि सोमोन्दै गुबुन गुबुन मानसिफोरा आलादा आलादा बुंफोरथि होयो। खिरिमिन (Legend) बायदिब्ला हाजंफोरा मोनसे समाव 'हाजं' मुंनि हादाबनिफ्राय दावबायनानै फैनायनि थाखाय बे सुबुं हान्जानि मुडा हाजं जादों। नैथियाव बिसोरनि आजै-आजौनि मुडा हाज'मोन। बै हाज'नि सुबुं एबा फोलेरनि सुबुं महरै सुबुंहान्जानि मुडा हाजं जादों होनना बुंफोरथि होनाय जायो। थामथि बुंफोरथि बायदियै हाजं सोदोबा न'सुंसेयारि गार'फोरासो होनाय मुं। बे सुबुं हानजानि गाहाइ जिउ खानाय राहायानो जाबाय आबाद, हाजंफोरा हायेननि हाफोराव हाब्रु दैब्रुजों लुद्रा-फुद्रा जानानै गोब्राबै खामानियाव कष्ट खालामनायनि गेजेरजों हाल एवनानै आबाद मावबोदोंमोन। हायेन ओनसोलनि गोथौ हाजों एनगारनो हायै सोमोन्दो एबा लोब्बा जाना थानायखौ नुनानै गार'फोरा बे सुबुंहान्जाखौ हाजं मुंजों गाबज्रियोमोन। गार' रावाव 'हा' आरो 'जं' सोदोबनि ओंथिया फारियै हा आरो एमफौ। बेदियैनो 'हाजं' सोदोबा सोमजिखादों होनना मिथिनो मोननाय जायो।

**समाजारि बाहागो :** हाजंफोरा गोदो गोदाय समाजारि महरै मोनद' थाखोयाव बोखावजानायमोन। जेरै : (1) हारां पारिया (2) भजालु पाहारीया (3) मानिक पाहारिया (4) टेपर पाहारिया (5) सातदल पाहारिया आरो (6) मान्जि पारिया। नाथाय आथिखालाव बे सुबुं हान्जानि गेजेराव बै थाखोफोरखौ मोननो गैया। हाजंफोरखौ गेदेमा हालामारि हान्जा महरै मोनबा बाहागोआव मोननाय जायो। बेफोर जाबाय : (1) दश काहानीया (2) छुछडी (3) मछ पाहारीया (4) कराइबारीया आरो (5) बार'हाजारी। दासान्दि समाजारि बाहागोफोरबो मोजां सोमोन्दो थालायनायनि थाखाय आरो गलायमोनदेर जानायनि जाहोनाव मोनफ्रोमबो समाजारि हान्जानि गावारि आखुथाइफोरा गोरोबसे जाना मोनसे समाजारि आखुथाइयाव बारस्लायबोनो हमदों।

**समाजारि नेमखान्थि :** हाजंफोरा दोरोडारि महरै मोनथाम समाजारि खान्थिजों समाजखौ सामलायो। जेरै : (1) गामि गियाथि (2) मोनबा गियाथि आरो (3) ज'वार एबा चाकला। समाजनि जायखिजाया रोखोमनि नांज्लाय खमज्जलायखौ गिबियावनो गामिनि बाय-बाहागिनि गाहाया बुजिलायनायनि गेजेरजों

गोरोबहोलायो। गामिनि बाय बाहागिनि बै गाहाया जेब्ला जायखिजाया आयदानि जेबो थिरांथा खालामना होनो हाया एबा गोरोबहोलायनो हायाब्ला मोनबा गियाथिनि गाहाइफोरा मेल खुंनानै थिरांथा खालामो। समाजनि माबाफोर गोब्राब समाजारि जेंना जायोबोला ज'वार एबा चाकलानि गाहाइफोरा मेल लिनानै थिरांथा खालामो।

**न'-बां लुनाय :** हाजंफोरनि न'-बांफोरा लांदां। सरासनम्रायै आबादथिलिनिफ्राय इसे जानगाराव समाननि इसे गोजौ जायगायाव न' लुयो; गेजेराव गंसे सिथला लाखिनानै सोरगिदिं न'फोरखौ लुना लायो। मान गोनां न'खरनि न'बां लुनायफोरा एरै बायदि : गंसे माइजो न' (न'मा न'), गंसे चांघर (बाख्रि), गंसे आखलि घर (ओंखाम संग्रा), गंसे गलिघर (ग'लि न') आरो सिथलानि सिगाडाव गंसे काछरि घर। काछरि घरखौ लामाजिंनि सौरान' होनना बुंनो हायोब्लाबो थारैनो हाजंफोरनि बियो डेकासां मोन। मोनसे समाव गामिनि गाहाइ एबा रां खान्थियारि गोहो गोनां सुबुंनि नखरनि सेंग्रा सिख्लाफोर थानाय न'आवसो काछरि न' दड'मोन। काछरि न'याव गामिनि हाबा जायै सेंग्राफोरासो हराव उन्दुयोमोन। गामियाव हौवा आलासि-दुमसि फैयोब्लाबो बे काछरि न'आवसो हर थानो होयोमोन। न'खरनि सिथलानि सानजा थिडै न'नि मोदाइ बोइश एबा बास्तु आरो कानादेउ (पद्मादेवी) नि बावनाय बिथा जायगा थायो। बैष्णव पन्थी हाजं न'खरनि सिथलायाव हरिमन्दिर आरो बावग्रा थुलुन्सिनि बिथा थायो।

हाजं आइजोफोरा दानाय-लुनाय, गायनाय-फुनाय, ना गुरनाय आरो खामानि दामानियाव आखा-फाखा न'खर सामलायगिरि। बिसोरनि मावनाय-दांनायखौ लानानै आगर एखंनानाय गाननाय जि जोमा जादों राडा पार्दिन। बिथांमोननि बिसोरनि दोरोडारि महरै जि दानाय खान्थि एबा आइजेंनि मुडा जाबाय 'बाना'। 'बाना'या जाबाय- दोरोडारि महरै बानायना लानाय औवानि हिसान। हाजंनि जि दाग्रा आइजो सासेया गावनि थाखाय गोजा, नीला, सोमखोर, गोथां, फानथाव गाब, गोसोम आरि गलाय गथाय गाबजों गोसो बोनो हानाय महरै 'रडा पार्दिन' दानायनि अनगायैबो हौवाफोरनि थाखाय 'भेझा कापुर' (गुमुं गामसा), बिबारगोनां आगरुण, फाचरा, बिबार गोनां काणपेछ आरि दायो। समाजारि रंजाथाइ फोरबो हाबा-हुखायाव हौवाफोरजों समानै गाबुर (सिखला) आयरक (बिमा माहारि) आरो बैसोगोरा आइजोनि बिफाव दड'। मार' फुजानि (मारै फुजा) उजनी एबा बान उठा (देउदिनी) काति पुजा, गुपनी ग'हेन बादि मोसानाय रोजाबनायाव हाजं हिनजावनि बिहोमाया मुंख'जाथाव। बिथांमोना गोदोनिफ्राय बाहायबोनाय मोनफा-मोननै गहेनाया जाबाय : खिलाखुन्थि सायाव काटा बाजु, आथिडाव बाक, गुन्जरी, ठेंपाता, खोमायाव करमफुल, गन्थंआव नलछ, नाकफुल, गोदोनायाव चिकिछरा, हारमाला, हाछुली, आखाइयाव बयला शांखा आरो आसिथाम।

हाजं हौवाफोरा जोबोर सादा सिदायै गानो जोमो। जान्जियाव गानना लेंथिमरिना हान्थु बारनाय

गामसानि मुडा जाबाय 'भेझा निंति'। बेयो गुफुर खायमा एबा फाखा-सिखा गाबनि जायो। बिसोरनि मोदोमाव बुकछलि (ग'स्ला) आरो गोजांबोधोरनि समाव गोदोनायाव फुलो कानपेछ (माफलार) आरो आवलान (सादोर) मेरायनानै लायो।

हाजंफोरनि गेजेराव जोनोम, हाबा आरो थैनायजों लोब्बा गुबुन गुबुन आसारखान्थि सोलिबोदों। हाजं समाजाव मोनब्रै रोखोमनि हाबा खुडो जेरै- (1) समाजारि हाबा (नायनानै खुंनाय हाबा) (2) दाय गोग्लैनानै एबा थेंफारानि गेजेन जानानै हिन्जावसाखौ बिसि महरै नाजावनाय) (3) गनायलायनाय (सेंग्रा सिखलाया गावजोंगाव मोजां मोनलायनानै जानाय हाबा) आरो (4) हाडा एबा साडा (रान्दि आरो बालान्दाजों जानाय हाबा)।

**रंजाथाइ फोरबो :** हाजंफोरा गाहाइयै आबादारि। आबाद मावनायजों लोबबा गोनां बाइदि बाइदि सुबुं आसार खान्थि बिसोरनि गेजेराव सोलियो। जेरै : गुचि पुजा (गोदान गचा होनाय) आगो लायनाय (गिबियै माय हानाय), नया जानाय (ओखाम गोरलै जानाय), काति गासा (कडालि बिहुवाव थाइगिर बिखंजों माइ फोथाराव साथि आलारि बाथि सावनाय) माइ हानाय आरो पुषणीयाव (मागो दमासियाव) फिथा सौराय जानाय, सडरानि एबा बिषुवायाव (रंजालि बैसागुवाव) मोसौ थुखैनाय, आबाद मावग्रा आइजें आइलाखौ सुम्रां आरिस्रां सिथलायाव फज'नानै आलारि बाथि फोजोंनानै खुलुमस्रानाय आरि। बेनि अनगायैबो बैसागुवाव बोइश एबा बास्तु फुजा, आसाराव आमथिसुवा (अम्बुबासि) मानिनाय, शावन दानाव बरत' (कानीदेउ फुजा), मेसेडाव जात्रा फुजा, भुइमागा च'र, मागा (लाथेर गेलेनाय) रंजाथाइ फोर्बो, काति दाननि जोबथा सानाव काति फुजा, पुष दानाव माइ हाबाय थानाय समाव फोथाराव भालुक मागा, मायफोरखौ नआव रोगानायनि उनाव थंबोमागा, पुषणी आरि रंजाथाइ फोरबो फालिनाय जायो। मेसैनि जोबनायथिं दीपावली अखाफोर थैनायनिफ्राय सप्ताह खुनसे हाजंफोरनि गामि गामि च'र मागा एबा चर खेलानि (लाथेर गेलेनायनि) मोसानाय रोजाबनायनि रंजाथाइ खुडो। आबाद मावग्रा हाजं सेंग्राफोरनि थाखाय बे समा रंजानायनि सम। सेंग्राफोरा ढाकि (ढल), धतरा, सिफुं, खावां आरि दामजुजों हान्जा जुथिनानै न'खर न'खर मोसाना रोजाबना मागियो। बे मोसानाय रोजाबनाय फोरबोनि लेवाटाना, जाखामारा, भाडा नावका, देवी युध्द आरि मोसानाय रंजानाया गोजाम आरो बयजोंबो अनसायजासिननाय। लेवाटाना मोसानाय-रोजाबनाया सेंग्रा-सिख्लानि मोजां मोनज्जायनाय, सोंखारिनाय, फेस्लाजों आबुं आरो मावसोमना जानाय जिउनि सावगारिबो बेरखानाय नुयो। च'रमागा एबा चर गेलेनाय रंजाथाइयाव मोसानाय रोजाबनाय हान्जाया न'खर बिगुमानिफ्राय खिन्दा खाडो।

**दोहोरोम :** हाजंफोरा हिन्दु दोहोरोमारिब्लाबो बिसोरनि दोरोडारि सुबुंहान्जानि दोहोरोमा जुथाइ महरै फालिजाबोदों। मिथिंगानि बायदि बायदि खैफोद-आफोदनिफ्राय बारग'नो थाखाय हाजंफोरा फोथायनाय आरो सिबिनायजों गुबुन गुबुन मोदाइ मोदाइजोखौ फुजियो। बोइश एबा बास्तुदेउआ हाजंफोरनि गाहाइ मोदाइ। मोनफ्रोमबो गामिनि समाजआ ज' जानानै बिसोरो बोइश एबा बास्तुदेउ फुजा खालामो।

बे फुजाखौ बैसागु दानाव खुंनाय जायो। सुबा एबा गामिनिफ्राय इसे गोजान जायगायाव बोइश मोदाइनि थानसालि बानायनाय जायो। बोइश एबा बास्तु मोदाइनि लोगोआव गुबुन गुबुन मोननैसो मोदाइफोरबो फारियै बिथा बानायनाय जायो।

हाजंफोरा दोहोरोम सिबिनायनि बिथिडाव मोननै बाहागोयाव बोखावजानाय- (1) हाजं शात्क आरो (2) खाटल (बैष्णव)। सुबुं हान्जायारि दोरोडारि दोहोरोमआरि खान्थिजों सोलिनाय सुबुंफोरा हाजं शात्क आरो जायफोर हाजंआ बैष्णव खान्थिखौ गनायनानै बैष्णवनि बाहागोयाव थांबाय बिसोर खाटल एबा बैष्णव थाखोनि। शाक्तफोरा ना-बेदर, न'नि जौ आरि जायो लोडो। गुबुन फारसेथिं खाटल थाखोनि हाजं मानसिफोरा बैष्णव खान्थिखौ फोथायग्रा। बैष्णव हान्जानि हाजंफोरा सोरनिबा सोरनिबा न'खराव शालग्राम बिग्रह दड' आरो गोदोनिफ्रायनो बै शालग्राम बिग्रहखौ बिष्णु मोदाइ महै सानफ्रोमबो फुजा फाथालि होबोदों। बिथांमोना जन्माष्टमी, राधा अष्टमी, रास यात्रा, दौल जात्रा बादि जुनिया जुनिया अक्ट'फोराव रंजाथाइफोरबो खुडो। भागवत, रामायण, महाभारत, गीता आरि फरायनानै कृष्णखौ गाबजिनानै नाम हमो कीर्तन खनो।

**जानाय लौनाय :** हाजंफोरा गोथावै जाग्रा आरो बेदर-फिसा जाग्रा हारि। औवा मेवाइ, थास' आलु, थास' बिथराइ आरो देन्था, हिदुल (ना गोरान देनानै हासुडाव सोना दौनाय) फाथो बिलाइनि गोरान नार्जि, खासेव खुसुं, माछां (बेदेर), लेबा-शाक (माइरंनि गुन्दै अनजों संनाय ओंखि) बिसि ओंखाम (हमनाय मायब्रा माइरंनि ओंखाम) बुकनि भात, डिंप'रा (औवानि हासुडाव बानायनाय मायब्रा मायरंनि ओंखाम) बिथांमोननि जोबोर मोजां मोनजानाय।

हाजं रावा तिब्बत बामारि राव फोलेरनि बड' दालाइनि सिडाव। हाजंफोरा आर्य हारिमुनि गोथौ गोहोमाव फोसाबजानानै बिथांमोननि गोदो गोदायनि रावा महर सोलायनानै फैबाय। हाजं रावा गावनि राव खान्थियारि खान्थि, गावारि सोदोब बाखि, बाश्रा फान्दाय, बाश्रा खोन्दोब, बाश्रा फाव, आरिजों आबुं। अदेबानि आथिखाल समाव हाजंफोरनि रावाव कामरूपीया आरो ग'वालपरिया दालाइ-रावनि गोहोम गोग्लैनाय नुनो मोनो।

### सोंथि :

1. हाजंफोरा बबे सुबुंहान्जानि मानसि?
2. हाजंफोरखौ हाजोआरि गावखुंथाइ जिलाफोराव माब्ला गनाय जानाय जनजाति महै गनायथि होदोंमोन।
3. आथिखाल हाजंफोरा आसामनि गाहाइयै मा मा जिलायाव रायजो जानानै दड?
4. हाजंफोरनि गाहाइ जिउराहाया मा?
5. बास्तुदेउ फुजाखौ माब्ला खुडो?
6. हाजं समाजाव काछरि न'नि ओंथिया मा?



## नाथ य'गीफोर

नाथ एबा य'गी सुबुं माहारिया आसामनि आरो भारतनि मोनसे गोजाम सुबुं हान्जा। आर्य सोदोमस्रिनि बेसेबा बोसोर सिगांनिफ्रायनो बे सुबुं माहारिनि मानसिफोरा भारतनि गुबुन गुबुन राज्योआव सेरखाय-बेरखाय जाना थादोंमोन। नाथ एबा य'गी सुबुं माहारिया शैव (सिबारि) हान्जा आरो बिसोर फालिनाय दोहोरोमनि मुडा शैब एबा ब्रात्य दोहोरोममोन। शैब दोहोरामनि गुबै दर्शननि य'ग मोनफुंनाया मार्गनि सायाव गायसनजानाय। य'गनिफ्रायनो य'गीफोरनि सोमजिदोंमोन। नाथ दोरोंनि बादिब्ला आदिनाथ थामहिनबा ग'साइ शिबानो जादों सेथि नाथ। महाय'गी मतस्येन्द्रनाथ आरो गुरु ग'रक्षनाथ मोना नाथफोरनि गहाइ सानै गुरु। नाथ य'गी सुबुं माहारिया गुरु शिष्य दोरोंखौ फोथायग्रा। नाथ य'गीफोरनि मोननै बाहागो दं। बेनिनो मोनसेया जादों नखर य'गी आरो गुबुन मोनसेया जादों सन्यासि य'गी। सन्यासि य'गीफोरा नाथ दोहोरोम फोसावो। नाथफोरनि गुरु ग'रक्षनाथआ हठ य'ग साधन मार्गनि दिहुनगिरि। गुरु ग'रक्षनाथआ फोसावनाय य'ग साधना मार्गनि सायाव लिरनाय स्वामी स्वत्तामाराय य'गीनि “हठय'ग प्रदीपिका” या मुलुगनाडै बयजोंबो अनसायजानाय य'गनि गांसे बेसेन गोसा बिजाब। नाथफोरनि गोजामसिन गुरु महाय'गी मतस्येन्द्रनाथआ कामरूपनिमोन आरो बिथाडा कामाख्या थानसालियाव तन्त्र आरो य'ग साधनायाव गोसो होथाबना दंमोन। बै समाव कामाख्या थानसालिखौ कामाख्या पीठ मुडैसो मिथियोमोन। नेपालाव सोलिनाय खुगा सल' आरो गोजाम खौगानथाइनि बादिब्ला नेपालनि राजा नरेन्द्रदेबनि समाव नेपालाव अखा हायिनि थाखाय जानाय आंखालनिफ्राय रैखा मोननो एबा बारग'नो नेपालनि राजाया महाय'गी मतस्येन्द्रनाथखौ नेपालसिम हांखायना लांदोंमोन। बै समाव नेपालआ बौद्ध दोहोरोमजों गफबना दंमोन आरो नेपालसिम मतस्येन्द्रनाथआ थांनायनि उनावनो नेपालाव हिन्दु दोहोरोमा गायसनजादोंमोन। नाथ सन्यासी सासे थैयोब्ला बिनि गोथै सहखौ सावनायनि बदलै गावसोरनि नेम खान्थिजों फबनायनि खान्थिया गोदोनिफ्राय आरो दासिमबो सोलिगासिनो दं।



नाथफोरहा गोजाम थुनलाइ दं। मोन्थोर (तन्त्र-मन्त्र), य'ग, आध्यात्मिक दर्शन, आयुर्वेद, ज्य'तिष, रासायनारि आरि गुबुन गुबुन बिथिडाव नाथफोरनि सिगांफिरि सुबुंफोरा मोननैसो बेसेनगोसा थुनलाइ लिरनायजों थुनलाइनि बाख्रिखौ दोहोनि खालामना दोनलांदों। सिगाडाव नाथ बिमुं मोननायफोरा लिरनाय चर्यापद एबा चर्यागीत (मेथाइ) असमीया, बांला आरो उडिया राव सोमजिनाय बिहोमा दं होननानै पण्डितफोरा फोरमायलांदों।

जोंनि आसामावबो नाथ य'गीफोरा गोदो-गोदायनिफ्रायनो थाबोदों। गुबैयै ग'वालपारा, बडाइगाव, क'कराझार, दरं, नगाव, मरिगाव, ह'जाइ श'नितपुर, काछार आरि जिलायाव लाख लाख य'गी मानसिफोरा दाबो दं। बेनि अनगायैबो आसामनि गंग्रोमबो जिलायाव बे सुबुं माहारिया मुगानि उनाव मुगा थाबोदों। गुवाहाटीनि आमबारीयाव हा जावखांनय खामानियाव मोननाय अन्थाइ लिरथियाव आथिखालनि गुवाहाटी मुडा मोनसे समाव य'गीहाटी मुडै मुंदांखामोन होनना मख'नाय दं। गुबुनफारसे बे गोजाम सुबुं माहारिनि सायाव सोलिनाय बिजिरसं आरो गुबुन गुबुन जारिमिन गिरिफोरा मख'नाय बादिब्ला मोनसे समाव नगाव खाथियाव कदली मुंनि गंसे फिसा राज्यो नाथ य'गी आइजोफोरनि जोहै सामलायजादोंमोन होनना मख'नाय दं। बेनि अनगायैबो दानि ह'जाइ जिलानि यगीजान, तेजपुरनि साखाथियाव थानाय सुर्य हाजोनि शिव लिंग, ग'वालपारानि य'गीघ'पा हाजोनि गुफाफोरा गोदो कामरूप राज्योआव नाथफोरनि गोजाम मानसिफोरा य'ग साधना खालामग्रा थावनिमोन होनना गुबुन गुबुन बिजाबाव लिरनाय दं। आथिखालाव जोंनि माखासे नाथ य'गी मानसिफोरा गेदेमा श्रीमन्त शंकरदेबनि 'एक शरण नाम धर्म' आव बारस्लायनानै महापुरुषनि दोहोरोम-हारिमुखौ आजावना लादों। भारतनि उदांसि सोमावसारनायावबो आसामनि नाथ य'गीफोरनि बिहोमा दं। 1942 मायथाइनि इंराजनि बेरेखायै हादरनाडै जानाय भारत नागार सोमावसारनायाव महात्मा गान्धीनि 'मावगोन नडाब्ला थैगोन' मोन्थोरजों मोदोम दुंखांन ढेकियाजुलि थानानि मुधचरनिफ्राय इंराजनि फिरफिला इउनियन जेकखौ बुखुनो थांनायाव नाथ य'गी माहारिनि मनबर नाथ, खहुली देबी आरो कुमली देबी मुंनि साथाम उदांसि दावहारुवा इंराजनि गुलियाव जायगायावनो थैदोंमोन। इंराजनि आमोलाव 1894 मायथाइयाव बोखावजायै दरं जिलायाव जानाय पथरुघाटनि आबादारि बिग्रायनाय समाव 1894 मायथाइनि 28 जानुवारि सानखालि इंराजनि खासि-बिसि गुलि गावनायाव थैनाय सा 140 मुंख्लं जानाय आबादारिफोरनि मादाव बे माहारिनि सा 28 सुबुं मुंख्लं जादोंमोन। उनाव 1980 जौथाइयाव सदौ असम सात्र सन्थानि दैदेननायाव जानाय गुबुनारि

एरख'नाय सोमावसारनायाव सा 855 मुंख्लंफोरनि मादाव बे माहारिनि सा 140 मुंख्लं जादोंमोन। य'गी माहारिनि मानसिफोरा गोजोन हासथायग्रा आरो हादर अनसुला। माहारिनि सासे बयजोंबो मिथिजानाय थुनलाइगिरि, जावखांगिरि, पण्डित, जावखांगिरि बिमुं मोननाय रुंसारि राजम'हन नाथआ आसामनि राव, थुनलाइ, हारिमुवाव जोबनो गैयि बिहोमा होलांदों। गोदो गोदाय आसामनि नाथ य'गीफोरनि हौवा-हिन्जाव बयबो दानाय-लुनाय आरो पाट आरिमुवाव जोबोर आखा-फाखामोन बेनिखायनो नाथ य'गीफोरनि गोबाडानो काटनी बिमुंजोंबो मिथिजाबोदों। बे माहारिनि गुनगोनां सुबुं बैष्णव फालिग्रा मथुरा नाथआ गेदेमा शंकरदेबनि सासे गोथार शिष्य आरो बैष्णव दोहोरोमनि फोसावगिरिमोन। गुरुनि बेसेन बहरा सोरजिनो बृन्दाबनी सिखौ मुनैसोल' दानायनि उनाव सिखौ दाफुंनायनि बिबानखौ मथुरा नाथनो होदोंमोन। आसामनि नाथ य'गीफोरा असमीया राव, थुनलाइ, हारिमुनि सुंथागिरि मह्रै मिथिजाबोदों। दरं जिलानि मुंदांखा सुकणाणि अजापालि, देउधनी मोसानाय आरो चिया मेथाइफोरा बे माहारिनि गोबां बोसोर हमथाना लाखिनाय आसामनि मोनसे दोहोन हारिमुवारि सम्पद। समनि फाखनाव बे गोजाम जारिमिनारि थागिबि सुबुंहान्जाफोरा बायदि मैया समाजारि जाखांनाय- गोगलैसोनायनि गेजेरजों गावनि सिनायथिखौ रैखा खालामबोदों। गुबुन फारसेथिं माहारिखौ सोलोंथाइयारि, सानथौवारि, हारिमुवारि आरो दोहोरोमारि गासै बिथिडाव दावगाहोनो हलिराम नाथ चहरीया आरो लम्बदर बरामोनजों लोगोसे सानैसो इयुन सानगिरि सुबुंनि नाजानायाव 1919 मायथाइयावनो दाजानाय 'आसाम प्रादेशिक य'गी सन्मिलनी'आ आसामनि गोजामथार सुबुं हान्जायारि आफाद।

**सोंथि :**

1. आसामनि नाथ य'गीफोरनि सोमजिनायनि सोमोन्दै लिर।
2. नाथ य'गीफोरनि थुनलाइ आरो दोहोरोमनि सोमोन्दै लिर।
3. नाथ य'गीफोरनि सोमोन्दै सुंद'थै लिर।



## आदिबासीफोर

आसामनि गं 885 साहा बागान आरो गामियाव थानाय 56 लाखसो आदिबासीफोर असमीया हारिनि नागारनो हाथि बाहागोल' नडा असमीया हारिमु आरो आसामनि रांखान्थि-समाजारि जौगानायनि थादेरसा। साहा बागान आरो गामियाव थानाय बे हान्जाफोरनि सिगां फिरि (आजै-आजौ) फोरा आदिबासी होनना सिनायथि होयोमोन। बबेखानि माखासे मानसिफोरा गावसोरखौ आर्य होनना दाबी खालामो। जाहाथे जारिमिनगिरिफोरा बिसोरखौ आदिबासी होना सिनायना मोनदों बेनिखायनो बिसोरखौ आदिबासी होनना गाबजिनाय जायो।

आदिबासी सोदोबनि ओंथिखौ एरैबादि होनो हागौ-आदिनि ओंथिया सिगां 'थागिबि' थामहिनबा हादरनि सिगां थागिबिफोरखौ आदिबासी होनना बुंनाय जायो। असमीया सोदोब बिहुं 'हेमक'ष'नि बादिब्ला 'आदिबासी' सोदोबनि ओंथिया जादों 'सिगां थाजेननाय' बबेबा जायगायाव सिगांग्रो थानाय। डिब्रुगड़ मुलुग सोलोंसालिनि बि.ए. डिग्रीनि फरायबिजाब 'भारतनि जारिमिन' आव (बि-3) प्रफुल्ल बरुवाया आदिबासी सुबुंहान्जानि सिनायथिखौ होदों। बे सुबुंमाहारिनि मानसिफोरा गाहाय-हायथा, जोबोर गोसोम गाबनि आरो गन्थं दाब्लेमोन। बिसोर सरासनम्रायै हाजो आरो हाग्रा-बंग्रायाव थानानै मोजां मोनोमोन। बिसोरहा हांखो गैयामोन आरो रावा आर्य हान्जा रावनिफ्राय आलादाथारमोन। क'ल, भिल, मुण्डा आरि हारिनि मानसिफोरा बे सुबुं माहारियाव गोगलैयोमोन।

बेनिखायनो 'आदिबासी' बुडोब्ला कावार, कल, भुमिज, चवर, चुरिया, पाहारिया, चाउताल, अरां, मुण्डा, माल पाहारिया, माहालि, नहरा, करवा, करा, किचान, कन्दु, खेरवार, काड़िया, कुड़मालि, ह, गराइत, गड़, चिक बाराइक, चेर, बिरजिय बिरहड, बिनजिया, बेदिया, बाथुडि, बानजारा, बाइगा, आचुरलधा, दामदारि, बन्दा, नागाचिया, उड़िया, भिल, परजा, धानवार प्रधान बायदि बायदि मानसिफोरखौ बुजायो। आसामनि गामि आरो साहा बागानाव थानाय बे हारिनि मानसिफोरा गावसोरखौनो 'आदिबासी' होननानै सिनायथि होना देरगाना लायो। बबेखानि गोबाडानो बिसोरखौ साहा बागानाव मावग्रा, कुलि, साहा जनजाति, सोमखोर असमीया आरि बायदि मुंजों गाबजिबोदों आरो मिथियैनि जाउनाव बिसोरनि खायसेया बै मुं गाबजिनायफोरखौनो गनायना लादोंब्लाबो बुंनो थाडोब्ला बिसोर

‘आदिबासी’ सुबुं।

**आदिबासीफोरनि हारिमु :**

सिगाडाव आदिबासिफोरा मिथिंगाखौ मोजां मोनग्रा आरो मिथिंगानि सायाव सोनारनानै फिथाइ-सामथाइ जानानै जिउ खांदोंमोन। आबाद मावनाय खामानिया जागायनाय लोगो लोगो बिसोरनि गासै खामानि, आसार खान्थिफोरा आबाद बिथायारि जाबोयो। बेबादिनो फोरबो फालिथाइफोरा आबाद एबा मिथिंगा मिरुवारि जायो। बिसोरनि गाहाइ फोरबो फालिथाइफोरा गाहायाव होनायबादि-

**करम फोरबो :** भाद्र दाननि एकादशि सानखालि बे फोरबोखौ फालिनाय जायो। ‘करम’ आ गुबैयै आबाद बिथायारि फोरबो। करम (Nauclea Parvifolia) आ रोखोमसे बिफां। गामिनि आइजोफोरा जर’खायै सिख्लाफोरा हाग्रानिफ्राय करम बिफांखौ दाननानै लाबोना गामिनि सिथ्लायवा गायो। गामिनि राइजोफोरा मोसा मोसा करम मोदाइखौ फुजियो। आदिबासीफोरनि पाहाना (पुर’हित)आ फुजानि उनाव करमनि सल’बाथा बुडो, जेराव आदिबासीफोरनि दोरोडारि नेम खान्थिनि बाश्रा हाबनानै थायो। करम फोरबोआ लोगोथि, खौसेथि, मोजां आबाद आरो उनाव हाबा जानो थियारि जानाय सिख्लाफोरनि थाखाय मोनसे ब्रतनि सम होनानै राइजोआ आबाद फोथारनि मोजां जानायजों लोगोसे गोबां दिहुननो हानायनि मिजिं खालामना मोदाइनि सेराव आर’ज गाबो। बेनि अनगायैबो आदिबासीफोरनि गेजेराव टुचप, बाहा परब (चारहुल), चहराइ, मागे, फाण्डुवा बायदि बायदि फोरबो खुडो। करम, भमर, डमकच, जादुर, लाइचुवा आरि मेथाइ खननानै-मोसानानै आदिबासीफोरा फोरबो-फोरखौ फालियो।

**आदिबासी राव :** आदिबासी रावफोरा द्राबिड़ आरो अष्ट्रीक हान्जायारि राव। बिदिन्थि बादियै उरांफोरनि कुडुष रावा द्राबिड़ हान्जानि। बेबादिनो मुण्डा आरो सावथालफोरनि रावा अष्ट्रीक हान्जानि क’लारीयान राव। ‘खाछिया’फोरनि राव आरो खायफा आसार खान्थिनि गोरोबनायखौ दिन्थियो। बिसोर गावसोरनि गेजेराव गोरोबनाय राव आदिबासीया (चादरी) खोथा रायज्जायो। आदिबासी कुडुष (उरां) मुण्डा, है, सावथाल सावरा, कुड़माली, खारिया बायदि बायदि हारिहा गावबा गाव राव दं। आदिबासीफोरा गावनि रावफोरखौ जौगाहोनो थाखाय बिसोरनि गेजेराव जेरै कुडुष साहित्य सभा, सावथाली साहित्य सभा, मण्डारी साहित्य सभा, खारिया महा सभा, कड़माली साहित्य सभा बायदि बायदिया जाखांदों।

**आदिबासी समाजनि जर’खा सुबुंफोर :**

**ख्रीष्टचन मुण्डा :** भारतनि उदांसि सोमावसारनायाव 1916 मायथाइयावनो बिथाडा मुंख्लं जायो। तेजपुर खाथिनि फुलबारी साहा बागानाव ख्रीष्टचन मुण्डाया आसामनि आबादारि आरो खामानि मावग्राफोरनि बिग्राइनायखौ 1910-1916 मायथाइयाव जागायदोंमोन (Tea Garden Labours of North

East India– S. Karotemprel B. Dutta Roy P-166-167)। ब्रिटिछ सरकारा खीष्टचन मुण्डाखौ फुलबारी साहा बागाननि राइजोआरि जायगायाव फासि होयो जाहाथे फिन रावबो मावग्राफोरा ब्रिटिछ सरकारनि हेंथायै गसंख्रानो साहस खालामा। नाथाइ बे जाथाइनि उनाव साहा बागानफोराव उदांसि सोमावसारनाया गोसारसिनो। हेलेम, सनाजुलि, कछरी गामि बायदि साहा बागानफोराव गोख्रों सोमावसारनाया सोलियो (Planter Raj to Swaraj– A. Guha)। मालति अरां (मांग्रीमेम), दयाल पानिका, बाकुड़ सावरा मोनबादि गोबां आदिबासीया उदांसि सोमावसारनायाव मुंख्लं जायो।

**जाष्टिन लाक्रा :** सदौ आदिबासी फरायसा आफादिनि जोनोमहोगिरि जाष्टिन लाक्रानि जोनोमा जादोंमोन चराइबिलनि कचुकाता गामियाव 1970 मायथाइनि 2 अक्ट'बरखालि। 1996 मायथाइयाव शिवलं कलेजाव हारियारि दाडाबाजि जादोंमोन आरो 2 लाखफ्राम मानसिया बादायाव थायो। बिथाडा सोलोंथाइ नागारनानै राइजोनि सिबिनाय खामानियाव ओंखारो। 2 जुलाइ खालारखालि जाष्टिन लाक्राया लोगोफोरजों (जसेप मिन्ज', ष्टिफान एक्का, बस्क चेरमाक', मांरा अरां आरो उइलफ्रेड टप्प) आरि लखिमपुरनि जुनुबस्टि आदिबासी फरायसालियाव ज'जायो आरो 1996 मायथाइनि 2 जुलाइयाव सदौ आदिबासी फरायसा आफादखौ दायो। राइजोनि रैखाथि आरो गोजोन लाबोनाया आदिबासीफोरनि गाहाइ थांखि। जोनोम मोनखांनायनि उनाव आदिबासी फरायसा आफादा गुबुन गुबुन सुबुं हान्जानि आफादफोरजों गोजोननि मेल खुंनानै गोजोन-आबुथि लाबोनो नाजायो। उनाव आदिबासी फरायसा आफादा आदिबासीफोरखौ जनजाति खालामनाय आरो साहा मजदुरफोरनि मजुरा बांहोनायखौ गाहाइ दाबी महरै लानानै गोलाउ सम सोमावसारबोदों। बे सोमावसारनाया आदिबासी समाजाव ज'रखा गोहोम खोख्लैदों। सोमावसारनायाव आन्दरियाच माण्डि, हेमलाल सना, बस्क चेरमाक', जितेन ताति मोना गासै सा 18 बीर आदिबासीया गावनि जिउखौ बावो। 2015 मायथाइनि 13 जुलाइखालि गेदेमा आदिबासी दैदेनगिरि जाष्टिन लाक्राया जिउ नागारो आरो बिथांनो उनाव आदिबासिफोरनि "हारिनि बिफा" होनना बिमुं होनाय जायो।

**सोंथि :**

1. आदिबासीफोरनि सोमोन्दै सुंद'थै लिर।
2. आदिबासीफोरनि राव आरो फोरबो फालिथाइनि सोमोन्दै लिर।
3. लिरसुंथाइ लिर-
  - (क) खीष्टयन मुण्डा
  - (ख) जाष्टिन लाक्रा

